




Early European Books, Copyright © 2011 ProQuest LLC.
Images reproduced by courtesy of the Biblioteca Nazionale Centrale di Firenze.
CfMAGL 1.7.82/a



Early European Books, Copyright © 2011 ProQuest LLC.
Images reproduced by courtesy of the Biblioteca Nazionale Centrale di Firenze.
CFMAGL 1.7.82/a



Early European Books, Copyright © 2011 ProQuest LLC.
Images reproduced by courtesy of the Biblioteca Nazionale Centrale di Firenze.
CFMAGL 1.7.82/4

107

1.7.82

VIII
LIPS.

IVSTI LIPSI
EPISTOLARVM
SELECTARVM
III. CENTVRIÆ:

E quibus TERTIA nunc primùm
in lucem emissa.



ANTVERPIÆ,
EX OFFICINA PLANTINIANA,
Apud Ioannem Moretum.

CLD. MDCL.

Cum Privilegiis Casareo & Regio.

AD PRÆTOREM,
CONSVLES,
ET
SENATVM REIP.
VLTRAIECTINÆ.

Viri Nobiles, Viri Prudentes,



PISTOLAS meas aliquot, quas
his diebus collegi, & errantes
redegì sub vnum huius Centu-
riæ velut signum, visum mihi
in lucem dare: idque sub tutelâ
nominis vestri. Causam habui
duplicem. Prior est, quia lucem aliquam tenui
huic & per se obscuræ scriptioni conciliare
conatus sum à luce vestrâ: quorum antiqua,
potens, & amœna vrbs splendet inter Belgicę
primas: vosque in eâ, per prudentiam & vir-
tutem. Causa altera. quòd beniuolentia ve-
stra huc me impellit & comitas, quâ publicè
ac priuatim insigni semper in me vsi. Omitto
amicitias, quæ mihi cum plerisque vestrorum
cuium artæ: sed pedem nunquam in urbem
vestram posui, quin clara mihi signa eximij
cuiusdam adfectus & cultus. Cum honore &
* 2 amore.

amore venientem excepistis, hærentem habuistis, abeuntem dimisistis. Quo meo merito? nullo, fateor: sed solo impulsu beneficæ & humanæ naturæ. quæ velut fato aut Genio, inter adsitas omnes gentes, propriè est vestra. Quod eo maius vestrum beneficium; quia tam munes fuistis in re & verbis hætenus immunem. Id ne vltra sim, verborum ecce saltem & scripti munus hoc capite: Epistolas inquam meas, nouum & veterem ingenij nostri partum. nouum dispositu, compositu veterem. sed partum profectò infirmum, informem: & quem per diuturni hoc morbi tædium nec fingere nec polire mihi mēs, quemque abiecisse veriùs videor quàm peperisse. Vos ei tutores, imò patres: tangite, tollite expositam hanc prolem: & in primis auctoritatis vestræ scuto defendite contra maligni liuoris dentem. Ita deus vos & vestram urbem ciuiliū hac bellorum flammâ aliquando eripiat, quâ vndique nunc cincti. Lugd. Bat. Id. Nouemb.

LE

LECTOREM MEVM

SALVERE IVBEO.



EN tibi Epistolas nostras, mi Lector, sed in parte. & eam ipsam partem, non mentior, trepidè emissi, & quodammodo volens nolens. Volentem me sanè volentia tua facit. cuius fauoris aura suauiter adhuc mihi spirat. nolentem, argumentum. Primum, quia id tenue: nec famæ ab eo magna spes. Epistolas enim meras damus: diales nostras nugas, iocos, lusus, & cum amicis garritus. Quid serium hâc magno opere, aut cultum? quin epistolæ esse desinunt, si nimis tales. Ordinem aut dilectum in materiâ, curam aut limam in stilo quispiam exspectat? à me frustrâ: quia in blandiente illâ hæresi ego, vt epistolas sub manu nasci debere censeam & sub acumine ipso stili. Atque adeò (dicam verè) bis non scribo, bis vix eas lego. Profluunt mihi ex liquido quodam canali aperti pectoris: & vt animus aut corpus meum est cum scribo, ita illæ. Victor meus solitus dicere, indices ei semper valetudinis nostræ meas litteras, etiam cum non indices. Nec falsò. Languent enim illæ, excitantur, dolent, gaudent, calent, frigent mecum. Affectus animi corporisq; mei in hâc tabellâ. Quod si quædam in his seriæ: tamen pauca: & præponderat, vereor, leuiorum multitudo. Nam nullas esse falsò dixerim. quia interdum intercurrent totæ & ex professo tales, philologæ aut philosophæ, & salubrium aut docentium præceptorum plenæ. Consulimus, monemus, cauemus; apud iuuentutem præsertim: quam cura mihi semper ad vtilia, non solùm ad amœna ducere, & animo ac robore ponere supra hunc vulgum. Quas ipsas si paullò diligentius scripsi, & velut percolui digniori quadam sermonis veste: nihil, credo, peccaui. quia hoc quoque sine curâ meâ magnâ, sine ambitu. cuius manus nimisquàm facile mentem sequitur: & cum impleuit eam materies grandior, chartam mihi vltro verba. Famam igitur siue laudem sperem hâc haud magnam. Atque adeò infamiam quâ nō timeam, cum oculos siue ad æuum hoc flexi, siue ad rem ipsam? illud quidem primum ingerere calumnias, hanc natam accipere toto sinu. Detegimur

murenim in epistolis, & subiicimur oculis panè nudi. Nosse me, aut alium vis? epistolas lege, quæ depingunt. Ingenij mei, adfectus, iudicij, imò & vitæ non vana imago istic. Alibi fucus & simulatio habitat: hîc candor, hîc veritas, & non nisi natiuus ille color. Quî simulet in subitâ illâ & sæpe calidâ scriptione animus? non potest. Quî apud amicum & se alterum? non vult, non debet. Reuera enim deprehenditur aut emicat, priusquam se componat. nec velum ei ducere succurrit, quo tam citò, & apud tales, se tegat. Protrahit igitur hominem maximè hæc scriptio: & ideo iudiciis calumniisq; exponit. De te tuisq; memoras? quod carpant reperient, vt vanum, vt iactabundum. De aliis? hîc quoque, quod carpant. Illi in laudes nimis pronus videbere, alij in reprehensiones: huic ad superbiam vergere, alteri in adulationem proclinare. Denique in publicâ & ciuili re, sub cineribus qui occulti ignes? Pietatis mihi rem alibi tange: apud hanc aut illam partem peristi. Reges aut status: cadauer es & funus. Atqui hæc in epistolas sæpe intercurrant necesse est, aut ne currant illæ. In quibus omnibus etsi nos (quantum prudentia quidem mea tulit) temperauimus: tamen vereor vt temperet sibi à me quoque intemperies quorundam. Voces iam audio, & præuideo. quid ad me? ego à verâ culpâ tantum abesse me scio, quantum carptores illos à verâ laude. Improuidè fortassè alibi aliquid dictum emissitij illi oculi reperiant: at nihil impiè aut malignè. Hoc testor, hoc profiteor. mali iuris, mali moris ille, quisquis aliam mentem mihi affinget ex suâ mente. Nec hoc te lædat, quòd vnum aut alterum alibi læsi. Apertè, fateor, nec tamen nominatim. Se ille quicumque est prius prodat & accuset necessum est, quàm me. Cur non liceat? Pestes & vitia hæc hominum detegi, ex vsu hominum est: etsi non ipsos. Peti se illi sentiant, alij suspicentur. In hoc tamen quoque, sicut in ceteris, siquid peccatum: post emendabitur. quia nunc vnicum hunc librum: velut in gustum damus, & periculi faciendî causâ. Emitto inquam hanc Centuriam, aut præmitto veriùs ex Epistolari meâ legione, tanquam ad incerta itinerum exploranda. & si nulli aut pauci hostes; fidenter omnes copias producam in hunc Famæ apertum campum. sin laquei & insidia, quiescam, & tenebo me iure in fidis silentij castris. Tu ô bone, faue, ama, fauentem, amantem.

INDEX

INDEX EPISTOLARVM CENTVRIÆ I.

A BRAHAMO Ortelio epi-
stola liij.
Adolpho Metkercho xciiij.
Alexandro Ratloni xij, xxxij.
Amico cuidam lxij.
Andrea Dudithio xcij.
Andrea Schotto xlv.
Augurio Gisleno Busbequio Casa-
ris Legato xix, lxij.

B.

Bonauentura Vulcanio lxx.

C.

Carolo Clusio xlviij, xcj.
Consulibus & Senatui Antuer-
piensi lvj.
Cornelio Prunio lix.
Cornelio Valerio j.

D.

Dominico Lampsonio lx.

E.

Errico Memmio lxxxviij.
Euerardo Pollioni xvj,
xlvi, lxxiix.

F.

Florentio Thinnio xc.
Francisco Bensio liij.

Francisco Modio xxviij.
Francisco Raphelengio xxxv.
Francisco Raphelengio Francisci
Filio lxxviij, lxxxij.

G.

Gabrieli Roelandio xlvij.
Gaspari Schuermanno xliij.
Georgio Benedetti lxxiiij.
Georgio Ratallero Præsidi Ultra-
iect. xxv.

Gerarto Falkenburgio iij.
Godschalco Steevvechio xlv.
Gulielmo Breugelio viij.
Gulielmo Camdeno xxiiij.

H.

Hadriano Vander-Burchio lvij.
Henrico Ranzouio lxxxviij.
Henrico VViltio lv, xcviij.
Hieron. Berchemio xxj.

I.

Iacobo Cuiacio lxviij, lxxxvj.
Iano Douſe iij, xv, xxiij,
lxxj, xcvi.

Iano Grotio xviij.
Iano Grutero xciiij.
Iano Gulielmio Lubecensi xj,

xxxix, lxviij, lxxiiij.
Iano Hanteno l.
Iano

Iano Lernutio x, xiiij, xx, xxxiiij,
xl, lj, lxxxvj.

Ioachimo Camerario lxxv.

Iohanni Ionstono Scoto xxxviij.

Iohanni Moerentorsio lxxij.

Iohanni Rotario xcix.

Iohanni Sambuco xxxvj.

Iohanni Viuiano xlix.

Iosepho Scaligero Iul. F. vj.

Iosia Mercero xxxij.

E.

Eauino Torrentio lxiiij, xcviij.

Lernutio & Gifelino xxviij.

M.

Marco Antonio liij.

M. Valerio Collino xcvi.

Martino Antonio Delrio xiiij.

Martino Lydio lviiij, lxix, lxxxix.

N.

Nicolao Biesio Cesareo Medico
xxx.

P.

Paulo Busio lxxxix.

Paulo Melisso lxxxiiij.

Petro Egmondo c.

Petro Pythæo viij.

Philippo Lanoyo Nobiliss. iuueni
xxij.

R.

R. Pinæo lxxxv.

Rolando Vincelio lxxx.

S.

Stephano Pighio v.

T.

Theobaldo Teelingio xxix.

Theodoro Cantero xliij, lxxxiiij.

Theodoro Leervio xix, xxviij.

xxxj, xxxviij, xliij, lxj, lxviij.

V.

Victori Gifelino. ij, ix, lxx, lxxxj.

IVSTI LIPSI
EPISTOLARVM
CENTVRIA I.

EPISTOLA I.

Louanium.

CORNELIO VALERIO S. D.



ITAE genus, quod à reditu elegeram, & indicaui præsens tibi mi Valeri & probaui. quietum istud, modestum, latens, remotum ab ambitu & à curis. Et iam ingressus serior eram. cum (ecce subitam vim fati) vereor vt subitò id mutem. Nam tempora quæ impendeant, vides; & quæ tela improuisò exorsa ciuiliū bellorum. quæ si perterritur, & nisi stamen eius ac subtemen pax aliqua abrumpat, stare mihi diutius non licitum in hoc loco. Quomodo enim? exposito cottidie non rapinis solum militum, sed iniuriis. quorum quàm libera licentia sit, nosti. Heu vitæ legem! cui annexum, angere & dolere in omni sorte. Itaque agellos istos mente iam deferro, & specto Grudios vestros. non planè inuitus, fateor, cum te cogito & Canterum nostrum: quem tamen audio & doleo in lento esse morbo. Quid autem? tabes ea est & marcor? an quis alius languor? De illa, visus mihi dicere medicus Gemma. Quod Musæ tamen prohibeant, & diurnare paullò magis in terris velint Parnassium hunc alumnum. Sed causa morbi quæ? studia, an curæ?

ait Tragicus. De studiis magis credo: quæ calidè ille nimis habuit & intentè. Numquam vidi tam indefessum ingenium, & laboris huius Musici aut appetens magis aut ferens. Semper ille in libris, chartis; noctu, diu, assiduus, accubans: nec dies solum omnes appensi & numerati ad hanc curam, sed horæ. quas singulas ad clepsydram diuidere, & attribuire ille solitus huic le-

A

ctioni

* Morbus enim pro-ducere & cura solèt.

* Epist. v.
hb. 111.

2

I. LIPSI EPIST.

ctioni aut huic scriptioni. De Plinio suo, * scribit & iactat alter Plinius? atqui torpor ille hominis & desidia mera, si cum hac assiduitate comparetur. Nos, mi Valeri, remissiores: & si per hanc viam mors, sum immortalis. Vis scire quàm ignauiter cesserem? Tot protela admonitionum tuarum nondum effecere, ut vel manum adinouerim Commentario Corneliano. Ita subiit me ignauiae huius dulcedo: & quod ille ipse Cornelius ait; *inui- sam primò desidiam, nunc amo*. Murabo fortasse cum loco. Tuus certe non sermo solum excitabit me, sed vultus, quem iure vereor & veneror, ductorem doctoremq. meum in meliore hoc animi cultu. Vale. In Iscano meo. a. d. xij. Kal. Decemb. ∞. Id. Lxxv.

EPISTOLA II.

Brugas.

VICTORI GISELINO S. D.

RA R A S à te litteras, mi Victor, accipio: sed certè caras, stil-
lahtes, imero melle & amore. Vellem vtrumque. ut & di-
ligentiam tuam amare possem, & adfectum. At principium
tuum vanum de abitu meo Coloniam. Vnde hoc autem? ab
amico aliquo, an à famâ? Non enim à me certè, aut meis litteris:
nec vnquam mihi fuit in mentem. Apage illud scelus (ita loquor)
ut pedem hac prouinciâ efferam, non visis vobis! Et sanè paul-
lùm modò hic morbus perseuerasset, veniebam ad te non solum
corporis sed animi medicum mei. Nunc, cum deo fauente, reua-
lui. & gallum debeo Æsculapio tuo. O diecula illa, quam vnà
mecum exoptas, quando exorire? quando te & Lernutium in
Iscano isto complectar & fruar? quando in pergulâ illâ ad Lunæ
lumen garriemus, viuemus, imò & bibemus? DI amicitiae præ-
sides, repræsentate mihi hoc votum. Festino enim, quia ut cogi
nubes has video, breui dabunt tempestatem. Circa nos milita-
res globi: qui vereor non ut interpellent, sed pellant. O locum
hunc beatum, absque metu isto sit! A Samboco herè ad me litte-
ræ, sanè quàm amicæ. Humanissimum virum coram repperi, non
pro opinione mea (tecum hoc sit) litteratum. Ita in his quoque
rebus ludit & illudit illud siue Fatum siue Fortuna: & quidam
merentur famam, quidam habent. Inter illos in eadem Germa-
niâ Andream Ellingerum noui, deus bone, virum magnum &
penitus

penitus doctum! at ille panè ignotus latebat & fallebat inter suos. Ita fatua sæpe huius æui iudicia, aut iniqua. Et nos quid speremus, aut laboremus? Dormiamus potius, aut cucurbitas pingamus. Quorum alterum ego quidem iam facio. Scripsi enim hæc ipsa ad lychnum, labente manu, premente somno. In Iscano meo. III. Non. Octob. ∞. IO. LXXVI.

EPISTOLA III.

Lugdunum Bat.

IANO DOVSAE *amicissimam salutem mitto.*

EC QUID tinnunt tibi aures, mi Doufa? ita multus non in sermonibus meis solū es, sed in litteris ad amicos. Vel nunc cū Rogerio nostro, quā multa, quā suavis, de te fabulatio! Adest enim mihi, ne nescias, hoc ipso tēpore, & quidem in mensā. Ita dico, in mensā: & in eā mihi hæc scripta. Abituriebat enim ille. nec fas certè sine meā manu: panè scripseram animo, quem ille à me exsulem auferet ad te secum. Non sum ex iis qui

Composita dicta pectore euoluunt suo;

Quæ cū componas, dicta factis discrepant:

ut ait Attius. audi, Doufa, veram vocem. mens omnis & affectus apud te est, ex quo legi suauissimos & felicissimi Genij tuos versus. O te magnum, & mei stomachi vatem! Non Musæ ipsæ Lipsium magis ament, quā ille te. Itaque non vltra fero desiderium. &, nisi res nostræ turbidè porro turbauerint, cis paucos dies excurram: & vsurpabo istis oculis, quem nunc auribus tantum & linguā. De Gisellino nostro & Lernutio, omnia recta. nisi hoc tamen, quod vterque nuper in vincla coniectus (percutio te? pone metum.) nuptiarum. Etiam ego in hoc carcere. si vir es, veni & Iunones nostras vide. Salue mellitissime. Louanij, Nonis Aprilibus ∞. IO. LXXVII.

EPISTOLA IV.

Vbios.

GERARTO FALKENBURGIO S. D.

MVNVS vestrum accepi egregium, mi Falkenburgij, imò regium. Et curnon, vestrum? ego scio Redigerum caput huic dono fuisse, te pedem. nec tam beniuolo conciliatori minus

A 2

debere

debere me fateor, quàm datori. Animus enim est, quem in his talibus specto: nec pretium iis vnquam à se facio, sed ab adfectu. qui in te certè maior. Aurum autem ipsum, quid nisi splendens quædam terra & nitidius paullò lutum? Iudicium tuum de libellis nostris mihi gratum. sed vtinam iudicium! siue tamen amor, is quoque gratus, quia magnus: nec aliter vnquam tam rectam certamque mentem cogeret in errorem. De lapsu memoriæ quod submones, verum est: corrigam libens. Quod autem his vt ad Pulmanum litteris iteras & pungis de seruitute: audi quæso liberè & diffusius paullò meum sensum. Ego qui status patriæ huius sit, nec ignoro mi Falkenburgi, nec nego. (aspera in eo multa fateor, intenta, rigida, præter mores, præterque leges.) sed hoc quoque scio, qui meus. Apud me ecce & in rusculo meo viuo: cur angar, quid Corta aliquis aut Carus moliantur in aulâ? Vim aliis inferunt? nondum mihi. opes delibant aut diripiunt? per eunt eadem absenti. Ad impium aliquid adigunt? numquam. Mentem enim istam liberam quis tyrannus mihi artat? internam sententiam quis cogit? cultum metumque diuinum è pectore isto quis eripit? Et si velint: ecce sacram ancoram,

* Quis ser-
uus est, pe-
rire modo
qui non ti-
met?

* Τις ἐστὶ δούλος τῆ θανάτου ἀφροντὸς ὄν;

Hoc enim firmum aduersus externa omnia telum, non timere propter quod timentur. Sic Socrates adfectus, qui Athenas non deseruit, infestas non vno sed triginta tyrannis: sic Seneca, qui sub Nerone, imò cum Nerone vixit: sic Heluidius, sic Thraseas, & magna illa sapientum manus. Me cur in alia vocas? Animo diffidis, aut annis? noli. Ego enim mi Falkenburgi in iuuenili hoc pectore sic adfectus, vt deum, virtutem, & me constanter colam: non aduler imperantibus, sed nec irrite: & cum Cornelia-
no illo * Lepido, *inter abruptam contumaciam & deforme obsequium, pergam iter ambitione ac periculis vacuum.* Periculis inquam, quorum nō ego (humanitus quantum licet) occasio aut causa. Quod si aliunde & ab externâ vi ingruant, quomodo aut vbi excludam? Non Vbij vestri ab iis me liberent, non liberæ omnes Imperij vrbes. Sed reuerâ (dicendum est) peccamus multi in hanc partem. prouocamus pericula, & laceessimus sæpe imperantes vanâ quadam specie aut superbæ libertatis, aut incautæ pietatis. Modestia autem est quæ Deo placita, & his qui dij in terris. Re-

* De cuius
causâ pru-
dentiâ apud
Tacitum,
Annal. iv.

ges vt

ges vt fulmina esse didici: dura frangere, mollibus plerumque illæsis. Itaque hæc tempora, vt nimbium, habeo: donec desæuerint, latito & me tego. Nec nimium tamē de sæuitiâ illorum queror: quia scio exoriri posse deteriora. Rusticulus ille mihi in mente. qui diu de Antigono rege viuo questus, cū obiisset successore peiore: terram laboriosè inuertens, & votorum iam pænitens, *Antigonum*, inquit, *refodio*. Faxit & ille deus, vt hîc turbæ nostræ stent, neu breui procellæ ingruant sæuiores. Sed hæc magis seria fortasse quàm pro epistolâ. occasio tamen iis ex iteratâ tuâ accusatiunculâ: & gaudebo, si consilij mei ratio proba iam apud te probum. Talem enim non minùs repperi, quàm amicum mihi. qui vt esse perseueres, rogo. Ad Redigerum ipsum scripsi scorsum. In Iscano meo, Kalend. Sextilibus. Anno ∞. IO. LXXV.

EPISTOLA V.

Viennam.

STEPHANO PIGHIO.

FIDEM meam culpas? audi. Prandium mihi hodie apud heroëm nostrum (non enim virum dixerim) Busbequium. post prandium longiusculæ etiam fabulæ (sed de litteris) vt apud illum solet. Hæc res diem mihi abstulit, & me tibi. Ignosce, & iam cognosce. Nam de Prætorum lictoribus, lictulæ nescio quid adfero ad te nostrum Prætorem. Vulgus & auctoritas veterum sex eos facit. loca & testes tibi noti. At duos fuisse tantum, lex vetus mihi ingerit, apud Censorinum ista. *Prætor urbanus qui nunc est, quique posthac fuerit, duos lictores apud se habeto. vsque supremam inter ciues dicito.* Cauillari poteram & effugere, tanquam minimum duos lictores lex esse vellet; de pluribus non vetaret. sed ligauit iterum meus Plautus: apud quem in Epidico clarus ab hac reiocus,

At enim vnum à Praturâ tuâ Epidice abest. EP. quidnam? TH. scies.

Lictores duo, duo viminei fasces virgarum.

Inter ornamenta ecce Prætoria disertim duos lictores numerat, duosque fasces. Hac reprehensione, huc ibam: vt censerem Plauti & veteri illo æuo haud plus duos sanè fuisse, at numerum postea auxisse, splendoris maioris causâ. Sed hoc quoque diuerticulum interclusit mihi importunè tuus Valerius: in quo lib. I.

A 3

cap. I.

cap. I. Iego de Furio Bibaculo : *Prator sex licitoribus precedentiibus arma ancilia tulit.* quod factum notæ tuæ Chronicæ referunt in annum vr̄bis D X V I : id est, ante adultum Plautinum ævum. An Pratori vr̄bano & peregrino si fortè bini tantum : aliis extra vr̄bem, & ad auctoritatem apud subditos, plures? Iuua, iuua: angor ego & resisto. Præmium tibi operæ, cænula cras apud me in diuersorio noto. sed eâ lege, vt ambulatiuncula præcedat ad filuulam nostram Querquetulanam. Salue à tuo Lipsio, & dormi. Viennæ, Idibus Iuniis ∞. IO. LXXII.

EPISTOLA VI.

In Pictones.

IOSEPHO SCALIGERO IULI F.

S. & amorem nuntio:

QVI verè erga te magnus. Nam iam antea, mi Scaliger, cum veneratione quadam amabam te paternæ & tuæ virtutis causâ : nunc magis, cum te quoque video conspirare mecum in hoc adfectu. Nam, quâ de me erant, litteras tuas Plantinus mihi legit : & amicas valdè, & honestas. Atque in amore quidem tuo, gaudeo: in iudicio, triumpho. quia (verè, & ex animo) si quisquam est proborum, cui probari me meaquæ velim: is tu es, inter probissimos primus. Nam hanc vulgum, morus ego si morer. Epistolicas his diebus emisi: rude opus, nec istarum aurium. Vide tamen : & agnosce nos in litteris multa velle, te posse. De Plauto quod item ad Plantinum : apage. egone ante te? Iamdiu libraui hoc onus, cui impar ista ceruix. Tu hic vnus Hercules siue Atlas nobis, & fulcire debes comicum istud cælum. De Nonio etiam cogitare te audimus. verone & serio? item de Manilio. sed litteræ tuæ nihil tale nunciabant. Credimus tamen: quia hæc omnia per iocum & ludum te posse scimus, in quibz alij sudant. Aquila in nubibus, quod Græci dicunt, verè tu es : vides, inò peruides omnia; & quidquid venaris, capis. Sed desino huiusmodi sermonum: quia reuera

* *Leue donum, sapientis pro multis laboribus dicere laudes.*

* *Κεφα δόσις ἀνδρὶ σοφῷ*

Ἀντὶ μόχθων πάντοδ' ἀπὸν ἔπος ἐπείν ἀγαθόν.

Tu salue, & me ama, qui te æternum. Louanij, a. d. v. i. Calendarum Decembrium, cIo. IO. LXXVI.

EPI-

EPISTOLA VII.

Lutetiam.

PETRO PYTHŒO IC. S. D.

P LANTINO nostro elapso ex Troiano casu, id est incendio suæ vrbis, & ad vos abeunte: iure mihi amplectenda occasio fuit, mi Pythœe, compellendi tui. quem iamdiu (verè tibi, & in os dicam) inter paucos Gallos amo & admiror. Ignotum, fateor: sed à vultu, non ab animo. quem politissimum exosculatus sum sæpe in tuis scriptis. Nec blanditiæ apud te sunt. testabuntur id publicè Epistolicae meæ, per hunc tumultum ausæ adspicere lucem: in quibus, si erit tanti, reperies cum beniuolentiâ memoriam tui. Te pariter quæso, vti hunc eundem adfectum erga me aut sumas, aut retineas: & , vt planè pleneque me bees, mutuis eum litteris foueas atq. alas. Litteris, non rerum grauium, aut de arcanis regum (quid ad me ista? sed quæ alucinentur liberè & vagè per studia nostra: quid tu, quid Scaliger, quid alij vestri Galli meditètur, eiusdem nobiscum Musæ. Vale, & me ama. quod valdè facturum te scio, si scias quàm valdè ego te. Fratri tuo Francisco, lectissimi ingenij iuueni, à me salutem dicito. Louanij xvi. Kal. Februar. ∞. Io. LXXVII.

EPISTOLA VIII.

Bruxellam.

GVLIELMO BREVGELIO REGIO CONSILIARIO,
cognato meo S. D.

MAGNUM, sed amicum mihi dissidium tecum est, de agro deque vrbe. Tu istam præfers, ego illum: & rationes mihi, nisi fallor, magis firmæ. Quas quoniam herè inter dissidendum leuiter libauimus, vísne hac epistolâ (otium enim & libentia mihi) promam accuratiùs & diducam tibi per partes? Scio velle. aurium tantum, vt sic dicam, vacuas ædes mihi aperi: & admitte, fodes, peregrinantem veritatem. Agrum & in eo cultum, meliorem Vrbe esse aio, ad Sapientiam, ad Mores, ad Voluptatem: addo & Fructum. De Sapientiâ: non negabis, quin illuc aptior ad eam animus, vbi is liberior & magis sui iuris. talis autem in agris est. Opida visè & adi: non effugies, quin vnà tumultus, procellas, turbas. Circumstrepent enim te subitò res hominesque

nesque: & negotium tibi non solum tua negotia facient, sed aliena. Vt difficile est in conuiuio lauto & opiparo solum esse siccum & sobrium: sic vacuum, inter tot occupatos. Ille ad sponsonem te trahet & ad forum: ad nuptias alius & ad templum. In ipsâ viâ clamores alibi & lites: pugna nonnullibi & arma, & mox iudex, lictor, carcer. Domum ipsam tuam cum veneris: ne in secretum venisse te cense aut penetrale. Irrumpet ecce salutatores, inuisores, & nomine amicorum quidam fabulas inò epulas captantes. Hos nullum linen submouet, nullū velum: & per omnes rimas inuolant importunæ illæ muscæ. Inter ista & inter istos, quis libris liber locus? quis cogitationibus? sine quibus an vlla legitima ad Sapientiam exercitio aut via sit, haud cerno. Et tamen fac te felicem aut fortem: otium aliquod in ipsâ vrbe diu luctatus tibi vindices: nego id liberum, firmum, aut aptum animo vegetando. Spernit enim naturâ suâ includi cælestis ille ignis, & aërem amat ac campos. Vt generosas feras cauea domat & frangit: sic altas mentes vrbicus ille carcer. Equum ad cursum apertus & liber circus prouocat: animum ad studia, vagans vacansque aura. Siluam illam viridem videt? hinc carmen auet aut hymnum deo pangere. Horri illam purpuram? hinc cum libellis suis decumbere. Aquæ illud murmur? ad eam altiori cogitatione abiici. Et nocte ipsâ aut sub eam, pictum illud patensque cælum eum capiet: & inter tot stellas errantes, aut inerrantes, a curis terrisq. erro, mente scandet super illas. Adde quod hinc altum securumque otium: nemo qui appellet, aut interpellet: & amicissima semper studiis, solitudo & quies. Vides igitur quæ in hac parte ager ante urbem habeat: nec vanè à Columellâ scriptum, *Vitam rusticam proximam & quasi consanguineam sapientiæ esse*. Quod si nunc ad Vitam me vocas & ad Mores: bonâ fide, vtrubi, te quoque iudice, illa innocentior, & hi puriores? veritas tibi exprimet quod in agris. Oculos paullisper conice in magna illa & cōmerciis crebra opida: mentior, nisi ambigas cœtus illic hominum, an confluges vitiorum. Adfert enim seorsum quisque suas culpas: quas mixti vulgant, & velut contagio, tradunt inuicem capiuntque morbos animorum. Quin vt flumina per se dulcia, cum in mare venerint, salescunt: sic homines haud mali, ex agris in urbem redacti, tactu inquinantur & mixtione. Illic enim ambitio, auaritia, libido propriè habitant:

habitant: & fons omnium vitiorum, depudere. cui origo, non negabis, ex crebro illo inter se adspectu occurſuque. Itaque prudentes olim legiſſatores & qui ſemina iecere boni ſtatus, ciues ſuos plurimum ab vrbe & conuentibus abductos, habere voluerunt in agris: quos ad probitatem, modeſtitam, robur, gymnaſium cenſuere & palæſtram. Romulus ille æterni auctor imperij, in duas claſſes cum ciuem diuiſiſſet, Seruos ac Liberos: illis duo tantum ſtudia Militiæ & Agri dedit; illis artes reliquas, quæ ad Mercurium & ad lucrum. Ita enim eſt mercatura & quidquid artium ad opes ducit, ducit ad vitia: nec animum ſolum emollit & effæminat (verè Salluſtio dictum) ſed corpus. Quis vires & viros vnquam in opidis quæſiuit, aut inuenit? adeo vetus illud verum in omni gente & æuo eſt, *Optimum militem legi ex agris*. Parthi olim belli potentes: ſed paſſi in agris. Scythæ: ſed in tuguriis oberrantes. Germani: ſed priuſquam vrbes coluiſſent. Turcæ hodie: ſed minimum dediti in amœnitatibus opidorum. Quin illud ipſum Geniſerorum agmen, iure terror orbis, non ex agris ſolum, ſed pænè dicam haris collectum, & mapalibus paſtorum. Nam Romanos tibi quid ingeram? Curios & Fabricios noſti ſerentes, occantes: Quinctios arantes, & Dictaturam induentes: & vno verbo, non milites ſolum ab agris, ſed duces. De Moribus ergo vides. qui ſi vſquam etiam hodie priſci integrique quærendi ſint, veſtigia reperiſ in agris. vbi apud ſequiſque: & ideo pudor, innocentia, ſimplicitas manet; & vita malarum fraudium artiumque expers. Sed quid poſſum in hac parte magis verè, magis ampliter dicere, quàm Hippolytus ille apud Senecam? quem, quæſo te, audi.

Non alia magis eſt libera & vitio carens

Ritusque melius vita que priſcos colat,

Quàm que relictis mœnibus campos amat.

Non illum auaræ mentis inflamat furor,

Non aura populi, & vulgus inſidum bonis,

Non peſtilens inuidia, non fragilis fauor,

Non ille regno ſeruit, aut regno imminet,

Spei metusque liber.

& adde plura pulcherrimi cothurni, quæ omitto. Ad Voluptatem enim tranſeo: quæ tamen hîc tam obuia, vt indignè ſuper ea mo-

B

ueri

ueri mihi litem. Elementa omnia intueor? vim suam vsumque palam & toto, vt ita loquar, sinu in hoc rure nostro effundunt: obscure & parciter in tuâ vrbe. Solem vide: melius hîc nitet. Aërem: lætius latiusque diffunditur & ridet. Aquas: purius bibuntur. Terram: hîc tantum cernitur in vero suo vultu. Alibi in planiciem effusè porrigitur: alibi in collem placidè adfurgit, aut magis rigidè in montem. Illic herbis & sponte natis arbutis vestitur: hîc fruge fructibusque, & feliciore ligno. Quem non delectet tam varius aspectus & cultus magnæ matris? cuius apud vos vna facies ædibus pressæ aut pauimentis. Jam domum si venisti, hîc prorsus gaudiorum & amœnitatis vera sedes. Manè surrexisti? ad musicam quidem. & circumsonant te ac velut saluant chori illi alitum, suauiter fritillantium, trutillantium, minuerientium. ad quos non æquiperent se tibiæ, citharæ, aut ex arte vlli cantus. In hortum prospexisti? oculorum aciem tibi præstringet illa ipsa nocte exortum agmen florum & herbarum. In pratum? occurrent Vere nouo arbores odorâ quadam & canâ nique perspersæ: eademque sub Autumnum, aliâ pomorum purpurâ siue cerâ distinctæ. Propius easdem aspice. insitiones mirare & matrimonia: adulteria etiam, & suppositos fatus, insciâ matre nec inuitâ. Quam lasciuam comprehensionem fecunditatemque quisquis in ligno non miratur; ipse profecto lignum. Jam ad agros deuertisti & tua rura? illic boues lentè pascuntur & oberrant, hîc pecudes magis vagè lasciuiunt & hædi. Porcus alibi volutatur & grunnit: alibi cristata cohors eugurrit & scalpit. Segetes illuc tuas vides, & filiginis, farris, hordei vberes fascies: siluam istuc, & ad hiemem lignorum strues. Vitem denique alibi florentem aut maturescentem: & spe iam præbibis sacrum illum alibilemque liquorem. Quorum omnium quæ copia in vrbe sit? quin ne imago quidem satis certa & expressa. Sed vt ij qui parietem intuentur, ex leui linearum ductu, animalia in eo & facies sibi fingunt: sic vos harum rerum futiles quasdam vmbas. Ita viuitis in pulcherrimo hoc mundo, mundi exsules: nec bona aut dona eius plenè vnquam nostis. Postremum Fructus inhi superest. de quo quid ambigimus? cum non solum cultus & ornatus plerisque vitæ ab agris sit, sed vita ipsa. Agricultura enim inoriatur: & vnâ humanum genus. Adde illa comoda. agnum
aut

aut hœdum à stabulo, pullum è corte, porcum ab harâ, & tot dapes inemptas : quas vos ægrè & carè præstinaſtis à foro aut inacello. Quòd ſi opes omnino quæris & aurum:rideo ego & ſperno. & tamen ſiquis hæc quoque ambiat, non alibi parandorum vberior materia & ſeges. Non palatia, non fora, non ſœnora plures ad opes euexère:quàm beati iſti agri. & addo rei caput,quòd tutò euexère, quòd citò, quòd innocenter. Thales ille olim anno vno diuitias amplas corrogare potuit, emptu proſpero omnium oliuarum: & viro prouido ſapientique non hodie idem fas, in ſegete, pecude, ſiluâ? Sed de his quia non libenter, nec ampliter quidem diſſero:& mitto te, ſi voles, ad veteres rei ruſticæ ſcriptores, à quibus diſciplinam eam petas. Nam ego ſaſtidio. ſicut & illud, quod crebrò ac pertinaciter mihi obiicis de dignitate. Dignitatem ea manſio nò habet, inquis:imò nec pietatem, quia patriam iſtæ deſertum. Dignitatem? me iudice, amplam:qui Reges & Principes fuiſſe ſcio in hac parte. An illud dignius, in foro latrare, tribunal ſiue aulam lambere, faſtum in æquales, adulationem in ſuperiores exercère: quàm Sapientiæ ſacrum colere, Naturæ opes luſtrare & promere, denique placidè viuere, placidè mori? Nam de patriâ, quid ais? In hac confuſione rerum ad clauum ego ſedeam: vbi nemo auditurus, non nemo etiam irriſurus rectè gubernantem ſit? Sæculum hoc paullisper vide. quo noxæ integritas, contumeliæ pudor, ludibrio fides eſt: & aude ſuadere vt iis præſim, quibus, hoc ipſum (pænè dicam) ægrè mihi eſt, quòd interſim. Concludens voueo, vt procul ab vndoſo illo vrbium mari, in hoc tranquillo & ruſeſtri portu quieſcam & conſeneſcam: vbi deum inprimis piè pureque venerer, deinde Sapientiæ ſtudia & Muſarum tractem, & quidquid propriè ad vſum aut cultum animorum. Vbi claffica nulla aut tubas audiam, vbi coruos aulæ aut fori non videam: ſed modèſtè tranquilleque mihi & mecum victitem, expers ambitionis & pallentium curarum. Cumque vltimus ille & decretorius dies venerit, ſpiritum hunc, ſine metu, ſine motu, emitam:& apud notos ignotoſque memoriam mei relinquam bonam potiùs, quàm magnam? Habes quæ pro agro, in agro ſcripſi. quæ ſi approbas, tandem etiam hoc inſtitutum meum: neu vltà cominouendum me cenſe ex beatâ iſtâ ſede. Ita Deus bea-

tum aliquando te faciat, cum vxore liberisque: quos saluto. In
 Ifcano meo III. Kal. Octobreis, ∞. IO. LXXV.
 Carmen ecce etiam adiunxi, quod eidem argumento, calore
 isto effudi.

LAUS ET VOTVM VITAE BEATAE.

ILLI est par superis deis,
 Et mortalibus altior,
 Qui fati ambiguum diem
 Non optat leuis, aut timet.

Quem non ambitio impotens,
 Non spes sollicitat lucri:

Quem non concutiunt metu
 Regum precipites minae,
 Non telum implacidi Iouis.

Vno sed stabilis loco,
 Vulgi ridet inania:
 Securoque oritur dies,
 Securo cadit & dies.

Vitam si liceat mihi

Formare arbitriis meis:

Non fasces cupiam aut opes,

Non clarus muiis equis

Captiua agmina traxerim:

In solis habitem locis,

Hortos possideam atque agros,

Illic ad strepitus aquae

Musarum studiis fruam.

Sic cum fata mihi vltima

Pernèrit Lachesis mea;

Non vlli grauis aut malus,

Qualis Langius hic meus,

Tranquillus moriar senex.

EPISTOLA IX.

VICTORI GISELINO.

LEGI tuas, ad os appressi & ad pectus. O quæ penna tibi me
 sistat! Ego ille constans deicior vnâ cogitationis hac plagâ.
 Scripta mea desideras & nugas: ego te, te. Sed quî agis? vt ex nûn-
 cio intelligo, perbellè. Gaudeo. nam timebam, ob subtractum
 tibicinem Moufflinum celeri casu. Nos fluctuamus, vt qui ma-
 ximè. sunt qui ad arma inclinant, sunt qui ad Irenen. Aiunt &
 apud vos puncta esse pro istâ. Quidquid est aut erit, ego te non
 amo sed pereo. De scriptis, scripsi ad Ocellum nostrum. non in-
 uidebit. Propriid. Kal. Septemb.

EPISTOLA X.

IANO LERNVTIO. S. D.

HAFTIVS apud nos est, ille cuius tu sororem. Eum ro-
 gaui de te multa, & rettulit omnia quæ vellem, excepto
 silentio:

silencio: quod causam habeat necesse est vel ab obliuione nostri, vel quod malo, ab inertia tua. Et quis insolitus hic torpor? Tu ille qui laceffere me soles, taces ad meas binas? *Omnia mutantur*, ait ille: non enim addam vel ominis causam, mutari amores. melius de te sentio. & tamen si amorem non deseris, non etiam debebas officia amoris. An etiam nunc te angit nupera mea fuga? Peccas: & emenda hanc culpam, ut in amicitia sis sine mendâ. Amicum nostrum audio adscitum in aulam, & in medicum Ducis. Gratulor: & magis, siquid is titulus ad Plautinam aulam. Nam si nomen tantum, & nihil ab eo vincti: sperno. Nos hic in alto otio (Nemesis non audiat:) & te istuc inuitare audemus vel habitandi causam. Multi certe vestrates oculos flectunt ad hunc portum. Plantinus ædes hic habet, Typographiam instituit. Quid multa? viuimus & vigemus. Tu vicissim, quid valeas, quid facias, cum Victore, cum vxore, cum amicis, nisi significas: scito serio me. sed deleo. nec cadat in amorem nostrum vnquam hoc verbum. Vale. Lugduni Batauor. Pridie Idus Septemb. ∞. IO. LXXXII.

EPISTOLA XI.

IANO GVLIELMIO LVBECENSI S. D.

AD FIRMO tibi Iane Gulielmi: pauca munera iamdiu gratiora mihi fuisse, & animo tuo, & versibus, quorum virumque tam benignè offers. Ille enim amoris plenissimus, isti elegantiae: & cogor (nisi ab ingenio meo abeam) valdè redamare illum, istos æstimare. Hoc magis, quod vltro prouocas, quod ignotum, quod immerentem. Nam quod beneficia quadam mea in publicum profers & prætexis: desine. hoc ipso video quàm me ames, qui non admodum laudanda laudes, & per adfectum recedis à certissimâ iudicij tui normâ. Itaque hoc ex fide tibi respondeo. vicissim amari te à me, vero honestoque adfectu: quem dies ipsa augebit & accendet. ea est eritque tua virtus. Lugduni Batauor. III. Idus Sextil. ∞. IO. LXXX.

ALEXANDRO RATLONI S. D.

RARÒ scribis. sed nescio an ideò litteræ tuæ desiderio ipso cariores. His quidem postremis fateor me non voluptate solum perfusum, sed gaudio: si verbo eo uti nobis fas in tristitiâ hac rerum. Nam de Antuerpiâ, quæ monstra audimus? Deus bone, huccine tandem erupisse tot mensium consilia malè sana, malè cocta! O factum à regio iuvene minimè regium! Etsi nobis adhuc tenebræ, nec de re totâ satis certis nec de causâ. Eiûsne fraus siue error? an vulgi cōsternatio & furor? Quidvis enim potius, quàm ut perfidiæ noua hæc macula inuratur laudatissimæ olim optimæq. genti. Sed hæc publica videbit publicus ille Rector. Tu in re tuâ quid? etiâ inne fluctuas? sic appâret. atqui statuendum semel aliquid est, cui firmiter inhærescas. Mutatio quidem hæc crebra, & desultorium, ut sic dicam, genus vitæ, non ex usu tuo, non ex famâ. Pessimæ, & Græcorum quoque prouerbio damnatæ sunt, nutantes & * *δίζωλαι* illæ *γνώμαι*. Litteraria hæc vita & otiosa tranquillitas, quid non habet commodi? Non externa illa fortasse. sed nec terra quæ aurum aut argentum gignit, res alias producit: nec animus, qui se colit & virtutem. Cetera, ille ferè sterilis. Quid tamen præferas huic vni? cui honos, cui salus comes, cui externa & interna quies. Militiam gustasti: & vides quàm non ea suavis. Itaque, mi Ratlo, huc redi: &, si me audis, in Musæo hoc portu nauim tuam defige & liga semel sacro morfu. Ad circumfusa illa & vana bona si abis, quis finis? iactabere, & natabis semper inter cupidinum novos fluctus. Non enim ratio, sed opinio tibi illas ingeret: cui insitum, variare & pænitere. Ut chamæleon, quoniam aurâ (ut aiunt) non cibo vescitur, hianti semper est ore: sic illi cupidine, quos ventus inflauit vulgarium opinionum. Hoc volunt, hoc nolunt: hoc hodie spernunt, cras appetunt. &, ut resculæ, quæ fluminibus innatant, temerè impinguntur in hanc illâ inue partem. Hinc perpes illud tædium in nobis, & velut nausea omnium rerum. damnamus parentum & nostra vota, & tam cupidè quæsita quædam deserimus, quàm antè quærebarimus.

Certa amittimus, incerta appetimus, atque hoc euenit

In la-

* *Verroque
claudicantes
sententia.*

In labore atque in dolore ut mors obrepit interim.

exclamat verè meus vates. Ecce ille ad aulam adspirat, & intrauit: rursus fastidit, & beatos censeat qui latent. Alius priuatim victitat: ægrescit, & inuidet purpuratis. parique leuitate rogati ad sagum properant, & hi rursus ad togam. Et quis non de Lachesi suâ queritur? reges ipsi de suo regno. At tu inter eos esto, quos Ratio, quos Sapientia firmavit: nec circumagere mihi vulgarium iudiciorum omni vento. Ut Vlysses ille donec Leucothea velum ei supposuit, natat nigrum pontum: sic tu hoc vitæ salum, donec pectus tibi præcinxerit candida illa diua. Constantiam dico. quam, audi, admitte, serua.

* Η δὲ ἐμοὶ κατὰ θυμὸν ἀεὶ ἐν φαίνετο βουλή.

* Hoc mihi
ex animo
visum op-
timum cō-
siliū.

Vale. Lugduni Bataur. x. Kal. Octob. ∞. Iō. LXXXIII.

EPISTOLA XIII.

Brugas.

IANO LERNUTIO meo salutem mitto:

QUAM recepi iam ipse. Hinc enim iure ordior: & gaudere te iubeo, mi Lernuti; quia à molestissimo morbo reuallui, imò reuixi. Ad fauces Orci destitutus mihi hos menses fuisse videor: ita me oppressiunculæ & obstructiunculæ illæ internæ pessimis adfecerant modis. Et audēsne credere? nō leue momentum ad valetudinem meam habuerunt & litteræ tuæ, & carmen: illæ amicissime, hoc scitissimum. nec fuerit vnquam ut tam piæ, tam disertæ preces non audiuerit illa Dea, cuius sedem aptè in Fortunatis insulis ponis. Quæ autem illa tam auida Parca, quæ vincla inter nos abrumperet non parcat sanctissimi amoris? Quin audi me, & securus animi es:

Dī me tuentur, dīs pietas mea

Cura est:

& porro, ut spero, erit. Turbæ apud nos ingrauantur, abiectâ spe pacis. quæ vereor, vereor autem? imò spero, ut breui eiiciant me ad vos. procul enim futuri videmini ab hoc belli nimbo: qui imminet prorsum capitibus nostris. Sed quid ais? Dousane nuper apud vos? nec ad me? ô factum ab amico nō amicum! Quod dixerit, subita res fuit, necessarius reditus: nihil audio. nuncia illi à me sodes, sexcentis versibus non luet hanc culpam. In Statium aliquid

aliquid meditari te suadet mihi noster Modius. vix persuadet. cur enim celes? & quidem cum tuo damno. Nam & mihi notata quædam ad sublinem illum & celsum poëtam (ita censeo & appello, non herclè tumidum:) & libri apud nos veteres, qui te iuvent. Innue, mittam. Epistolicæ nostræ nondum emissæ. sed vix eas teneo: ita ituriunt. De quibus quid iudicaturi sitis, timeo. Alia enim quædam à prioribus meis hæc scriptio. cui nitor ille abest, & luxuria, & Tulliani cincinni: pressa vbiq̃ue, nec scio an quæsita nimis breuitas. Quæ me tamen nunc capit. Timanthem pictorem celebrant, quòd in eius operibus plus semper aliquid intelligeretur, quàm pingeretur: velim in meâ scriptione. Magni Scaligeri ad Amorum illos * Triumuiros vidi, legi, probavi. In Propertio tamen traiectiones illas versuum crebras, mirari malim quàm imitari. Tu quoque non ita sentis? scio. sed quis Polydamas ausit illum Hectorem? qui dīs hominibusq̃ue fauentibus tenet profectò, & tenebit hoc regnū. Itali eum quī deiiciant? silent. nec iam à multo tempore quidquam ab eā gente litteratum. excipio Quæsita Aldi per epistolam, & Fuluij De Nummis. Muretus noster Orationes pangit & edit, & dat se in floridum illum eloquentiæ campum. ad famam consultè, imò & ad quietem. Nam Criticæ istæ tricæ quàm non latè se spargunt! quàm laboriosè colliguntur, & scribuntur! In quibus nos tamen etiam, nescio quo fato an morbo, insanimus. Pergebam in hoc garritu. sed alius mihi in auribus garritus, nuntij ad excubias trahentis. Arma capio, pono stilum. Quid ais? fatin' tuti Belgæ, hoc milite? Ite, dormite in vtramque aurem. Louanij. Idibus Iuniis. ∞. D. LXXVII.

* Notæ e-
ssu ad Ca-
rullum, Ti-
bullum,
Propertiu.

EPISTOLA XIV. *Louanium.*

MARTINO ANTONIO DELRIO
Consiliario Regio S. D.

MIRA tua fides in me, mira pietas. amoris enim certè verbum leue est, in re quam rari pro fratre fratres audeant, pro liberis parentes. Me mea que absentis defendisti: & obiecisti te non molestiis solū sed periculis, in hac flammâ rerū. Venisti vltro ad meos, crexisti, securos esse iussisti: hoc tantū questus, quòd

quòd non indicassent. Itaque quòd res opesque meae saluae, quòd scripta & libelli (id est, vita ipsa:) beneficium est vniuersi tui. Quid scribam? gratias agere me? ne concipio quidem: & affecisti me in summo beneficio vnâ hac iniuriâ, (quod olim ingeniosè ille ad Cæsarem) vt viuendum & moriendum mihi sit ingrato. Gaudere me tantum nuncio; meâ causâ, tuâ, sæculi. Meâ, cui is amicus obligit; tuâ, cui ea virtus; sæculi, cui hoc exemplum. Mea salus salue. Antuerpiæ a. d. i. v. Non. Mart. Cl. Id. LXXVIII.

EPISTOLA XV.

Vltraiectum.

IANO DOVSAE meo S. D.

SILENTIUM tuum mihi, Doufa, molestum: absentiam multo magis. Vbi autem fides? intra dies octo expectari volebas te: menses ecce labuntur. Statueras hoc iam antea? an quid interuenit? an placent tibi nouitij isti & fallaces mores? An potius uxoris partio te detinet? quæ genuit tibi (ita audio) decumam iam prolem. Macie hac fortitudine dicam, an fortunâ? vtrâque certè opus. nec minus hîc, quàm in agricultu, Labori & Euentui litandum. Sed tibi quidem propitius vterque deus: & gloria Masaniis te manet, si sic pergis. Vide tamen ne dum assiduus nimis in illis vallibus, desertum eas nostros montes. Suspicio: & iure. Vt quid enim procaces illæ antea Musæ tuæ tam diu silent? cur tribus his mensibus gutta nulla nos irrigauit poëtici tui humoris? Emenda: & hîc & ibi vir esto. Libelli etiam tui addicti Plantino, vbi sunt? Solue sodes, aut Prætorem expecta & suspensum capiti tuo libellum. Non enim differo, non protollo. Indicem Francoforto en habes. sed sterilem bonarum rerum: & nihil nundinæ istæ ad Phœbum. Melleri tamen Spicilegia edita, acutissimi ingenij iuuenis: vtinam rectissimi, verè addam! Sed profectò aut fallor in hac omni litteraturâ: aut ille valdè in censendo, & scribendo. Quales pleræque eæ coniecturæ? quàm non callidæ solum, sed calidæ? imò quàm audaces? Mihi crede, corrupendis ista, siue perdendis potius libris litterisque sunt: si dimanat hæc labes. Et dimanabit. ita iuuentutem hanc video: & tantum ingenij specie blanditur hic calor. Iam stilus ille quis? doctus, antiquus, arcanus, inquires. Scio. sed quò tam doctus, antiquus, ar-

C

canus?

canus? Ego ille ipse qui aliquid hîc capere me puto & sapere, sæpe quærô aut non video eius mentem. Quæso, mittamus tenuem nimis subtilemque hunc colorem & Apellæas, vt sic dicam, lineas: & Venus nostra inspiciatur etiam à vulgo. Vt nihil minus expedit, quàm agrum optimè colere, (aiebant veteres:) sic consue- rim de stilo. Nimis ornas? fucus & adfectatio apparet. Nimis attenuas? tenebræ & squallor. Modus autem in omni re op- timus: etiam in epistolâ. quam finio, & te saluere iubeo noue Hercules Musarum, noue matrum. Lugduni nostræ, a. d. I I I. Nonarum Aprilium. ∞. IO. LXXX.

EPISTOLA XVI.

Ultraiectum.

EVERARDO POLLIONI meo S. D.

A M E A enim velut manus, à domo, & à disciplinâ. Vt sta- tuarium opus suum delectat, si laudabile: sic in te iure mi- hi placeam, si tu bonis. Quod futurum omnino est, mi Pollio: si non audies solùm præcepta quæ crebrò dedimus, sed obau- dies: eaque admissa in hoc pectus, re exprimes & factis. Ad vir- tutem ante omnia te hortamur: cui litteras istas seruire volumus, magnum vel in parandâ câ adiuumentum, vel paratâ ornamen- tum. Non enim solùm pulchrior comptiorque per doctrinam virtus, sed fortior: nec colorem modò ab illâ ducit, sed sangui- nem & robur. Egregiè noster Seneca: *Et si magis refert nostrâ for- tiores fieri, quàm doctiores: tamen alterum sine altero non fit. Non enim aliunde animo venit robur, quàm à bonis artibus, quàm à contemplatio- ne naturæ.* Quod ita verum scito, si doctrinam non hanc mol- lem & amœnam solùm intelleges, quam φιλολογίαν haud malè ap- pellamus: sed virilem illam magis & robustam, quæ in naturâ aut animo occupatur, quàmque φιλοσοφίαν propriè indigetamus. Illa enim sola, tantùm abest vt tutum securumq. te præstet inter hos vitæ fluctus: vt moueat sæpe exciterque in ambizioso animo cupidinum nouas tempestates. Itaq. vt nautis solitarium Helenæ sidus nō placet: non item mihi ista. Gemini illi sunt, qui cùm ap- paruere, tranquillitatem nautis nunciant: tibi hæc duo, si iunges. Quod voueo ex animo: & in firmâ hac spe saluere te iubeo carû mihi caput. Lugduni Batauor. III. Nonas Octob. ∞. IO. LXXXII.

EPI-

EPISTOLA XVII.

Delfos.

IANO GROTIUS.

AT tu quasi ad Collegium etiam scribis: cui vitam fuisse te nescis, & obiisse illud te abeunte. Certè à nuptialibus tuis facibus, funereæ accensæ sunt Musis & quidquid hîc fuit Musicorum. Rê dico. solutus dudum ille cœtus: non tamen etiam vinculum amoris, quo inter nos ligati. Tu mihi sæpe in mēte, rarò in oculis: nec lepōrem & virtutē tuam deleuerit ex animo meo vlla dies. non magis quàm tuo litterarū studia exciderint, etsi callidè id præ te fers, & negas agnoscere te Deas, idq. carmine, quod agnoscant ipsæ deæ. Abi Socraticæ noster *εἶπεν*, & apud tam fidum age ex fidē. Tu Musas, te illæ amarunt, amant, amabunt: & cū illis ego. Carmen totum approbum: nec Critica illi à me nota. Rem ipsam & argumentū vt melius nōrim curabo: & legam quæ scripsit Belgicus hic Euclides. Nos Pindaricus *ἀλέκτωρ* ille *ῥεσσαν* respicere cœpit, in parte. vtinam diffusiore paullò vultu, vt sanitas apud me sit læta, plena, firma. Quam tibi, vxori, liberis (nōnne rectè ita loquor?) opto. Lugduni Batavor. postrid. Kal. Sextil.

EPISTOLA XVIII.

Lutetiam.

AVGERIO GISLENO BVSBEQVTO,

Cæsareo Legato S. D.

NOMEN ipsum tuum in litteris ante legendum me adfecit, & lectio multo magis. Iudicium talis viri meritò magnum apud me est: & hæc tam proluxa beniuolentia, quam solo animo meruisse me scio. Nam rem quidem tu auges: & facis tam liberali beneficij interpretatione, vt vltro obliger, & nouam gratiam debeam tibi. Quam vt prorsus soluam, ne expecta. non est istarum virium; non item animi. qui magis magisque illigari tibi cupit, & nunquam dependere, vt pendeat à te semper. Liuij variantes lectiones ex codice Puteani quas submittis, grata mihi: etiam vtilis spero, post perfectum Commentarium Cornelianum, in quo vnus nunc sum. Absoluto enim eo opere, libens fanè manum & limam adiecerim vberrimo historicorum. Permittiam valetudo: quæ non paullò melior, post iter Antuerpiense

C 2

& hau-

& haustum auræ siccoris. Nam marina ista & palustris, nescio quomodo corpori huic non amica. Sed quis in Belgicâ alius angulus ad quietem? Itaque ferimus, & hîc hæremus: donec deo visum pacem huic Belgio reddere, & nobis veterem sedem. Quod, ut res sunt, vouemus potius quam speramus. Amplissime & Nobilissime Vir saluæ. & inter cultores virtutis nominisque tui Lipsium nō falsò cense. Lugduni Bat. Non. Mart. ∞. ID. LXXX.

EPISTOLA XIX.

Hagam.

THEOD. LEEWIO *Consiliario* S. D.

IN silentio tuo, mi Leewi, mirabar, & (hanc enim libertatem amicitia mihi dat) indignabar. Sed indignatione tibi non ingrata, cuius fons ab amore. Iniuriam mihi ferre videbar, quia priuabas me hoc alloquio: quod etiam in negotiis occupationibusque meis vsurpo cum libentiâ & voluptate. Veluti hoc ipso tempore, quo Plantinus cum genero apud me est: & eripit mihi non inuito optimam diei partem. Ego tamen scribo. de re priuatâ, valere me non optimè, ut hoc anni labentis tempus fluxionibus meis ferè est infestum. De repub. nec multa nec bona. Hostis Ninouiam obsidere dicitur, & imminere meæ Bruxellæ. certè copias colligit circum illam. Galli lentè & frigidè agunt; nec pro ingenio gentis. Ita vides, mi Leewi, in longum trahi rem, & produci calamitates patriæ iam exhaustæ. Nec abiiciendus tamen animus. quem si ratio non adfectus subegit, ille est erique in firmâ arce, quam nulli insultus, nulla vis perfringet. Sed opinio nobis hæc facit magna & metuenda, quæ ratione si examinas, leuia sunt. Bellum metuimus. ita enim accepimus à parentibus, ita à nutrice, ita à publicâ vulgi voce. Sed imponunt. Cur enim bellum malum? nepe quia vastitatem inducit, quia pauperiem, quia mortem. Atqui hæc ipsa mala non sunt, nisi malis. Quot viri boni beatiqûe paupertatem appetiere vltro? Litteræ ipsæ diuinæ eam nobis cõciliant, ut rectam ad cælos viam. Mors autem quid? metuenda viro? optanda potius: quia finis huius miseræ, & principium melioris vitæ. At enim hæc Philosophorum sunt, inquires, dictu pulchra, re & vsu asperissima. Imò, mi Leewi, communis hæc vox totius generis humani: quotiens abstersâ adfectuum illâ nube

lâ nûbe radius diuinæ mentis illucebit. Sic tu, sic ego loquimur inuiti, si rem pendemus ad veri iudicij lancem. Signum vis? Ecce pone mihi ex illo ipso corrupto & corruptore vulgo aliquem in morbo. spernet diuitias, spernet opes: sanitatem dumtaxat vouebit corporis & mentis. Scilicet seriò cogitare iam de se cœpit ad motus ad extrema: & inanium obliuiscitur, cùm periclitatur de salute. Exsulant adfectus, cùm ratio rediit: & erigit at tollitque se animus, corpore iacente. Tamen sani redimus ad eadem omnia: quia litigium illud cum adfectibus fuit, non diuortium: nec proposito aliquantisper boni, sed metu sumus. Quare maneamus in hâc viâ, quam institimus, segregandi nos à vulgo: nec id sermone tantum & velut in pompam fiat, sed reipsâ, & quod dicitur, Bonâ fide. Vacillamus, imò cadimus interdum? Surgamus, & citâ celeritate corrigamus, quod temporis ereptû lapsu. Viden' vt miles quoque, si cecidit, surgat alacrior, & animos irasq.umat à casu? Idem nobis sit, & cōstanter pergamus ad illum Tranquillitatis internæ portum, qui verè efficit beatos. Vale. Lugduni Batauor. III. Idus Nouemb. ∞. ID. LXXXII.

EPISTOLA XX.

*Brugas.*IANO LERNVTIO *meo* S. D.

DIMISI nuper à me Oudermanhum vestrum sine litteris, valde præter meum votum. Sed mihi crede, ita distinebar, vt eius rei facultas mihi nulla. Nec nunc magna: (Plantinus enim apud me cum amicis est, quibus dies dandi pænè toti:) tamen erigit & conari me iubet epistola tua, si qua alia, plena suauitatum. Vel illud de SVAVITIS tuis quàm mihi spirat crede, quòd omnes Arabum diuitiæ, imò quòd ille ipse halitus à suauiorum deâ. Tu tantum perge, & damna me huius voti, vt citò teneam amplectarq.ue libellum, & te in illo. Sed de titulo cur mutasti? Mihi simplicius suauiusq.ue inscribi SVAVIA videbantur, quàm funereâ & atrâ voce SECUNDI MANES. An frontes seueras metuis, & consultum tibi is modestiâ inscriptionis? Frustrâ. quatenus ego gustum sumpsi, pura illa basia tua: quæ & Catones capere possint, & dare ipsæ Vestales. Denique quousque scribimus istis? paucis nobis potius. & da quod in sinu

tenere Scaligeri possint & Turnebi. De Plantino, verum est: ædes hinc conduxit sanè amplas, & partem vacantem Typographiæ transferet istuc. Aliquid ea res fortasse me excitabit ad lucubrandum: cum interesse editioni libellorum nostrorum licebit, imò præesse. Nam aliàs, & valetudo sæpe illud igneum, quod in nobis, retundit: & iudicia hæc multorum aut maleuola, aut malefana. De Germaniâ quidem audistin? Proscribere misellam Satyræ nostræ nuper voluere, & ejicere edicto extra imperij fines. O pisces, pisces! non hæc aqua, in quâ vos natetis: & magis vobis faciat ille ab Cithærone liquor, quàm hic ab Helicone. Sed feramus: & quoniam cœpimus, æremus etiam hoc litus. De Venatione in manus iam sumpseram, & eram in secundo libro: reieci, & iterum daturus me videor in torporem. Catarrhi mei id faciunt, statim mihi sub hoc tempus & solemnes. A Scaligero nuper litteræ edit De Emendatione temporum, & promittit breui exemplar. Vale mi anime, cum animâ tuâ, & cum iis qui ex felici vestro cœtu. Lugduni Batavor. 111. Id. Nouemb. ∞. Id. LXXXI.

EPISTOLA XXI.

Antuerpiam.

HIERON. BERCHEMIO I.C.

NIMIVM vrges, mi Berchemi, de Imitatione. nuper omnibus sermonibus, nunc epistolis hoc agis. Quid censes? aliquos thesauros mihi esse doctrinæ reconditæ? erras. siquid in hoc genere posse tibi videmur, magis à casu siue naturâ est, quàm ab arte. Et tamen quidquid illud est quod sequor, quod teneo; nō vltà celabitur. & proximâ epistolâ præcepta aperiam, ad quæ stilum meum fingo & conformo. Tu Minerual, sis, para doctori nouo. Scaligeri ad Ausonium en tibi. O virum, ô filium à patre magno magnum!

merito cui doctior orbis

Submissis deferet fascibus imperium.

Enimverò ille vnus est, quem miramur, quem æmulamur, imò ne mentiar, cui inuidemus. Felicem Galliam hoc sole! cuius claritas non ad eos solum, qui nunc sunt, sed ad posteros diffundetur, quamdiu quidem erit in terris nomen litterarum. De rep. quid

quid scribam? manus mihi labat, & ingemisco. Carcer ille nouus tot Lentulorum quò erumpet? de quibus ambigua hîc fama. alij emissos dicere, alij artius teneri: hî culpam affingere, illi demere. Omnia incerta mihi, præter illud: quod omnino futurum video, vt plebecula illa aliquid plus faciat. Habet hoc semper noua libertas, vt ad licentiam facile deflectat: quid censes de vrbe, cui insitum & fatale, turbare? Vt fistulæ diu interclusæ aut interceptæ turbidiores aquas emittunt: sic isti actiones, aliquamdiu pressi. Sed nos quoque hîc in metu. Quidam inter optimates partium non optimatum: qui, vt cum Pindaro dicam, ^{τὸ δὲ πῶς τῆς πόλεως ἔσται, ἀλλὰ χολῆς ἀναβάντος ἀπ' αὐτῆς.} Plebs ista ^{*Nō iustitia reclusum muru, sed obliqua fraudis scandunt.} mollicula. quid augurer? hostis tantum adueniat: ego tibi spondeo, non fore hîc Numantiam aut Saguntum. Cometam & nos per hos dies vidimus: immanem, dirum, & facie haud saepe visitatâ. Quid portendat, quæris? Chaldaeus non sum, nec cæli signa cognoui: tamen hoc vetus noui, ^{ὅτι οὐρανὸν ἴδωμι καὶ τὰ ἀστέρας.}

^{Οὐδὲ γὰρ κομήτης ὅστις ἐκ καὶνὸν φέρεται, καὶ οὐδὲ τὸ ἀστέρας ἴδωμι.} cui versui magis quam Aristoteli credo, qui hæc talia ad causas fortuitas refert & infernas. Quid tamen aut quibus minetur, distinctè nouit ille *Prudens futuri temporis arbiter*: ego communiter, non referre eum aureum sæculum. Vale. & Illustri Comiti tuo à me salutem. Louanij III. Id. Octobris. 1600. IO. LXXVI.

EPISTOLA XXII. *Duacum.*

PHILIPPO LANOYO, Nobilissimo iuueni S.D.

IN Italiam cogitare te audio, nobilissime iuuenum: & audio volens. Placet ea mens, quam agnatam scio non nisi optimæ cuique menti. Humiles istæ & plebeïæ animæ, domi resident & adfixæ sunt suæ terræ: illa diuinior est, quæ cælum imitatur, & gaudet motu. Itaque siue prisco siue nostro æuo, peregrinati ferè sunt viri magni. Sed ista hîc cautio: vt id fiat non cum voluptate solum, sed cum fructu. Vagari, lustrare, discurrere quiuis potest: pauci indagare, discere, id est, verè peregrinari. Vt tu id possis, finem verum fructumque ante omnia mihi propone, quem is peritum. Vt enim ij qui iaculum mittunt, non in vanum dirigunt, sed scopum præspeculantur ad quem collineent: sic tu præfini,

fini, quid peregrinatione istac quæras. Duo, nisi fallor: vtilitatem, & voluptatem. Non enim hanc solum, nec vt coronarij bellissimas saltem herbas floresque struppis aut coronis innectunt, salubrium nullâ curâ: ita hîc tu. Quin cōtrâ potius, plura ad mentem ac salutem referes quàm ad sensus aut ad spectum. Ac de voluptate aliquid dicere vacuum sit: cùm ea sponte obuia: nec quisquam tam lapis aut frutex, quem non titillet ac flectat amœna illa variaque spectio gentium, vrbium, locorum. Natura scilicet illuc aufigatur, nec duce opus villâ ratione. At in vtilitate laborandum est, quam nec secuti omnes, nec qui secuti, adsecuti. Eam tibi ingero, & triplici hoc limite designo, Prudentiæ, Scientiæ, Morum. Hæc enim omnia peregrinatio adferre debet, si consilio, si ritè instituta. Ac Prudentiam ab eâ peti, Homerus nobis satis auctor, ille non poëtarum solum eximius, sed, me iudice, sapientum, qui cautæ illi Vlyssiæ prudentiæ quam aliam causam vbique tribuit, quàm quod πολυτροπίας: quodque, vt ipse ait,

* Multerū
mores ho-
minum &
simul opi-
da vidit.

Πολλῶν ἀνθρώπων ἴδεν ἄστεα καὶ νόον ἔγνω.

Et verè. Instituta enim illa varia gentium, ritus moresque hominum, formæ ciuitatum, incredibile est ad iudicium & prudentiam quàm potenter possint, si tamen non visa aut libata ea leuiter, sed admissa, retenta, & collata inter se examinis quadam lance. Quod ante omnia tibi censeo faciundum. Vide inquam, audi, iudica: nec cōquire solum hæc talia, sed in ea inquire. Et inquisitio quidem à te & tuâ mēte erit: cōquisitio, ab hominibus esse debet, aut à libris. Nam & libri ferè siue historiæ peculiare suis quibusque locis & linguis sunt, quas indagabis: & homines æuo & vsu prouecti non deerunt, à quibus percontandō discas. Et si enim modestiam & silentium iure tibi suadeam: tamen nihil abnuo, quin per iter fræna saepe laxes effræni illi membro. Ius tibi sermonis, non in viâ solum (siqui eiusmodi cōmites) sed in hospitio sit: nec ante mensam modò, sed in eâ, & posteam. Sed sermonis ius intra hos fines, quærendi de moribus, legibus, facie cuiusque vrbis. addo & de Principibus, bellis, casibus, aut siquid euentuum magis insigne. Hæc notabis, hæc sepones. certus ex iis civilem illam prudentiam inferi, tacitâ quadâ vi & viâ. Vt enim herbas, vt arbores, crescere non cernimus, sed creuisse: sic factam hanc prudentiam potius, quàm fieri. Atqui incrementum & irrigatio

gatio illi, ab his inquisitorij, vt sic dicam, humoris guttis: quas altè perbibit melior animus, & paullatim madescit sapientis iudicij succo. Atque hæc de Prudentiâ dixerim: verbis parcè, rebus ampliter, si rebus experiris. Ad Scientiam te nunc eâdem manu doco. Quam mirère fortasse, quòd peregrè quæram. cùm domi illi sedes potiùs, & hæc litterarum studia quiete secretoque magis gaudeant, quàm motu aut discursu. Sed desines huius admirationis, si animum flectes ad duplicem, qui ad Scientiam, modum. Aut enim ab Auribus ea, aut ab Oculis est: à Doctore dico, aut à Libris. Et de libris quidem, nemo ita negatum quin domi habeantur, tractenturque meliùs: in doctoribus, aliter esse ratio suadet mecum. Quæ enim illa, obsecro, tam felix regio, quæ felicissima omnia ingenia includat? Quin sparsa illa: &, deo dispensante, sua cuique terræ velut gemmula quæ illustret. Hanc adi, hanc audi: & è sacris illis pectoribus, hianti ore bibe abditæ doctrinæ fontes. Quis non à Turnebo aliquo doctior redeat? prudentior à Sigonio? disertior à Mureto? quorum ego non auditum solum magno emerim, sed visum. Quòd si notitia etiam aliqua tibi cum cum iis accedet (& id pronum apud tam humanos:) deus bone, quæ occasio hîc tibi discendi & ditescendi! quot gazas legere & recondere cottidie poteris latentium litterarum! Mecum vides. tu arripe tantum: & me auctore, in vsum eiusmodi virorû omni arte irripe, vi irrumpe. Nusquam meliore damno frons ponitur. Hæc Platonis, hæc Pythagoræ, Democriti, & aliorum sapientium mens fuit: qui relictâ penu artium Græcia, non ad cultos solum, sed ad barbaros peregrinati, acri quodam cupidine discendi. Iam & alia ab Oculis utilitas: qui hîc tibi soli & nudi ad Scientiam sæpe duces. Italiam ecce nunc adis. illam frugibus, viris, opidis cultam, illam famâ inclutam scriptisque. In eâ non vestigium vsquam pones, non oculum flectes; quin monumentum aliquod premas, aut memoriam vsurpes, ritus siue historiæ priscae. Illîc Thrasymenum miserantibus oculis subiicies, aut æternum imperij vulnus Cannas: hîc magis lætis, Albanum, aut Tybur, aut nobiles Baias. Plinij alibi mansio, & Virgilij aut Propertij patria tibi ostendetur; alibi rudera Varronianæ aut Tullianæ villæ. Quanti & quàm arcani gaudij ista visio? cùm non animo solum, sed pænè oculis sese inferunt manes. illi

D

magni,

magni, & sola preminimus pressa toties ipsis. Iam coloniæ illæ veteres, iam templa, theatra, arcus, sepulchra, lapides, quem non & doceant mirificè & delectent? Doceant dico. quia reuerà notata aut exscripta hæc talia, mirum quantâ luce mentem perfundant, trepidantem per veterum scripta. idque experti dicimus ipsi. Vt omittam etiam illud commodum, quod nescio quomodo attollatur & grâdior sese fiat animus, adspectu tot sublimium & grandium rerum. Cupidinem veræ virtutis & gloriæ ingenerat, visa toties aliena gloria & virtus. Ad Mores iam venio, qui postremus mihi locus; tibi, siquid sapias ô adolescens, primus. Ab hoc enim scopo si aberrasti, aberrasti ab aliis: & inutilis, imò noxia, scientia omnis prudentiaque est, secreta à probitate morum. Cetera speciosa puta, hanc necessariam: illa ad ornatum adhibe, hanc ad salutem. In moribus autem duplex mihi præceptio: & vt bonos rectosque vbique adnotes, & fugias malos & detortos. Sed in bonis, ne mentiar, haud magna fortasse peregrè copia est. Latent enim plerumque verè probi: & in pectore intimo domicilium Virtus habet, non in vultu aut fronte. atque inde vt extrahatur, vsu opus & notiâ quadam propiore: ad quam peregrinantibus rarò accessus. Tamen elegantia quadam morum & comitas, & externa quadam, vt sic dixerim, virtus, quin apud exteros iure quærat, non negabis. Quid in cultu, vestitu, actionibus deceat; quæ Veneres & lepôres in sermone aut gestu; docere te ritè politiores illæ gentes possint, Itali, Hispani, Galli. atque ita rus illud nostrum apèrè sæpè diluas quæsitâ istâ vrbinitate & peregrinâ. Sed quæsitâ, non adfectatâ; vsurpatâ modicè, non ostentatâ: alioqui nihil comptu eo incomptius, elegantia ineptius. Risimus non semel eiusmodi histriones, qui ab Italiâ aut Galliâ noui, gestus nescio quos mimicos molestè vsurpabant, & delicias parum non dicam ciuiles, sed viriles. Tu hæc fuge. & imprimis vera & interna animorum vitia, quorum vbique larga & obuia seges. è quâ ne quas spicas improuidè colligas, magna mihi pro te cura, imò metus. Admittimus enim nescio quomodo & combibimus facillè peregrinas illas culpas; siue quia nouitate aliquâ blandiuntur, siue quia specie virtutum. Atque vt venena vinis admixta, medicorum scito, perniciousè & perniciosè penetrant: sic peccata hæc adsita virtuti. Ferè enim ita fit: vt in quâ gente

vitia

vitia certa increbuerē, mores iam vocentur, nec in veniam modo veniant, sed laudem. Adde, quod naturā ipsā proniores nos ad mala imitanda. Vt pictor, leui manu, & volante penicillo, rugas, verrucas, n̄uos in facie exprimit, haud tam faciliē ipsam: sic probitatem laboriosē imitamur, nullo negotio maculas illas animorum. Aduigila hīc igitur: & iam-antē serio prouide, quæ vitia cognata vel amica cuiq. gēti. Quis enim neget? vt hominibus singulis, sic populis suæ laudes, suæ labes. Galliam ecce cogitas? leuitatem & vanitatē etiam, quæ in plerāq. eā (omni, falsō dicam) gente. Italiam? proteruiam in eā & libidinē. Hispanias? typhum quemdam & Africanum fastum. Germaniam? comestationes & ebrietatem. Quæ velant illi, scio; & comitatem, fiduciam, grauitatem, hilaritatem interpretantur falsō. at tu vitabis, nec in venas rapies peruersi iudicij aurā blādientem pestem. De moribus tantum est. & pertexui hanc telam: nisi quod leue parergum illi addam de Italiā ipsā. Laxat enim nescio quomodo vela huic stilo, prouehitque longiūs amor & cura tui. In terram is igitur terrā istā meliorem, fateor; gentem gēte nobiliorem: haud scio an probam magis, an fidam. Ingenium, & subtilitas, & magni erectique animi in illis locis habitant: non semper puri, simplices, & ad Gallicam istam niuem. Ideoque incautis & apertis nobis nonnullum ibi periculum, & quidem à duplici telo. Nam & inter viros multi recti, callidi, periti simulare: & inter fæminas, formæ conspicuæ, sed lasciuæ & procaces. Hīc Scylla, ibi Charybdis: & duo hæc discrimina vt enauiges, opus non prudentiā quadam solū, sed dicam fortunā. Prius tamē illud me angit minūs. quod amoliri magnam partē posse videor cauentibus quibusdam præceptis. Nam contra insidiantes illos aut simulantē, quidni firmum scutum à simulatione itē aliquā sit? Cres mihi esto inter Cretas. Nec viam tibi tamen ad fraudes præeo. absit. sed vt medici, venena quædam venenis pello, in salutem tuam non in noxam. Ad minutas & innocentes quasdam simulatiunculas te voco: nec ad alienas insidias, sed ad animi tui opportuna tegimenta. In Italiā totā tria hæc mihi serua. Frons tibi aperta; lingua parca, mens clausa. Commis & cōmunis vultus aduersus omnes sit, animus externo nulli pateat: & velut in theca clausum eum habeas, dum redeas ad notos animos & verē amicos. Epicharmæ sapientiæ ille neruus

hîc valeat, nulli fidere. Nisi facis: non vnus Vlysses Aiacem te circumueniet; & dolorem nobis debes, illis risum. Atque hæc tamen cautio mea propriè in vulgus Italorum dirigitur. Nam de nobilibus cur diffitear? reuera optimates illi plerumque optimi: celsi, alti, sinceri, virtutis, gloriæ, litterarum amantes. In vulgo aliter esse obseruauimus, qui fex & limus, & verè vulgus. Itaque in illis; vetus Italicus aut Romanus sanguis ferè apparet: in istis, peream, nisi claræ reliquiæ (fidenter dicam) Gothorum, Vandalorum. Iam contra telum alterum quî muniam te, aut moneam? Ita sim saluus, vt opto potius quàm spero te hîc planè saluum. Tantum mihi metus & ætas tua facit, quæ in ipso æstu: & illæ non dicam fæminæ, sed Veneres, Venetæ aut Romanæ. In naturâ tantum tuâ spes omnis præsidij hîc, & voluntate. Quarum si alterutra ad calidas & callidas istas Solis filias inclinat: quis hominum te seruet? certè ruës: nec vlllo præceptorum sufflamine te sistam. Tamen ne nihil dicam aut addam: ecce armaturam à me duplicem, Oculis, Auribusque. Oculos, inquam, primum mihi claude, & auerte longè ab illecebroso hoc adspectu. Aditus enim mali morbi hinc est: nec amor aut cupido facilè irruperit, nisi per geminas has fenestras. Sed & aures etiam muni, contra omnes non Venereos solum, sed paullò magis venustos sermones. Ij sunt enim qui titillant, qui excitant: & vt cupere ab aspectu est, sic vel le ab auditu. Igitur vt athletis olim, munimèta quædam aurium adponi mos (*ἀμφοτέρωθεν* vocabant) ad vitandos ictus: sic tu hoc firmum contra amatoria vulnera habe velamentum, Amatorium nil audire. De hominibus dixi (quæso ne cum inuidiâ cuiusquam aut irâ: quia liberè aliquid protulerim fortasse, nihil acerbè aut malignè:) adiungam & aliquid de locis. Qui varij in Italiâ omni & pulchri: vt non iniuriâ deliberes, quem præferas ad videndum, siue habitandum. Et meo quidem sensu (vidimus enim plerosque omnes, & triuimus) prima tibi vel antiquitatis causâ, adeunda Roma est: adeunda tamen, non habitâda. Confusio enim ibi & *σύγχυσις*, aëris & morum haud pura puritas: & quod verissimè à Varrone dictum, turba turbulenta. Loca igitur illa prisca & vetera, monumenta ac rudera,

— & campos vbi Troia fuit,
cùm lustratus satis & veneratus fueris: Neapolim mihi abi, & paulli-

paullisper infide illam nobilem, illam cultam, illam amoenam. Per quam viam deliciae locorum multae, quas omitto. sed si inhabitanda diutius Italia est, in Tuscos mihi redi, & illos incole, lingua, aëris, morum causâ. Omnia hæc ibi pura. Quod si de opido etiam quæris: Florentia mihi aut Senæ placeat: & magis ista. At iam in ambitu & reuersione, Bononiam amicam studiis libens videbis, & eadem laude insigne Patavium. quibus cum dies aliquot dederis, non pigebit in vrbe maris domina (Venetias dico) lustrandâ ponere septimanas. Heu ad inuidiam pulchra, opulens, felix vrbs! minùs tamen ad nostrum Genium, quia Mercurio amior quàm Mineruæ. At in exitu grande illud & diffusum Mediolanum te capiet. in quâ sine Italiæ finis mihi epistola. Deum supplex precabor vt te seruet, & tu ista. Vale Nobilissime iuuenis, vale, vale. nec Deus mihi * auguria perficiat, quæ in tristi mente. Antuerpiæ III. Nonas Aprileis ∞. IO. LXXVIII.

* Certè vera. obicit enim ea ipsa peregrinatione, princeps nostræ iuuentutis.

EPISTOLA XXIII.

Vltraiectum.

I A N O D O V S A E S. D.

HEVs tu, sacrifica. Lipsius etiam viuit. Discrimen igitur tibi? inquires. Grande, capitale, mi Doufa: & quidem sine crimine discrimen, à scriptis iterum meis; non à factis. Satyram ego nuper scripsi, & illa me panè proscripsit. Iocari me putas? verò, seriò, à grauib, imò à grandibus viris res agitata: à proceribus imperij: tanquam in læso aut turbato publico statu. Suspendo adhuc te. rem habe. In iocis illis Menippæ nostræ aliquid est de lauru poetarū, quam largitur Cæsar. Ab eâ iste ignis. Aiunt ignominiâ à me affici vniuersum id genus: aiunt Cæsarē ipsum aspergi iniuriâ, quasi nō id ei ius aut potestas. Itaq. à Legatis ipsis Cæsaris litteræ subito Francofurtum, quæ grauiter me accusarent, minarentur: & Satyram ipsam priuatum irent publicâ luce. Hæc audis: hæc credis? Non ego ipse: nisi litteras eas vidissem his oculis, tenuissem hac manu. O sæculum, ô viri! Ita vos docti, vigilate, scribite: & pro famâ, subite hanc flamam. Et tamen utcumque calumniarum ferax æuum: quis materiam iis censuisset in re tam leui? Nisi si hoc proprium mihi fatum, vt ex candore istarum niuium oriatur semper aliquis ignis. In Epistolicis meis

D 3

nōne

nónne simile? Benè certè sperare de iudiciis posterorum de-
beo: cui tam iniqui sunt viui. Tu vide, ride, & si vir es, pro Sa-
tyrâ nostrâ Satyram in saturos illos scribe. Nónne enim, no-
strâ: tu certè eius magna pars es. Vale mi oculissime. Lugduni
Batauor. III. Kalend. Iulias. ∞. IO. LXXXI.

EPISTOLA XXIV. *Londinium.*

GVLIELMO CAMBDENO.

MVNVS à te accepi, Vir ornatissime, per mihi gratum,
Britanniam tuam: quam illustrasti ingenij & industriæ
clarâ facie. Multum patria tibi debet: multum exteri nos, qui per
te pulcherrimam insulam videmus etiam cùm non videmus.
Perge in hoc & simili studiorum genere, quod abesse non potest
quin tibi famam, posteris æternum ferat fructum. Lugduni Ba-
tauorum. IV. Kal. Sextil.

EPISTOLA XXV. *Vltraiectum.*

GEORGIO RATALLERO *Præsidi ibidem*
Consilij Regij S. D.

VALDE alienus à Gratiis omnibus sit, Vir Amplissime,
cui non & litteræ tuæ gratae, & hæc ad amicitiam inuita-
tio, tam amica, tam honesta. Quam quòd prior, quòd vltro sus-
cipis: iure magni facio, qui scio quàm tu magnus. Et amaui
quidem te, imò colui iam pridem, tacito quodam sensu: qui diu
inclusus, libens nunc se promit & exspirat ad hanc suauem beni-
uolentiæ tuæ auram. Cui tamen non dicam paria, sed maiora fa-
cio: quo plures mihi ad amorem & æstimum tui causæ. Doctri-
na, dignitas, virtus, & ante omnia hæc humanitas: quâ trahis &
& nectis me tibi adamantino quodam vincolo. Quod nulla vis,
nulla fraus, laxabit aut soluet; donec

Lumine adempto animam moribundo corpore fundam.

Idq. tibi non per epistolam scriptum, sed velut per syngrapham
volo sponsum. Tu mihi quæso responde: & hunc, vt sic dicam,
amoris noui fruticem, quem tam amanter eduxisti, euocasti, ale-
re & fouere perge beniuolentiæ tuæ radiis, ô Belgij & meus splen-
dide sol. Vale. Lugduni Bat. postrid. Kal. August. ∞. IO. LXXX.

EPI-

EPISTOLA XXVI.

Hagam.

THEODORO LEEWIO *Consiliario S. D.*

MAGNUM illud Antuerpiense facinus, magnum dicerem & malum, si de causâ mihi liquidò cōstaret aut fine. Sed tamen hoc ipso malum, quòd malum imò exitium patriæ trahet secum. Heu, quæ videmus! quæ audimus! quàm inopinata! quàm obliqua! quàm non pro veteri fide & more regum! Nec tamen, mi Leewi, deiicere. erige te potius: & vt palma, attollat se animus contra nouum hoc pondus. Inspice ludibria rerum humanarum, & aleam ambiguæ Fortunæ: quæ gaudet iactum aliquem ex occulto iacere, nec expectandum. Hinc ille vulgi stupor & querela, Quis putasset? quæ non cadit in mediocriter sapientē: qui iam antè ita meditatus, vt sciat hæc & deteriora posse euenire. Vt in bello, etiam si hostis absit, semper excubiæ: ita vigilat ille contra improuisum omnem ictum. Quis fuit ille dies, cum hîc & alibi insulæ totæ aquis absorptæ, aut vrbes terræ motu? Quis eorum qui tam magnâ ruinâ perierunt, id putasset? Nec exempla nobis defunt istarum, quas patimur, cladium: sed ipsi nobis. qui, insito à naturâ vitio, proni semper ad spes meliores. Quas coercere tamen potius sit, & laxiores habenas permittere timori. Non deerit consilium aut solatium illi animo, qui timuit quidquid potuit timeri. Iure à Romano sopho laudatur is versus,

Cuius potest accidere, quod cuiquam potest.

Quem velim impressum tuæ menti, vnâ cum amore mei. Vale.
Lugduni, Prid. Kal. Febr. ∞. IO. LXXXIII.

EPISTOLA XXVII.

Brugas.

LERNVTIO, ET GISELINO.

SALVETE meæ animæ. ita enim meritò vos appellem, quia quamdiu istic fui, vixisse videor: nunc vitâ frui quasi per vmbra. Circumagunt me hæ turbæ in Numidæ morem: & adhuc discurri sine lare, sine certis sedibus. quas tamen positurus in Batavis videor, Ordinum vocatu, & stipendio sanè quàm honesto. Sed temporaneas, non perpetuas: saltem,

Dum hæ consilescunt turbæ, atque ira leniunt.

Aliter

Aliter videtur quibusdam è meis, qui in mutatione hac rerum ad dignitates & splendores vocant. videatur. mihi stat vetus illud decretum meum, reipub. tam confusa non misceri. Orpheus ille vester Lugduni est, & (inuideo vobis hunc risum) partes has simulat, & ambit professionem. Exambietne? non, si Batauos noui: in quibus certè plusculum, quàm pro veteri verbo, auris est & cordis. Eurydice etiam eius hîc. & illa professionem. O Dousa, viuis & Satyrâ non scribis? Sed ridebimus coràm. Ita enim de vobis recepit mihi Winterus vester, adolescens adprobus & perhumanus. Facite, & properate ad hæc Neptunia loca: in quibus ego cû Dousâ tam arctè, tam auide, vos amplectemur, quàm Amymonem suam illeipse Neptunus. Sed hospitium quidem vobis (ita iubeo) apud me erit: familiare scilicet & sobrium, nec propter vos maiorem fumum viciniâ videbit. Properate tantum. quod vt magis faciatis, nuncio accepisse me nunc nuper Lutetiâ à Pythæo Trochaicum vetus, cui titulus Peruigilium Veneris, elegans & scitum carmen, & dignissimum illâ ipsâ deâ. Plura non addo. venite, videte, valete. Lugduni Batauorum, Kalendis Veneris ∞. IO. LXXIX.

Sed heus tu, Lernuti! est quod à te seriò petant mei horti. non magnum aliquid, sed illud idem quod hortus tuæ, Seminari. Itaque siquid semini tibi superest, non illius Plautini (apage nuptiales tuas nugas) sed istius hortensis: quæso, hoc nuntio mitte. Habeo enim & colo hîc in ipsâ vrbe hortum, amicum potius quàm grandem, concessu nostri Hauteni. Pro eo ad Venerem natum mihi herè hoc Carmen. quidni enim friuola mea mittam, vt eliciam gemmulas tuas? Ita callidè captator sum: nec nego.

AD STELLAM VENEREM PRO HORTO.

A LMA Venus, quæ calorum colis ardua templa,
Quæ maria ac terras vitali semine comples:

Quâ sine nec flores hortos, nec gramina campos

Vestierint, neque frugiferas animalia terras,

Quæ've solum pedibus sulcant, quæ've aëra pennis:

Tu dea tu faulrix horrore in cultibus esto,

Adspice quæ meo numen genitale labori.

Nam sine te nil Flora potest, nil flaua Segestis,

Nodu-

Nodutisque herbae pubenti optabile numen.
 Pelle malum virus à floribus, imbricatorque
 Ne noceat Aquilo, neu grando, neu robigo,
 Effice, diua potes. Solis Lunaque potestas
 Te superà: sed consensu tua tertia regna.
 Nec tibi Mercurius certauerit, aut tibi Mauors:
 Ipse tuo fasces submittit Iupiter igni.
 Interea, dum nos fera mœnera militiæ
 Exercent, litulque vocant ad ciuica bella:
 (Patria da veniam) Hauteni securus in hortis
 Ipse habitem, fallatque meos cultura dolores.
 Non ego Bellona sim uictima, non ego Marti
 Miles: nascentique alius mihi risit Apollo.
 Sat patriæ Belgique datum, si fama Camœnæ
 Nostra erit, atque aliquis uenienti Lipsius auro.

* Ad clarem
 rem stelle
 Veneris
 hærefe-
 renda.

EPISTOLA XXVIII.

Herbipolim.

FRANCISCO MODIO S. D.

ERGÓ NE viuis Modi, & nos amas? De utroque enim am-
 biguos reddebant & locorum interualla in quibus agis, &
 silentium quo tam diu non iuste vsus. At nunc emendasti, & lon-
 gâ epistolâ cessationis culpam eluisti in parte. nam totam tum-
 demum, si perseverabis. Et quamquam remotum te doleo seiun-
 ctumque à nobis: tamen quod in iis locis, & apud eum virum es,
 lenit desiderium, gaudium inò adfert. Amo enim, amo, Germa-
 niæ illum tractum, in quo beatè viximus olim ipsi: & gratulor de
 hospite, qui, ut scribis, tam benignus in meliores Musas. Sæpe
 apud notos prædicaui, sed parum credulos, Homines etiam illa
 tellus alit ingenio doctrinaque pares nobis, fide & virtute melio-
 res. Experiris ipse: & magis experieris cottidie, si omisâ inanum
 specie, de re iudicabis ex re ipsâ. Interea vides portum aliquem
 & receptum in his studiis esse, per res afflictas: nec vanum illum
 quicumque scripsit,

* Τὸ τέχνην καὶ τὴν αἰσθητικὴν ἐκπαίδευσην.

Ego quidem auctor tibi sum non commouendi ex iis locis, donec
 Belgio huic fiducia status melioris. Nam nunc quàm fluctue-

* Artē mi-
 nutā terra
 quævis e-
 ducat.

E mur,

mur, vides. Fœdera & domini noui: & omnino aut mutatio, aut interitio rerum. Sed malo aliquid de studiis. Tacitum ad me, siue Eclogas potius tuas in Tacitum, si mittes, gratum: & vtar, non sine memoriâ eius, per quem vtar. Paramus enim iterum vulgare Commentarium nostrum, sed auctiorem. Habemus & libros duos de Venatione iam adfectos, Saturnalium priorum (quæ dilaudas) titulo & exemplo. Sed & de Epistolis meis edendis aliquid cogitabam, si quas colligere aut seruare potui in hoc naufragio nostrarum rerum. Quæ mens iniecta mihi nuper, non nego, per Italos: quorum Epistolas ambitiosè editas vidi, & (liberè dicam) non inuidi. Curenim? A verbis cultas eas censeas? sæpe nec Latine sunt. A sententiis acutas? torpor & tepor merus est. O Italia, vbi Politiani tui, aut Barbari? defecisti. & hoc sæculum ambitionis & fuci aliquid fortasse plus habeat, re deseritur & seriâ illâ doctrinâ. Etiam Agellius nobis nuper in manibus: deposuimus, postquâ aliis audiuius eam esse curam. De Matulis illis & Petreii, iam aliquid inaudiuerâ. sed quid? etiam illæ nitedulæ extrahi volunt è suis senticetis? à me frustra. Tu tantû purga me calumniarû eiusmodi apud Posthium: & animum hunc illi aperiri candidiorem vestrâ niue. De poëtis Germanis aliquid dixi aut scripsi: at non de germanis, inter quos mihi ipse. Fucos & dehonefamenta poëtarum saltem tetigi: quorum fertilis sanè illa ora. Vidimus nos, & vides ipse. Quis non ibi somniasse vult in bicipiti Parnasso? Itaque vates omnes audiunt, & prodeunt: & compiti sublimesque multi cum Cæsareâ suâ lauru. Quos non equidem sperno aut rideo: hoc tantum iis instillo, *Laurigeri multi, pauci Phæbi*. Quin re plerumque didici, minimè re poëtas, qui titulo illo & nūcupatione. Extrema tua epistola pupugit me de M. Antonio. Itane est? abiit? certè doleo. Nam æmulatiunculas illas eius (ita appellare malo, quàm calumnias) nihil moror. Habere hoc scio ista studia, vt nescio quomodo facillè pariant riualitatem. quam ego seriò contemno: sed & hoc mihi seriò dolet, contemni per hanc illa. In contentionibus enim istis quis risus sæpe vulgi? & iure, cum tam pueriliter desipientes eos videant, qui ad sapientiam aliis magistri. Ratallerum Præsidem quod saluere tu patronusque iubetis: ille verò saluus. iam pridem enim à nobis abiit ad beata illa loca: idque præcipiti quodam fato. Nam benè valens

Iens ad curiam cum venisset, subito deliquio animi concidit, nec surrexit. Ita ereptus patriæ optimus ciuis, nobis amicus. Hoc ante septem menses accidisse scitote, & mecum dolete. Vale mi Modi, & magno illi patrono tuo à me salutem. Lugduni Bataur. Nonis Augusti. ∞. ID. LXXXII.

EPISTOLA XXIX.

Hagam.

THEOBALDO TEELINGIO.

APPELLA me verò, & litteris, & sermone: nec excusa. vaco semper ingeniis, quibus discere vacat: quale est, & spero, erit tuum. Hoc excusa, quod ad epistolam profam, carmen non addideris: nam id te decebat. An alienum ab Musis me censebas? non sum. amaui adolescens & nunc amo, & scio eas esse, quæ lato & læto limite ad sapientiam & virtutem ducunt. Lasciua modò caueatur, & obscenæ illius deæ laquei, quos in Musicis illis arbutis sæpe textit. Tu redux, me appellabis reducem, (nam & ipse iam in vltiorem Batauiam excurreram:) & hoc mihi semper gratior, quò maior in te ardor ad discendum. Ætatis tuæ florem cogita, & æui huius fluxum: quodque Æneas ille Homericus aurigæ suo dixit, tibi ego:

Αλλ' ἀγανὺν μάστιγα καὶ λυγρὰ σιγὰ λόβηται

Δέξαι.

Atque vnà salue. Lugd. Bat. postrid. Id. Sextil.

EPISTOLA XXX.

Vienna.

NICOLAO BIESIO *Cæsareo Medico.*

Nos quoque, mi Biesi, Legatum Budensem vidimus. Magna pompa, multi comites: vestis & mores nobis exteris mira. Pellis illa iniecta puerorum anteeuntium humeris, nūquid abest à prisco Scytharum ritu & habitu, qui pelliti? non videtur. Vestis illa laxa à Braccis? nihil. Sed & honoris habendi ritū, quem Cæsari retrogradiens exhibuit (sollemne id genti) odoramur esse à Persis. Ammianus suggerit lib. xviii. de Antonio quodam, qui transfuga ad eos eorumque mores: *Simul hoc dicens è medio prospectu abscessit, nō aduersus, sed dum euanesceret, verècundè retrogradiens, & pectus ostendens.* Garritum hunc præmisi. plura, si voles, in cænâ: ad quam bonâ fide me sistam. Salue.

* Verum,
age, nunc
manibus
flagrum &
splendemia
fræna Ac-
cipe.

E 2

EPI-

EPISTOLA XXXI.

Hagam.

THEODORO LEEWIO S. D.

ITA certè oportuit. in viam, inquam, officij redire, à quâ exorbitauimus vterq. nimium diu. non negligentia aliquâ, vt scio, aut contemptu: sed fortasse dulcedine cessationis, & fiducia amoris. Id enim de me fateor; de te opinor. Quin sæpe sic afficior, vt quemadmodum mulieres quæ vterum ferunt ad omnia nauſeant: sic mihi nec scribendi libido vlla sit nec legendi. Mare quoddam mortuum esse aiunt, sine vento sine motu: sic sæpe ego. Sed tu me excitasti: præsertim illâ parte epistolæ, quâ consilium à me petis de summâ vitæ. Deliberas de coniugio, aut cœlibatu. Difficile mihi sententiam interponere, præiudicio iam panè deuinctam. Vides enim quid ipse fecerim. Ita nisi à coniugio dixero, damnum me ipse necesse est aut inconstantia aut erroris. Sed seponam tamen paullisper eam cogitationem, & de totâ re videbo quasi liber & exsolutus. Ac principio coniugium si quis damnet, impius sit in vtramque legem, & ciuium & naturæ. Stare genus humanum non posse omnes scimus, sine viri mulierisque cœtu. Non ergo vniuersè id quæris, credo, an coniugium probandum: sed strictius, an sapienti, an hoc tempore, an tibi. Sapientia studia & vitæ quietem si sequeris; nescio an ducenda vxor. Exempla vererum sapientium in vtrumuis sunt: ratio magis est vt neget. Si enim liber animus, Deo & sibi vacans, ad sapientiam & tranquillitatem requiritur: non video quomodo adsumenda illa cura, quæ noctes diesque adhæreat, angat, coquat. Si satis molestia in te tuisque cupiditatibus regendis, fruendis: quid aliunde accersis, cui imperes & moderare? Cymbam nostram difficulter gubernamus: ecce nauim adiunctam volumus cum tot armamentis? Et fero adhuc, si reges. sed quid si regere illa vult? si fulmenta lectum scandunt, vt vetus verbum est? quid? nonne bellum tibi non ciuile, sed familiare sumendum est de principatu? At enim moderatam audientemque tibi speras. Ita censeo & opto. sed quâ in re vnquam magis spes & vota fefellerunt? An ex composito illo vultu, oculis, verbis, toto corpore ad modestiam ficto, vxorem eliges? crede mihi, nulla fides. Proprium hoc & velut innatum illi sexui, vt crudæ adhuc & vix pueritiam egressæ simulent, fingant,

gant, fallant. At enim fide & commendatione aliorum, inquires. Nolim equum sic emere aut agrum. Et quâ in re libentiùs aut minùs cum periculo fallunt amici? Si in equo aut agro imposuerunt, expostulandi mihi saltem ius est. at id non in isto. Canetur tibi illud comicum, *Habeas ut nactus*: & querelæ tuæ in ventum ibunt, imò in irrisum. In genere hoc prædixerim de sapiente: iam tempora ista videamus. Si res latæ & proluxæ: magis ferrem te ligari hoc nexu. Nempe publica solarentur: nempe in spem honorum & felicitis æui liberos susciperes, educares. At nunc quid nisi communes calamitates & bella? ne domi tu quæras. Quid nisi exsilium, exitium, imminet, & mutatio vniuersi status? ne ad aureum sæculum liberos procudi à te censeas. Denique te ipsum (quod tertio posui) intuere. Animus tibi ingenuus, & corpus: id est vires valerudoque parum firmæ. Ætatis quidem bona pars superest, sed & bona elapsa. Ingenium tibi cômè, molle, quod ferre iniuriam potius possit quàm inferre. Hæc omnia vide sis an apta ad mores famineos nostri æui. Et Diogenes quidem ab omni ætate coniugium remouebat, satis scitè. Nam iuueni, in- quiebat, nondum ducenda est vxor: seni nunquam. Græcè hoc sonat meliùs, τῶν νέων μὴδε πώποτε, τῶν γέροντι μὴδε πώποτε. At ego certè non vanè id restrinxerim ad statum mediumque hoc æuum, quod velut vinum iam deferbuit; & quale, mi Leewi, est tuum. Hæc in parte vnâ dici possunt, nec pauciora in alterâ: quæ quoniam scio subiici & à te tibi & ab aliis cottidie, laborem non sumam in iis recensendis. Eò minùs quòd frustra scio suaderi coniugia aut dissuaderi: quæ à cælesti nutu & à fato haud vanè esse dicuntur. Bene Euripides,

* Εὐνὴ γὰρ ἀνδρὶ καὶ γυναικὶ μορσίμη.

Idque didicimus nos ipsi. Bina Socratis monita tantùm addam. Primum, iuuenes cælibes similes esse piscibus qui alludunt circum nassam & gestiunt inire, contrà, qui iam inclusi, exire: simile in matrimonio esse, quod ambiunt liberi, damnant capti. Alterum, Sciscitanti cuidam Vxorem an non duceret? Vtrumuis, inquit, feceris, poenitebit. In quo verè oraculo concludo, & ambiguum te sententiæ meæ relinquam, non amoris: qui tam verborum à me Epistolam expressit. Vale.

* Fata is
est viro at-
que fami-
na liberis.

EPISTOLA XXXII.

Lutetiam.

IOSIAE MERCERO S. D.

AD me verò sæpe eiusmodi muscæ aduolent (ita per iocum te appellas:) imò apes. quoniam tu & litteræ tuæ plenæ suauitatum & meri mellis. Ipsâ quidem causâ scribendi quid mihi gratius? Appetere te amicitiam meam: quæ si vltro offerenda sit tam benè natis ingeniis, nihil abeam à decoro. Tu tamen anteuertisti. etsi non ignotus planè, vt ais: quia famæ aliquis radius te quoque illucet à magno illo patre: cuius eruditio, & virtus clara apud omnes. Et tu succedes, imò præcedes: si pergis modò in hoc laudis stadio, quod currere cœpisti recto & felici pede. Nam notæ tuæ ad Cornelium nostrum quas mittis (verè non blandè dicam) vix tuæ ætatis. Maçte hoc acumine! quod vide te quæso ne ambitio deprauet aut calor. Nam illud nisi ad rectum maturumque iudicium dirigis; nocet, non iuuas, & infligis scriptoribus vulnera, non fanas. Nos Tacitum vulgare iterum paramus, cum Commentariis nostris (siue Notæ erunt) ad omnes libros. Nam priores fanè illi ad Annales refingendi etiam sunt: quia & lapsus alibi sum, & quædam mihi elapsa. Cur negem? semitam sæpe ingredior, cum maximè cenſeo viam: & gratiam seriò habeam, si quis corrigat, dirigat, reducat. Ad P. Pythœum litteras iam nuper dedi. accepitne? inquire obsecro. Nam ipse quidem ſilet: at non in illum meus amor. quod indicabis, & salutem à me nunciabis ipsi & fratri. Vale. Lugduni in Batauis. Idib. Martiis. ∞. Id. LXXXII.

EPISTOLA XXXIII.

Gandauum.

ALEXANDRO RATLO *amicissimam salutem.*

LECTIS litteris tuis, mi Ratlo, & dolui dolorem tuum, & gauisus in constantiâ sum: quòd videam te quæ eueniunt ita ferre, vt ferenda humana sunt, & vt dignum est iis sapientiæ studiis quæ tractas. Nam reuera hæc bella, hæc turbæ, hi discursus, quid aliud quàm ludi? cruenti fateor, sed tamen ludi, quos instruit ambitio & sæuitia nostrorum regum. Itaque non ferenda solum ista, sed ridenda. Et vidēsne cum nuces sparguntur, vt currant pueri, & rixentur? idem isti, qui oppida & arces rapiunt, diripiunt,

ripiunt, alieno malo & suo nullo bono. Atqui ea ipsa quæ tanti faciunt, propter quæ sudorem sanguinemque fundunt, si dimotâ vulgi nebulâ consideres, nuces sunt. Quare mi Ratlo mittamus ista, & habeamus eo loco quo sunt: id est, pro nugis. Ad nos redeamus, & ad eum quem dicis *παραγωγὸν λείπον*: in quo solo quies & tranquillitas firma. *Cetera fluminis ritu feruntur*, vt canit Poëta ille inter verè sapientes. Senecam nostrum tibi placere ex animo gaudeo. Scio non alios è priscis magis consentire cum Christianâ pietate, quàm eos qui è Stoicâ domo. In quo numero etiam Arrianus est, qui digessit Græcè dissertationes Epicteti, mihi valdè probatas. Quare, moneo, & lege. Nos hîc turbæ iterum exercent, quæ sub discessum tuum sopitæ. Sed sopitæ tantum. nam euigilant iterum & viuunt, metuo ne in reip. malum, & scholæ nostræ exitium. Nisi fallor, ea imminant, vt nō discessisse à nobis videre, sed nos præcessisse. De Gallis mihi quidē ænigmata. Veniunt; non veniunt; volunt; nolunt: audent; timent; & omnia ancipiti metu suspensa & suspecta. Turcarum princeps aliquid in Africâ mouet: & aget is saltē bonâ fide. Mitto ad te Saturnalium meorum primam partem De Gladiatoribus, vt videas cruentas etiam illas in pace pugnas. Salutem quibus dici voluisti, dixi: iidemque te resalutant. de patris tui morbo doleo: quem à me saluta, & tu Vale. x. Kalend. Feb. ∞. IO. LXXII.

EPISTOLA XXXIV.

Briggs.

IANO LERNVTIO.

SPES iterum me fefellit. quid fecimus, quod totiens in nos vana ista dea? Mercurialis ille hodie ad me rediit, negauit posse. Rem dicam? poscere volebat, nec audebat: quia collybum vulgò iam dinumerant trium florenorum in centenos. Id lucellum inhiabat; nec petere scilicet ab amico volebat, nec ego dare, te inconsulto. Tu dispice illic. aut, si vis, Atuaticum excurrere: in hoc statu abeuntium, redeuntium, transferentium, reperies qui velit. Loquere cum Moreto, efficaci ad res tales. Sed quid me celasti? tunc Grudios? Peream, nisi adprobo: ad quietum locum, amœnum, & quod caput, amicum Paci, & eximium à milite ac Marte. Si expedire te vinclis possessionum tuarum potes, abi,
curre,

curre, vola. Ego nōne aliquando vicinus? Si dī me, & mihi Isca-
num meum seruant; quam sedem destinaui reliquæ huic vitæ.
Cum lege, si securitas illū; si status, quem Modestia & Probitas
non spernat. Parēre boni possunt & debent; seruire, ancillari, adu-
lari, non nisi vitiorum ancillæ. Valeat autem æternū mihi pa-
tria, si valebunt in eā ista. Tu quoque, mi Lernuti, (sed ab aliā
mente) mihi vale. 1. Octob. ∞. Id. LXXXV.

EPISTOLA XXXV.

Antuerpiam.

FRANCISCO RAPHELENGIO.

DILATVM mihi responsum ad superiorē epistolam tuam,
non dimissum. Dum enim cottidie discessum sororum
tuarum exspecto, atque aliud ex alio interuenit; septimanæ ali-
quot in hoc silentio exactæ, vt vides. Ceterū grata mihi tua scrip-
tio, vtī & amor: cui à me cum fide respondebo. Filius tuus in
studiis perseuerat, & effecimus ne quid Typographia auocaret
illum aut impediret. Cursum certē hunc studiorum interpellari
aut fisti, non erat ē re eius. De filio altero tibi agnato gratulor.
etiam filius tuus, vt videbis ē carmine Genethliaco, quod credo
illum iam misisse. In Constantiā nostrā pergimus: sæpe negotiis,
sæpe valetudine retardati. Iuuat tamen opus, argumento saltem
vtile futurum hodie multis. Nubem enim hanc temporum vi-
des: nec Solem aliquem qui pellat. Ille quidem Gallicus, qui
DISCVSSVRVM se promiserat, videtur FOVISSE. Et Austri isti
cum Circiis mixti & iuncti, vereor vt dent mage maiores tempe-
states. Omnia hodie Principum, infida, intuta: nec veri solatiij
vsquam spes, quā in se cuique. Firmemur iam antē contra hæc
omnia, quæ euenire homini non solum possunt, sed communi
quadam lege debent. Ciceronis falsi Consolationem vidimus.
quæ me quidem adeo non erigit, vt deiiciat potius. scripta videli-
cet frigide, solute, & verbo dicam, ineptē. Quis ille tam stultus,
qui sperauit se posse imponere nobis falsā hac personā? sub quā
latet aliquis ne superioris quidem, vt suspicor, æui. Bardi Typo-
graphi, qui tam ambitiosē hæc diuulgant! Sed credo in nostrum
risum, & suum quæstum. Valdē me Ciceronis pœniteat, si ille
vel in medio dolore tam elumbis. Nusquam nerui, nusquam sen-
tentiarum

tentiarum sanguis, ne color quidem verborum, nisi cum cerussâ & fuco. At tu vale, & me ama. Delphis. Huc enim sorores tuas abeuntes deduximus. III. Idus Septemb. ∞. IO. LXXXIII.

EPISTOLA XXXVI.

Viennam.

IOANNI SAMBVCO S. mitto.

DIV mihi nullum alloquium apud te, ne per litteras quidem. causâ & temporum horum, quæ nos turbant: & locorum, quæ seiuungunt. Nam nos, ut audisse te credo, in Batavis agimus apud Oceanum verè vndosum: & iactamur ciuili tempestate, tibi non ignotâ. At nec loca tamen nec tempora gratam mihi memoriam Sambuci excutiunt: quam testari volui per hanc occasionem primò nunc datam. Qui enim illuc viam affectaret, præter hunc adolescentem, nactus sum neminem: & nuncij illi ordinarij, ordines deseruere per hæc bella. In studiis, dum Mars hîc feruet, languidè versamur. ita tamen, ut cogitemus editionem nouam Taciti, cum pleno iustoque Commentario in eius omnes libros. Eâ in re iuuari me à te posse sentio, vsu libri manuscripti quem memoriâ teneo Viennæ olim vidisse. non illum quidem antiquissimum: sed è quo tamen non dubiè aliquid eruamus, & Criticâ istâ sagacitate indagemus. Quare si cum ad tempus gratificari mihi volueris, amorem in me ostenderis, & simul morem tuum tenueris rei litterariæ adiuuandæ. Videtur sub has nundinas tutò transmitti ad Plantinianos posse: quibus mandata dedimus accipiendi, adseruandi. Velim voluntas tibi & occasio in mittendo non desit: nobis fides constabit in remittendo. Saluè ab eo qui meritissimò te amat, Iusto Lipsio. Lugduni Batauor. Kal. Martiis. ∞. IO. LXXXIX.

EPISTOLA XXXVII.

Hagam.

THEODORO LEEWIO S. Dico.

SEMPER amo litteras tuas, præsertim eas quibus (ut sic loquar) nota aliqua impressa est bonæ mentis. vel hæc postremæ quàm sine adfectione prudentes! quàm verè Philosophum referebant, & sine vlllo fuco! Itaque ut calebant adhuc à meâ nuntiâque

F

tîque

tuique manu, iis rescripsi. Melonis tui odor vel hucusque nares meas adflavit. & mentior, nisi saluam mihi mouet & desiderium gustandi. Sed cohibe tamen. & vide ne gnatum illum, qui vnicus nobis, nimium properè auellas à matre. Auster saltem & imber hic abeat, & soles aliquot videat puriores. Tum licebit

Extremum hoc oculis lumen radiatum rape.

De Alenconio meherclè quid dicam nescio. ita anigmati similis res est. Venit, nō venit: accessit, recessit. Credo non illum Callipidem, qui prouerbio locum fecit, tardiùs ambulasse, quàm hunc subnixum tor equitum alis. Nec aliud tamen adhuc audimus quàm, Veniet. Si seriò hæc aguntur, facilè præfagio difficile & diuturnum bellum: cuius exitus Deo in manu est. Ad nos quidem quid ista? non magis quàm si Æthiopes inter se belligerent, aut noui Indi. In animo nobis pax sit, cum affectibus concordia: & ecce omnia tranquilla. At enim patria periclitatur. Fateor. sed quis nostrum iter præcludet publicis fati? Habent ista transitus suos, imò interitus: quorum tēpora cum venerint, nulla vis aut consilium ea firmet. Et tamen illi ipsi patriæ, cum res feret, non manu non mente deerimus: atque hoc scilicet agemus, vt non solum boni viri simus, sed & boni ciues. Vale mi amicissime. Lugduni Batauor. xv. Kalend. Septemb. ∞. Iō. LXXXI.

EPIST. XXXVIII.

Rostochium.

IOHANNI IONSTONO SCOTO.

QUOD & me amas, & Constantiam meam laudas, mi Ionstone: alterum valdè amplector & approbo, alterum timidè, quia scio reipsa non attingere me culmen hoc laudis, in quo collocat me tuus affectus. Etsi tamen nonnihil blanditur quòd David Chytræus (quis ille vir?) pariter tecum, vt ais, siue iudicat, siue errat. Quidquid huius est, amo iam amo Constantiam meam, quæ tam multos mihi conciliat amicos. In quo numero vt fidenter te deinceps censeas, mi Ionstone, iubeo, non solum rogo. Quòd si Deus mihi tangere & videre Germaniæ solum iterum dederit (fiet fortasse voto citius, vt res hinc fluunt) te videbo, & dexteram iungam tesseram Fidei & Amoris. De Carmine gratiam tibi habeo, magis magisque habiturus, si crebrò me epistolis

stolis tuis salutaueris, in quibus notas claras video elegantiae prae-
sae & doctrinae. Lugd. Bat. xi. Kal. April. ∞. Id. LXXXVIII.

EPISTOLA XXXIX.

Lutetiam.

IANO GVLIELMIO S.

LIBENS vidi Quaestiones tuas Plautinas, mi Gulielmi: in
quibus non doctrinae solum notae vberes & actis cuiusdam
iudicij, sed etiam amoris in me tui. Partem enim mihi inscribis.
cum magnâ meâ gratiâ (liberè profiteor) vel quia scriptoris eius
res est, quem amo vnicè, vel quia beniuolentiae hoc testimonium
me delectat ab eo quem aestimo, quemque amo. Ego profectò si
vnquam occasio erit, praestabo me ad gratiam referendam non
modio sed horreo toto. At in libro eo tuo, magnae mihi voluptati
non semel interpositum iudicium, de studio Sapientiae & Mo-
rum. Maeste hac sententiâ! Obsecro enim, vt quid ista humanita-
tis studia tam ambitiosè adfectamus, tantum propter ipsa? Ab-
utuntur plerique ad malam & vanam pompam, vt scis, verè cum
Appione, cymbala quaedam inanis iuuentutis. Tibi melior, vt
video & gratulor, mens: atque vt porro sit, quaeso & horror. No-
strum illud de Constantiâ cenfeo vidisti. nunc damus De Am-
phitheatro, & cis paucos dies habebis: etsi opus ludicrum, & na-
tum mihi per remissiones, vt stilus ipse indicabit. Dedi litteras
ante septimanas sex ad Egmondum, quibus inclusae alterae ad
Busbequium de te, imò pro te. quid iis factum, nescio. quia ha-
ctenus nihil inaudiui. Quaeso inquire. Ille quem tangis, quid &
vbi agit? Vtinam in gratiam cum virtute redeat! nam mecum
tunc vt volet, & quando volet. Busbequium si conuenis, sa-
lutem illi à me dicito: & è iuuentute selectâ, Iosiae Mercero, si
nostri. Passeratio item doctori publico, & si quibus aliis ex eo
numero procerum innotuisti. Vale.

EPIST. XL.

Brugas.

IANO LERNVTIO S. D.

CISTAE tuae hesterno die ad me perlatae binæ. hoc ante
omnia scire te volui: sed perlatae benè madidae per conti-
nuum imbrem. Itaque valdè veremur, si quid in iis sit, quod pe-
riclite-

riclitetur ab vdore, ne putifcat. præsertim si quid è lino aut lanâ. Cõgitet tua vxor: & si videtur, aliquem fidum huc mittite qui inspiciat, aperiatur, euentilet. Nos quidem amicâ & sedulam omnem operam custodiamque pollicemur: quantum id pote. Collocabimus etiam eas bono & aërio loco. Scripsi bis ante septimanas aliquot, & valdè fallor si meas non accepistis. Carmina tua adhuc apud me sunt. Doufam enim exspecto in horas, cui velim ostensa. Ego, nisi quid interuenit, intra septimanas duas aut circiter Antuerpiæ ero. velim sanè te videre & amplecti: & si illuc venis, posses mecum redire in Batauos. Ita ipsum iter nobis non sine gaudij & amoris fructu. De Giselinî re, omnia hætenus nequiquam. & nonnihîl turbellarum inter Magistratum & Curatores, occasione professoris cuiusdam admissi Senatu inconsulto. Priuata profectò & publica turbant. quid refert? si quies modò apud nos & in hoc animo sit: ex quo puro siue impuro, liquidum omne aut turbidum manat humanarum actionum. Vt in corpore ægro & corrupto, quidquid infertur, alimentum est morbi, atque abit in noxam: sic in homine, qui internum illud non depurauit. pectus dico, fontem & originem cupiditatum. Opes adfluunt? auaritia te torquebit, & angor seruandi, dispensandi. Desunt? inopiam non feres, & quæres eas per vendas & per ignes. At modus ab animo petendus est: cui composito semel & securo, numquam superest aliquid aut deest. Sola, mi Lernuti, quies est & internæ illæ opes,

* *Quis
recte viuunt
homines,
dixit p
tatur.*

* *Οἷον τ' εἶ ζωῶσι, καὶ ἀρνεῖται καλέον,*

vt ait Homerus. Vides philosophari me tecum: nec excuso. amplius dico, Sæpe faciam. Valdè enim te tuamque egregiam naturam trahere ad hæc alta velim (quò scio propendes:) & collocare te supra hominem etiam dum es in humanis. Et enitèris, si nitèris. Vale, & salueat à me virorum optimus noster Giselinus, à quo responsum exspecto, sed non lentum vt solet. Lugduni Batauor.
III. Non. Feb. ∞. IO. LXXXIV.

EPISTOLA XLI. Pontem-Museum.

GODSCHALCO STEEWECHIO S. D.

M I H I & scriptio tua grata, & magis Coloniam reditio: quam extra noxâ fuisse gaudemus, etsi non extra merum.
Scimus

Scimus quàm intuta viâ his temporibus: quibus ad iniuriam omne ius prædonibus non militibus, dant hæc latrocinia non bella. Tu quoque gaude, portum enim iterum attigisti, in quo acquiescere possis, Musarum suauiter aspirante aurâ, sine vento vlllo aut nimbo ciuilibus huius tēpestatis. De promissis Plantini, securus es. hominem nō nosti, si ambigis: & credi illi potest, tanquam Fidei ipsi. Nec tamen deero submonere, cūm redierit: quod fiet cis paucos dies. De Modio, certè amicus ei sum. (ingenium & adolefcens eius virtus ita merentur.) ac valdè auctor tibi, sic rem in scriptis tuis temperes, vt nequâ parte eum aut stringas aut lædas. Lædas autem? laudes inò volo. Ita de illo ipso Vegetio meruit: & se pone mihi sodes omnes istas æmulatiunculas, quæ intercurrent hæc studia malo iure, malo more. Inuidet quispiam? hoc ipso inferiore se ostendit. quia apud humiles dumtaxat animos habitat, & in altos dirigitur liuida illa dea. Sed tu non talis. moneo tamen vel ex superuacuo, quia peccatum hoc in litteratorum nostra gente peccatur hodie nimium crebrò. De Vegetio ipso sic sentio. scriptorem non malum potius, quàm bonum esse: & hoc tamen quod in eo boni, deprauatum & pollutum à patribus variâ labe. Creber enim in illorum manibus: quæ nec innoxia vsquequaque, nec puræ. sed nec oculatæ. Itaque non iniuria ad purgandum eum tu Modio nostro velut optio succedis: & opto vt cum publico fructu, cum tuâ famâ. Quod fiet, si stilum manumque modestiâ quâdam temperabis & diriges: malisque ambigua quædam vlcera relinquere, quàm districtè auferre omnia & præcipiti quodam ferro. Medicos in Criticâ istâ ferre possum: sectores ad Matrem deūm ablegem, procul à virginali nostro choro. Vale mi Steewechi, & mutuiter me ama. Lugduni Bata-nor. Postrid. Nonas Octob. ∞. IO. LXXXII.

EPISTOLA XLII.

Vltraiectum.

THEODORO CANTERO S. D.

ITANE Dalius noster abiit? abiit, non visurus ampliùs, non videndus. Sanè dolui: eo magis, quòd subita illa plaga, & præter exspectatum. Nam lethalis quidē ille morbus (phthisis enim vera erat:) sed quis putasset tam præcipitis eum fati? Trahere, vt

scis, plerumque solet, & lento passu ducere ad Orcium illam thesaurum. Sed nimirum ut nauim interdum improuisus vortex absorbet: ita homines nigra dea. & præsertim eos quibus indoles melior, & ingenium supra annos. Quod in Dalio planissime fuit. Claudium Quadrigarium scribere memini: *Hæc maxime vexatur deorum iniquitas, quod optimum quemque non sinunt inter nos diurnare.* Aptè & verè. nisi quod iniquitati impiè tribuit, quod est æquissimæ æquitatis. Cur enim cælestes illæ animæ diu in hac facce: abeant imò, & euolent ad suum cælum. De Arnobio, vrge cœptum. Quis post Tertullianum inter sacros scriptores doctior: ideoque doctorum limâ dignior? Etsi bona sanè in eo opera Gelenij: quamquam interdum (quis non Criticorum?) exeret per acumen nimium aut calorem. Satyram quam vulgari his diebus, en tibi. Nomen te terret? frustra. edentula est, &, ut antiqui nostri loquebantur, planè innox. Lasciuia alibi agnoscas, nusquam morsum. Artemidorum tuum totum auidè legi, & velut *ἀνὴρ*. Nescio quomodo non sperno totum hoc diuinare (id quoque fortasse à nostrâ porticu:) & eam rem visus mihi ille commodè & acutè tractasse, ex ipsis fontibus naturæ. Salue. & salutem à me, ut Comicus noster ait, plenis faucibus propina Lamberto Burchio Decano, viro qui litteras & litteratos vnice amat; ideoque digno qui ab iis vnice ametur. quod me bonâ fide facere ei nuncia, imò sponde. Lugduni Batavorum, quo die Cæsar olim in Curiâ Pompeij. ∞. IO. LXXXI.

In Arnobij tui isto loco, libro I. *Et tamen, ô isti, qui pollutas res nostras vitiorum criminamini: sribiligines & vos istas in libris illis maximis atque admirabilibus non habetis? Nonne aliud hæc vtria, aliud dicitis hos vtres? celus, & celum? non item filus & filum? crocus & crocum? fretus & fretum? sanguis & sanguen?* Odoror duplex vitium. Ac primum scripserim, *res nostras vitio verborum criminamini.* Fugit enim omnino prior illa verbi syllaba, retrahenda ex Arnobij ipsâ mente. Hoc scilicet politi illi & docti Romani obiciebant nostris, *solæcismis obsitas res nostras, vitiorum deformitate pollutas*, ut ipse præmisit. Respondet: variari sermonem pro arbitrio, & illos ipsos veteres à talibus solæcismis non absuisse. Nam, inquit, *aliubi hæc vtria, aliubi dicitis hos vtres.* Ita enim alterum vitium tollo; *Aliubi*, inquam; scribo, non *Aliud*. Clamat res, & sequentia

quentia exempla. An enim aliud sanguis, quàm sanguen? fretus, quàm fretum? Minimè. Variatum tantum licenter genus ostendit, & modò Vires positos *ἀντὶ τοῦ ἀσυνέτου*, modò Vtria. Ecce in Nonio: *Vires usu generis masculini tantum. Neutri, Linus Andronicus: Flacci teget vtria.*

EPISTOLA XLIII.

Hagam.

THEODORO LEEWIO S. D.

TE verò laudo, nō imitaris meam pigritiam, & quanquam ad binas tuas iam filui, tamen tertiis etiam laceffis. Et si, mi Leewi, nulla hīc pigritia. ignoscas aut miserearis potius, si scias quàm per omnes hos dies distrahar & distinear negotiis nec feriis nec bonis. Amici & alieni adpellant, interpellant: ad conuiuia vocant. & hoc putant comitatem, auferre mihi vsum veræ vitæ. Pareo tamen, & quamdiu in hoc profcanio sum, sustineo personam. Mallem ad interiora illa gaudia diuertere, studia dico & sapientiæ exercitationes: à quibus non per hæc solum acerbissima tempora, sed etiam latiora, veros petam quietis & gaudij fructus. Sed differo sæpe illa, non dimitto: quod tibi etiam vsum venire certò scio. Plantinus nunc adest. seriò à me monitus de Thalete illo Gallico, seriò ad suos iterum scripsit. & illi responderunt iam Lutetiā se petiisse, apud nos scilicet sapientia illa non habitat. De adolescente quem nuper mihi commendaras: scis quàm omnia velim tuā causā. Hoc tamen nolo. & si rationes omnes meas audias, scio, ipse non velles me velle. Multis iam recusavi. quos omnes offendo, si vnum admittam. denique rimam aut fenestram hanc si aperio, toto ostio admittēdi alij sunt. Quies autem mea id non patitur, & ratio vitæ quam per silentium ago. Petò ergo vt id excuses: & maiora aliqua à me petas, cum opus erit, non neganda. Institutum tuum de omisā domo, hactenus probò si in eo perseveras. Semel enim constituendum est quod vitæ genus eligas, solitarium an sociabile, illud cum paucis & sapientibus quos melior Deus adspexit, commune tibi futurum; hoc, cum multis. Et vtrumque tamen illi rectum, qui incommoda vtriusque fert. nam vt omnia tollas, vanè cum vulgo speres. Siue vxor ducitur, siue omittitur: habebis quod doleas, quod querare.

* Ita indiget
getau Mi-
chaëli Mō-
rani librā
Gallicum
Gustum
titulo: pro-
bum, sapiē-
tem, &
valde ad
meum gu-
stum.

querare. nec in hac omni vitâ tam optabile aliquod bonum est, quod non mixtum poculo aliquo mœrorum. Hæc publica & æterna lex: cui, improbus & refractarius est, quisquis repugnat. Ut athletis olim fors non electio aduersarium dabat, cum quo certarent: sic cuique nostrum vitæ suam conditionem fata, cum quâ luctemur. Hanc vincere oportet, id est ferre. Huius enim pugnæ robur omne in patiendo est, & victoria in cedendo. Res publicæ non in bonâ spe. Præcipue aliquot Flandriæ & Brabantia: vrbes nauseare incipiunt, & fastidire præsentem hunc statum. siue diuturnitas belli id facit, siue gubernatio non vsquequaque inculcata. Consilia arcana agitare dicuntur de paciscendo cum hoste. quidquid horum est aut erit, nos pessima timere nihil nocuerit: & ut pugiles, iam nunc parari ad strenuam cum omni sorte pugnam. Paupertas imminebit? exsilium? carcer? proponamus interdum animo has imagines; & persuadeamus illi quàm nihil in his aut certè non multum mali sit illis, qui mala ea non putant. Reuera enim ut opinio diuitias bonum fecit, sic eadem inopiam malum. Sed hæc facilia dictu videntur: fortassis etiam factu, si quis conetur. Nunc plerique eò stultitiæ venimus, ut nec aspirare audeamus ad bonam mentem. Sicut ij qui phrenesi laborant, irrident aut verberant suos medicos: ita nos. Vale. & me amantissimum tui, ama. De hortulo tuo nihil narras noui. meus in eadem causâ. qui iam pridem animam agit, aut potius egit. Credo enim per huius ipsius diei æstum ablatum illi omnem succum & vitâ. Hoc quoq; feramus. Leidæ. viii. Kal. Iun. ∞. IC. LXXXIII.

EPISTOLA XLIV.

Antuerpiam.

GASPARI SCHVERMANNO IC. S. D.

LITTERAS tuas, mi Schuerimanne, libens vidi: at nondum sororem. quam ne frustra mihi commendaueris efficiam, si quâ in re operâ meâ illi vsus. Constantiam nostram quod laudas amasque, gaudeo: complecti magis te velim & amare virtutem ipsam. quâ certè in omni æuo, & hoc nostro imprimis, opus. Hostis, ut audio, vicinus vobis, perfidiâ eorum in quibus numquam fuit eritque fides. qui ut trutina in eam partem vergit, in quâ plus ponderis; sic ipsi in eam, vbi plus æris. Pestis iam olim & calamitas

tas nostri fundi. sed qui auertas? cūm etiam nunc immixti nobis, nec longè à clauo, quibus idem morbus. Ambitio aut Auaritia multa regna & opida euertit: vtinam ne vtraque hunc Belgicæ statum! Hortaris me vt iuuem. votis possum, non consiliis. quis enim audiet? Publicè dico. at priuatim si quosdā possum erigere, & in singulis ciuibus de totā patriā bene mereri, non immunis hæc mea quies. Conati id sumus in postremo hoc scripto, & conabimur porro, si Deus mihi dat vitam. Nam otium ipse mihi parabo, etiam in æstu negotiorum. Gabrieli Roelandio adfini tuo velim ex me nunties beneuolam salutem. Verè eum amo & æstimo inter paucos meos Belgas. Vale. Lugduni Bat. postridie Non. Nouemb. ∞. IO. LXXXIII.

EPISTOLA XLV.

Toletum.

ANDREAE SCHOTTO.

CARVISSE me alloquio litterarum tuarum tamdiu, mi Schotte, non re solū, sed cogitatione molestum fuit. Illud, quia priuari voluptate eā mihi durū: istud, quia trahebatur animus hoc silentio in varias suspitionum partes. Quid censerem? mutatum esse te? nō fidei tuæ videbatur, non amoris. Offensum? verebar. utiq; cūm oculos flecterem ad illum, qui non mihi, non bono cuiquam bonus. Sciebam litteras te crebrò commutasse cum eo & sermones: sciebam & hominem duplicem, cuique (sed non mente Ennij) *plures lingua & plura corda*. In aliis didici, quā illi volupe disiungere & soluere, qui mihi iuncti. At rursus tuæ prudentiæ videbatur, non temerè ei credere, qui aliarum rerum apud te sæpe vanus. Et, vt video ac gaudeo, haud planè credidisti. Litteræ hæ tuæ mihi testes, scriptæ ex veteri more & amore. nam binas alteras, quas dedisse dicis, non vidi. Istæ me delectarunt; & te mihi restituerunt, me tibi. De mansione in Tolentanā vrbe & in illustri dōmo, gaudeo. eò magis, quoniam splendorem hunc cum fructu video, nec interiora illa tua studia interpellari aut abrumpi. quod sæpe in illis aulis. Senecam patrem quod paras, approbo. Vnicè me sapientia in filio delectat: in patre comitas, lepos, & facundia quædam simplex. Sanè Controuersiarum illi libri mirificè non corrupti solū, sed abrupti.

G

Atque

Atque opus in eliminandis ingenio meliore, sed inprimis libro. quem valdè veterem & integrum si repperisti, vt ais, apud Couarruiam; vt ere sodes, & adnitere. nos iuuabimus in parte. Nam quæ notata mihi, quidni transmittam libens? De Lanoij nostri morte, valdè mihi acerbum. Amabam adolescentem altæ indolis, niuei pectoris: & destinabam eum olim in corruptâ hac nostrâ nobilitate velut gemmam. De Papio etiam, vt video, inaudisti: qui merfus Mosâ flumine, dum in eo iuueniliter ludit & natat. Sed hæc tristitia. illud lætius, quod amicum mihi te interprete & tanquam parario conciliatum video Ant. Couarruiam, virum à stirpe, à fratre, à se verè illustrem. Deus bone, quæ illa ad me epistola! mentior, si ab aliquot annis litteras vidi magis litteratas. Imbutum profectò arcanâ doctrinâ pectus illud oportet, quod promit tam docta. Quidni *in* iudicem? facilè nobis ἐν τῇ κριτικῇ δὲ τὸ ὕψωμα γινώσκων. Veterani venatores ceruum ex impresso vestigio dinouerint: ego ex scriptiuncula virum. Saluta quæso à me: & quoniam te ferente & sub tuâ velut manu hæc amicitia surrexit, effice vt eodem te irrigante, augeat & crescat. Libellos nostros misimus, & in his Electa: in queis reperies amicam memoriam tui. Iure. quia amamus te, & æstimamus: quod velim à te mihi fieri, alterum certè. Vale Nonis Iuliis. . ∞ . Id. LXXXII.

EPISTOLA XLVI.

Vltraiectum.

EVERARDO POLLIONI S. D.

LITTERAS tuas & adiunctum carmen, Euerarde, legi libens. Alteræ memoriam mei; alterum diligentiam tuam testabatur: quam te non remittere in ipsis remissionibus, lætor. Et ita te dignum est. quid ætatis sis, vides. in hoc vere, nisi virtutis doctrinæque feceris sementem, frustra cùm ætas erit, expectaueris fructum. Indoles tua ingeniumque ad alta te vocant, & sæpe Homericum illud instillant. — Πανταίης ἀρετῆς μινῶσκει. nec nos monitores tibi defuimus aut doctores. Nisi sequeris & adsequeris, præter ipsum te, quem culpes? Feriæ nostræ finem habent cum ipso Caniculæ fine. Sub id igitur tempus te expecto: sed ad Valerianum scitum. *vegeta ingenia quò plus recessus sumunt, hoc vehementiores impetus edunt.* Vale. Lugduni Batauorum VI. Idus Sextil. ∞. Id. LXXXI.

* Omnis
virtutis
nomen
est.

EPI-

EPISTOLA XLVII.

*Antuerpiam.*GABRIELI ROELANDIO IC. *mitto salutem.*

GRATAE mihi tuæ gratiæ: quas tamen ita ad me mittis, ut ipse eas non dimittas. Habitant enim apud te illæ diuæ: nec aliud pectus magis amant, scio, inter meos Belgas. Fama ita mihi antea dixerat: nec mentitam eam, firmant lepidæ istæ litteræ & litteratæ. Atq; utinā post hos nimbos lux & sol aliquis tranquillitatis; in quo apricari nobis liberè liceat, & sermones sæpe miscere, non solum scripta. Voueo. quid sperem tamen nescio, cum oculos deflexi ad hunc rerum statum: qui indies minùs stabilis, & nisi à Deo aliquo fulciatur, (non enim fortasse à Gallo illo tibicine) ruet. Iani Guilielmi litteras accepi: paullo antè etiam librū Quæstionum. quem ego ita probo, ut negem aliquid melius in hoc genere vidisse ab aliquot annis. Rectam viam adolescens ille ingressus est: & ingenium in eo ac iudicium pariter magna. At tu mi Roelandi salue, quod ut mihi quoque magis magisque sit, litteris me tuis sæpe appella. Doufa, nisi fallor, scripturus est: quem scire debes tui peramantem. Ad finem tuum Schuermanum saluta. Lugduni Bat. Non. Maiis. ∞. IO. LXXXIV.

EPISTOLA XLIIX.

Viennam.

CAROLO CLVSIO S. D.

Et salutem à te accepi, mi Clusi, & munera quæ Plantinus noster reddidit; bis mihi grata, quia & à te missa, quem tacito quodam sensu dudum amo, & quia missa in optatum mihi finem. Vis enim ea sancientiæ amicitia esse, & offers velut arras. quas libens accipio, & restipulo tibi sanctè eâ fide & officiis cultum à me iri hanc nouam amicitiam, quæ inter verè bonos. Talem enim te scio, nec minùs integritate & ingenuâ quadam virtute clarum acceptumque, quàm doctrinâ. Atque utinam tempora aut conditio nostra permittant, minus longè ut absimus: non litteris solum beniuolentiam hanc foueremus, sed alloquiis & aspectu. Sed istud quoniam non datur, nec fortasse citò dabitur (augescunt enim hæ turbæ, & in isto mari cottidie maiores fluctus:) quod relictum est alterum amplectar, & te amicissime

G 2

Clusi

Clusi per chartaceum hoc æquor (vt cum poëtis loquar) sæpe adibo, sæpe salutabo. Vale. Lugd. Bat. Non. Maiis. ∞. IO. LXXXIV.

EPISTOLA XLIX.

Antuerpiam.

IOHANNI VIVIANO. S.

VTRVMQVE libellum carminum tuorum accepi, mi Viuiane: gratissimum mihi & argumento & tersâ (ita sentio) versione. Sciunt experti, quàm arduum sit in talibus & mentem scriptoris exprimere, & non abire à proprietate aut venustate prisci sermonis. Quod vtrumque egregiè es adsecutus. Atque meo voto, vtinam poëta nostri alij laborent in similibus argumentis: quibus non oblectari tantùm animi possint, sed instrui & iuuari: pietas & mores inferi, qui nimium exsulant ab hoc æuo. Itaque Prouerbia eiusdem regis, hortor te, accelera & vrge; quibus ne in externâ quidem sapientiâ melius aliquid apud omnes Sapientes. Otium nōne adest? Mercurius certe vester non calet. Mars vobis ante portas, & hactenus non nimis felix. Deus tamen ille noster iuuabit: quem bonum & propitium semper scimus bonis, vtcunque externa ista cadant. Remitto muneri Constantiam nostram recusam, cum Epistolę nouæ additione ad Lectorem. Doufæ non libellos tuos offerre potui, non salutem. abierat enim à nobis in Angliam peregrinandi causâ. De loco Iosephi nihil mihi in mente, præter adsentiri Ortelio. Sed nec in Serrato nummo iuuo multum: de quo tamen quid sentiam, iam dixi in Notis meis ad Tacitum. qui tantùm non absolutus. Vale mi Viuiane, & pariter me ama. Lugduni Bataur. ∞. IO. LXXXIV.

EPISTOLA L.

Lugd. Bataur.

IANE HAVTENE

ALIPSI O tuo salue. Suaues herè conuiuas habuimus (auribus enim meis inerrat ille sermo) elephantos. Multa de ingenio eorum dequę mirâ indole garruimus: omnia iucundè, nisi quòd in plerisque indignabar haud plenam mihi esse fidem. Quid censebatis? madidum esse me? non fui. Quin siccus nunc & sobrius ingeram tibi eadem: & laudum hunc campum stilo paullò

paullò certius decurram, quàm linguâ. Nónne Hilarium isti dies sunt? lubet ludere hunc lusum. Sed fides mihi prius stabilienda veterum, quibus præcipuè innisa mea fides. Nónne enim eam herè eleuabat: & nimios harum rerum aiebat fuisse, aut vanos. Itáne? quibus igitur hæc res notior? Nobisne, qui omni hoc nostro æuo vix * vnum vidimus, eumque pusillum, iuuenem, bonarum artium rudem: an illis, quibus cottidiè bellua ea in ore, in oculis? quibus tam crebra de ingenio & moribus eius pericula facta, in bellis, in ludis? Habebant enim & docebant magnâ curâ, Afri, Asiani, Græci, ad prælia: Romani magis ad spectacula & Venationes. Quanquam Europæis tardè sanè innotuit; & *ἐλέφας* (Pausaniæ verba sunt) *πρωτος ἦν ἐκ τῆς Ευρωπαϊκῆς* *Ἀλέξανδρος ἐκ τῆς* *σας*: qui victâ scilicet Indiâ, intulit siue immisit. Sed ab eius tamen morte statim crebri: & transportauit in Italiam ipsam Pyrrhus, bello quod cum Romanis. Hinc quoque iam Romæ nobiles. & magis per Punica bella: quibus tanta copia, vt vno tempore centum quadraginta duos ceperit & in urbem miserit L. Metellus. Nam Critolaus apud * Plutarchum apertè mendax; qui à Paulo Æmilio, bello Pyrrhi, centum sexaginta Romam missos vult, & quidem turritos. At postea sanè Romæ semper: siue capti, siue magis pretio parati ad populi voluptates. Vides initia, vides frequentiam, quæ magis expressa apud Plinium: quem, si voles, lege. De fide igitur veterū cur ambigimus? Nónne nouerunt hoc animal? intinè atque optimè. An fallere nos voluerunt de compacto? nec potuerunt quidem, in re cottidiè omnium oculis sensibusque exposita: & in quâ miracula milleni aliquot homines simul viderunt, id est theatra tota. Ista ipsa ætas fidem fidei illorum struit, etsi in alio illo orbe. Lusitani nauigationibus suis terras eas aperuerunt, in quibus animal hoc crebrum. Insula Madagascar eos habet, & quidem Indicis maiores. habet Zcilam, vbi vanales sunt miro modo. ad mensuram enim admetiuntur, vt pannos, aulæa, telam: tanti palmos singulos. ita cum magnitudine pretium crescit. Habet prouincia Malabar, Goa, & tota illa ora. itemque regnum Benamen inferioris Æthiopæ, omnes (quod notes) albos. Qui adierunt, qui viderunt, eadem aut similia narrant de ingenio bruti huius non bruti. Quæ vt seriò aliquando nosceas ac credas: cape à me de naturâ eorum & moribus.

* Illi, qui anno LXXI. donū Cæsari missus ab Hispaniarum rege.

* Elephantes primus inter Europæos Alexander habuit.

* In Parallelis.

quæ nihil aut paullum ab homine abire, miretur aliquis imò indignetur. Sed prius vniuersè commemorabo elogia de iis veterum: inde facta ipsa distinctè, & exempla. * Aristoteles inter alia de elephante: *ἐστὶ δὲ καὶ ἐναιότατος, καὶ τῇ συνέσει τῇ ἄλλῃ ὑπερέχων. est autem apprimè bonis acutisque sensibus, & cetero intellectu excellens.*

* Lib. IX.
Hist. cap.
XLVI.

* De Nat.
tur. deor.
III.

* De Diui.
nat. I. I.

* Epist. ad
Marium.

* Lib. XV.

* Lib. II.
De Vita
Apoll.

* Cicero: *Elephanto belluarum nulla prudentior.* * Idem: *Elephanti acutissimis sensibus.* Quin homini ipsi adiungunt passum. * Cicero: *Esse illi bellua quendam cum genere humano societatem.* * Strabo: *ἐγγύς εἶναι λογικῶ ζῶν. adsidere animali ratione prædito.* * Philostratus: *τὸτο γὰρ ζῷον διὰ τὸν ἀνθρώπου τάττω, καὶ ζῦναι τὴν βελὰς. hoc enim animal proximum ab homine loco, prudentiâ & consilio.* Plinius: *Animalium maximum elephas, proximumque humanis sensibus. quippe intellectus illis sermonis patrij, & imperiorum obedientia, officiorumque quæ didicere memoria, amoris & gloriæ voluptas, imò verò, quæ etiam in homine rara, probitas, prudentia, æquitas, religio quoque, siderum solisque ac lunæ veneratio.* Et Plinius sanè effusè: tamen verè, ad cuius accuratam laudationem videor non ineptè diducere posse & adducere lecta mihi testimonia aut exempla. Tribuit primò,

Intellectum sermonis patrij. Quod mireris. Nam cum duo velut limites sint, quibus Hominem à Bruto disparamus, Sermo & Ratio: prior iste vide quàm vacillet. Sermonem patrium ait ab iis intellegi: id interpretor, Indorum, Æthiopum, Afrorum, & vbi-
cumque nati. Præter Plinium, * Ælianus: *συνίασι γὰρ ἐλέφαντες & γλώττης ἀνθρωπίνης τὸ ἐπιχωλεῖ. capiunt & humanum sermonem elephan-
tes, sed indigenam.* Etiam * Dio: *ἡδὲ καὶ ἐμείνο εἶπον, τὸ φωνῆς τὸ πατριώτιδος αὐτὲς ἐπαίειν. Et iam hoc aiunt, eos patriam vocem audire atque intellegere.* Nec alia res certior. Institutionem eorum vides? linguâ fit. Domituram? linguâ. Incitationem, reuocationem? linguâ. Denique vt clauus nauim: sic animal hoc impellit dirigitque quò libitum humanus sermo. De institutione, * Ælianum audi: *Do-
centur, inquit, atque instituuntur ad varia φωνῇ τινι ἐπιχωλεῖν, ἡ πατριῶν ἐπαίειν εἰλήχαι, φύσει τινι ἀπορρήτω & μάλιστα γὰρ ἰδὲ τῶ ζῶν τῷδε, sermone vernaculo, cuius miro quodam & ineffabili modo ac velut peculiari natura sunt capaces.* De domiturâ, * Strabonem: *Primum, ait, captos vincis ac fame domant, καὶ δὲ ταῦτα πεθάρχων διδασκασί, τὰς μὲν διὰ λόγον, τὰς δὲ μὲν μὴ τινὲς καὶ τυμπανισμῶ καλῆντες, deinde cicures eos reddunt mansuetosque, hos sermone, alios cantu aliquo aut tympani sonitu deli-
nientes.*

* Lib. III.
c. XXIII.

* Libro
XLIIX.

* Lib. XIII
cap. XXII.

* Lib. XV.

nientes. De regimine toto: cottidiana olim exempla in bellis, in pace, atque item hodie. Quin furere etiam cum incipiunt & à se abire, ad mentem reducuntur oratione. Credere ita seriò Christophorus Acoſta me iubet: cuius aſſertioni præſtruenda breuiter fides. ſapius enim teſtimonio eius vtar. Is gente Hiſpanus, ad nouum illum orbis tractum abiit, quem Orientalem Indiam vocamus. Diu illuc egit, luſtrauit, ſcripſit: & inter alia de elephantis non pauca, viſa ſibi aut à viſoribus accepta. Crebrum enim valdè & cottidiani vſus animal in iis locis. Is igitur * refert: Genere morbi tentari elephantos quotannis, quod haud diſtat à * furore. cauſſam, amorem eſſe, & venire cum venit ad eos Venus. Tum bacchari eos, furere, lædere, incurſere: niſi quidem vinclis coercantur. quod fit ab incolis ſtudioſè. *Sed eum morbum haud ſermè aliter tolli, quàm pharmaco verborum. Adſiſtere belluæ magiſtrum, increpare acriter, & oſtendere ſæditatem. Tantùmne belluam & reginam aliarum ita dementire per adſectum? Vilitatem eam eſſe, degeneratio-* nem à naturâ & à ſtirpe. Rediret ad ſeſe, & conculcaret amorem, qui turpiter ipſum. Et his talibus, quæ etiam homini vtiliter adhibentur, fieri medicinam. Quomodo autem poſſunt iſta, niſi ſi non audit ſolùm, ſed imbibit, & capit? Nec verò, vt aliquid mirius dicam, audiunt ſolùm ſermonem, ſed edunt. Oppianus diſertè Elephantos colloqui inter ſe vult:

* In libello De Aromatibus.
* Plinius & Ariſtor.
meminere eiſdem morbi, ſed Plinij locus malus, cui corrigendo non hic locus.

Φήμι δ' αἰς ἐλέφαντες ἐπ' ἀλλήλοις λαλέουσιν.

Φθογγὴν ἐκ τομάκων μεροπνίδι τοιυρίζοντες.

Fama eſt inter ſeſe ſermonari elephantas,

Diſtinctâſque ſuſurrare atque emittere voces.

Acoſta ille idem nihil certius in regno Malabar eſſe ait, quàm quòd hæc belluæ communicent inter ſe ſermone. Denique viſ in hac re aliquid miriſſimum? (ignosce. tantâ nouitas egebat nouo verbo.) edunt & loquuntur etiam humanam vocem. Boues inter prodigia Romæ locuti olim: iunge & elephantem. Atque audi ipſum Acoſtam: Erat, inquit, in vrbe Cochîn elephas, qui operas diurnas præbere ſolitus ad portum & res marinas. Eum fortè iam feſſum vrgebat nihilominus vrbiſ eius Præſectus, vt Liburnicam quam commouere cœperat, deduceret porrò in mare. Ille abnuere. inſtare alter multis blandiſque verbis, & ad extremum in gratiam Luſitani regis vt id vellet, orare. Hic (immane dictu) elephas motus, clarè hæc duo verba ingemi-

ingeminat, Hoö, hoö: quod Malabarum lingua est, Volo, volo. ac sine mora nauim traxit in mare. Trepidat ad hæc & nutat? Age, age, mouebo tibi in isto exemplorum mari magis maiores fluctus: & ambiguum relinquam, non dicam an hominem capiant, sed ad hominem imò supra hominem sapiant elephantes. Dixi enim de priori limite, qui discriminat obscure: alterum vide, Rationem. quâ ego omnino carere me fateor, si prorsus ille. Audi igitur è Plinio, quæ huc spectant. Ait:

Imperiorum obedientia.] Clara, & quam nemo neget. Scinèl domiti, omnia ab homine, & pro homine perferunt: & tanta illa moles vel à * pusione regitur ac dirigitur tredecenni. idque sine vi, bacillo tantum (*καλαύεται* in Philostrato scriptum) aut * leui ferro. Et quid non imperentur? etiam iugum subière, & traxere currum. Oppianus id tradidit, & Romæ primus ostendit Pompeius, ac postea sæpe Principes secuti. Nummi docent. Tertia in Plinio laus,

Eorum quæ didicere memoria.] Tenax sanè memoria, & ad humanam, ut mox dicam. Sed ingenium Plini cur omittis? Præuaricaris in hac causâ: quia si vlla propria & magna iis laus, hæc est acuminis & ingenij. de quo, te silente, non ego silens. Ingenium igitur iis docile, facile, flexile, aptum ad omnes artes. & artes Belli dico, siue Pacis. Quod vide mihi & discere è paucis his effectis. Ac de bello, quis non ingenium eorum admiretur: siue cum belluis pugnam, siue in homines iussu hominum habent? Dirigunt enim velut * consilio aciem, defessos aut infirmos in medium agmen recipiunt, in * fugâ ipsâ suos non deserunt, sed gregatim abeuntes circumdant & propugnant. Iam læsis medicinam faciunt: spicula aut infixâ tela leniter manu suâ extrahunt, & ut * Plutarchus ait, *ἀνδρῶν ἀναεργαῖς ῥαδίως καὶ ἀβλαβῶς*, sine conuulsione & sine damno, prorsus ut * peritissimi chirurgi. Quin & proprium medicamentum, aloës lacrimas, instillari vulneribus ab iis, Philostratus adseuerat. At pro homine quis homo nescit acres eorum pugnas? Instituuntur velut milites ad prælia; bellatores non dorso solum ferunt, sed & ipsi bellant: propugnant suos, impugnant hostes: deniq. eò veniunt, ut munia etiam omnia militaria vsurpent. * Ælianus quidem mihi auctor, *Elephantos decorè etiam motus bellicos edere: ex iis viginti quattuor Indorum regi adstistere, & excubias*

* Philostr.
tradit lib.
II.

* Falcæ siue
δριπνοῦ
Aristoteles
Elephantis
istæ attribuit:
Ælianus eadem
mente ap-
pripit.

* Plin. VIII.
cap. VI I.
Ælian. VI.
cap. LVI.
* Ælian.
VII. cap.
XXXVI.

* Libello,
πρόντος ἔστι
Ζωάρ.
* Ælianus
libro VII.
ἀντιπρὸς
καταπραΐας
ἐπιστημονίας.

* Lib. XIII.
cap. XXI.

cubias agere, vt fidissimos quosdam corporis custodes. atque ita agere, vt alternis in stationem succedant, sine somno quidem aut conuiuentia oculorum. A peritissimo milite, dic sodes, quid aliud expectes? Iam quanta fides eorum in dominos, quam ad extremum spiritum pro iis pugnent; satis tibi claruerit vel ex vno elephanto illo Pori qui decantatus: & ab eo disce omnes. Hæc de belli artibus. At in pacis; quid hominem doceas, quod non istos? Quorum tanta in discendo (* Æliani verbis & sententiâ vtar) * *ἐν παιδείᾳ καὶ ἐν πολεμικῇ*, vt eas disciplinas artesque hauriant, quas ægrè homo ipse. Circa corpus, circa animum hoc considera. De corpore: conformant id ad omnem ex arte motum aut gestum. Ingeniculare, submittere, & adorare reges docetur. * Aristoteles: *πολλὰ γὰρ καὶ παιδεύει καὶ ζυγίσι* * *ἐπὶ τῇ βασιλείᾳ*. multa erudiuntur & sciunt. quando & regem adorare condiscunt. Saltare etiam & choræas ducere. * Plutarchus: *ὁρχίσεις τε μαθησάμενοι, καὶ χορείας, & ποσειδάωνες*. saltationes discit, & choræas, & adorationes. Ad scopum iaculâri, armis vtî, natâre. Strabo: *ἔτι δὲ ἐν παιδείᾳ τῆς ἐξ ὧν καὶ λυθίζουσιν ὅτι σκοπὸν μαθησάμενοι καὶ ὅλοις χρόνοις, καὶ τὴν κάλλιπτα*. adeo autem mansuescere, vt & lapides ad scopum iacere, arma vsurpare, & natâre optimè discant. Vbi tamen τὸ νεῖν siue Natandi verbum mihi anceps: quia nec alteri id traditum, & alienum à naturâ elephantis qui aquas profundiores horret. Ventilare, gladiatorios militaresque motus edere docentur. Plinius: *Vulgare erat arma per auras iacere, non auferentibus ventis*, (vt scilicet iterum iacta reciperent.) gladiatorios congressus edere, aut lasciuiente Pyrrhice colludere. Denique in theatris eos gestus effingere, quos vix Pylades aliquis aut Bathyllus. * Plutarchus: *ἐν τοῖς θεάτροις ἐπιδείκνυντο* * *χημαίων εἰς δὴ καὶ μεταβολὰς, ὧν ἕδδ' ἀνθρωπίναις μελέταις ἴσμεν*. ostendit elephas eas gestuum figuras & varietates, quarum copiam atque concinnitatem difficile sit humanæ vlli industriæ exprimere aut memoriâ completi. Itaque & funambuli elephanti reperti sunt, irrisum vobis herè & explosum. * Plinius: *Postea & per funes incescere*. * *ἰταὶ ἐπὶ τοῖς τοῖς*. Iterum: *Mirum maximè, & aduersis quidem funibus subire, sed regredi magis; vtique promissis*. Quorum verborum mens: quod & ascendunt per extentos funes aduersi: & regrediantur etiam per eosdem proni. * Seneca: *Elephantem minimus Æthiops iubet subscendere in genua, & ambulare per funem*. Suetonius Nerone: *Notissimus*

mus eques Romanus elephanto insidens per catadromum decucurrit. id est, per funem in theatro extentum; interprete Dione de hac ipsâ re: Καὶ ἐλέφας, inquit, ἀνέχθης τὴν ἀνωτάτω τῆς δεξιᾶς ἀψίδα, καὶ ἐκείθεν ἐπὶ χονίωι κατέδραμεν, ἀναβάντες φέρον. Elephas ad superius theatri fastigium conscendit, atque illinc per funes decucurrit sessorem ferens. Quod genus spectaculi primum exhibuisse Galbam, qui postea Imp., Suetonius idem monet: Prætor, inquit, commissione ludorum Floralium nouum spectaculi genus, elephantos funambulos dedit. Et quæ frons vltra obduret contra tot & tales testes? Atque hæc tantâ curâ & intentione discunt (id quoque valet ad vim testandam & indolem acrem animi:) vt sæpe deprehensi sint noctu velut dictata sua ruminantes & meditantes. Plutarchus cum Plinio mihi auctor, quemdam tardioris ingenij, & verbis verberibusque malè sæpe acceptum, inuentum ad Lunam gestus illos & motus præscriptos exercentem. Grandia hæc, grandia: tamen de illis artibus quid dices, quæ non nisi propriæ videntur humanæ mentis? Legere aut scribere, quis ab homine seiunget? ego: nisi si elephas inter eos. Nam is quoque scribit. Rides? time potius. æmulus reperi- tus muneris tui, & tuæ artis. Plinius è Muciano clarè adfirmat. quemdam Græcas litteras pingere didicisse, eâque linguâ scripsisse. IPSE EGO HAEC SCRIPSI, ET SPOLIA CELTICA DICAVI. Et Philostratus: Scribunt igitur, atque tripudiant, & ad fistulam saliunt. Quod si hos duos testes eleuas (herè ita memini) *Æliano quid facies, qui oculis suis id spectasse panè per oculos suos iurat? Vidi, inquit, ego ipse quemdam in tabulâ litteras Romanas promuscide scribentem, * rectè & non contortè. Quinetiam cùm scriberet, oculi eius cum rigore deiecti in tabulam erant: vt planè intentos dices & scriptitantes. Sed iam concludam hæc de artibus, insigni & nimis certo exemplo, cuique milleni aliquot oculi spectatores. munere, quod Romæ publicè dedit Germanicus Cæsar. * Plinius tangit, & magis vbertim narrat * Ælianus: exque iis ego. Ludis igitur illis, Tiberio Principe, duodecim elephanti theatrum inducti sunt siue Circum, induci floridas & histrionias vestes. Ac primum ad vocem Magistrî diuidebantur in diuersas Circi partes, inter eundem molli & saltatorio gressu inundantes: iterumque ad eandem vocem corbant, & efficiebant saltatorium quemdam orbem. Sed & flores spargebant, & corollas, & ad cantum terram pedibus leniter & numerosè pulsabant,

* Lib. 11.
Var. cap.
21.

* ἀπὸ τοῦ
καὶ ἀπὸ τοῦ
τοῦ.

* Cap. 11.

* Lib. 12.
cap. 21.

bant, & omnia præstabant quæ peritissimi ludiorum. Iam iidem (quod
 insanum mirum) docti mensas accumbere, cibum potumque sumere,
 parcè, modèstè, ordine, humanum in modum. Lecti erant humiles (agno-
 scis Romanum ritum) instrati purpurâ & aulæis. mensæ ad eos, va-
 rio & dapfili instrumento. disposita pocula aurea, argentea, minuta,
 grandia: cibi in lancibus, panis, caro, fructus. Ecce ingressi duodecim ele-
 phâtes, sex mares, totidem femina: illi togati, hæ stolatæ. Decorè & vere-
 cundè in lectis se reclinant, mensam accumbunt. tum signo dato (non enim
 antè) in mensam promuscides siue manus suas extendunt: summâ modèstia
 cibos capiunt, delibant. non voracitas vlla in iis, non auiditas visa, non
 maioris meliorisve partis appetitio, præreptio. denique cùm bibendum,
 pateram pueri porrigebant: iique promuscide eandem genialiter hau-
 riebant & (iucundæ potioni hoc adnexum) reliquiis vini circum-
 stantes aspergebant, velut cottabum facientes. Hæc meis verbis texui,
 sententiâ germanissimâ Æliani. Et effare. potuîne spectaculum
 magis ad Gratias, ad Venerem, ad Naturam? cui vtinam his ocu-
 lis arbiter paullisper ego! id mihi ante omnes theatrorum opes,
 luxum, nugas. Atque hæc nisi promptissimi cuiusdam & acutis-
 simi ingenij signa sunt, tardus valdè & cæcus ego. Quid illa, quæ
 non à doctrinâ insita sunt, sed emicāt & subsiliunt naturæ ipsius
 sponte? Cuiusmodi spectata in iis sæpe ad prodigium vsque fa-
 gacia & acuta. Quale illud * Plutarchi: In Syriâ elephas quispiam
 alebatur. seruus curator additus, cottidiè de dimenso subtrahebat, &
 dimidio belluam malo furto fraudabat. Fors fuit, vt hero præsentè cibum
 daret: & ad mensuram igitur est totum. Elephas vt iniuriam diu sibi fa-
 ctam, quâ posset, detegeret, accuratè hordei partem separat: dimidium
 sibi seruat, altero repulso. quid nisi clamans, callidissimo inuento,
 illud diarium sibi hætenus fuisse? Alius (refert idem scriptor) cùm
 rudera & terram magister ad explendam mensuram pabulo idem idem
 misceret: fraude fraudem hanc vltum iens, in ollam eius carniump le-
 nam, è foco correptum cinerem iniecit. Sed exemplum quod ab Aco-
 stâ, fidem omnem superat, etsi ex fide. Palàm enim & spectante
 populo res gesta est. Elephantici cuidam in vrbe Cochîn ad horam cibus
 non oblatu. Queritur, & barrît. Magister excusat, & vas aneum
 eius cibarium ostendit persuens & pertusum. causam hanc moræ esse,
 quòd cibi non vltra tenax. iubet igitur, si esse velit, ad fabrum ærarium
 ferat reconcinnandum. Ille paret. promuscide aufert, fabro offert. Faber
 siue

* Libello,
 non est
 2. an.

sive per negligentiam, sive ludos belluam faciens, infideliter reparat atque obstipat. Elephas refert. Herus vitium videt, & indignatur. in clamat illam absentem, hunc presentem. denique redire iubet cum illo ipso vase. Facit. & fabro querulus impingit. Ille homo suavis iterum imponere conatur, & admoto malleo claudere rimam simulat, non claudit. Nec tamen imponit. Nam ille catus lebetem resumptum ad flumen defert, immergit, & aqua implet periculi faciendi causa. Videt effluere. Plenus igitur irarum ad fabrum recurrit, intonat magna voce. Confluunt vicini, & inter eos Vicarius regis. Faber blandis verbis demulcet (nescio an ultra audeam dicere) belluam: vas denique sumit, & resingit probe atque ex fide. Sed ille ne tum quidem fidens, iterum ad flumen, & ad haustum. dum contineri aquam videt, vertit se ad adstantes & ostendit, velut testes eos aduocans in hoc factum. ita demum abiit domo. Quid addam? nec verbum: quia reuera datus sum in stuporem. Et cur iam * Æliano non credam, qui iure optimo duplex cor tribuit tam cordatis? Sed satis ad ingenium ista: redeo ad Plinium meum, qui suggererat

* Lib. xiv.
cap. vi.

Memoriam.] Ea autem pars tam magna in hoc animante, ut homini non dicā nihil cedat, sed eum excedat. Unū exemplum vetus dabo, pauca noua. Michaël quidam Glycas inter Græcos, Annales scripsit haud improbe nec indecenter. Is in parte primā prodidit: Elephantum quemdam cum in Circum deduceretur, sedentem in foro ad Milliarium aureum Magistrum ferarum, subitā irā atque impetu interfecisse. Causam non aliam violentiæ fuisse, quam quod ante annos totos decem, eodem illo loco, idem Magister, eundem elephantum ferro percussisset. quam iniuriam tot annos recondens, tunc demum iit ultum. Aliud ex Acostā: Miles quispiam in vrbe Cochīn elephantum, per lasciuiam, in fronte putamine nucis percusserat: (grandem illam Indicam intellego, quam incolæ Coccum appellant.) Elephantus putamen studiosè tollit: illud, atque iram, recondit. post dies plusculos, in viā quāpiam publicā obambulantem militem conspicit. accedit, & elatum ex ore putamen, promuscide suā acriter in illum coniicit. tum exultabundus abiit, quasi talione illā iniuriam probe ultus. Iterum ex eodem: Miles elephantem in eādē vrbe cum rectore obuuium habuit. noluit decedere. elephas suam & rectoris contumeliam id interpreta- tur: vlciſci tamen à rectore prohibetur. Post dies aliquot, in ripā Mangatæ fluminis (id vrbem alluit) militem fabulantem otiosè repperit. Cūm

Cum rector non adesset, corripit illicò hominem, in altum tollit. nec precibus nec clamore adstantium motus, aliquotiens flumine merfit, alienans subinde & demittens. Cumque lusum eum satis diu lusisset, contentus hac vindicta, hominem vitæ suæ iam diffidentem, rectum & illasum destituit eo ipso loco vnde sustulerat. Sed hæc in deteriore & vindicem partem Memorix exempla: ecce etiam in beneficam & benignam. Acofta idem mihi suggerit: Elephantum in vrbe Goá fuisse, qui annuo illo & solemnifurore correptus catenas abruperit & vincula. Fugientibus omnibus, seruulum quempiam qui vlnis infantem dominicum gestabat in ades properè irrupisse, oblitum sarcinæ quam deposuerat in illa trepidatione ante ades. Elephas adest. mortem omnes & obtritum pueri expectant. Ille contrà manu suâ leuiter attollit, in humile tectum, quod è regione ædium, collocat, respectans curiosè, satine puer illic sine damno. Dein furibundus cursum suum exsequitur. Id datum omnes interpretabantur veteri beneficio; quia mulier earum ædium domina & infantis mater, elephantî transeunti sæpius panem aut fructus obtulerat. Et alia quædam legere tibi fas, si lubet apud eundem Hispanum. Ego in Plinio pergo, qui admonet

Amoris.] Quod ipsum iure mirum. Nam sicut Sermo & Ratio homini peculiaria videntur, sic certi Adfectus. Inter quos auidus ille & varius amor, pro leni tormento soli huic animantium datus. Sed abnuat elephas, & hac quoque parte sociat se nobis. Serio enim amat. Trita & nota * historia est illius qui Aristophani Grammatico præbuit se riualem. Vterq. enim Alexandria in Egypto corollariam quampiam amauit. nec minus studiij aut ingenij elephantino fuit ad declarandam & mitigandam suam flammam, quam illi acuto & litterato. Forum, in quo ea desidebat, crebrò adire: adsistere, suspirare, poma aut flores offerre: manum intra sinum blandè penetrare: & ea omnia, quæ Venerens aliquis nepos. Alia similis in * Æliano. In Antiochiâ vrbe Syriæ, elephas inter cicures more suo ad passionem iens, vidit fortè mulierem haud inscitam, pariter corollariam. Vidit, periit. Assiduus ille apud eam; promuscide faciem, manus, lambere, tergere; & quacumque poterat, blandiri, insinuare. Quin & illa redamauit, corollas & flores aliasque amoris illecebras sæpe offerens. Cum perseuerasset mutuus hic amor, mulier ecce ad plures abiit. elephas desiderium non tulit, nec mentis suæ vltra compos datus est in furorem. Sed & honesti fidiq. amoris non deficiunt me exempla. Habe vnum.

* Narrata Plinio c. v. & Plutarcho, in libro de bellis per totam Græciam.

* Lib. vii. cap. xliii.

* Athenus
lib. xiii.
cap. xxx.
Aelianus
lib. v. cap.
xiiii.

* *Antigono regi elephas femina fuit. Euēnit vt in obsidione opidi Megaren-
rensis, puerum pareret vxor Indi elephantistæ. Is suā linguā commen-
dat infantem inter bellicas turbas elephantis (ita nomen eius fuit) Ni-
cææ. Caput illa serid in fidem : & omnia officia exhibet, quæ pussima ali-
qua nutrix siue mater. Infans ante pedes eius deponi debebat. nisi fieret,
cibum non capere, iram omnibus signis ostendere & dolorem. Gaudere
contrà, eo adiacente. & tum cunas mouere ad oblectandum, aut som-
num conciliandum, tum ventilare & pellere muscas. quod faciebat sanè
scitè, arundinis ramum promuscide suā motitans. Atque hæc officia in-
terdum etiam vsurpabat elephas maritus. Pergit Plinius, & addit*

*Glorie cupiditatem.] Qui sanè ipse affectus hominum proprius;
& inter eos, animæ cuiusque maximè sapientis. Exempla eius in
hac belluâ pluria. tu vnum vetus à Plinio cape, nouitium alte-
rum ab Acoftâ. Plinius : Erat, inquit, Antiocho regi elephas, cui (ita
enim hominum canumque exemplo distinguuntur) nomen Ajax. Is dux
plerumque agminis, generosus, celsus, & velut rex in regio illo grege.
Euēnit vt flumen transmittendum esset. renuit infelix, & malâ suâ
sorte Ajax. Pronunciatum enim illic à Magistris, Principatum eius fo-
re qui prior transisset. Intellexit, & arripuit Patroclus (& hoc ele-
phanti alteri nomen) fluuiumque transmisit. Præmio igitur donatus est;
phaleris argenteis, quibus mirè gaudent, ornatus, & velut in possessione
positus principis loci. At Ajax noster properè ab hoc Vlyssè circumuen-
tus, fatum etiam quâ potest, illius veteris exsequitur : & mortem igno-
minia præferens, in mediâ se confecit. Acofta autem inquit : In litore vicino
vrbi Goæ tormentum grande aneum commouendum erat. conatur ele-
phas : non potest. Instigante magistro & duos iuniores elephantis osten-
tante, qui id facerent ni ipse faceret : iterum iterumque conatur, tanto
nisu, vt medius illico creparet. En! dum gloriam illam præreptum
alteris iuit, miser sibi vitam. Sed prosequitur laudationem suam
Plinius, & adiungit magis alta. Est enim, inquit, elephantis, quæ
etiam in homine rara,*

*Probitas.] Ergone virtutes elephanto? virtutes. vt nequid scili-
cet ad perfectum omnibusque numeris hominem desit. Et de
probitate planè verum est. Innoxium enim, pudens & pudicum
hoc animal: probæ mentis, probi oris. Vis ei vt omnibus noceat,
vt nemini, voluntas. Homini occurrit? vitam nō adimit, osten-
dit viam. Feræ alteri? transit. Quin nisi irrites & impugnes, nec
in Arc-*

* Plinius
cap. lxxii.

in Arenâ quidem excitabis ad lœdendum. In magistros rectoresque suos mira illis pietas. * quos aliquando per calorem aut furorē interfecit, ita luxerunt, ut inediâ interfecerint sese ipsi. Eadem in natos: quos, * urgentibus venatoribus adeo non deserunt, ut milles capi, cædi, malint, quàm ipsos. Adde reuerentiam in grandiores & senes. quibus de loco, de potu, de cibo iuuenes concedunt, bonæ suæ Naturæ legibus non Lycurgi vllis minis adducti. Adde pudorem & castitatem. quia non nisi occultè & filius tecti coeunt, & sanè rarenter. Nam quod Plinius & ex eo Solinus prodiderunt, *nō ampliùs quàm semel parere, nec plures singulis*: validè refutat ratio. quia si vnus saltem è duobus: iam diu, minuent numero, defecerit id genus. * Ælianus tamē vsum Venis semel item iis tribuere videtur. Sed ea ex Aristotele hausta, malè aut lecto aut intellecto. Nam * ille hoc tradit: *Marem quam semel inierit, non vltat tangere. interposito tamen triennio coitum repetere, sed nimirum in aliâ. Feminam vterum biennio gerere, parere singulos.* Strabo etiam de initu eorum & partu, magis cautè & verè. Adtexitur in Plinio

* Strabo
tradit, lib.
i. v.

* Aelianus
lib. vi. cap.
xv.

* Aelianus
ibid.

* Lib. viii.
cap. xvi.

* Lib. v.
Hist. Animal.
cap. xiv.

Prudentia.] Quam non dilato, satis mihi in Acumine & ingenio dictam & doctam. Ostendunt tamē & hanc propriè in Acie instruendâ, in tardandis secutoribus fracto dente, in flumine transmittendo. quæ apud Plinium, Philostratum & Ælium vide. Sequitur

Æquitas.] Quam in se, quam in aliis amant. Retegunt inò scelera, & alienas etiam iniurias vlciscuntur. Historiam Æliani duplicem te non celo. * Narrat Romæ euenisse, Imperatore Tito: *ut vxor elephantista malo iure cum altero mœcharetur. Videt elephas, non fert domini hanc iniuriam: irruit, & in ipso complexu, vtrumque dentibus transfigit. Denique provide ita copulatos relinquit, stragulo regit. & cum dominus aduenisset, stragulo reiecto facinus ostendit, & se vltorem.* Hoc pro magistro, sed probo. Narrat * iterum in illum, *sed improbum. Fuisse magistrum elephantum, qui adulteraret. nec contentum furtivâ libidine, vxorem suam clam sustulisse, & ad præsepe elephantis sepelisse, alterâ illi mox inductâ. Elephantum hoc scelus tacitum non habuisse. vxorem nouam illuc traxisse, & cornibus pedibusq. refodisse cadaver, tantum non rebus ipsis mulieri inclamantem, cui, & quomodo, innupisset.* Extrema laus est.

* Lib. x.
cap. xv.

* Lib. i. v.
cap. xvi.

Reli-

* Libello.
πρότερον.
* Lib. VII.
cap. XLIV.
* Lib. III.
cap. X.

Religio.] Quam veteres omnes tribuunt consensu. Lustrari aquâ, orientem solem ab iis adorari, * Plutarchus & * Ælianus mihi auctores: Lunam nouam, Plinius, & * Ælianus. Sed & hoc ad Religionem, quod mortuos è suo genere sepeliunt, & prætereuntes iniiciunt humum. Ælianus ille idem hoc tradidit libro I. cap. XLIX. Homines ecce, mi Hautene, elephantes feci; Sermone, Ratione, Adfectibus, Virtutibus præditos: quid superest, nisi vt etiam diuinos? Diuinant enim. & Oppianus de hoc animante dixit:

Μαρινδὸν ἐν στήθεσιν ἔχειν κέαρ.

Diuinum cor habere in pectore.

* Libro
XXIX.

additq. præscire eos fatalem suam horam. * Dion amplius, scientiâ eos ornat caelestium rerum. Ἦδη γὰρ τῆς, inquit, καὶ ἐνέω ἐν τῷ, ὅτι τοὺς τοὺς τῷ φωνῆς τῷ παρῳιδίῳ ἀντὶς ἐκείνῃ, καὶ τῷ ἐν τῷ ἑρπῶ γανόμενῳ συνίσσιν. *Quidam hoc etiam aiunt, eos, præter quod sermonem patrium intellegunt, scire etiam que in celo gerantur.* Sed inter quosdam illos, ne te fallam, nō ego. Habes lufum, natū non importunē mihi ex hesterno lufu & ioco inter vina. cui vt seria multa & vera inesse nihil ambigo, ita quædam maiora verò: nec vsquequaque in his talibus veteres illos Fidei litasse, facillè tecum credam. Quis enim tam magni oneris sit, vt quidquid illi imponunt, vehat? Nectamen mali quidpiam in istis, etiam falsis: quia innoxia mendaciola sunt, & volente deo Rifu nata. Qui si te non aspexit dum hæc legis, iam nunc me imponente licet vsurpes cognomen prisce illius Craffi. Iterum salue.

EPIST. LI.

IANO LERNVTIO S. D.

IPSVM pectus mihi commouit series malorum, quæ es passus. Heu homines, quid sumus? quid speramus? Atque ego sub idem illud calamitatis tuæ tempus, nescio quo instinctu, in Saturnalibus meis adfinxeram orationem tibi de incertis casibus vitæ. Sed benigno Deo gratia, qui concussit te, non deiecit: ostendit vulnus, & non impressit. Vtile enim, mi Lernuti, vtile, admoneri nos interdum à summo illo Principe & imperij illius, & fluxæ nostræ conditionis. Nempe quid est homo? lutum, vt ille ait, scitè

scitè mixtum. quid vita? hæmina vna sanguinis: quam quilibet leuis casus rumpit, qualibet febricula corrumpit. Solus animus & eius actiones æterni. Vides pulcherrimum hoc mundi corpus? ruer aliquando. Vides hanc Belgicam nostram? iam ruit. ne indignemur interitum aliquot hominum, cum cadauera futura sint cæli terrarumque. Saturnalia nostra credo te accepisse. primam dico partem, quæ De Gladiatoribus. Nam reliqui sunt aliquot libri, De Venatione, & Circo: in quibus etiam tuus sermo. Iudicia vestra liberè, liberè, velim adscribi: vt mutemus, si quid tale erit, iteratâ editione. Iubebo enim, si otium aut valetudo mihi constat, simul excudi omnia quæ ad ludos Romanos. Nunc molesti mihi quidam nomine Ordinum, vt Grammaticam conficiam, quæ legi possit in Belgicâ vniuersâ. Ride, si sapis: & vide quàm bene de me & nervis meis sentiant isti. Apud vos miles, vt audio, & turbæ. Si ita est, quid si expedias te ab eâ vrbe, & secedas in hæc loca sub Neptuni regnum? Nam terrestres dii, parum nobis æqui. Cautè id fiat tamen, & circumspectè. Nam & apud nos nescio quid turbellarum, ab iis qui pax deberent esse mundo. at illi fax sunt. Vale mi suauissime, & aut me expecta sub æstatem, si quies illic; aut ego te, si hîc. Vxorem saluta à me ex animo, & tua pignora dissuauia. Victorem nostrum filere ita miramur, vt suspicio sit ne & ille penetrauerit ad loca silentia. At tu eum saluta, & è veterno excita. Salutat te Dusa, Hautenus. x. Kalendas Feb. ∞. ID. LXXXII.

EPISTOLA LII.

Roman.

FRANCISCO BENSIO S. D.

DEVM ego testor, vir optime, vt in solo nomine tuo lecto exilij: quanto magis in commemoratione amoris, quem integrum inuiolatumque seruari apud te cognoui. Ita enim ad me scribit P. Egmondus: quem certū mihi, amatum antea, vel nuncij huius causâ, magis amare. Non enim dissimulo. verus & vetus mihi in te adfectus est, hæresque mihi in arcano isto penetrati. Genus vitæ mutasse te audiui: quod salutare tibi futurum omnino confido. Et reuerâ, mi Bensio, quid hæc humana sunt, nisi iactationes & fluctus: in quibus nihil firmum sit, nisi ad anchoram

I

ea al-

ea alliges veræ Pietatis. A me quoque abiit illa iuuentus : & vna mihi hæc cura, vt quidquid hoc est æui, in virtute & feriis iam studiis traducam. Publicè id testari cœpi: & edidi nuper De Constantiâ libros duos, qui pietatem (nisi fallor) aliquam præferunt, etsi prisca Philosophiæ velo. quos ad te mitto, non vt inspicias modò, sed iudices: & liberè me moneas, si quid exorbitans in iis aut minus rectum. Nec amantis adfectu iudicabis, sed vt apud Pindarum est,

* *Sententiis
reitis & ri-
gidis Rho-
damanti.*

* *Βεβαιῶς ἐν ὁπράσι παρὰ δ' αὐτῶν.*

Hoc omnino peto. M. Antonium Muretum (ex animo dico) amo æstimoque. minus promptè id ostendo, quia multa in me ab illo non amica. Ita enim moneor litteris multorum. Quo meo merito? Nam ego te iudicem non defugio, qualiscumque ea est, litis. Tacitum edidi. quid ergo? an illius? Quæ hîc iniuria est, si campum eundem Famæ decurri, sine fraude? Sed mihi iam ista non magna. & reuerâ pudeat me verba consumerè in talibus rebus. Nati ad maiora & meliora quædam sumus, & ego & Muretus. Quem tu quidem à me salutabis, & animum hunc illi firmabis volentem semper eius & amicum. Ita me posteritas amet siue æstimet, vt ego illum. Constantiam nostram vt cum eo communices, volo siue iubeo: cuius exemplar etiam à me expectet. iam enim receditur. De amphitheatro ante paucos dies edidi: & mittam. Tu quæso me ama, & interdum solare & erige in his turbis omnium rerum. 1 x. Kalend. April. ∞. IO. LXXXIV. Si quid ad me voles, mittes tutò ad Plantinum.

EPIST. LIII.

Romam.

M. ANTONIO S. dico.

CAUSSA mihi scribendi nata ex tuis ad Plantinum litteris: quas cum gaudio vidi, cum motu animi legi. Vel in manu tuâ conspectâ lætabar: quanto magis in hoc animo, & tam insigni testimonio amoris? quem si à quoquam mortalium, à te certè volo. Ita adolescens iudicavi, ita nunc, consensum quemdam esse conspirantis iudicij nostri & naturæ. qui ad coniunctionem, quæso te, valeat; non ad æmulationem, aut, quod pudet me dicere, simultatem. Et fuere tamen improbi homines, qui id sperarent:

rent: à quibus alia quædam ad me delata olim, non nego: sed vana, falsa, vt nunc video; & quibus caput, homines non profesti solum, sed vtrique nostrum infesti. Ea, per cōmunes deos deasque, obliteremus mi Amice: & beneficiis inter nos cerremus, non querelis. Electorum librum iam nunc vulgaui: paro Saturnalium sermonum, & De vitâ ac scriptis Annæi Senecæ. quem nec inuitus ad te miserim, quasi vadem amicitia coeuntis & fanescentis. Etsi quid in eâ ægrum? nec aliud peccatum vtrunque, quàm celsatione, & amicitia, vt sic dicam, inusu. Quod ipsum emendamus. Viximus amicissimè vnâ, viuamus porro & moriamur. En ego ille, cuius ingenium & os coram probasti: nec amorem absentis requires profectò aut fidem. Te vt eundem sperem, faciunt paucula, sed impressa & signata epistolæ tuæ verba: quæ ruminor idem tidem & examino, vt solent amantes. Vale. Lugduni in Batavis, ad magnum & sine terminis mare. III. Kal. Decemb. ∞. IO. LXXXI.

EPISTOLA LIV.

ABRAHAMO ORTELIO S. *precor.*

PER fidem, Orteli, vt tu vtrunque largus es, & amando, & donando! Miseram ad te nescio quid munusculi nuper, Amphitheatrales meas nugas: tu repedis illicò & reponis, sed verum amplumque donum THEATRVM tuum. Ad tutelarem Prætozem ibimus? Profundis enim tua, & quidem valdè ^{* ἀμέτρον *} *Immensa* ^{μετρώ: mensurâ.} cum pro libello, libros; pro ludis, seria: pro orbiculis Arenarum, diffusum istum terrarum Orbem admetiris. & eum ipsum in triumphali veste, purpuratum auratumque. Quid censes? donis magnis capi me? non magis quàm numina (si comparare fas:) quæ vt voluntatem solam in oblationibus metiuntur, sic ego. At ea in te magna: & ideo munus tuum iure mihi magnum. Vtinam hic quoque animus aliquà tibi liqueat in quo acris flamma, sed per nullâ occasionem erumpedi, adhuc clausa. Quod vereor, mi Orteli, vt breui quoque vestrae vrbi sit. Quæ enim istæ pontium moles, quas audimus? aut quid parat nouus ille Xerxes? ^{* γὰρ ὁ καὶ τὸν Ἰνδόν *} *Candâ* ^{blandiens,} Non ego ^{* ἀπέροιστον *} cum Aristophanē: (frustrâ in aliis castris) ^{siue adu-} ^{lans.} sed maior & prudēior opinione nostrâ ille Princeps. Hoc ipsum

opus quanti animi est? prisca & Romani. Ac compedes profecto Poliorcetes ille iniiciet indomito vestro Scaldi, nisi quid subueniant filij isti Neptunini. Batauos & Zelandos dico. qui tamen lentè accurrunt, nec ut ad socialem flammam. Heu *παρὴρ ναυῶν*! & falsa vobis vita, si aufertur hoc salum. Quid suadeo igitur? fugam. sed non ab vrbe, mi Orтели, aut solo patrio; tantum à vulgo. Ad Constatiæ nostræ asylum te voco, & ad arcana illa Sapientiæ templa. Cuius tectum si semel subis & penetras, tectum ego sacrumque te habeo ab omni vi, ab omni hoste. Salus missa à Dudithio, Cratone, Monauio, mihi grata: quæ tres stellæ in vnâ iam vrbe, valdè illustrent Germaniæ illum tractum. tu quoque à me remitte. Viuiani nostri poemata vidi: valdè mihi tersum & probum. Sed Itinerarium vestrum quando ad nos? Ne preme. & quod boni prouidique patres, si tibi obsideri visum, emitte saltem hanc prolem. De Chirio Fortunatiano, indagatio tua noua. adeo autem mihi ille non visus, ut nec auditus. quin ipse vltro peto, si alicunde eruis, concede vsuram. Ad Schottum nostrum scripsi. en litteras, quas mittes, & amorem nostri non dimittes. Lugd. Bat. 1 v. Kal. Ianuar. ∞. I. C. LXXXIV.

*Scripsit
de Imp.
olim, & ex
emplaria
in Italiâ
edita, sed
per pauca.

EPISTOLA LV.

HENRICO WILTIO. S. D.

VERE existimas. officium mihi fuit tua scriptio, imò beneficium: quia & amoris tui in me index, & diligentia, quam intermittere à te in hoc otio gaudeo, non dimitti. Adde amicam inuitationem tuam: cui quod hoc tempore non parco, ab occupationibus meis est, non à voluntate. Nam animum si consulo; reuerà ambit esse isthic, & regustare humanitatem vestram, quam anno superiore pleno ore hausi. Sed ita conditio mea est, ut mos mihi potius alienis cupiditatibus gerendus sit, quam meis. Impedimenta, quæ defubito mihi nata, scripsi ad Pollionem: nec hinc iterum. Itaque quod benigni creditores solent, voluntate meâ sustentaberis, & illam nunc accipies in solutum. At te, mi Wilti, hortor (quod in extremâ epistolâ tuâ prudenter scriptum) cogites, quàm in præcipiti cursu ætas tua sit: nec facile facturum te messem, si in hoc iuuenili vere neglexeris facere sementem. Sementem

mentem dico, & virtutis, & doctrinae. Ad vtramque enim te vo-
co. quod hæc sine illâ, damnosa: illa sine hac, parum decora aut
ornata sit. Aures tuas saepe insonet illa Democritici, vt opinor,
laudata vox: * πολυτέλεστον ἀνάλοιμα χρόνον. Vt in flumine vnda
vndam trudit, nec vnquam reuocas elapsam: sic in tempore dies
diem, nec reparas amissam. Cogita, & vale. Parens tutus à me sal-
uebit, & noster Canterus. Lugduni Batavorum 111. Idus Sex-
tiles. ∞. Id. LXXXII.

* Sumptuo-
sissima ia-
ctura tem-
poris.

EPISTOLA LVI.

CONSULIBVS ET SENATV ANTVERPIENSI S. D.

NOBILISSIMI & Amplissimi Domini, Munus accepi,
non meo munere, sed splendore vestro dignum. Pretium
in eo respiciam siue artem; omnia eiusmodi, quæ animum ve-
strum abundè declarent, & quæ me deuinciant nouo vinclo. Cu-
ius si non soluendi, at laxandi saltem aliquo genere officiorum,
vtinam facultas mihi vnquam sit! Intelligeretis profectò æstima-
re me munera posse, & accipere: non tam propter ipsa, quàm eos
qui adfectu tali dederunt. Ingenuè dico. Aurum illud aut argen-
tum nihil me mouet, aduersus talia satis firmum: mouet prolixa
hæc vestra humanitas, quæ omnia non impetrare solum à Lipsio
potest, sed imperare. Valete Amplifs. Coss. & Senat. urbemque
vestram regite inter hos fluctus, præeunte & gubernate supremo
illo Nauclero. Lugd. Bat. 1 v. Idus Ianuarias. ∞. Id. LXXXIV.

EPIST. LVII.

Ultraiectum.

HADRIANO VANDER-BURCHIO V. C.

Et litteras tuas nunc accepi, & nuper carmen. vtrumque gra-
tum mihi fuisse scire debes, etiam me silente. quidni enim
testimonia hæc à pectore tam amico? At tu etiam Valerium Max.
vltro mihi submisisti: in quo priuatim mihi, & publicè non nihil
litteris etiam cōtulisse te, re (spero) ostendam. Maneat feliciter hic
cœptus amor inter nos, qui Genio ingenioque non dispares, &
his solatiis vtamur in mæstitiâ publicâ temporum & infelici-
mi æui. Nam vt sol aliquis alius tenebras & turbas istas pellat, vi-
deo

deo nondum. Ligna & oleum ad miserum incendium hoc Belgicae suggerunt passim. & nos ardemus: vicini alij rident, spectant; alij miserantur, sed miserantur tantum. Deus scilicet ille est qui punitum it iure veterem nostrum luxum. feramus; aut ne feramus, emendemus. De munere apto ad valetudinem meam firmandam habeo gratiam. ego quid mittam? animum & verba. cetera immunis. Vale. Lugduni Batavor. v. Kal. Febr.

EPIST. LVIII.

Amstelrodamum.

MART. LYDIO. S. mitto.

NEC epistolâ tuâ quidquam mihi potuit accidere gratius, nec admonitione siue censurâ. In utrâque amor tuus elucet: in hac magis: quam nisi liberè in amicitia admittimus, tollimus pulcherrimum eius fructum. Ego de meo sensu noui & attestor, libentissimè me sicubi deflexi, non corrigi solum, sed corripì: certè cum de animo mihi constaret corrigentis. quem totum candidum purumque in te scio, mi Lydi, & famæ ac salutis meæ amantem. Itaque nec excusatione nec tergiversatione istâ opus: quâ (verè dicam) gratiam admonitionis corrupisti in parte. Ego enim me ab amicis non blandè amari velim, sed fortiter; id est, ut viris ac sapientibus est dignum. Sed de notâ ad verba illa paginæ 66. * Constantiæ meæ: sententiam meam breuiter sic habet. Cum ea scripsi, ad peccatum & ad malum respexi: quod Deo sancto & præscribente euenire, durum mihi videbatur dicere. Fateor eam vim esse Providentiæ diuinæ, ut nihil in minimis maximisque eueniat quod à filo illo non pendeat: tamen cautionem cautissimam in verbis & effatis adhibendam censeo, vulgi imprimis causâ. Itaque Damasceni verba hoc fine adiunxi. Nam ἀπορροή, ἀπόνοια, ἀπορροισμός, ratione quâdam distingui ab hominibus, & causâ hominum, non ignoras. Nec temerè dixerim, Peccata euenire Dei præfinitione. Nec tamen certamen hæc mihi vllum tecum sed rem altam, intricatam, & vereor ut homini semper obscuram, sic explico. Definitum à Deo omne agnosco, quidquid euenit: trepido tamen dicere, peccata ipsa. quorum fontem à solâ malâ voluntate nostrâ esse censeam, supremâ illâ voluntate permittente. Exempli causâ. In Tarquinij adulterio, in cædibus

* Lib. 1.
cap. xx.
Vidit, non
coëgit: sci-
uit, non san-
xit. &c.

cædibus ab Herode innocentum, duo spectro: factum ipsum, & crimen. Factum à Deo definitum fateor, & comprehendo sub fatali illâ lege: crimen, quod soli voluntati inhaeret, non videor fateri posse, sine iniuriâ Dei. Causam omnium rerum diuinam voluntatem statuo, omniumque euentuum etiam si mali sint: at non causam causæ mediæ, quoties ea mala. Alias quomodo effugimus, ut non auctor ille sit mali? ut non ad probator? Itaque ea quæ ex *Actis* aptissime adducis, huc accommodo. Mortem Christi destinatam ab æterno, prodicionem Iudæ ab æterno, mediæque omnia quæ ad salutare illud opus ferrent: sed non crimina adnexa ipsis factis, quibus fundamentum in impiâ tantum voluntate. Quod si tamen satis habemus generaliter & vniuersè dicere, omnia nō præcisa solum à Deo, sed præscripta, hoc respectu, quod illa ipsa facta sine peccato euenire non potuerunt: ego non pugnaciter pugnauero, & fatebor fortasse (cùm omnia examinauimus) vim hanc necessariò inesse cathenæ illi & nexui Providentiæ imnotæ & æternæ. sed disseri tamen ea in vulgus, periculi inuidiæque plenum existimem. vulgo autem scriptus meus liber. Habes strictim mentem mei scripti. Tu si quid aliud obseruas, aut si quid etiam est in quo ambigis, valdè à te peto ne me celes. Non delectabunt me solum eiusmodi iudicia & indicia, sed docebunt. In istis ipsis quæ nunc scripsi, si quid aberro, dirige. Reipsâ videbis, me non admoneri solum posse, sed emendari. De missò ad me Heroldo, habeo gratiam. remittâ cum fide, ubi legero. Quamquam de Germaniâ Taciti, nescio an hac editione emoliar accuratè. Occupationes, & valetudo, & Typographi festinatio, sæpe nobis impedimento. Quod pag. eiusdem Constantiæ meæ 131. in margine positum est, *Davidis adulterium*: facile obseruasti peregrinationem esse meæ mentis. Itaque velim pro eâ notâ hanc in libro tuo substituas, *Quâ populum ambitiosè recensuit*. quod alios etiam monui. Vale. Lugduni Batavor. XIII. Kal. Decemb. ∞. IO. LXXXII.

* Acta A.
post. c. 11.
vide.

EPIST. LIX.

Antuerpiam.

CORNELIO PRVNIO S. D.

LIBROS hos de Constantiâ cùm ad Senatū vestrum, Vir Clarissime, mitterem: valdè peccassē, si non ad te vnâ. Nec enim

enim Senatus solum ipsius magna pars es: sed & mei. qui amo te, qui abs te amor: nec cum Antuerpiam veni, facile pectus reperio magis promptum in me, magis pronum. Addo & causam tertiam, quia prudens tu & doctus. cuiusmodi lectore, imò iudice, opus mihi in nouitio hoc scripto. Parum enim adhuc tritum istud ad Sapientiam iter: nec scio an ipse id peragrauerim usquequaque pede recto. aut si, an aliis videbor. Saculum enim & mores non ignoras, quamque in re quæ pietatem tangit, varij hodie sensus & dissensus. Non sententia, sed verbum aliquod à calente calamo anceps fugiat: ecce calumniarum subitus & magnus ignis. Quæ causa abstinuit me, fateor, ab altiori initu in sacrarum illud rerum mare. quò materies alioqui & ingenij veteris vocabant: sed repressit hic metus, & adnavigare iussit litus. Elephantibus aiunt, etsi omnibus impensè delectetur, haud temerè tamen eos ingredi, cum inscij sint natandi: idem in Theologiâ mihi. quam amo, quam æstimo; & tingo salubribus eius aquis libens animum, non tamen mergo. Questionum enim vortices illos horreo: hisque ne inuoluatur, adfideo & obambulo saltem eius ripas. Et hinc tamen haurio & ex tuto sumo, quæ ad usum. Nam acumina aut dissertatiunculae quid iuuent? Quod ille de Virtute censet, rem eam esse non verba: iustius ego de Theologiâ, cuius verum seriumque finem scio. Vitam. Vt melior, non ut doctior fiam, sacra illa volumina tango: ut pectus instruam, non ut acuiam mentem. Procul à

* Maiorem
quàm pro
homine, sa-
pientiam
sapientes.
* Satagunt
inquiretes,
ex qua ter-
ram infra
ex qua ce-
lum supra.

me isti, qui alti & subnixi ambulant, * μέλλω πρὸς τὴν κατ' ἀνθρώπων σοφίαν
σοφοί: quique, quod Socrati obiectum olim, * μετὰ τὴν (σοφίαν) ἐν ἄνθρωποις
τὸ πρὸς τὴν κατ' ἀνθρώπων σοφίαν. Et cum omnia tamen subtilis ingenij
alâ peruolarint, miscelli, præteruolant ipsi sese. Reliqua sciunt: il-
lud vnum quod scitu necessarium est nesciunt, ut se sciant. Sed
hos mitto, te Vir amicissime quaeso, ut gratum hoc munus ani-
mumque nostrum habeas: & istum ames, illud examines. quo fi-
ne præcipuè scito à me missum. Siquid alibi aliter dictum: hoc
magis mihi amicus, quò liberiùs monueris. quia inter eos ego qui
labi & errare possunt, sed & inter eos qui resurgere & emendari.
De Amplissimi Torrentij valetudine & statu, gratum mihi si per
te cognouero. Iure nobis carus, rarus ille vir. Vale. Lugduni Ba-
ratorum xviii. Kal. Novemb. 1615. LXXXIII.

EPI-

EPISTOLA LX.

Leodunum.

DOMINICO LAMPSONIO, *Leodienſi Epifcopo*
& *Principi à Secretis, S. D.*

DIV est cū scripturio ad te Vir clarissime. ſuſtinui me-
dum ſcriptum illud promiſſum exſpecto, materiem ſcili-
cet vberioreſſimam reſpondendi. Nam lata & læta illa epiſtola, quid
ferè aliud habet, quàm adhortationem & laudes? Quæ ample-
ctor vtraque, quia in iis amorem tuum agnoſco, ſine labe, ſine
fuo. Non merui. quid refert? hoc ipſum delectat, talibus viris &
iudicibus meruiſſe videri. Nō enim fallacia tua verba, ſed prom-
pta è pectore, & vt ille ait * ἐκ φρενῶν λαλῶ. Itaque calcar mihi addis
ad decurrendam reliquam hanc viam: quod detrahunt mihi ſæ-
pe iudicia quorūdam, qui θεολόγων, vt volunt, παίδες. Miſceri enim
hæc nolunt: & ſatis eſſe puram illam à Chriſto doctrinam, ſine
mixtione vllâ Sapientiæ humanæ. Nec acriter iis ſanè pugnem:
niſi quòd neſcio quomodo apud homines vim aliquam habeant
& iuuent etiam iſta externa. Quis veterum Theologorum Philo-
ſophiam ſpreuit? uſurparunt imò & Græci & Latini, ſed ſuo quo-
dam ſine. Ego ex uſu non iuuentutis ſolū noſtræ, ſed generis
humani putem, trahi & conduceri omnia ad metam hanc pietatis:
modus teneatur tantū, & vt hæc diuinis litteris ſeruiant, non vt
contrà. De Amphitheatro philologum aliquid nuper edidimus:
& exemplaria mitti iuſſimus ad Claris. Torrentium vnà tecum.
Nunc feriamur: niſi quòd Taciti Commentarium reſenſimus,
& in quibuſdam reſingimus, ſed leui manu. Ximenio tuo, imò
noſtro, velim à me multam ſalutem dici. quem virum olim pæ-
nè puer Colonia vidi & audiui, ſed nunquam pernouui. Doleo, &
excitor, non in amorem ſolū eius, ſed amplexum: ita multa à
multis audio de ſincerâ illâ & doctrinâ & pietate. Tu ſi mihi in-
terpres & conciliator amicitia illius es, magno me beneficio de-
uinxeris. Ortho Venius à nobis abit, ſed inuitis: inſignis mori-
bus & arte adoleſcens, & cuius manus uſui mihi eſſe poterat ad
multa Antiquitatis illuſtranda. Eum commendatum tibi, tamen
commēdo, etiam me: quem ſcire certò debes tui ex animo aman-
tem. Salutat te I. Douſa. Lugduni Batauorum Prid. Kalend.
Iun. ∞. IO. LXXXIV.

K

EPI-

THEODORO LEEWIO *Confiliario* S. D.

HAVTENVS noster ad te venit: cui utinam ego comes! Sed valetudo validè verat: quæ semper anceps, nunc acerba, tenet, ligatque me domi. Alioquin in votis mihi prorsus, te videre, te solari, & officium exhibere quod eiusmodi tempora exigunt ab amico. Litteris id feci antea: sed nescio quomodo momentum hîc magnum habet frons ipsa & ipse vultus. Euripides non vanè mihi visus scribere, Non serenitatem nautis gratiorem in tempestate aduenire, quàm lugenti amico amicum. Sed & hoc breui, ut spero, fiet. interea mi Leewi, firmare quæso paullum, & frigus illud tenebrasque dolorum calface & illustra ad Rationis solem. Ante omnia nouitatis opinionem hanc exue, quæ luctui tuo mala faulrix. Miserabili, inquis, genere mortis periit, & quod luctu municipium omne nostrum compleuit. Scio, & adfectu aspectuque primo ipse misereor. sed hîc quoque paullum te attolle, & secerne à vulgo. Quid illud miserabile? cum omnia circumspexeris, Mori. Varia ad illam metam via fert, cliuosa, plana, brevis, longa: eadem tamen omnibus quies, cum peruenire. Tua per difficilem partum, & velut per nimbos fluctusque delata est in Beatum illum portum: delata tamen. & præteritus labor adeò non grauis illi nunc, etiam gratus. Tu tantum ne misereare, imò nec mirare. Scilicet id genus Fati nō cadit in hunc sexum? non communis ille omnium prægnantium timor? Imò non crebriores alios sermones audias, si in confessum aut conuētum venias muliebre. Attamen hic nostrum omnium error: cum triste aliquid accidit, etiam si non nouum, habere id ut nouum. Per circumstantias quasdam augemus, polimus, & velut fucum ac lenocinium circumponimus dolori. Scilicet ut pulchrior in oculis appareat iustiorque. Peruersi mortales! cōtrā oportuit: & in omni casu oculos flectere ad communem dispersamque legem. Non Hagam solum aut Bataviæ hunc angulum intruci, aut quid pauculis ibi annis gestum sit: sed diffundere cogitationem per sola hæc terrarum. Conditionem tibi pono. Iure non lugebis solum, sed indignabere ut in nouo fato: nisi alibi terrarum hac ipsâ horâ idem ille aut acerbior casus. Et tamen cur peregrinè? reperies
exem-

exempla eadem, si quæres, in finitimis istis locis. Quamobrem exsurge, & contra leuia ac lusoria hæc Doloris arma, arripe vera. Quid vita, quid mors, quid fatum sit, seriò cogita: scio placari posse implacabilem etiam dolorem. Quid enim hæc vita, quam eripi lugemus? ludibriorum scena, miseriarum mare, per quod ut maxime ex voto tibi feratur nauis, tamen in multos scopulos impingas, multis vadis obhærescas necessum est. Quid ipsa mors, quam timemus? requies, gaudium, & vera vita. aut siquid in eâ mali, malis tantum. Quid miseraris traductâ ad hanc, optimam matronam, & per fidem salutis suæ velut certam? Iam Fatum quid? æterna, ab æterno, in æternum, dei lex: quam adeò non abrogare fas, ut nec obrogari ei liceat aut derogari. Si ab æterno & immobilis: stulte, quid cum Necessitate pugnas? hoc vnum vinces, ut pluribus plagis contusus vincare. Si à deo: impie, quid queris? Culpare non potest aliquid malum aut acerbum in eo & ab eo, qui Bonitas & Benignitas totus. Naturam eius si exprimere voles, non melius aut magis proprium expresseris, quam per eas voces. Mortua igitur tua est: debuit. illo tempore, illo fati genere? debuit. Lex ita lata: quam frustra sollicitant & exagitant acumina hodie ingeniorum. Non enim mouebunt. Quin nos, qui sapimus, pareamus potius; & quod necessario patiendum est, etiam libenter patiamur. Leuamentum aliquod miseriarum est, non reniti. Cur autem renitamur? Non Deus solùm est, qui ita de nobis statuit: sed & pater. Salutare igitur, bonum, prosperum: quidquid sensibus oculisque nostris aliter videatur. An illi curæ aut amor nos esse non putas? magis quam nos nobis. Sed & pueris parentes multa præter votum imponunt, idque tutelæ aut salutis causâ: item ille nobis. Hæc mi Leewi seriò discute & bonâ fide leuaberis, si ostium pectoris semel Rationi aperies, reinto repagulo isto vulgarium opinionum. Plura me Hauteni discussus vetat addere: iubebat tamen amor, qui magnus mihi in te semper & sanctus. Vale. Kal. Martiis. ∞. IO. LXXXV.

EPIST. LXII.

AMICO cuidam S. D.

IRASCERE debebam mi**, si possem. Tu ne ut iter vllum susceperis, non dicam sine comite me, sed sine conscio? Hoc

K 2

verum

verum fuit? Pectus tuum roga: non dicet id esse pro veteri illo & fido inter nos amore. Caput meum hoc tango & testor, nullum mihi caput carius fuisse tuo. Quid autem suspicer? arcanam aliquam causam huius consilij fuisse? non inquirō. & si ea aperienda mihi nō fuit totā fronte, saltem vestigiis & sub personā ostendenda. Ego te in meis rebus tale aliquid nunquam celassem. An subitō hoc tibi natum, & per mortem vnius illius viri? Hoc potius credo, quia reuera causæ tibi temporanei alicuius secessus hīc non iniustæ. Noui collegas tuos, scio quibuscum res & consilia miscenda fuerint: homines & actiones, parum ad tuum stomachum aut ad nostrum. Interea tamen (quæso hoc volens audi à volentissimo tibi amico) nec nos omnino eam rem celandi eramus, nec certè vxor: quæ misera se adfligit. Quamquam nos solamur & erigimur: certi, non aliud latere sub hoc instituto tuo, quàm secessum aliquem ab his turbis. Tamen mulieres nosti; (etsi tua sanè prudens, & mariti ex animo amans) & linguas siue malas, siue vanas. Quibus, oro te, in tempore medere: & ad nos redi, qui manere tecum parati, abire, perire omnia, vt ferent res & tempus. Quæ enim tibi causâ eximij alicuius consilij aut singularis? Confusio hīc & discrimen? Scimus. sed & animum tuum nouimus nihil horum metuentem. Denique inter homines istos dum viuimus, obsecro vitam etiam instituamus humanā hac & communi viā. Pax aut bellum erit? communiter consilium aliquod capiemus, quod paci huic attemperemus siue bello. At ego tanquam seriō scribo, & quasi monendus mihi sis: quem liquet vsurpasse hanc protectionem animi causâ; etsi cum angore aliquo tuorum. Quibus etiam, mi **, consule. & ad suauitatem conuictus illius nostri redi, sine quo tenebrę nobis in mediā luce. Verè dicā etsi vulgariter, Vita sine te nobis nō vitalis. Res adhuc hīc quietæ: sed Brabantia tamen & Flandria raptantur, vt audire te credo etiam istic. E Galliis litteras iam bis accepi, & quædam in iis noua. vt de re accipitrariā carmen, subtilis & nouitiæ inuentionis. Veni & vide, & (quod Constantiam tuam meamque decet) ride. cur enim non spernamus hæc circumfusa & externa, iure iis altiores? Nobiliss. VV. Philippum Sidnæum, & Dierum, si vides, saluta à me quæso: & iis indica, per te stetisse quod eos non viderim tecum. Certè enim inuitis meis omnibus iuifsem.

sem. Tui valent. Vale & tu, & fac vt breui te videamus expectatum. Salutat te Hautenus noster, qui hilariter herè apud me in prandio fuit ad funus Melonis. Inuideas illis exsequialibus epulis, si in tam albo pectore liuor. Lugduni Batauorum x. Kalendar. Septemb. ∞. IO. LXXXIV.

EPISTOLA LXIII.

Lutetiam.

AVGERIO BVSBEQVIO *Cæsaris Legato*, S. D.

PERIISSE litteras meas nuperas ad te, minùs doleo, quòd de officio meo saltem tibi còstat. Nihil enim in iis magnum aut serium. hoc tantùm, adfectus mei & cultus significationem continebant: quem à iudicio susceptum, constanter seruo. At tuæ istæ litteræ, quàm mihi grata, & in mediis his molestiis iucundè! Præter enim amorem (qui largiter appâret) etiam grauissimi testimonij tui pondus continent & iudicij de meis scriptis. Quod amo magis, quàm probo: quia mihi virium mearum conscius & modicæ laudis. Fuimus his septimanis aliquot in Taciti Commentariis refingendis, & nouis quibusdam attexendis, vt videbis. exemplar enim Antuerpiâ iussi mitti: si tamen commodè id poterit per has turbas. Nam caput illud Belgij à corpore nostro semi-auulsum. Ripas obsident, & tormentis aditum nauibus arcent: etsi nautæ adhuc perrumpunt. Nobis mutatio non impendet iam, sed adest: faxit ille Deus vt in bonum. Quamquam hæc sunt illa, aduersus quæ Constantia nostra nos arinauit: quæ hoc saltem mihi profuit, quòd ab eâ scriptione impressum animo meo aliquod robur. Plures hîc imperant. nec vidi eam rem benè vnquam cessisse in bellis. Discidium etiam animorum præfagio, & motus fortassis in ipsâ plebe. Nobis tamen decretum patriam non mutare, si mediocris aliquis in eâ status. si nullus, & si confusio tantùm & raptus: quæcunque terra dederit nobis aliquam sedem. Nec enim liberi prægrauant, & sola mihi vxor. Ianum Gulielmum commendaueram tibi superioribus meis litteris, adolescentem, si quid video, probi ingenij, animi, iudicij. Ei si quid benignè facere potes aut dicere, quæso ne grauere. Ex istâ iuuentute nō est alius, de quo meliùs sperem. Itineraria tua Plantinus si accipiet, edet. nos qualecumque augmentum auidè expectamus.

spectamus. De Thraseâ meo poliendo cogitabam, vereor ut tempora permittant. Quidquid tamen ea permittent, mihi certum conferre ad hanc meliorem curam; & quod in me est, fugitivas virtutes retrahere in nostrum ævum. Valdè me huc incitat etiam tua admonitio, & votum, quo honorificè nimis epistolam tuam claudis. Vale Amplifs. Domine. Lugduni Batauor. x. Kalend. Septemb. ∞. ID. LXXXIV.

EPIST. LXIV.

*Leodium.*LAEVINO TORRENTIO V. *amplissimo* S. D.

ITa Salus aliquando seriò me respiciat (nam hætenus quidem adit, abit, & vacillat) ut mihi insigni gaudio imò robori sunt tuæ litteræ, tam amanter ad Plantinum de me scriptæ. Te novi, me novi: & hoc scio, hunc tam prolixum adfectum non meruisse à tali viro. Quid dicam? me meaqué offerrem & addicerem, nisi iam pridem addicta tibi, nexu quidè & vincolo, quod non nisi atra mors rumpet. Commentatiunculas nostras semestris hic morbus valdè tardavit. morbus, qui per intervalla duxit me ad Fati limen, & reduxit. Nec nunc optimè: etsi in optimâ spe, ut medici volunt, & iam in abscessu atque inclinatione sit morbus. Absque eo, iam & Suetonium meum haberes (meum? imò verè tuum, cum tuo integro Commentario, meis tantum ad oram Notis: præterea votum tibi & dicatum:) & Dialogos nostros De Rectâ institutione iuventutis, quibus sermonis partes do Philippo Lanoyo & Papio nostro. Amo enim & amaui rectissimum ingenium adolescentis, dignissimi hac vitâ, nisi meliorem ei Deus destinasset. Plura iubet amor meus, imò ardor: verat languor, & serum hoc diei, quo litteræ tuæ conspectæ nobis. Excusa. & apud Dominicum Lampsonium item nostrum, cui cis paucos dies vbertim scribam. Officij enim aliqua cessatio apud me per hos menses, non amoris: qui mihi æternus in tales viros. Vale, & salveat à me Lævineius tuus. Lugduni, ut volunt, Batauorum. Postrid. Kalend. Ianuar. ∞. ID. LXXXV.

EPI-

BONAVENTURA VVLCANI, *Vir & collega amice,*

CALLIMACHVM, Bionem, Moschum, iam nunc à te accepi: vno partu trigeminos, rarum & felicem ingenij tui fatum. Publicâ causâ (verè dicam) tibi debeo: priuatâ magis, quia duos ex iis mihi inscribis, hoc est, immortalem me facis. quo quid homini ab homine maius dari potest? Viuent enim amœnissimi poëta illi, quamdiu Musæ: & cum iis tuus labor: & cum labore tuo meum nomen, quod Musæo illi peplo intexuisti amicâ & doctâ nimis acu. Gratias agam aut habeam? referre malim. & tamen verbis quoque nunc dicam, sed paucis & fidis. Emptum me tibi hoc munere, mancipio tuum. & addo improbi hominis priscas illas voces, sed probè & sinceriter: *Quid concupiscas, tu videris: quod concupiueris, certè habebis.* Libros nouitios, quos è diuite bibliothecâ tuâ prompseram, per hunc puerum recipe. De ** Collectaneis iudicium quæris? illud Iuliani scitum profero: * *ἐγνων, ἀνέγνω, κατέγνω.* Magis ad gustum meum Conui- * Vidi, le-
gi, damna-
ui. uialia Stuckij, ex eadem gente, non ab eadem mente. Firmiora hîc omnia & lectiora. De Sigma, quod obiter quærebas & videras, ille nihil noui: fortasse nunc ego. Nam quæ in Antiquis scripti, vacillantia aut falsa. Non enim Sigma antiquis Biclinium propriè, vt sensi ego: non diæta aut cænatio tota, vt Cælius: non mensa ipsa, vt Brodæus: sed nisi fallor, certa in cænatione pars seorsum erecta & exstructa ad recipiendum lectum. idq; hemicycli aut lunatâ formâ, quâ littera illa Græca passim hodie in lapidibus & priscis libris. Suggestû, inquam, quoddam ligneum (siue quâ meliore materiâ, non impedio) semirotundum: in quo perpetuus vnus lectus, ad sex septem conuiuas recipiendos. Quod velut dimidiatum triclinium repertum inferiore æuo, ad facilem & magis aptû vsum. Ab Apuleio hîc mihi prima lux, & à me illi. de Psyche, lib. v. *Viso quæ statim proximo semirotundo suggesto propter, instrumentum cænatorium rata refectui suo commodum, libens accumbit.* Non nominat Sigma, fateor: sed auribus oculisque ingerit quasi nominasset, ita clarè. Semirotundum suggestum ponit, & Instrumentum cænatorium appellat. quid capere aliud est, quàm hoc Sigma? Triclinij enim certè non illa forma.

Radium

Radium mihi etiam aliquem, etsi à tenebroso æuo scriptor, allucet Ditmarus Episcopus libro IIII. Chronicor. De Othone Imperatore: *Imperator*, inquit, *antiquam Romanorum cupiens consuetudinem reuocare, magnâ ex parte iam suis deletam temporibus, multa faciebat quæ diuersi diuerse accipiebant. Solus ad mensam quasi semicirculum factam, loco ceteris eminentiore sedebat.* Quod libens item rettulerim ad Sigma: sicut illud ad Principalem morem, quòd solus, quòd loco eminentiore. Sed mensam ipsam ad Sigma, lunatâ item formâ fuisse hinc discis. parte dico eâ, quâ conuiuas tangebatur: nam illâ, quâ alios, fuerit lineâ sanè rectâ, ad ministerium & adfectionem puerorum scilicet aptiore. Et quanquam de mensâ hîc Ditmarus: non tamen eam solam venisse in id nomen (eruditissimo Brodæo scriptum:) peruincit Sidonius, qui in his versibus discriminat clarè:

*Non tibi gemmatis ponentur prandia mensis,
Assyrius murex nec tibi sigma dabit.*

Ita omnino lego, non *Signa*, vt vulgò. Idem alibi nominat, & ostendit duplex fuisse, Æstium & Hibernum.

*Cominus aspicitur vel prima vel extrema turris:
Mos erat hic dominis hibernum sigma locare.*

Vbi Locandi verbum refutat item Cælium, Diatam capientem ipsam. At ea non transfertur; non locatur in turre. Cetera quæ huc faciunt, aut ego aut Stuckius iam diximus. De Antecanâ etiam ambigo, quòd ad vocem. Macrobius sanè ita: sed in Apuleio & Isidoro tuo Antecanium, siue multitudinis casu Antecania reperio. quidni rectè, quo flexu à Scenâ Proscanium? Ille libro II. sic: *Prorsus gladiatoria Veneris antecania.* Alter lib. XX. *Merenda est cibus qui declinante die sumitur: quasi post meridiem edendus & proxima cænæ.* vnde & *Antecania* à quibusdam dicitur. nisi si hîc utrobique Antecana reponenda: quod haud temerè putem. Salue iterum mi Vulcani: iterumque tibi à me gratiæ. quas promam semper & recondam, habebo æternum & debebo.

EPIST. LXVI.

Lutetiam.

IANO GVLIELMIO S. D.

SERIO Ægrotabam, mi Guilielmi, tamen expressit amor vt scriberem: non miraberis, si paucis. Hepatis enim acer nec
finc

sine discrimine morbus est, qui me septimanas iam aliquot affligit: quam partem ad vitam eiusque munia principem esse non ignoras. Litteræ tuæ nuperrimæ suauis. celasti in iis me de Epistolâ in Sigonium, quam missam tamen è Britannia vidi. Gaudeo conspirare te mecum: cuius iudicium super eâ Consolatione credo te iam vidisse. Sed tu, fodes, cur non acrius paullo egisti hanc causam? Debebas. & sine adpectu illius, quem nimis attollis, falsæ huius proles patrem. Agnosco stilum, disiectum, otiosum, lentum: & illam (audeo apud te dicere) Sigoneitatem. Quid sibi volunt Itali? Transalpinos omnes esse fungos? Scilicet nemo nostrum inter oletum illud diiudicet & Tullianam myrrham. De Re Accipitrariâ nouitiæ & acutæ inuentionis carmen accepi. legi mihi iussi per hunc ipsum morbum. placuit. Gratiæ quæso à me auctori & datori nuntia. cuius mihi laudes gratæ, eò imprimis quod iunxit me laudatissimis illis viris. De P. Fabro gaudeo mihi impositum. Tamen scripseram etiam aliquid ad Cuiacium. Tu purga. Tacitus noster prodit, & nouæ ad Historias reliquosque libellos Notæ. sed Notæ tantum. plura valetudo vetuit, & hæc turbat, quæ rerum & mætionis nos faciunt incertos. Saluta Brissonium, Memmium, Scaligerum, & tu salue quidquid me erit. Constantia nostra iterum prodit cum Præscriptione aduersus quosdam qui in *uerebia doctores*. Critica omnia nostra imprimuntur vno volumine iunctim, quibus noua quædā addemus si valeo & viuo. Lugd. Bat. xiii. Kal. Octob. ∞. Io. Lxxxiv.

EPIST. LXVII.

IACOBO CUIACIO IC. S. dico.

SAEP E mihi de te sermo, Cuiaci clarissime virorum: apud te adhuc nullus. Hoc pudor vetuit: illud iussit amor & admiratio tui. quæ nō apud me solum, sed apud omnes in quos scintilla aliqua diffusa lucis melioris. Et euauerunt tandem hæc duo, ut absumperem ingenitum mihi modestiæ vinclum: & iter ad amicitiam tuam struerem sine vllis cuniculis, aperte. *Perit enim procari, si latet*, aiebat ille: & sæpe iam litteris nec vnus nec vnus, spes inō fiducia mihi facta mutui tui adfectus. Quæ non me faller: si noui humanitatis veræ genium, qui spirat in tuis scriptis.

L

De

De rebus meis si in hoc aditu amicitie aliquid quæris: cetera commodè agimus, nisi quod inter eos quibus rerum bonarum non magnus sensus. Bella etiam & tumultus quibus inuoluimur, fieri non potest quin interdum & tangerent nos & angant. Si de studiis: Commentarium Cornelianum vulgamus iterum, sed pleniorē. addimus enim in Historias & adiunctos libellos. Vtinam autem fas polire mihi eum præsentis tui limâ! Quia non licet, velim tibi animus otiumque sit vel per litteras dirigendi me, corrigendi. Labimur enim, Cuiaci, in hoc genere ego aliique: & illa tua velut propria laus, exacta certaque esse quæ semel ex adyto tui pectoris profusa. Paramus etiam de Amphitheatro seu Venatione libros tres, ut fiant legitimi Saturnales quinque. Nescio quid præterea in Liuius nuper exorsus: quod pergam detexere, si auxilium mihi paullo firmitus librorum. Duo tresque apud me sunt: sed quasi de compacto consentientes. Tu, Vir maxime nostri æui, si dignum me habes quem redames, quem rebus item tuis consiliisque (de litteris loquor) participes, in cælo me collocabis nouâ apothecâ. Ios. Scaligerum quem scio me tantum amare quantum tu, & quantum te, (liberè enim addo,) ex animo salutes velim: cuius libros De emendatione temporum auidè auidè expectamus. Nisi ambitiosum sit, includam in eandem salutem magnum Brissonium, Puteanum, Fabrum, Pythæosque, viros clariss. & idè mihi quoque fainâ notissimos. *Amare autem liceat, si potiri non licet.* Vale Vir clariss. Lugduni, ut volunt, Batauorum. III. Non. Octobris.

EPISTOLA LXVIII.

THEODORO LEEWIO *Consiliario S. D.*

DISTYLI ad te scribere, Vir clarissime, non libens. Morbus meus hoc fecit, qui non sine discrimine etiam nunc me vexat. Ego fero: & æquissimo animo expecto illum diem, quo Imperator hoc corpore, imò carcere, me soluet. Obstructiones sunt quæ me tenent, internæ inflammationes, nescio quæ arcana alia symptomata, ad quæ medici ipsi trepidant & caligant. At non ego. scio hanc legem vniuerso humano generi datam: nec magis mirum aut nouum mori hominem, quàm nasci. Denique
quid

quid est quod in sæculo hoc me teneat aut delectet? Publica vide: pessimè habent. Priuata: etiam in iis suæ cruces. Melonem nostrum tibi gratum fuisse, mihi gratum. Sanè bonos & eximios aliquot habui hoc anno. sed quid? ego, velut Tantalus sitit inter suas vndas, esurio inter medios melones. Nec gustare quidem mihi fas ob hunc morbum. Constantiam nostram recudit Plantinus. pauca mutata aut addita præter Epistolam, quam videbis. Exemplar Latinum Seb. Gryphio nostro dabis, cui ex voto debeo. Belgicum vxori tuæ seruiet: si tamen hæc ad sapientiam illius sexus. Sed tu, si tanti est, interpretando iuuabis. Ego te illamque saluere ex animo iubeo. nam longior scriptio mihi non facit. Valete vterque. Leida, 1 x. Septemb. ∞. IO. LXXXIV. hodiè paullo rectius valere visus sum.

EPIST. LXIX.

MARTINO LYDIO. S. D.

VALDE me, Lydi, de scriptiunculis meis vrges: vtrique de Thraseâ. Quod nollem. Cur enim ea tanti? & si essent, non certè differrem si otium aut vires mihi tēpora darent & hæc valetudo. Quæ nunc quidem (deo magno gratia) præter spem melior: sed infirma tamen ancepsque: & quam fouere ac vegetare per quietem debeo, quàm meditatione aut scriptione infringere. Paratus sanè magnâ ex parte Thraseas, fateor: sed limam tamen expectat & extremam illam manum, quæ mihi quidem maximè in labore. Cetera enim impetu & calore quodam scribimus: iudicij hîc res est, & acrimoniæ, & intentionis. Materiam ipsam vide, grauem, seriam: an præcipitanda tibi ea videtur, & in pugnam aut aciem vocanda mea fama? Futurum id enim certè in rebus illis sublimibus, nisi omnia non benè solum dicta, sed etiam cautè. Sæculum hoc noui, contentiones & variantes sententias quæ vbiq; vigēt. & vt veram liberè maximè exprimam (non enim vnquam deterrebor) videndum tamen vt verbis & tēpore id faciam opportunè. Festinare in aliò quouis scripto possum fortasse & debeam: hîc non nisi maturare. At de Agellio, ecce magis me tibi facilem. Etsi enim H. Stephanus iam nunc eum dedit: tamen non spicæ mihi solum multæ, sed fasces reliqui,

quos carpsam ex Attico eo agro. Itaque Plantino ultro iam locutus sum, nec differemus si cursum typographiae eius non sustent aduersi isti venti. Nam Antuerpia si amittitur, optimi viri res in arcto: nec facile de sumptibus expediat aut papyro. Quamquam id quoque curabimus. Sed tu mi Lydi, quando in Frisiam? Gratulor enim tibi hoc otium, non otium: honestum tibi, utile futurum iuventuti. Meo voto & electione iam pridem tibi is locus apud nos fuisset, & Doufam habeo crebri iudicii huius mei testem. Sed Deo aliter visum: qui te meque ad salutem foueat & firmet. Vale Vir amicissime. Lugduni Batavorum. h. m. i. Kalend. Iul. ∞. IO. LXXXV.

EPISTOLA LXX. Brutus.

VICTORI GISELINO S. D.

ITANE litteræ à Victore? tandem, tandem. Quod in gaudio improviso, vix credidi ipse meis oculis cum legere, manibus eum tenerem. Itaque verè scribis, pro bono tibi cessit perucax cessatio: quia in morâ abisse videbatur, & desisti flagitari. Imò præscriptio tibi iam pænè proderat (si Iurisconsultus esse vis) nisi hæc interrupisset scriptio. Sed vide ut nō specimen solum emendandi nobis præbeas, sed re emēdes: nec gustum modò, sed rectam plenamque crenam. Aliàs, quò arenti mihi & sitienti paucula ista gutte, si veniam tu iterum interclusurus es huius suauitatis? Sed non facies: quia non ultra ego facilis in ignoscendo, vel te auctore. Quod si iram etiam meam contemnes: quid? quid? Veniam videlicet ipse, & iterum te mihi adseram subtractum non bonâ fraude. Trellæo illi dii omnes benefaciant: qui adiutor tibi, ut opinor, & interpret honestissimi muneris. Sed ad carmen eius suadēsne rescribam? Nec enim hominem satis noui aut mores. De schidis recipieris, noua & mira. Sed siue illum poenitentia (non enim pudor) furti subiit: siue eum apud quem deposita: tibi quidem ex animo gratulor de receptis. Vide, ut te vna cum illis. Nam certè, mi Victor, indignantur iam pridem nostræ deæ desertas se à te, illo militiæ suæ principe olim & antesignano. Purga: & ostende emanfionem hanc fuisse tantum, alendis ingenij viribus, & velut quiete irrigandis. De Plinio, ego quidem valde sum

sum auctor. Nec excusa. velis modò, fides mea interueniet de
 successu. Plantinus ades hîc emittit, Typographiam instituit, &
 videtur effecturi vt stipendium ab Ordinibus accipiat hone-
 stum. Fortassis carer eriger excitabitque me ad studia, aliàs saepe
 languentem. Laco noster, vt audio, plurimè perit: nec dese-
 ruit illum præcentem Nemesis, etsi pede claudor. A Cuiacio be-
 nigna multa ad me & honora. Gifanii Agellium excudi audi-
 mus. quem ego scriptorem ante quattuor menses ad Plantinum
 miseram, seuerè & anxie correctum: curque omiserit aut dimise-
 rit, ne nunc quidem scio. Necquarò fanè aut duro. Nam si meus
 aut otium mihi, satis multa in aliis scriptoribus quæ agamus: ne
 eripiam hæc patri prolem, iam cerè nubilem & plus quam quin-
 decennem. Scis quid ille semi-Italus questus de filiola suâ nuper:
 non sine risu meo, credo etiam vestro. Quem mihi commendas-
 ti, cupio omnia: sed nihil dum ego aut Dusa extricamus. Nam
 de Plantino quam ei spem ostenderam, profertur in eius aduen-
 tum, id est ad initia veris. Antè nihil statuere de domo suâ vult
 aut potest. Dusa noster Commentarios ad Petronium scripse-
 rat, nunc totus in Historiâ concinnandâ suæ gentis.

EPISTOLA LXXI.

Londinium.

I A N O D O V S A E V. N. Salutem opto.

AN potius linguam ista enim decast, quâ tam diu files. Vindi-
 ctam talionis merebare: sed noster amor si non maior, cer-
 te acrior: procatur, & læcessit te vltro. Valemus ego, tui liberi, tua
 vxor: non inæc Musa, quæ frigent absente suo Sole. Exorere, &
 aut vultu tuo coram calface, aut illinc saltem radios & stricturas
 aliquot per epistolam mitte.

EPIST. LXXII.

Antuerpiam.

IOHANNI MOERENTORFIO S. dico.

VXOREM ad te redeuntem, mi Moerentorfi, quâ dimittam
 sine litteris? Egrè eas scribo, fateor: sum enim in alienâ vr-
 be & domo: scribo tamen. siue quia debeo, siue quia valdè volo.
 De filioli tui apud nos obitu socer, credo, iam scripsit. Ego te so-

L 3

ler?

ler? animo facio: verbis nunc non licet, nec opus est, si firmitudinem animi tui probè noui. Sepe eam in litteris ad focerum adspexi, sed in alienis rebus: te illa deferet in tuis? Non opinor. præsertim cum ita placita tibi ea virtus, ut per eam Cōstantia etiam nostra: quam non legis solum auide, sed vertis. Vidi enim specimen, & probō. illud vellem, plus aliquid tibi permitteres, nec vestigia vsquequaque sermonis Latini premeres pede tam certo. Atta per hanc curam versio, astricta, tenuis, sæpe obscura. Est suus videlicet cuique linguæ Genius, quem non auellas, nec temerè migrare iusseris in corpus alienum. Quàm multa Latine breuiter scripserim, quæ si totidem verbis transferas, sententiæ nec plana satis, nec plena sit! Quàm multa rectè & altè: quæ in aliâ linguâ iaceant aut vacillent! Quod iis præsertim euenit, quorum stilus paullo magis ab eruditione, & à curâ. Iam allusiones illas, an nominationes, flexus, & in vno sæpe verbo imagines, quæ tam dextra mens vertat, ut eadem vis iis aut Venus? Exorbita igitur: & hoc erit rectam in vertendo viam tenère, viam non tenère. De pecuniolâ Facuensi, grata tua cura. expediemusne aliquid à nummario hoc tricone? quidquid erit, tibi debebo. De cistâ scriptoriâ, ô gratû & opportunum tuum munus! planè eâ egebam. gratiam tibi meæ Musæ. Tu tam benignus in nos saluè, & vide ut validum te reperiât valentula iam tua vxor. Delfis, III. Idus Sept. ∞. IO. LXXXIII.

EPIST. LXXXIII.

GEORGIO BENEDICTI.

ET cāmen tuum valdè mihi gratum, mi Georgi, & beniuola memoria mei: sed illud longè gratissimum, quod valens & incolumis appuleris ea loca, ad quæ missus es velut ad mercatum artium feriarum. Philosophiæ dico, & imprimis Theologiæ. ad quam postremam non actiones solum omnes tuas, sed cogitationes necessum est collineare. Quæ tamen ipsa, quoniam sine pierate & puritate nulla est; caue, te quæso, ne quid labis aut maculæ trahas ex cœtu iuuentutis maculosæ. Fuge illos, fuge, qui liberioris vitæ obtentu ad licentiam trahunt: quæ vna ianua & aditus ad omne scelus. Magna non frustra nobis de isto ingenio tuo pollicemur: tu vide sollicitè, ne id deprauent prauj. In flexu ipso ætatis

ætatis es: in quo si non laberis, speramus te inoffenso deinde cursu pertingere posse ad metam. Vale. Lugd. Batavorum. 10. 10. LXXIV. Deus te seruet, in quo & à quo omnis salus.

EPIST. LXXIV.

Lutetiam.

IANO GVILIELMIO meo S. D.

EGO verò Quæstiones tuas iam antè videram, & legeram cum curâ. An gemmæ hæ non luceant? aut nos celerentur? itaque non itero apud te iudicium meum, quod apud alios nusquam celo. Si tamen de alterâ editione cogitas, sunt minuta quædam quæ te monebo. Quid ni moneam? amici hoc est: & utinam id mihi iuueni factum in meis scriptis! Quamquam reuera tua iuvenile nihil spirant, matura, adstricta, graua: nisi quod à iudicio tuq abeo in pauculis locis. Itaque abi, nec festinationem mihi excusa, quâ nihil peccas. Noster, ille noster, etiamnum Luretia? & quando tandem videbimus in luce illas Noctes? sanè longa & difficilis satio in hoc Agello. & metuo vt acerbi etiam fructus, incusante & incurante Oberto. Doleo. sed videor tamen de his studiis nostris posse dicere

** Δὴν δὲ λέω ἐν ταῖς καὶ βλάβη βλάβη.*
Impudentiâ id fit & scâuitate quorundam, qui perfudère animum scientiâ, non imbuere. Gulielmi Furnerij, ad De verborum significatione, vidimus: probum, & sine ambitione doctum planè opus. Fauco, admiror, amo. P. Fabri Ad Regulas auidè exspecto: nec inducor vt lædi me credam posse ab eo viro, non certè si me nouit. Quid tamen eius sit (nam è Coluio nostro inaudiui aliquid) liberè, vt oportet, scribe. Ego æquiter puctuunculas aliquot stili eius feram, qui sæpe me iuuat. Errico Memmio viro summo, (ita dudum sentio,) meo nomine indica: scriptum ad me ab Egmondo de oblati Notis aliquot in Tacitum, sed litteras eas tardè, imò serò redditas: itaque non postulasse eas me, habere tamen ei gratiam proinde ac si impetrassem. Dicare me ipsi hunc animum, & si ne fuco amorem. Clarissimo viro Claudio Puteano, iam diu etiam laboro, vt animus meus innotescat, scio illum esse inter lumina illa Gallia: & velim valdè eum à me saluere. Sed tu, mi

Gulielmi,

* Litè parit lū, noxatem noxam seruit.

Salueat à me, & tu vnà amicissime Camerari. Lugduni Bataur.
xvi. Kal. Iun. ∞. IO. LXXXIV.

* Effusus
ex louera-
mus.

EPIST. LXXVI. Biturigas.

IACOBO CUIACIO IC.

NON ipse contentus in amicitiam tuam penetrasse, aliis ec-
ce fores aperio, quasi in eâ vetus. Iuuenem hunc tibi com-
mendo, familiarem nuper meum, oris & ingenij probi. Com-
mendo autem ita, non vt ad interiorem illam amicitiam tuam
admittas (aliis seruetur aditus ad illa adyta) sed ad externam hanc
notitiam, quæ in adfatu posita & ad spectu. Hæc enim illi sufficit.
& adolescentibus id ætatis satis gloriæ, Vidisse, Conuenisse.
Quamquam hic etiam Audisse referet: quæ vnica illi causâ Bi-
turigas, imò Galliam, petendi. Tu mi Cuiaci illum, vel meâ causâ
sâ complectere, & me omnino, qui æternum tuus. Lugduni Bat.
Non. April. ∞. IO. LXXXV.

EPIST. LXXVII. Lutetiam.

FRANCISCO RAPHELENGIO FRANCISCI F. S. D.

IAM vir es, laudo. Binas à te litteras accepi, tu à me nullas: non
culpâ tamen nostrâ (scripsimus enim vbertim nuper) sed Lie-
gatorum qui diem ex die ducunt, & more suo morantur. In eo-
rum enim comitatu I. Esychius noster est, cui fasciculum dedi-
mus. Valetudo nostra infirma, incerta, non etiam animus, cui
fixum parere & sequi magnum illum Deum. At rumor ille fal-
sus, qui vos terruit de meâ morte, qui tamen idem Brugis &
Leodij sparsus, ne mirer apud longinquiores Gallos. Homines de
meo capite possunt ludere, statuere tantum supremus ille Prin-
ceps. Ego mortem non timere dudum didici: quin vt hæc tem-
pora & languores mei sunt, propior sum appetenti.

* Κρείσσον εἰσάπαξ θανέειν

H τὰς ἀπώσας ἡμέρας παρῆν κακῶς,

ait Æschylus. In studiis quod pergis & perseueras, gaudeo. quid
sequendum tibi, reperies in litteris meis primis. Passeratio sedu-
lam

* melius est
semel mo-
ri. Quam
continenter
in diu affli-
gi male.

lam operam da: qui vna columna labenti Scholæ. Nam vetus fanè Parisiensium doctorum gloria valdè flaccuit & imminuit. Sapientiæ studia & virtutis ne omitte. Pietas tibi in mente, modestia ante oculos, & demissio animi: ad quam numquam satis te horter. Illa fundus bonorum omnium & fundamentum: nec pestis alia plura ingenia abripuit, quàm Confidentia & æstimationis sui. Tu abstine. Reuera enim quid sumus? quid scimus? Quò longiùs progredi in scientiæ veræ viâ, tenebras & circumfusam caliginem magis cognosces ingenio humano. De me ne labora, si quidam inuideant aut carpant. An ego eximius sim inter homines qui sunt, qui fuere? Omnes qui excellere aliquâ in re conantur (non enim dicam qui excellunt) statim adfluit & adussit malevolentia ista aura. Cita veteres, reperies. Circumspice hodie nostros: idem. Quid miraris si Marculus aliquis hoc in me faciat aut Lacon? Mihi sententia de me, non nisi apud me fertur: nec quis sim, alium rogo. Interno isto iudice si probus audiam: quid addent aut dement mihi hi sermones? Nec famam tamen sperno, aut neglego: sed hoc te moneo, non esse eam nostræ potestatis. idè inter externa habendam, & in momentum nullum ad beatam tranquillamque vitam. Quis sim, in me situm est: qualis audiam, in vano isto vulgo. Sed ad te redeo. Iuxta Sapientiæ studium, stilum cole & exerce: qui diuæ illius fidus & necessarius administer. Quid enim recondita illa aliis proderit, nisi spargere & emittere ad plures eam poteris felici quadam pennâ? Stilum autem, meo iudicio, Plautus & Cicero tibi perficient: aptâ quadam, & quam ex me sæpe audisti, mixturâ. Æuum tuum vides? propera. nò aliud magis idoneum disciplinæ. Autum tuum vides? item propera. infirmus enim ille tibi cen qui te sustentat. Morbi & languores cottidiani illum vrgent, facturi aliquando quod minantur. Quis autem studiis tuis gubernator, amisso illo? Nam & ego sanè infirmus. quoramen viuo haud spero quidquam tibi deerit. Vale. & veram virtutem nosque ama. Lugduni Batavorum xvi. Kalend. Ianuar. 1610.

LXXXIV.

EPI-

EPIST. LXXVIII.

Aurelianus.

EVERARDO POLLIONI S. D.

ERGÓNE in Galliâ tam diu es, & files? Siue adfectum meum in te respicis, siue consuetudinem quâ domi meæ vsus: peccas. Nam me certè vel morbus excusat, qui quattuor iam menses perpetim me vexat. Et tamen cum mihi arbitro tibi res est. scribe, & excusasti. Loca illa quâ placent? quâ homines? Probi illic, scio, improbi quæ: sed hos, mi Pollio, vitâ: & in primis si qui nequiores aut leuiore. quæ verus gentis illius notâ, & nunc per bella, per tumultus, auxit valdè. At illos (probos inquam doctosque) elige & excerpe: his adhære: linguam ab iis disce & mores. Ut aromata odorem semper aliquem adfricant tangenti: sic boni & modesti, auram aliquam suæ virtutis. Inter hos Aureliani (illic enim agere te cenfeo) Furnerium antecessorem habeo: quem virum probum esse audio, penitus doctum è scriptis scio. Si potes, illi innotescere: & si gratum esse putas, à me saluta. Pestem in iis locis sæuire accipio, nisi si iam defæuit hoc frigore & hac hieme. fuge contagem illam, quantum humaniter potes: sed ante omnia pestes illas animorum, sodales malos, qui fraude & arte inrepunt & inrumpunt. Plura, cum rescripseris. Nos enim adhuc in morbo: nec sine discrimine, nisi clemens ille Deus auertat. Qui virtutem modestiamque tibi seruet, & nostri amorem. Lugduni Bataur. XVI. Kal. Ianuar. ∞. IO. LXXXIV.

EPIST. LXXIX.

MART. LYDIO. S. dico.

SOLICITUDO tua de valetudine meâ, non magis mihi noua, quàm amor tuus, quem iam diu ostendis. Vtraque grata. consilium etiam, quod amicè adiungis contra vim melancholici morbi. Sed mihi, mi Lydi, nō planè capitalis ille morbus, non inquam vera Melancholia; sed tantum suboles eius, flatuosa illa hypochondriaca adfectio, longa & sæua nihilominus, nisi quòd cerebro & menti adhuc parcat. Quæ cōstant mihi, nisi erro. Nam in hoc ipso morbo illud mirum, quòd cum maximè desipiunt, sapere maximè sibi videntur: & ita aberrat à se mens, vt se non

M 2

quærat.

quærat. Libellum quem dicis Aloysij Luifini, vidi numquam. argumento certè iam nunc placet, nescio an tractatione. De Thraseâ meo aliisque scriptis, quæso minus vrge. In morbo hoc nisi morbidum quid possim? & ego me ne sanum quidem ad scribendum scio accedere, nisi cum vegeta mihi mens & acris. Cum calore quodam nostra illa pangimus, non minus quàm poëtæ. At nunc frigeo & rigeo, anni tempore & morbo. Ego mortuus in Galliâ & alibi dictus sum, vt ex litteris non vnus intellego: falsò. Vtinam tam falsò L. Guilielmus noster, quem emigrasse scies Iulio mense Auarici Biturigum, correptum aridâ febre. Item C. Sigonius in Italiâ abiit, reliquum in eâ gente lumen. Herè mihi dictus Cuiacius idem fecisse, nec tamen certò. Quid ais: nonne funestus & fatalis ingeniis hic annus? videtur. De me, Deus ille & seruator meus videbit: qui nec præter mētem meam hac in re aliquid statuet, nec præter votum. Obsecro enim quid nos teneat aut liget in hac facce? Nihil me: qui magis magisque in dies video. & rideo furorē Principum & vulgi. Etiam priuata si introspicis: miseriæ, & angor, & languor: & cum Homero

* *Maror
subit ex
marore.*

Quæ tamen Christiani meritò ferimus, quamdiu Deo illi visum, qui explorat & expurgat nos per hunc ignem. Ei te, mi amice Lydi, commendo: & me precibus apud eum tuis. Vale.
Lugd. Bat. xvi. Kal. Ianuar. ∞. Id. LXXXIV.

EPIST. LXXX.

Romam.

ROLANDO WINCELIO S. mitto.

ME quoque certè accendit ad redamandum amor hic tuus, cuius scintillæ exsiliunt & emicant in omni epistolæ tuæ parte. Quem quod meritum meum siue aluit, siue accedit? Nam quod magni æstimas hoc nescio quid litterularum, quod in nobis est, vide mi Winceli, ne abducatur & seducat te adfectus. Voluimus sanè quædam in publicum; sed adolescentes, nec annis aut iudicio satis adhuc firmi. Quibus, benignè mecum agitur, si venia à Lectore tribuitur; nedum vt cumulus iste laudum. At tu tamen ea extollis, & cum aliis quibusdam errorem erras, quem negare mihi non possum esse gatum. Posteritas saltem (vt ille inquit,

quit) ita de me meisque aut erret aut iudicet. Nam viuis certè iudicia multorum experior valdè in me prona. Quorundam etiam aduersa, fateor. & cur offender? scio, quòd sæpe meritò. Lapsi enim non semel sumus, præsertim in iuuenilibus illis scriptis: quæ tamen nunc reprehendo & retracto, & à postremâ hac incude firmiora erunt, nisi fallor, contra malum dentem. Sed cur tamen in me iniqui? Dent mihi aliquem ex omnibus æuo nostro Criticis, qui non peccant; & flageller ego solus. Sed hos omitto. illud tantum instillo: si temerè arroserint,

** ἡδὲ μὲν δ' ἀνοὶ ἀνδρα γορνόν.*

** Etiam mus
momerde-
rit virum
improbum.*

Sed libentiùs ad beniuolas & amicas animas deuenio, in quibus te auctore dehinc cenfeo Illustrem Gondosaluum Pontium, Neapolitani Proregis nepotem: cui quid nisi gratias agā pro adfectu? addo etiam redamare me iure, etsi ignotum. quomodo enim non, qui tam benignè prouocat? De Mureto summa mea opinio est, & erit. & felices vos sanè illo doctore. Patria nostra porro turbat: nec scio quando nobis adfulgebit tranquillitatis ille sol. Itaque nos etiam sæpe frangimur: nisi quòd conatus solari me meosque Belgas sum nupero De Constantiâ scripto. quod scire equidem velim, quâ faciat ad Italorum teneram saluam. Vale mi Winceli. iam enim interpellor, inò auocor. Non. April. ∞. Id. LXXXIV.

EPIST. LXXXI.

Rhotomagum.

VICTORI meo. S. dico.

QUOD deficientibus aspersa frigida, hoc mihi vestræ litteræ. Releuant recreantq; labentem me, & virium adspirant nouam auram. Hem, amor quid potes! tu honeste, tu vere, & qui semel in puro amicitia solo egisti radices. Intemperies mea adhuc me tenet. ita enim veriùs appellitare videor posse, quàm morbum. Cetera valeo: calor tantum molestus in hepate, mesenterio, & panè dixerim venenatis in eo venis. Eæ sunt, eæ venulæ, quæ pugnam mihi cum stomacho mouent: quæ calorem eius succumque ad se trahunt malâ vi aut fraude. Caputne alterum de Melancholiâ Rondeletij tui legisti? Is purus putus meus morbus. Myrchialem Arabes, nisi fallor, appellant. Pugno sanè cum eò strenuè, & abiecisse sæpe videor, sed vt Antæus quispiam, virefeit

M 3

& re-

& refurgit. Frigidis iuuari imprimè videor: sed crebra & cōtinens
 eorum vsio, scis quàm non ventriculi ex vsu. Hic nodus. habes
 ei cuneum? an tu quoque cum veteris Scholæ medicis adhæres?
 Dico, veteris. nam isti noui à Paracelso, auxilium pollicentur ab
 Vitrioli aceto. Frigerare id aiunt, penetrare, aperire; & simul
 robur addere visceribus & membris. Et sanè (iram & vocem
 comprime) iam vtor, successu non infelici. De exitu videbo: si
 iuuare ita porrò pergit, ego inuentorem hunc deum. Phleboto-
 miâ nuper etiam vsus eram, & iuuat valdè. sed quid dicam? Ut
 ille in Ætnâ ignis interualla sua habet, & cum desæuiisse credi-
 tur, redit: ita meus iste. Quem nisi breui tollo, me tollit. Quid
 refert? generosa & Herculea hæc ad cælum via est, per æstuum per-
 que ignem. Ego, mi Victor, iamdiu paratus ad hoc iter: nec
 cum alio adfectu minor mihi pugna, quàm cum metu mortis.
 Vitam habeo velut hospitem. si manet, non eiicio: si abit, non te-
 neo, nec pænulam scindo. De Modio, grata mihi narratio. Faueo
 & faui iamdudum illi ingenio: nec (cum à paucis vobis abij) in
 Belgio habeo, cui factum velim magis. Placent mores & indol-
 es, & (constet sibi tantum, nec transuersum eum abripiat aliquis
 Lacon) fructus, scio, dabit studiorum. Sed cur ad me non scrip-
 sit? cur ne salutem quidem adscripsit? Peccatum largum; siue il-
 lius qui dicere omisit, siue tuum qui scribere. De Lacone quid?
 trepidas in aduentum eius & palles? Sta tantum: spondeo tibi, fu-
 git. Nihil eo homine *υπονοειλότρεσι*. Scelera hoc faciunt, & occul-
 tum illud in pectore flagellum: quod commouet, quisquis eum
 constantius aspexit. De Apuleio deque Pintiano, curæ habebō,
 imò iam habui: & indica siquis alius tibi à viuo mortuoque me
 vsus. Doufa in Angliam abiit legatus. Mihi, si vires paullo ma-
 gis firmæ, (nam atrophica quædam coniuncta cum hoc languo-
 re) decretum Vbios excurrere priuatæ meæ rei causâ: & illinc
 Eburones, ad acidos fontes. Mira iis vis dicitur & propria in
 hunc morbum. Videbo. & pro valetudine omnia faciam, pro
 vitâ haud multum. Mori enim mihi non graue, graue tabère
 istud & languere. Tu salue, cum tuâ. Fratri tuo, si iam adest,
 amicissimam salutem: quem tuâ & magis morum eius causâ
 ferio amo. Rubicasium nostrum valere audio, sed calere to-
 tum in rebus. Dea Lua cum adiuvet, & nexibus illis mala-
 rum

rum litium exsoluat quibus implicatur. Valdè eum saluta, & iube (ita loquor) amantem me amet. In Batauis, x i. Kalend. Sextil. ∞. I. LXXXV.

EPISTOLA LXXXII.

Lutetiam.

FRANCISCO RAPHELENGIO FILIO. S. dico.

GRATAS expectatasque nobis fuisse tuas litteras, nihil opus est scribam. scio te id scire. etiam adfectum tuum amauimus, qui & in epistolâ se ostendit, & in carmine quod adiunxti. Tu verò & in amore nostri perge, & in virtute ac modestiâ multò magis: sine quibus caue censeas, non dicam famam vllam tibi esse posse, sed vitam. Litterulæ enim & aliæ elegantiae siue cultus ingeniorum vacuæ ab istis, sordes sunt & deliramenta mera. Modestia est, quæ ad cognitionem nostri nos ducit: hæc ad virtutem & ad Deum, in quo omnis felicitas. De professoribus quod distinctè scripsisti, gratum. Ego audiendi tibi Gibrardi auctor sum in Hebræis, in Græcis Helix aut Gullonij, (nam magnus ille Auratus lectionem, vt audio, iam desit:) vt res suadebit aut scriptor aliquis quem leget. Philosophiam ante omnia non deferres: cuius fructus demum gustabis in progressu. At nunc obdura. Sed de litterariâ tuâ sarcinâ, quid? peritne? insignem *memoriam* tuam: quam vide seriò emendes. etiâne in eadem sorte meæ litteræ? Nā memini dare me tibi ad Memmium, & Pincæum, & Faucerium. cur non scribis, vt saltem iterum scribam? Nam silētium meum trahi alioqui possit in culpam. Agellium (quandocunq; difficilis ille partus lucē videbit) fac habeamus: & si quid aliud prodibit, quo scias nos capi. Scribe de P. Fabri ad Regulas iuris, an prodierit; aut potiùs mitte. quod facile tibi per Somnium. Contagionem pestiferam valere istuc audio: tu quantum in te est vita, & segrega à turbâ. Abstine à multiplici omni cursu, discursu: donec hiems & gelu telum infregerint malæ diuæ. Valetudo mea nondum ex voto, melior tamen: sed ita, vt nec corpus nec mens mihi satis firma. non certè ad labores. Itaque studia nostra cessant. non tua spero: quæ nisi auidè, imò calidè prosequaris in hoc flore æui, frustra postea quæres fructum. Hæc monita nostra tuâ sponte seruabis, confido: nequid tamen ea laxent

ea laxent alij, nonnullus mihi metus. Quos vita, per Deum immortalem: & mala illa, soluta, & petulca ingenia, fuge supra ipsam pestem. Non enim hæc magis corrumpendo corpori est, quam illi animo: cui per subdolas blanditias instillant & adfigunt venena. Euripidæum illud cogita,

* Labor
gloriæ ge-
nitor.

* ὁ νόμος εὐκλείας πατήρ.

Auus tuus & auia valent. tibi volunt semperque valent, si voles ipse. Salve & vale. Vxor meate resalutat. Lugduni Batavorum Prid. Kalend. Decemb. ∞. Id. LXXXIV.

Ecce tibi ad Busbequium librum & epistolam. si ita Porreto visum fuerit, tu illi meo nomine dabis. Sed vide ut tales viros conuenias honestè & modestè. Hoc ætatem tuam, hoc institutionem decet. Inter loquendum (moneo enim nunc, quia fortasse non alius tibi monitor) caue tua verba præcipientes, ne sint cū Homero * ἑσπερα, ἡσπέρων & vitium tuum nosti: quod nunc aut nūquam corrige, & effer sermones tuos, clarè, articulatè, distinctè. Sed heus tu. de sumptibus itinerariis tuis quid audio? valdè vos quidem largi. Non conueniebat. An tempora hæc nescitis angusta, arcta? Sed ignoscimus tirocinio primi itineris tui, qui dignus alias eras acerbiori monitione. Non aliud magis decòrum in iuvene, quam ut per viam gerat se demissè & submissè. Quod in posterum facturum te confido. Vale. III. Kal. Decemb. ∞. Id. LXXXIV.

* Verba
alata.

EPISTOLA LXXXIII.

Lutetiam.

PAYLO MELISSO S. D.

EPISTOLAM tuam, mi Melisse, quā non amem? indicem constantia tuæ in amore. & magis cāmen, quod de morbo meo scriptum cum ingenio & adfectu. Gratiam habeo, & debeo. Sed te quis Deus, quæ Dea è Germaniā tuā mediā traduxit subito in Gallos? Amor nisi fallor, non ille à Cypride, sed hic à Phœbo, discendi, videndi, & doctos cognoscendi. Quorum omnium fores & pectora, non dubito quin pateſcent tibi. Nos etiam in morbo: contra quem animo magis, quam corpore pugno.

* Morbos
necessum
ferre cali-
tus datos.

ait Sophocles. In I. Guilielmi morte valdè indolui. De vultu aut facie non cum noueram: optimè de animo: nec censeo melius aut rectius

rectius ingenium fuisse hoc æuo. Sed Deo ita visum, optimos quosque traducere ad optimam illam vitam. ad quam in tot tur- bis & molestiis nos quoque adspiramus, & te saluere iubemus, optime poetarum. Lugd. Bat. Kal. Decemb. ∞. IO. LXXXIV.

EPIST. LXXXIV.

Vltraiectum.

THEODORO CANTERO V. N.

DIV & sæpe ad te scripturio, mi Cantere: tardauit morbus, qui aliquoties minatus discedere, non discedit. Redit enim per interualla, & cum seriò surrexisse me censeo, prosternit. Ta- men nunc iterum meliusculè est, & omnino aut mensis huius ge- nitalis aura me reficiet, aut nulla. Ad vos cogitaui sapius. (inuita- bat, præter amorem vestrum, aër.) sed absterret via longior, im- becillitas, finitimi etiam nunc terrores. addere audeo & conuiuia vestra: quæ lenta nimis apud vos & lauta. Librum II. Electo- rum nuper demum tibi per Vulcanium misi. credo accepisti. Ce- tera cessamus: & satis abundè habeo, si omni curâ corpusculum hoc sustento. Labores certè nec ingenij quidem fero aut subeo, sine manifestâ noxâ. Ferenda ista: donec aliter visum magno illi & benigno Deo, qui te mi Cantere seruet, & me (si ita expedit) ali- quando firmet. Vale. Lugd. Bat. Non. April. ∞. IO. LXXXV.

EPIST. LXXXV.

Lucetiam.

R. PINCAEO Senatori regio S. D.

QVAE hæc tam obuia humanitas tua est, Vir clarissime? quod vltro appetendum mihi fuit, ipse defers vltro, amici- tiam & coniunctionem tuam: quibus, moriar, si quidquam mihi gratius accidere potest à talibus viris. Splendor, fama, opes haud altè me tangunt: iuuant & penetrant hæc iudicia, quæ proficisci scio à viris mystis Virtutis & Doctrinæ. Quarum candidatum me non nego: sed hoc tantum. & vereor vt purpuram seriò vn- quam induam tanti honoris. At vos ita benigni, vt non rem tan- tum ametis, sed vinbram etiam & speciem, omnesq; in quorum animis effulget aliqua *τὸ καλὸν* imago. Itaque mi Pincæ (amicè & familiariter iam nunc te compello) amorem meum vicissim

N

feriò

seriò tibi offero: spondeoque futurum, prius vt à me excidam, quam vt ex animo meo illi qui tam procliuces ad me amandum. Amplissimo quidem Brissonio, & Regij concilij & ceteris nostri Presidi publicè deuinctum diu me scio; priuatim nunc, hanc amicâ salutatione. quam meo nomine illi reddes, cumulatam adfectus tui aurâ. Vale vir Clarissime, & litterarum hoc iter si crebrò teris, gratum mihi: qui nunquam vincar in officij aut fidi amoris cursu. Lugduni Batavorum i x. Kalend. Octob.

E P I S T. LXXXVI.

Brugas.

SALVTEM AMICISSIMAM D. IANO LERNVTIO

Tv. certè, mi Lernuti, in amore iuxta & in litteris prolixus. Nam Victor noster quàm breuiculus! In hac raritate nuntiorum, difficultate temporum, tribusne verbis ad Lipsium? Ita fecit. pro more suo, imò naturâ: quam quia nosco, ignosco. At effusionem tuam amo & amplector: cum quâ iure pariabo. Valetudo nostra ne nunc, quidem ex voto. Mensis Maius iunisse aliquid & vegetasse visus, sed vt in floribus, quoque, vigore fluido & haud diuturno. Anceps enim hæc sanitas, mi Lernuti, anceps. Hodie stare me putem? cras relabor. vires recepisse? amitto: & quod medici mecum mirentur, cæcis nec liquentibus caussis. Calores saltem viscerû sentio, & nescio quos edaces æstus. Quid me aliosque fallam? tabes ea est, nisi erro, & certâ sed lentâ viâ eo ad mortem. Nec ingemisce. Deo ita visum: cui nos tam libenter, tam fortiter paremus, vt manum non verterim hoc fiat an illud. Ennianum istud verè proclamo:

Vitam an moriar, nulla in me est metus.

Cur aliter adficiar? Æquissima hæc naturæ lex est, quæ pariter ligat omnes. Carnifex illud Fatum te meq. expectat: & alium alio tempore duci iubet magnus ille Imperator. Ecce tibi plebeiū aliquem tam constantem, vt lictorem suum sequatur, & manum vltro exposcat percussoris: aliena ab eruditis vis ea sit? Non à me: nec præibo ad molliem hanc exemplo. Vt fera avis, apertâ caueâ, non eiicitur, sed euolat: sic ego libens in apertum illum purumque campum. At enim iuuenis. Fateor. sed vitæ huius tam satur, quàm Priamus aliquis aut Nestor. Quousque enim eadem? edere,

edere, bibere, legere, scribere. & adde miseras, quas largiter sup-
 peditat hoc æuū. Sed mitto hæc sophā: ad mattya venio tua-
 rum litterarum. Electa nostra Secūda probari tibi ais vnice. Gau-
 deo. eoq̃ue magis, quòd serio verebar ne parum ad Genium prio-
 rum scriptorum meorum is fatus. In morbo quippe conceptus
 & editus, quid mirum si referat aliquid triste & morbidum,
 & tabeat ipse à spiritu hoc tabente? Quod si aliter, præter spem
 meam est, non præter votum. Epigrammata tua in impurum il-
 lum valdè pura. Cur plura eius generis non mittis, reficiendi sal-
 tem mei? Pascor enim libens hanc ambrosiā: quam per alium istud
 otium vbertim necessum tibi est gigni. Sed illa aspis etiāne Au-
 domari? Æternū velim, necubi propinquior halitu suo vos af-
 flet. Agellius autem eius tam ambitiosè promissus vbi est? Ste-
 phanicum enim vidimus, & in eo scommata ac tela non obscure
 in istum. O improbum pariter & infelicem! Vbiq̃ue vapulat, &
 corpus eius tot cicatricibus infamiæ iam occalluit, vt plagæ no-
 uæ non sit locus. Et tu tamen hoc cadauer petis. me inuito: qui
 mucronem hunc acutissimi ingenij seruari & dirigi velim in di-
 gnorem hostem. Hic quidem calcandus est, non feriendus. & de-
 mittat atque abiiciat se necessum est, quisquis eum tangat. De
 Modio, gratissima. vos monete, firmate, & comitate veltrā reti-
 nete, quæso, in hac meliore vitā & viā. Fax aliqua Belgis aliquan-
 do ab ingenio illo. Rubicasium nostrum amō & in pectore gero.
 Litigātne etiam & tricatur? an Grudios nostros potius abiit, se-
 dem illam Musarum olim & Gratiarum? Quæ breui assurget,
 nisi fallor, & virorem ac calorem iterum ducet ab hoc Zephyro
 pacis. Ibi enim certè iam lucefcit: si verum quidem est de Ma-
 chliniā, quam deditam nos audiebamus. Critica nostra en tibi.
 quibus versiculos de meliore venā, Deo duce, audacter inferui-
 mus, numero ccc. vtinam comite Fortunā! Spero. Vxori etiam
 Cilicis illius aliquid concedemus: nec de fide ambigimus, ran-
 tū de successu. Di viales adeste, di præstites, di tutelares. En epi-
 stolam, an querelam? meri enim in eā morbi & mortes, quæ non
 ingrata tamen tibi, siquid in Lipsio gratum habuisti præter corti-
 cem hunc externum. Ille enim abiicitur. at Lipsius vester nullus
 moritur: eumq̃ue præire scitote, non perire. Longūm mihi salue-
 re, tu, vxor, liberi. Lugd. in Bat. Kalend. Sextilib.

ERRICO MEMMIO V. A. S. D.

ANIMVM saepe corpori imperare, vir Amplissime, non vanè dictum. Ego testis. Ecce enim cum Iani Guilielmij epistola ad me venisset amoris & iudicij tui de me index; etsi languebam ex acri & difficili morbo (nam hepar mihi laborat ex inflammatione & infarctu) tamen animum secuta hæc manus est, & per adfectum potui quod vix per vires. Scribo igitur; & gratias ferio tibi ago pro amico isto in me animo, in eoque ut perseveres, si necessum est, rogo. Etsi cur necessum? quem ultro amandum diligisti, nō spernes, ut opinor, cupientem iam, imò ambientem. Vtar enim isto verbo. & ambio reuera amicitiam talium virorum & gratiam, quos velut sidera quædam huius æui habeo, & à quibus lucem conciliare me posse scio pallenti meæ famæ. Quam vulgarem, & à vulgo, nihil moror: bonam, & à bonis, nunquam contemnam. Vale Amplifs. Domine, & à valente me litteras pleniores exspecta, & ut sic dicam, magis robustas. Lugduni Bataurorum 1 v. Kalend. Octobr. ∞. 16. LXXXIV.

HENRICO RANZOVIO, Viro illustri, Vicario
Regis Danie, Salutem mitto.

LEVEM significationem animi & iudicij tui, Vir illustris, pro beneficio habuerim: quid censes hoc testimonium & litteras, tam amicè ad me, tam honestè de me scriptas?

Omnes mortales sese laudari expetunt,
ait poëta vetus: non valdè tamen ego, nisi à laudatis. Inter eos autem, quis ante Ranzovium mihi sit? Genus tuum intueor? nobilissimus es. Famam? clarissimus. Virtutem & doctrinam? utrâque maximus. nec facilè quem his iunctim rebus prætulerim tibi, reperiam in Europâ. Itaque beasti me hoc tuo iudicio, beasti. & iam demum Constantia nostra mihi placet, cum illa vobis. Incitor ad scribenda talia: quæ apud rectas istas mentes recta. Tribuni illi, quos indicas, me absterreant? nihil. iactent se apud suam plebem: mihi adfatim satisfacitur, si eques hic plaudat & Senatus.

tus. Vt eadem purpura homines delectat & ad gaudium prouocat, tauros offendit & irritat ad pugnam: sic eadem veritas aut virtus intellegentes capit, lædit improbos & imperitos. Itaq; scribere hæc talia (quidquid iucurrant) nihil tardor. & vt Luna, quod luminis à Sole accepit, infero huic mundo refundit: sic libens ego dona, quæ à magno illo Deo. Qui te, Vir illustris, reip. & bonis feruet: & mihi hunc animum tuum, quem tam amanter defers. Vale. Lugduni Batauorum Idib. Februar. ∞. Id. LXXXV.

EPIST. LXXXIX.

Delfos.

PAVLO BVSSIO V. *Ampliss.* S. D.

CVRATOREM te (ita iam nunc intellego) huic Scholæ datum, Vir Amplissime, iure tibi, & magis nobis gratulamur. Tibi honorem aliquem: nobis grande beneficium, quod ab hac electione meritò speramus. Speramus? imò iam tenemus. ea voluntas tua est in iuuandis optimis studiis, ea facultas. Illa clara; qui omnia pro nobis egeris, laboraueris, re priusquam titulo Curator. ista etiam non obscura; qui magnus apud magnos. Sedes in hac publicâ, vt sic dicam, naui, non inter remiges aut nauales socios, sed inter eos qui ad gubernacula & ad clauum. Vis igitur, & potes: & ideò adfirmatio mihi non iniusta de adfectu optimo & effectu. Sed sub initia tuæ Curæ, ingeram tibi maximè curas duas; de Collegio & Philosophiâ. Diu nimis dilata vtraque res, cum nostro, imò cum patriæ damno. Collegium inquam ante omnia instituendum est, in quo ali iuuentus aliqua possit: certo numero, disciplinâ, lege. Domus iis vna sit, vna mensa, vnùm caput: lectiones variæ, pro captu cuiusque, & pro iudicio Præfecti. cui hîc & alibi districtè parebunt. Numerum esse quàm maximum velim: certè non infra tricenos aut quadragenos. Sumptus in eam rem aliqui, fateor, sed exigui pro fructu. Hoc seminarium lectissimorum hominū erit: hæc seges eorum, qui ad Ecclesiam, ad remp. adinouendi. Nec alios legi quàm ex ipsâ patriâ velim, qui in eâ, pro eâ, & ab eâ alentur. Cur enim lac maternum hoc germanæ soboli præreptum, indulgeatur & immulgeatur externis? ne facite: & sumptus à vobis, ad vos iterum redundant. Cetera quæ ad legem & disciplinam, tunc distinctè superædificabo &

N 3

addam,

addam, cum positum hoc fundamentum. Quod si Ordinibus de Collegio ægrè aut tardè persuademus, (tempora video & impensas:) age, inite saltem hanc viam alteram quæ impendij minus habeat, compendij non minus: me iudice, magis. Pro Collegio, substitute Mensam communem. Ita suadeo ad Germanorum aliquot Principum exemplum. qui in Academiis (vtamur voce tritâ) subsidium hoc subtiliter & vtiliter inueniunt paupertinæ iuventuti. Domum aliquam à se præbent, instruunt, nec eam nimis laxam. In hac Oeconomum cum familiâ collocant, cui cura nulla præter eorum quæ ad victum. Conueniunt cum eo certis legibus: & ferè istis. Domum hanc tibi & familiæ habeto. frumenti annui tantum numerum, ad panem: tantum, ad zythum siue ad potum. Iuvenes cottidiè ad mensam recipies quadragenos, quinquagenos. pro obsonio viritum quid pendent? Et ferè in septimanas conuenit de pretio aliquo minuto: idque vnum onus (excipio quòd cubiculum sibi quisque parat) incumbit iuventuti. Singuli inquam pro obsonio obligantur, cetera liberi & immunes. Sed id quoque leges suas accipit, quantum & quale ab Oeconomo detur. Iam Rectoris & Professorum illa cura est, qui ad hanc Mensam admittantur, qui admissi reiiciantur: & quater anno recensetur & examen eorum, qui beneficio Principali digni siue indigni. Submouentur, retinentur, subrogantur, vt collegio illi visum. Conuiuiolum iisdem tunc, pro labore. Mihi crede, non alia res sumptuum minùs grandem habet, fructum magis certum. Nam in ordinariis illis collegiis, scimus quàm multa ambitu peccentur, admittendo, reiiciendo: scimus quàm verba ferè sint, præclaræ illæ de disciplinâ leges. Itaque minùs compositi plerumque egrediuntur, è compositissimâ tali domo. Nescio enim quomodo, assidua conuictio illa & cõturbarnium, nō ex vsu iuventutis: qui, vtcumque arceas aut separeas, sermones communicant, consilia, vitia, fordes. & hinc lasciuiunt, degenerant. Nō id peccati in meâ Domo, in quâ præter mensam nil commune. Nec aliud ea est, quàm velut publicum Diuersorium: sed parcum, sed honestum. Cogitabis: & cum voles, colloquemur. Iam de Philosophiâ, quàm turpe! Ceteras hîc minores & velut ancillas artes coli & colere: negligi illam, dominam & reginam: locum ei non esse in pro-

in proprio suo loco? Quò enim aliter hæc omnis Academiæ institutio, quàm ad Prudentiam Sapientiamque inprimis spectat? Atqui ad eas Philosophia ducit: quam tu, Vir sapientissime, induce. Barbaries te terret, & spinosa illa viarum? Pelle illam, has purga: quas patres nostri malis tribulis, malis serupis, impleuere, per prauum acumen. Ipsam illam legitimam Diuam reuocari à te volo: non hanc squallidam & personatam, sed in vero suo vultu. Scholarum hunc ante annos trecentos aut quadringentos vsu suæ abusu cur teneas? Sperne. & reduc omnia ad veterem veramque formam: cui, præter fructum, par dignitas & venustas. Quis enim amœnior adulescens ad illa tam inamœna veniat? fugiunt imò cum aduenire: & imbiberere non iniuriâ spernunt absinthium illud doctrinarum. Nos Aristotelem reducimus: sed ipsum &, si me audis, non solum. Ipsum dico. quia obscuro illi & aculeati Cõmentarij cui rei? Detorquent rectissima ingenia, & in acuminum flexuosos labyrinthos abducunt à vero Philosophiæ fine. Ipsum legisse & intellexisse satis sit: & maximè in iis libris, quos hi minimè legunt. Logica illa ætatem eos occupant: concepta ab Aristotele fortasse, numquam ita scripta. Politica quis tangit? quis De animalibus? aliaque diuina, ob quæ mirati illum nos & præsci. Nam Ethica ipsa, leuiter libant & velut in transcurso. Scilicet hoc iamdiu moribus his obtinuit, vt nulla pars minùs ad Philosophiam facere censeatur, quàm quæ ad mœurs. Atqui ea præcipua erat, vel veriùs sola. Iam, nec solum, addidi: & bono iure. Cur enim vni Aristoteli locus in hoc procinctu? Ille signifer esto: commilitent tamen alij, & in vnâ legione non vnus saltem Centurio aut Tribunus. Plato aliquod agmen mihi ducat, aliquod Epictetus, Plutarchus, Seneca: & in opinionum nonnullâ varietate, omnes tamen pro Sapientiâ & sub eâ pugnent. In Ciuili & Morali eius parte, an ille à Lycæo indignetur Platonem sibi apponi? imò fortasse nec præponi. ita diuinitus libri illi De rep. & Legibus magnâ ex parte concepti sunt & conscripti. An Senecam sæpe & Plutarchum? gaudeat potiùs in acri & arduâ militiâ hos sibi iungi velut optiones. Idemque de Physicis censeam: ad quæ & Senecæ Quæstiones Naturales, & Lucretij etiam liber sextus, aliquod, me arbitro, adferant momentum. Nec enim vel

poetas

poëtas expunxerim ex hoc maniplo: & cum fructu hæc talia publicitus legi censeam in Scholis. Sed plura item & distinctè magis huius rei, coram. Illud mihi non monendus es sed rogandus, ne te aliorum trahant iudicia quorundam. Nouam viam noui homines ineunt: & explosâ illâ sectâ veteri, sapientiæ frugem quærunt in agellis Rami aut Philippi. Quid dicam? neutrum culpo. vterque doctus, sedulus, industrius: sed valdè error, si errorem hunc errare nos voluerunt ipsi. Compendia perueniendi conscripserunt: an vetuerunt adire loca ipsa? Atqui isti ita eos complectuntur; vt non viam illos, sed metam censeant: nec per eos ad veteres transitum faciant, sed in his subsistant. De Philippo, vt vir fuit, aliam ei mentem fuisse planè scio: de Ramo, spero. Quod si alteruter hoc adfectauit: si ipse solium illud Sapientiæ insidère, priscis ciectis: nã ille apud sapientes omnes valdè insipiens. & quem isti ipsi tyrunculi Principatu mox deiicient, qui per seditionem elegere. Puerorum enim ista (dicam liberè) illudia, & Saturnalia dierum aliquot regna. Nec tamen eos sperno aut refuto prorsus (scio & fateor multa in his breuitate & ordine bona:) manère tamen intra fortunam suam iubeo, contentos parietibus & auditionibus priuatis. Puluerem scholasticum & aërem adfectant? non ferent: obruentur siccis & pugionibus istorum, qui à Veteribus illis castris. Iuuentus nostra à me hoc audiat: Numquam ille magnus erit, cui Ramus est magnus. Pergebam in hac scriptione: (vides quàm benigna materia:) reuocant me non meæ occupationes, sed tuæ. Eas aspicio: & in ambulatiunculam nostram vnã aut canulam potiùs hæc conferam, quàm vt manum tibi & mentem impleam epistolâ tam longâ. Quod initio dixi, repeto: gratulari me, & optare vt curæ has curas habere possis, non rogare. Cur enim rogem? scio te iuxta ac me velle: nec penes te vnquam culpam futuram non impetrati, non effecti. Deus illis in quorum manu res est, tuam mentem det, tibi seruet. Vale Amplissime & amicissime vir. Lugduni Batauorum i v. Idus Iulias. ∞. Io.

LXXXIII.

EPI-

EPISTOLA XC.

*Ultraiectum.*FLORENTIO THINNIO *Syndico reipub. eius.*

SILVI aliquamdiu Vir amicissime: sed (dicam veram causam) fiducia solâ amoris. Oblivio tui fuerit? absit. hæres mihi tu & humanitas tua in medullis. Neglegentia mea? nec illa. quia alibi focors, numquam in hac parte quæ ad amicos. Amor, inquam, fuit, firmus inter nos amor: & ab eo fiducia, quia tam certus eram non irasci te posse Lipsio, quàm non amare. Et tamen siquid hîc quoque culpæ, morbus excuset: sub cuius umbrone sæpe nunc in his talibus latito & me defendo. Nam etiam nunc apud me ille hospes, lentus, deses, certus non abire. Vitrioli acetum à te nuper accepi, siquid acria eum fortasse fugarent: & vtor. Nam nec Heurnius noster improbat, medicus mihi in omni hoc morbo fidus, peritus, & (quæ laus ei propria) cautus. Refrigerat sanè aperitque insigniter: sed nocet exsiccando. Itaque nondum plenè iuvat. A Pollione nostro ante biduum ad me litteræ. Omnia, quæ volumus. Aureliani sanus agit: Furnerio innotuit: pecuniam accepit. Consulit super abitu, aut mansionem. Illum ego suadeam, ut rem video & natas in regione eâ desubito turbas. Et Basileam (antea mihi scriptum) cur non emigret? placet locus, incolæ, mores. Atque adeo si nulla vis alia aut metus expellat, suadeam Germaniæ tamen adspectum. Utile enim & est peregrinatum, qui Galliam infederint, in illam transilire: ut siquid ex gente istâ adhæserit exultans, diluant siue temperent Germanâ gravitate. Quærit & de Titulo, Vbi? Ego, dum rem adferat, Aureliani an Biturigis, non discernam. Et illam adferet, aut valde me fallent femina quæ hîc iecerat firmioris doctrinæ. De rep. non illa mea cura. Tamen excusso Palinuro nostro valde fluctuatur hæc navis, nec Æneam aliquem promptum video qui succedat ad clavum. Varij inter Ordines sensus: benè, si non dissensus. Deus videbit: ad quem confugio. quia, ut scitè Plinius, *tunc votorum præcipuus locus est, cum spei nullus est.* Quæ ipsa vota mihi interposita pro tuâ meaque (si ita expedit) salute. Vale. Lugduni Bataurorum, a. d. xii. Kalendas Iulias. cc. lxxxy.

O

EPI-

Mi Clusi, & litteras tuas accepi, & cū iis thesaurum (ex animo sic appello) hortensem. Cariores mihi Bulbi illi Tulliparum selectarū quos ad me mittis, quā si globulos totidem ex auro vel argento. Vulgus nō credat? ego de meo animo, & ex animo loquor. Grandes tibi gratias habeo: & cū habeo, debeo: ac debebo semper. Infortunium quod in pede tibi euēnit, mihi dolet. sed quid? Tu hanc sortem, ego aliam: & quemque clade aliquā internā siue externā afficit Homerica illa Ate. Dea tristis, amara, perambulat hunc orbem, nescio quomodo magis celeri pede, quā candidē Litæ. At tu quiescis, & id luges. Vtinā nobis domi illa desidia! Sed (en tēpora, mi Clusi, imminēt) iactamur & pellimur ad nescio quæ terrarum. Nam hīc palām discidia. Tamen sermo etiam aliquis de Irene: sed vereor, vt sermo. Te vocaui nuper: nunc reuoco, cū video instabilem statum. Nos in studiis agimus, & promouemus haud multū inter tot turbas: tamen his diebus feriatis nescio quid in Senecam adnotauimus Tragicum. quē mitto, si te fortē delectat ille poēta. Paramus Politica, & grandiora quædam; sed quid mihi aut tibi spondeam, per hæc tēpora & valetudinem hanc incertam? Hoc vnum. amare me virtutem, doctrinam, & amaturum semper. eosque qui cā præditi. te, mi Clusi, inter primos. Vale. Lugd. Bat. vii. Kalend. Nouemb.

In ruborem me das hāc humanitate tuā, Vir Illustris. Scribīs vltro, compellas vltro: & promiss atq. offers ea, quæ improbæ pænē mentis sit à tali viro sperasse. Ego enim te noui, Dudithi. Et quamquā inter nos multæ terræ, multi montes: tamen etiam huc penetrauit se dudum fama nominis tui & virtutis. Boni omnes ita me probent amentque, vt iam pridem ego te, etsi tacito dumtaxat quodam sensu. Quæ enim mihi occasio aperiendi? ad quam præiuisse nunc te & velut strauisse hoc iter beniuolentiæ & amoris, sanē gaudeo. In quo sedulō & cum fide decurrēdo, numquam erit vt vincas. Libellos nostros & Constantiam laudas. mentiar, nisi

nisi id mihi gratum: non quia laudes me capiant nimis aut titil-
lent, sed quia testimonia talium virorum. Itaque addis ad reliqua
calcar. quo egere nos interdum fateor, ob iudicia siue calumnias
quorundam. Nam valetudo mea nunc (propitio Deo dixerim)
nihil impedit: & querela illa, quam Constantiæ subtexui, scripta
in morbo meo ante aliquot annos. De Amphitheatro librū edi-
dimus: quem mitto ad te non vt munus, sed nouæ amicitiae velut
arram. Superfunt Saturnalium aliquot libri: qui digesti, imo per-
fecti, nisi quod aliquam exspectat iudicij limam. Quam haut fa-
cile adhibeo, partim negotiis districtus, partim his bellis: contra
quæ etsi stamus erecti, tamen auocant sæpe hunc animum à tali-
bus cogitationibus, & in se intēdunt. Remedium tu amicē offers
(scio enim quod domicilium & apud quē designes:) & exosculor
adfectum. Sed multa mihi nunc impedimēto. Familia, vxor, (nul-
li tamē liberi) parui ē sorore nepotes, quibus tutor ego, illā nuper
mortuā, imō velut pater. Sed nec corpus mihi nimis firmum ad
longum iter: etsi integra adhuc & viridis ætas. Itaq; non decretum
mihi cōmouere ex hac patriā, nisi fluctu aliquo maiore expellar.
quod non scinēl nobis timendum videtur, in hāc tam diuturnā
tempestate. Alioqui beniuolē me habent Bataui, & stipēdio sanē
honesto. Nicasium Ellebodium ab adspectu numquam noui,
optimē à nomine: iam tunc cūm Romę apud Cardin. Granuella-
num agerem, paucis mēsis post eius discessum. Nam ipse tunc
Patauij: & scio me aliquando ad eum scripsisse Cardinalis nomi-
ne & iussu. Scire velim viuātne, & ecquid agat. Idem de Michaële
Bruto: quem ex Epistolis editis video tibi amicum, itemque ex
Præfatione eā quę in iudicio tuo de Cometis. quem libellum iam
olim auidē legi & cum fructu. De ** Mathematico scripseram
olim ad Ortelium, sed nescio reuera sit ne futurus ad saluā tuam
& ad gustū. Mathematicus enim merus est, sine aliā arte, imō pæ-
nē linguā. deniq; ex genere, qui μηχανισμοίς potiūs quā θεωρητικοίς.
Adde quod egrē nūc auellatur ab his locis, in quibus arti eius ho-
nos & vsus. Siquid de altero eruam, non grauabor indicare. Do-
nellus Iurisc. amicē te resalutat. quem Norici abstrahere conati à
nobis ad Altorfianā Academiam, frustrā. Manet enim māsurus:
quę est, quādiu hęc schola. Valdē & tibi se insinuat noster Doufa:
itemq; Plantinus, qui apud nos nunc agit, & casu. cūm has scribe-

rein interuenit. Vale Amplissime & nobiliss. Dom. Lugduni Bat.
 ∞. IO. LXXXIV. Saluto ex animo D. Monauium, si est istic.

EPIST. XCIII. *Middelburgum.*

IANO GRVTERO. S. D.

IMPEDITVM in Galliam iter tuum molestè fero. & hoc tamen malo, quàm vt cum perueneris, periculum tibi aut fuga. Quamquàm rumores illi magis grandes fortasse, quàm graues. Sane qui modestiores illinc veniunt, omnia magis placida nuntiant, nec de bello etiam nunc aperto. Suspectam tamen pacem esse fateor: sed quando nō in illā gente? utiq; hoc statu: quo de religione illud discidium malè sartum malè coit. Consilium tamen à me si quæris: ego censeam per Galliam trāsire te posse ad Germaniæ fines. Basileam vel Argētoratum dico: atq; illic velut è speculā prospicere quis in Galliā vētus. Si Zephyri pacati: redire. si Austri aut Noti: hærere apud crassio rem, sed & quietiorem gētem. Omnino consilium non est, dare te frustrā & cupidè in turbas. quarum si tibi amor: mane apud infelices Belgas. De Electis meis. si is, fer ad Brissonium vnā: si manes aut aliud iter capis, remitte. Nam vt per nuntium, non sunt tanti. atque ego tantum munus illud velut conciliando tibi viro magno dederā, & aditu muniendo. Vale, & salue à me nondū saluo. Lugd. Bat. xiv. Kal. Maias. ∞. IO. LXXXV.

EPIST. XCIV. *Antuerpiam.*ADOLPHO METKERCHO *Presidi Flandriæ* S. D.

QUOD rariùs te appello, Vir amplissime, ab occupationibus tuis est, non à meis. Illis hoc largior: quas cum in reipub. curā & patriæ nostræ salute defigas, non inscitus solū sed impius sim, si temerè interpellem. Et verò quid magnopere ad te scribam, præter colere me & amare? neutrum ambiguum, qui deberi hoc tibi à bonis omnibus scis & iam reddi. Effecit enim dudum (rarum in πολιτειᾷ) integritas tua & mira probitas, vt inuidiam odiumque non minùs in aliis viceris, quàm auaritiā in te & ambitionem. Ad patriæ salutem consilia tua omnia diriguntur, ad tuam, ciuium vota. Sed hæc apud alios malo. Studia nostra per has turbas non vigent, sed nec planè cessant. Aliquid De Pronunciatione linguæ Latinę meditabamur, vt tu de Græcā: sed exemplo magis eodem

eadem, quàm curâ fortasse aut successu. Tenuis enim hæc materia: & quâ vix impleam, nisi à suspicionibus & coniecturis. Nam auctoritatū nos hîc ferè inopes. Plantinus etiam ad Grâmaticam concinnandam impellebat, quæ cōmunis Belgio vniuerso. sperabat id enim Ordines decreturos. Vix ego. nec si faciant tamē, valde ingenio aut Genio meo scriptio talis. Quamquā fateor vtilissimi instituti rem fore: nec magis peccari in iuuentute instituendâ, quàm hac Grammaticarū varietate. Inter magistellos factionum res est: & quisq; hanc aut illam præfert, quia posthabuit eam alter. Iam illi ipsi qui condunt, quid? hoc vno reges. Mihi puero triplex olim Grammatica prælecta, in triplici migratione. Ad annum decimum tertium nugæ illæ tenuerunt; & ad firmo tibi ab anno octauo eadem me tenuisse, etsi non eodem modo. Quinque illi anni si in stilo & grauiorum rerum scientiâ positi fuissent, quis mihi fructus? Et hæc peccantur cottidie, non tam imperitiâ, quàm ambitu docentium & prauitate. Cui vos quoque, velut publico malo, mederi par sit: si tamen à grauioribus illis respiratis paulum & ad mortem morbis. Quos Deus aliquando à miserâ hac Belgicâ auertat, & te Vir Amplissime nobis illique seruet. Vale. Lugd. Batavor. III. Idus Nouembr. ∞. IO. LXXXII.

EPIST. XCV.

Lutetiam.

M. VALERIO COLLINO S. *multam precor.*

NON largiter solum, mi Colline, sed, quæ maior laus, firmiter amas. Louanij cœpisti: comitatus te in Galliam adfectus etiam nunc non deserit, etsi in temporum & locorum grandi intervallo. Adde inter nos silentium. quod frigus inducere potuerit vel incitatissimo amor. At tuus nec intepuit quidem: & scintillas acres sparsas video & colligo in epistolæ tuæ omni parte. Redamo, redamo; & iure, pectus tam fidum, tam amicū. Locum sic satis honestum tibi illuc esse gratulor: nec, si me audis, muta. Ad patriam enim cur aspires? Zephyri interdum aliqui melioris spei, fateor: sed turbant subito ex transuerso Noti. Cur autē iuuenilem hanc, ut sic dicam, nauim in feruidum illud fretum immitas; cum statio tibi aliqua saltem, si non portus? Obdura. credo aliquando, post tam diuturnas tenebras, miseris Belgis sol aliquis illucebit firmioris pacis. Nos quoq. non mutamus: etsi exteri ia-

O 3

nuam

nuam aperiant & inuitēt. De pugnis, quas in improbos quosdam pro me pugnās, (ita scribis:) gratum, nec gratum. Ab adfectu, gratum: re displicet & effectū. Quid enim litigio isto vincis? Non illos meliores facias: nō me honestiorem, quem nihil maculant linguarum illarū sordes. Ita seriō sentio. laudari me, cū culpant tam illaudati. Non virus illud homuncionis ego noui? inter cuius minimas culpas est liuor. Alia peccata sunt, quæ ipsum eosq; perdidērunt & perdunt, qui adhærescunt. imō qui tangunt. Tu fuge igitur, non pugna. Cessisse hīc præstat, quā incesse: quia nec vincis quidem ac repellis sine maculā tam maculosos. De Hospitalij Epistolis editis, valdē gratum. haueo inspicere: magis quā illos ad Ciceronem Commentarios, famæ grandioris quā rei. Quid refert? emptores suos, imō & amatores reperient vana illa doctrinarum. Nos solida nihilominus amabimus, contra iudicium hoc vulgi; & te vnā, mi Colline, quādiu tu me & virtutem. Vale. Lugd. Bat. Pridie Kal. Septemb. ∞. Iō. LXXXV.

E P I S T. XCVI.

I A N O D O V S A E meo S. dico.

LE G I ad vxorem litteras tuas, quā de me erant. Bellum hominem & facetum! qui tam arguto schemate scribis ad me, & non scribis. Quid censes? excusatum iri te? Non debebas. præfertim cū non alieni solū multi huc cottidie, sed ipse à te tuus homo. Et tamē excuso. non tam arte istā captus, quā iuductus à naturā tuā: quā cetera efficientissimam, cessare plerumq; scio & fastidire in scribendo. Culpa eā in amicitia, fateor: sed cui non sua labes? Nec circumfusa illa Thetys eam in te eluerit suis vndis: nedum vt ego me postulem minis. Tacco igitur, & patior. Emanatio vestra præter vulgi vota & nostram spem est. Etiamne in illā aulā trica & remora? nec tamen miror in re tam intricatā: cui, in vrbe vrbium iam amissā, nouus nodus. Multi apud nos concidunt, multi dilabuntur. ē familiaribus tuis abit quantū potest *Iupiter ille Tonās*. Iam valedixit, iam sarcinas collegit, iam est in viā. nō tenuerint hominē Bataurū omnes quadrigæ. O vim metus, & verē *τα-υ' η' επ' ο'ρ δ' ε' ι' μ' α'* A quo pēnas etiam Hybrida noster sumit, ad eādem fugam. qui tamē dissimulat, & resistet, vt ait, hac hieme: scilicet cū ciconiis ad vos venturus, sub æstatem. Ceteri valemus, & stamus. Vale.

* timor
passis aliis.

Valemus. vt & me includam: haud planè etiam firmum, ad fidem tamen iam sanis, imò & accumbentem. Nam conuiuia inire & obire hilariter audemus: quibus ades plurimū, & non ades. Nam mens nostra saepe apud te, & de te lingua. At inuitatiunculâ tuâ & illorum procerū nunc non vtor. Di boni, quā voluissē nobilissimam insulam! Sed antea languor impediuit; nunc hiems, quæ per continentes has tēpestates occupat præmaturè. E Galliâ mihi litteræ; & hoc noui, Petronium ibi recusum cum tuis Notis. Apud me est, videbis redux. De Mureto, nunciant Vixisse. antea tamen Senecam Romæ edidisse castigatū & illustratum. Valdè velim vidisse. Rogertius noster istic quī valet? quē inuideo tibi, te illi. Fabulamini enim assidue, muginamini, & estis vnâ quando libet, quādiu libet. ô beatum par! & quod vtinam per me impar! Saluta sodes, & excusa me de silentio iustissimâ morbi causâ. Sed heus tui imitator tuum σοφισμα, & ad alium in hac epistolâ scribam. Cognatus mihi illic est in comitatu Busij, appella hominem, saluta, (caue neglexeris.) dic accepisse vnas eius litteras, cupere plures. respōsurum me in breui: impeditū adhuc morbo. O velum mihi vtile, & hac saltem parte salutarē morbum! patrocinator in omni culpâ. Tu ne inuide. cui frōs tam dura, vt excusari etiā possas & possis sine illo. Nos editionem Epistolarum paramus (si quid fortè subitū in hoc morbo) & iam concinnauius ad libros plures. Tardat, quod odium alibi aut inuidiâ veremur, ex cādore & libertate. Quomodo tamē aliter ad amicos scribamus? Sed videbo, & incidā aut recidam: nequi noui in nos vti. Qui vtinā te referant, mihi, vxori quē! quorū alter te amat, altera perit. Vale. Lugd. nostræ, Kal. Septemb. ∞. I. LXXXV.

EPIST. XCVII.

Leodium.

LAEVINO TORRENTIO V. *Amplissimo* S. D.

LITTERAE tuæ quā gratae mihi acciderint, haud facile effabor. Mittentem intueor? scio ab eo viro, à quo nosci perhonestum, non dicam cōpellari. Ipsas? plenæ sunt fidæ cuiusdā beniuolentiæ & salutarium præceptorū. Et fateor, de Constantiâ meâ iure ita sentis. Aptare enim veterem philosophiam ad Christianam veritatem volui: & in cogitatione eâ totus dum sum, illapsa & elapsa mihi quædam fortasse, quæ illam magis sapiant quā istam. Non purgo. correctionem imò polliceor: & effecturū me vt ad culmen illud

illud veniam, à primo isto velut gradu. Ego enim seriò scio & sentio, in vno Deo & filio eius Christo, qui nos benignè redemit, liberavit, spem omnem positam humanæ salutis. Vias ad eam perueniendi, expressas in Sacris litteris. nec hæc externa omnia, & Philologa siue Philosophia, aliud esse quàm accessiones quasdã & ornamenta: folia inquam, nō fructus. Quod iudicium meū in isto ipso de Constantiã libro in fronte apparebit: qui iam iterum sub Platiniano prælo. At Senecam & Stoicos admiratus sum. Certè. sed nō vt qui verum, me iudice, viderint: sed qui paulo magis tamen in iis tenebris oculos aperuerint, quàm ceterum vulgus. De immortalitate nostrã aut malè aut timidè senserunt & scripserunt: esto. (et si disputari eã de re potest) deum tamen aspice: quæ secta aut illum magis aperuit & homini inseruit, aut ea quæ ad ipsius maiestatem dico eius, prouidentiam, gubernationem, & curam nostri. Quem primum limitem esse ad cognitionē & amorem veri dei, nemo negat. Hæc mihi sectam illam non probam prorsus fecerūt (absit): sed probabilem tamen supra ceteras, quæ magis humi & circa hominem repunt. Iam de moribus & animorū lustratione, quis Senecæ, Epicteto, Arriano (quãquam ille, Epictetus alter est, & loquitur ferè eius verbis) hac parte præponendus? Multa & præclara Plato, confiteor, multa Aristoteles: sed non robore eodem aut nervis. Spirat nescio quis calor in Senecæ aut Epicteti scriptis, qui ad lectorem quoq; peruenit: nec differere illi magis de virtute videntur, quàm inferere & inculcare. Quod si vita eam & factis nō expressere: quid miramur? Veræ fidei & veræ lucis fulcrum illud defuit: cui qui nō innixus, necessum est in partem aliquã ruat. Et tamen hîc quoq; facile peccari sentio, si quis eos nimis apud lubricam iuuentutē hanc miretur & laudet. Abstrahat enim à veris & legitimis illis animorum medicis, alliget ad agyras istos. quod cū aliis, tū mihi quoq; deinceps censeo cauendum. Nō enim satis, ne ipse errem; sed ne alteri sim erroris causa. Itaque; vt illuc redeam, iure quædam in scripto illo. meo desideras: & præsertim magis expressam pietatem. Quam ego, te hortatore & duce, nō animo meo deinceps gerã includam, sed proferam & præferam clarè in scriptis. Factū autè à me parciùs, (si verã causam vis) in hoc ancipiti statu rerum & varietate iudiciorū, metu offensionum. At ego te sequor: nec inuitus in placidum illud mare rapior ab hoc Torrente. Quod superest, & te (vir maxime)

maxime) ex animo amari & coli à me scito, & canam illam veritatem. De Dousâ hoc quoq; confirmo, virum modestissimum optimumque esse, & tui amantem. Plantinus ad nos redierat: è quo speramus aliquid audituros de tuis scriptis: quæ æstimari magis à nobis scito, quàm apud te promo. Vale. Lugd. Bat. Prid. Nonas Maij. ∞. IO. LXXXIV. Dominic. Lampsonium valdè velim à me salutes. cuius litteras accepi, at non illud quod in iis promissum. Item Læuineium, sororis tuæ filium.

EPIST. XCIIX.

Lutetiam.

HENRICO WILTIO S. D.

QUOD salui adueneritis, idq; ex litteris tuis intellexerim, valdè gratū. contrà molestissimum audire, de morte Sigonij & Guilielmij. Sed ille præter ætatē nihil passus est, (canescebat enim:) & fructus vberes cepit & reliquit studiorū suorum. Iste noster, extinctus in ipso æui & ingenij flore. Feramus. & vereor ut hic annus fatalis sit ingenio non vni. Me quoq; carpit lentè morbus: etsi mitior nunc paullò molliorque. Lutetiæ, siue in plerâq; Galliâ totâ, pestiferam luem vigere audio: caue & fuge, quantū humaniter licet. Abstine à discursu, ab intemperie, luxu, & in primis ab insolenti illo Baccho. Nisi caues, fatum tibi per illam viam. Melissum istic esse, gaudeo: & magis si vsus tibi cū illo. Velim te in hac peregrinatione innotescere viris; qui claritatis aliquid habent ab ingenio & scriptis. Hæc enim res ad tuam lucē. De Cuiacio quid est? Auaricīne agit? an Lutetiæ est in consilio Regis? Ita nescio quis rumor ad me adfert. Tu hæc & talia scribes: quæ grata nobis scis intellectu. Eidem viro epistolam meam ostendere poteris ad Iannum Guilielmium (si tamē occasio erit) quia, si memini, quædam in eâ quæ ad illum. Aperi prius, & vide: & quod videbitur face. Sed ô illius alumni nostri ignauam ignauiam iitan? eum perdidisse aut proiecisse commissas litteras? At ego de superbiâ & cōtemptu periclitè apud Memmium, Pincem, Faucium, quem Leidæ olim nosti. Plura vetat languor: nec manus aut mens mihi satis prompta ad scribendum. Deum rogo te seruet, & augeat cum annis modestiam & virtutem. Scribe ad me quidquid ibi noui. Lugd. Batavor. Kal. Decemb. ∞. IO. LXXXIV.

I. Aurato, viro & poetæ summo, item Passeratio à me salutem.

P

EPI-

IOHANNI ROTARIO S. D.

Et ipsæ litteræ tuæ, Vir prudentissime, mihi gratæ: & gratior
 causa, quæ te impulit ad scribendū. Amor enim & humani-
 tas est: quæ nisi mutuum amem, manantē à tam puro fonte, durus
 sum & inhumanus. Atq; ego te, mi Rotari (verè & sine blanditiis
 dicam) iam antè inter iunctos habebā & inter caros. ita multa de
 virtute tuâ audiebam, & studio sapiētiae & doctrinæ, quod rarum
 inter tui ordinis homines, quibus * pennatus ille deus carior est
 * Mercurius. quàm * laureatus. Nunc autē à te litteris tā amantibus prouocatus,
 * Phœbus. sequar in hunc amicitiae campū, nec vinci me patiar officiis, quæ
 ab animo quidē sunt & adfectu. Constantiam nostrā à te probari
 gaudeo. & magis illud, quod significas te iam olim in studiis his
 Sapiētiæ deditū: quæ sperni scio à quibusdā vt superuacua, & in
 quibus parum ad virtutem momēti. Sed errāt. quoniam etsi à di-
 uinis litteris verum omne robur, & purā luce nos perfundi fatear
 pietatis: sunt tamē hæc iuxta diuinum verbum adminicula quæ-
 dam, quibus dirigi & firmari possint vacillantes isti gressus. Nam
 quin castè & cautè Philosophiā vtendum sit, nō abnego: eaq; ad
 normā & velut lapidem explorāda cælestis legis. cum quā tamen
 consentire pleramq; eam (dico quæ de Moribus est) quis item ne-
 get? in Platone, Trismegisto, Epicteto, Arriano, altas præclarasq;
 multas voces reperio. quid refert à quo eæ profusæ, si ab vno illo
 spiritu veritatis? Quæ inspirasse, vbi libuit, prisca illa etiā pectora,
 & oracula edidisse per homines vanos & profanos, nihil ambigo.
 Inter vetustissimos Iobum vide. quæ è gente electā fuisse nō cen-
 sent, & tamē scripsisse omnia electa. Mercurium illum ter maxi-
 mum, quem dixi. mysteria in eo multa & arcana nostræ legis; etsi
 Ægyptium fuisse traditum sit, nec inbutum veris sacris. Idem in
 philosophis est, & omni illā scholā quæ à Socrate. quorum scripta
 notas non obscuras & scintillas præferunt clari illius ignis. Itaque
 vt in prælio, non gladiis solū & grauioribus telis res geritur, sed
 etiam funditorum quædam opera & leuis armaturæ est: sic in hac
 nostrā contra vitia & adfectus militiā, non solū illo penetrante
 Verbi mucrone, sed etiam philosophorū hastis & sagittis aptè in-
 terdū & vtiliter pugnabimus. Sed digredior. & tu fortasse aliquid
 de

de repub. item nostrâ exspectas, vt remunerer te hâc quoq; parte. Sed quid scribam? lenta hîc omnia, nō læta: & videtur res nostrâ velut in vado quodâ adherescere. idq; eo tēpore, cum velis & remis festinandū sit. Nam qui in nos pugnant, quos progressus cotidie faciant, vides. Remedium hîc mutatâ reipub. formâ & ab vno capite quæritur, vtinâ vtiliter! Sed vix spero. ita multi palâm, plures dissidēt occultè. A labe eâ quæ Flandriam corrumpit, immunis nostra Batavia non est: & hîc quoq; varia iudicia & discidia animorum. Ita vereor ne rebus nostris fractis & labentibus *extremum malorum* (vt Tacitus noster ait) *discordia quoq; accedat*. Quod si fit, conclamatū est: & exsequias Belgicæ, quibus commodum est, ite. Sed hæc sunt illa, aduersus quæ Cōstantia nos munit: & in cuius præsidio ego quidē acquiesco. De falso Cicerone illo, gaudeo tibi probari iudicium nostrū. Illud miror, Italos fuisse tam obefæ naris: à quibus, si deo placet, aureus ille partus. De Boulenio & Panhuisio, faciam sedulò: & si quid aliud erit, in quo gratū facere tibi tuiq; similibus possim. Salue. & per te Iohannes Viuianus vir planè bonus & pœta. Lugd. Bat. xiv. Kal. Ianuar. ∞. I. O. LXXXIII.

EPIST. C.

Antuerpiam.

PETRO EGMONDO S. D.

GRATVLATIONEM exspectas? increpabo. Tūc Româ recens redieris, & tribus verbis ad Lipsium? idque post biennium, & illo ipso biennio per silentium elapso? Certè tuum. non enim ego etiam silens, qui ad te crebrò, ad Bensium etiam, & ad Wincelium dedi. At nunc, tanquā in oculis mihi & ore assiduus, ita languidè scribis & quasi inops rerū. Quin si de te nihil & itinerum cœtu: saltem de manu illâ nostrâ aliquid litteratorū? quid Fuluius, quid Muretus, quid meus Bēsius acriter, & illi velut Patres litterarum ac Senatores? quid iunior alia soboles, qui succrescunt? Nō enim effatam nunc ingeniorum Italiam censeo, illam nutritæ eorum olim & parentē. Hæc peccasti. & vt spē imò viam veniæ ostendam, purga. Quod fiet vnâ re, si priores illas litterulas delebis & obrues grandi aliquâ epistolâ, longâ, latâ, & quò magis latâ, magis lætâ. Talibus enim alloquiis egeo nūc, ô Egmonde, in torpido hoc morbo, qui me, annū & tres ipsos menses, iam tenet; nec notus quidē adhuc planè medicis, adeò nō remotus. Ardores

P 2

visce-

viscerum sunt & interni æstus, haud procul ab Hypochondriacâ melancholiâ: nisi quod mens & caput mihi sana. quæ tentari tamen & lædi per eum morbum nō te, credo, fugit. Similis aliquis languor fuit, qui magnū Laurentium illum Medicē tenuit & citō abstulit, sed per imperitiā medicorum. Nam aliās, ad mortem non ita præceptus. Ego omnibus armis in eum pugno, & præcipuè auxilio Nympharum (frigida enim in potu & esu mirè iuuant:) & aliquid sanè proficio: nisi quod ad extremum, vereor ut suppediet me tam pertinax hic luctator. Victus enim aliquoties non vincitur, deiectus non cadit, fugiens nō cedit. Antæus aliquis est:

— *ab ipso Sumit opes animumque casu.*

Et profectō Terræ illa progenies, ducet me ad terrā. De me habes. nam de studiis, scilicet in languore hoc languent. Tu autē quid? Grudiosne cogitas, & illic honorē? Faueo, & voueo. illud miror, in eadem togā cādida tecū conspici tam nigros. Etiamne ille, ab Lutetiā huc adspirat? O frontē, frontem! Nec tamē illum nimis culpo (perseuerat enim esse quod fuit:) magis illos, qui flectunt & inclinant se ad tales. O vrbs mihi olim amata & culta, misereor. tenebræ & infamia tibi, per tam obscuros, tam infames. Tu autē, si me audis, obdura & fortiter age: peruinces, si inter suffragatores aut arbitros, vlli erunt mediocriter boni. De migratione nostrā: amicē tu, nescio an ex famā meā, aut ex vsu. Inter hirūdines istas ego? æstates aliquot otij & pacis hūc egimus: vis mutem ad ingruentē primam nimbosum hiemē? non decorē, fortasse nec prudenter. Perpetuum enim serenum in illā parte quis mihi spōdet? Obscura, mi Egmonde, hęc talia: in quibus vetus illud Tiberianū iure nobis placeat, ut *cōsilia, quibus impares sumus, fato permittamus.* Homo hūc quid videat? desipit maximē, qui sapit maximē. & solus ille æternus æthereusq; oculus est, qui hos euentus cernit, & dirigit sæpe præter omnium mentē. Illi ego hæc & me permitto, & clamo ex animo hoc vetus: * *Ἀγὼ δὲ μὲν ὦ Ζεῦ, καὶ σὺ ἡ περὶ παλαιήν.*

* Tu Iupiter me au-
cito, & Fa-
salitas.

Tu mi Egmonde vale, & Clarissimum Iurisc. & Antecessorem Iohannem Wamesium, si occasio tibi, à me saluta. virum prudentem, doctum, & (quod expertus sum) in virtutem & litteras valdè pronum. Idem cupio & censeo de Antecessore Philippo Suerio.

FINIS.

IVSTI

IVSTI LIPSI
EPISTOLARVM
CENTVRIA
SECVNDA.

LIBRERIA
MISTOLAVIA
LIBRERIA
LIBRERIA

Ad Illustrem virum

119

THOMAM BVRG
BARONEM,
ET

BRIELANVM PRÆFECTVM.



LTERAM Centuriam episto-
larum nunc emittimus, Vir il-
lustris, & nomini tuo meritif-
simò eam dedicamus. Si amor
aut beneficia huc me vocant:
ille in me magnus, & hæc cre-
bra. si dignitas aut virtus: utrâque ornatus
es inter gentis tuæ primos. Genus tibi nobi-
lissimum, & antiquâ stirpe decòrum: magni-
tudo animi & prudentia eximiæ, & cuius
vtriusq; specimen dedisti in his Belgicis quo-
que turbis. Ad arma quoties te hostis aut oc-
casio duxit, tu manu strenuus, consilio pro-
vidus: & quies cùm fuit, Præfectura tua te
habuit cum ciuium militumque veneratio-
ne pariter & amore. Quinetiam in illâ nocte
temporum, cùm homines quidam maioris
animi quàm consilij hæc nostra turbarent, &
vno velut filo appenderent publicam salu-
tem: ea moderatio & prudentia tua fuit, vt
in mediis flammis flamma te non tangeret, &
panè vnus firmus quietusque stares in com-
muni

muni illo motu. Magna ista sunt: & maiora futura, si maior aliquis aut latior virtuti tuę campus. Quod voueo: & te, Vir illustris, rogo, uti inscriptionem hanc accipias velut animi cultusque mei in te pignus. Vtriusque quidem eximij exiguum: sed quid faciam? ut Vlysses ille apud Alcinoium nihil habet quod rependat pro ingentibus meritis, præter vota & grates: ita ego, quem cetera destituunt præter munera hæc mentis. Quæ tamen vobis magnis quoque sæpe magna. & meritò: quoniam fama & æternitas ab istis. & ut ait Pindarus,

*Sermo factus diuini viuit, quæ cum Gratiis volentibus lingua exulserit è profundâ mente.

* ῥῆμα δ' ἐγμάτων χερσὶν αἰ-
τερον βιοτὸν δέει,
ὅ, π κε σὺ χάριτων τύχα
γλώσσα φρενὸς δ' ἔξελαι βαθείας.

Vale III. Idus April. ∞. Iō. xc.

AD

AD LECTOREM.

121



HABE etiam hanc CENTURIAM
Lector, sed puram, simplicem, &
sine mixtione. In priore illa alie-
nas aliquot inseruimus: nunc dis-
plicet, & detraxi. Non ergo di-
gna illa edi? digna, sed non à me:
& mali exempli, arbitrium hoc sibi sumere in scri-
pta aliena. Mihi fieri nolim: & tamen faciunt.
atque ecce edunt alibi hanc aut illam epistolam, me
non ignaro solum sed inuito. Quæ hac temeritas,
sive improbitas, est? Clamo & testor apud homi-
nes qui sunt, qui erunt, inimicus mihi quisquis hoc
facit.

QVICVMQVE QVODCVMQVE
MEVM, PRAETER ME, DI-
VVLGAT AVT DIVVLGABIT,
PRAESES LITTERARVM ET
FAMAE DEVS VINDICATO.

Homo imperite & ὀπίσθας ἡδέε. Verba aliquot apud
te familiaria, aut libera, aut blanda effudi: sed apud
te: & in lucem tu hac calide effers? Quid hoc
est aliud (ὅτ' αὖτ' ἀριστοῦ ἀνδρῶν ὁ λόγος) quàm
tollere è vitâ vitæ societatem? tollere ami-
corum colloquia absentium? Quàm multa
ioca solent esse in Epistolis, quæ prolata si
sint, inepta esse videantur! quàm multa fe-
ria,

Q

ria, neque tamen vlllo modo diuulganda!
*Abi igitur inhumane, inepte: nec sic me produce, imò
 traduce. En, cum cautè omnia & circumspectè scri-
 psimus (ut hoc auum est) non effugimus morsum:
 tu subitaria mea prodis, id est, latus pectusque meum
 nudum obicis ad omnem ictum? Abstine. & tu Le-
 ctor, mea ama, sed mea.*



INDEX

INDEX

EPISTOLARVM

CENTVRIÆ II.

A.

A BRAHAMO Mylia epist. xxvij.
 Abrahamo Ortelio xxxvij, lix,
 xcix, c.

Emilio Rosendalio xix.

C.

Carolo Clusio xxiv.

Caspari Vosbergio lxxxvij.

Christoph. Plantino xxvij, lxxij.

D.

Dionysio Gothofredo xxxij.

Dominico Baudio xxij, lxxx.

Dominico Lampsonio l, lxxxvj.

E.

Elberto Leonino xij.

Euerardo Pollioni xij, xxxix.

Euerardo Reidano xcv.

F.

Federico Morello lxix.

Francisco Bencio lxxv.

Francisco Hildesheimio lxxij.

Francisco Iunio xij.

Francisco Nanfio xxxvj.

Francisco Raphelengio Filio vij,

xxxij, li, lxx, lxxj, lxxij,

lxxxvj.

G.

Gerardo Tuningo lxxvj.

Gulielmo Cripio Filio lxxxij.

H.

Hadriano Sarauia xx, lxx.

Hadriano Turnebo Hadriani Fi-
 lio

Henrico Borbonio Principi Dum-
 barum lvij.

Henrico Viltio vij, liij.

Hieronymo Greflotio Lislao xj.

Hieronymo Mercuriali xlvij.

Hugoni Blotio xciv.

I.

Iacobo Augusto Thuanio Amerio
 iij, lxj.

Iacobo Corbinello v.

Iac. Cuiacio xvij.

Iacobo Monauio lxxvij, xcviij.

Iano Douſæ V. N. lvij.

Iano Douſæ Filio xliij.

Iano Duystio xxxij.

Iano Grutero xli.

Iano Lernutio ix, xvij,

liij, lxvij.

Ioh. Arcerio xxv, lxxxij.

Ioh. Guliel. Stuckio xxvj.

Iosepho Consalues lxij.

Iosepho Scaligero xxj.

Q²

* Ioseph.

* Ioseph. Scaliger Iul. Caesaris F. Nicolao Ondaerto xciij.
Francisco Vertuniano xlv.

Iosia Mercero xxxij. P.
Isaaco Casaubono lxxxiv. Paullo Melisso xxx.

* Iul. Scaliger Ferrerio xlvj. Petro Aloftano xl.

L.

Petro Brachio lxxvj.
Petro Paurvio lx.

Leuino Caluardo lxxix. Petro Regemortero xxij, xlix.

Lamberto Culenio xlviij. Petro Villerio x.

Lamberto Vander-Burch vj. Petro Villerio Filio iij.

Lanceloto Brunio xcviij. Philippo Marnixio lxxxv.

M.

Marie Gornacensi, virgini nobi-
li lvj.

Martino Lydio xc. Regnero Grutero xcj.

Matthæo Dressero xxxviij. T.

Michaëli Forgacz, libero Baroni xlj, lxxviij.

de Gimes lxxxj. Theodoro Bernardi xliij.

Michaëli Huralto Hospitali lxiv. Theodoro Cantero lxij, lxxviij.

Michaëli Montano xli, lv, xcij. Theodoro Leeuvio xvj, xliij,

lxviij.

Theodoro Marcilio xxxix.

* Typographus Lettori xcviij.

N.

Nathani Chytrao lxxxix.

Nicodemo Frischlino xxxv.

V.

Victori Giselino. ij.

IUSTI LIPSI
EPISTOLARVM
CENTVRIA II.

EPISTOLA I.

HADRIANO TURNEBO HADRIANI F.



ERVM mel, non epistolam, à te, Clarissi-
me Turnebe, accepi. Tu mihi gratias? ego
tibi, qui tam gràtè & benignè interpretaris
officium, quod sine scelere non omissem.
Qui vir diuinus ille parens tuus fuerit, nò-
runt & fatentur omnes, quos stupor non
præpedit, aut lior. Ego à puero, velut astro
quopiam inclinàte, iui in amorem illius &
laudem: nec vir mutauit affectû, sed auxi. Nônemo inuidet? esto.
ille viuet in summâ æternâq; gloriâ, quamdiu res Græcæ aut Ro-
manæ. Nec plura hîc de illo: de te, germanissime Turnebe, sic ha-
be. non ambire me amicitias, naturâ & iudicio propensum ad te-
nebras & quietem: sed triumphare in tuâ, quem iure amo purum
aurum ab illo auro. Plura libet, non licet. testis mihi iste Hier.
Grossetus vestrâs, insignis iuuenis, qui iam nunc mihi adest, &
abit. At nobis haut sæpè opportunitas mittendi, scribendi tamen
semper voluntas. quod crebrò & magis seriò faciam, ita amor
hic inter nos perennet, quem coimus auspice & teste immortalis
tuo patre. Postrid. Id. Mart.

EPIST. II.

VICTORI GISELINO.

INVITI à vobis abiimus, inuiti. Quid vis amplius? apud ami-
cum hoc satis est: ceterùm, calceum hunc vide, nemo vestrûm
scit vbi me premat. Apuleium tuum scriptum conferre cœpi:
quædam in eo valdè bona. Venationes etiam nostras attigimus,
Q₃ fed

sed frigide imò contemptim. A peregrinatione enim hac supinus & aliarum cogitationum, vagè adhuc in studiis erro. nec facile insitam lineam, nisi recreatus aduètu vestro: qui, per omnes deos, ne me fallat. Hoc communiter rogamus, Doufa, Hautenus, ego. Varias Lectiones legi, editas in Galliâ nuper. placet ingenium adolescentis, placet aliquot locis nostri imitatio, si non furum. Idem in libello Quid dicam? discipulos habeo, & breui faciam sectam. Sed vt ait Pindarus,

*Optimè
omne quod
à naturâ
est.

* τὸ δὲ φύξι καὶ τῆς φύσεως ἀπὸ τοῦ θεοῦ.

Sanè siquid in oratione nostrâ aut stilo probandum: totum à naturâ est, vix à curâ. Rationem meam scribendi scire vis? fundo, non scribo. nec id nisi in calore & interno quodam impetu, haud aliter quàm poëtæ. Siquid operosius paramus; rem meditamur, disponimus. verba faciliè succedunt ac pænè præcedunt meam mentem. Istos rideo, qui etiam epistolas, si dis placet, lentè & velut ad numerum componunt. Verba examinant, circumspiciunt, traiciunt: & miselli cum omnia fecerint, ymbras putes non homines loqui. Ita tenuis tota scriptio, sine sanguine, colore, carne. Sed diffundor. peccatum meum solemne, cum ad te scribo. Nunc emendo, & sileo; & te valere iubeo, ac venire. Ni facis, Amor Gifellini res tuas tibi habeto. Lugd Bat. xv. Kal. Iunij. ∞. I. LXXXI.

EPIST. III.

Lutetiam.

IAC. AVGVSTO THVANO AMERIO.

DISTVLI ad te scribere, V. C. dudum: præter morem meum & præter votum. Amantes redamare non ego neglegens: & tu merueras, non amore solùm quem benignè vltro attulisti, sed ingenio, sed doctrinâ, sed probitate: quæ tria in vno Carmine tuo clarè vidi. Sed amabote, ita perpetuùm Fama te amet & Virtus, ignosce: & morbum hunc nosce, qui non finit me esse mei iuris aut moris. Verba non dedi, non misi: dedi animum, misi affectus mei sæpe auras, qui apud te & duos illos quos in extremo Carmine tuo mecum iungis. O caelestem pænè dixeram Trigam! nisi de terrâ & luto meo aliquid afferrem ego, funalis ille tertius equus. Nam iugales duo, retiera supra homines: & tu item auriga, qui iunxisti. Nos Epistolas dedimus nuper: & valde

& valdè hauebam exemplar tibi illisq̃ mittere, nisi qui has ferret, recusasset. Nosti per hoc bellum, nec tuta, nec trita nunc viarum. Valetudo mea meliuscula: sic tamen, vt extra morbum potius videar, quàm languorem. Damus nunc & edimus *De Pronuntiatione Latine linguae Dialogum*, tenue in re tenui opus, nec dignum meliori vestra aure. Tu ex animo à me salue: qui æternùm tuus sum. ita sim saluus. Clarissimis Cuiacio & Scaligero salutem. Lugduni Bat. III. Id. Februar. ∞. IO. LXXXVI.

EPIST. IV.

PETRO VILLERIO *Filio.*

VERE scribis. semper tu mihi curæ, & nunc es. ita ingenium tuum & mores, & pater etiam, merentur. Vtinam aliquâ curâ meâ te curem, & à morbo isto releuem, qui pertinaciter vrget! Quid facias? feres. certus ad salutem tuam hæc dirigi, etsi non ad voluntatem. Si vulgi more loquerer; querelas miscerem, & dolorem meum ostenderem in casu, quo hæc ætas tua & tu indigni. Non faciam. fortiozem esse te & me volo: nec te cupere solatia ex alienâ sympathiâ, nec me promere dolorem, etsi doleam. Nam hoc non nego. si deo visum esset, alium te malim. cùm non visum; quod ipse vult, nolens, (vt sic dicam) volo. Hoc de te scribo. in me nōne idem? languor hic biennalis me tenet, & abiicit in validissimâ hac æui parte. Annum enim trigessimum-nōnum vix attingi. quid tamen angar, aut opponam? facit ille, qui me fecit. Nōne in figuli manu est, effingere leui rotâ vasculum, & idem frangere? Et hoc melius, quod figulus noster nos non frangit, sed refingit, & è miseris beatos, ex inferis superos reddit. Sed hæc talia aut tu tibi sæpe, aut omnium optimè pater dicet. De iuris studio, quid nunc cogites? profectò solitudinem id non amat, cui forum semper propositum & turba. Ad Philosophiam magis te nunc ducam, quæ non delectet solùm in hoc tædio, sed firmet. Eloquentia & stilus rus tuum non spreuerint; in quibus si tempus hoc ponis (donec melior tibi valetudo) id non perdis. Scripsimus *De Pronuntiatione*, leui manu, vt in re leui. en habes, vide, & à me salue, qui ex animo tibi cupio. Lugduni Batauorum, Kalend. April. ∞. IO. LXXXVI.

EPI-

EPIST. V.

IACOBO CORBINELLO.

LITTERAS ad me mittis, non adfectus solùm plenas, (leue id verbum sit) sed amoris. Benignè ad amicitiam prouocas, laudes adiungis: è quibus has vix agnosco, illam appeto pari tecum voto. Gentem vestram amaui semper: & ex eâ illos maximè, qui vetere illâ Italiâ digni. Qualem te esse, mi Corbinelle, non solùm ex igniculis litterarum tuarum, quos sparsos colligo, video: sed etiam ex testimonio viri magni P. Victorij, qui de indole tuâ ad virtutem magna prædicat, nec vana. Atque vtinam pessima hæc tempora concedant nobis liberum eundi redeundi iter! profectò viderem vos, (lumina illa Galliæ etiam includo:) & nectar illud sermonum vestrorum haurirem auidâ aure. Sed nos iactamur: nec Æolo etiam vos, vt video, litastis. Venti vbique & tempestates: quæ, mirum, nisi hoc anno euertant, certè conuertant, hanc Europam. Fratrìs tui *μεγαλοψύχου* historiam & tristem exitum legi. quid miremur? hodie illæ viæ, & nil nisi *σκολιδον* videmus à plerisque his dynastis. O Italia, Italia illa prisca, vbi es? At tu, vir nobilissime, solare te cùm aliis rationibus, quas litteræ & sapientia tibi suppeditant, tum maximè cōmuni eo Fato quod iniquum hîc semper in bonos. Exempla tibi prompta scio. tu scito & hunc animum: quem iam nunc seriò deuoueo in tui amorem. Lugduni Bataur. ∞. IO. LXXXVI.

EPIST. VI.

Utraiectum.

LAMBERTO VANDER-BURCH, Decano.

AMORE iure tuas litteras, amoris & prudentiæ simul plenas. Amorem enim interpretor, meas laudes: quas adfectus tibi magis certè, quàm iudicium dictat. Quid enim sumus? conari me magis scio quàm efficere, velle quàm posse in publicum prodessè. quidquid tamen id est (& esse aliquid vobis tam fidis amicis credo) gratum mihi, quòd gratiæ saltem locum parit apud tales viros. At prudentia tua, in iis mihi clara, quæ de publicâ istâ re scribis. quæ sanè confusa, turbida, & vtinam non vicina ad occasum. Quis bonus non queritur de eâ tecum? sed hoc vnum reli-

ctum

Etum est, quoniam mederi non in nostrâ manu. Imò fortasse nec humanâ. Deus ille est, qui publicas has clades immittit, qui alit, & fouet, & tum finiet, cùm nos earum causas. Eæ autem peccata sunt, quæ adeò apud nos non desinunt aut minuunt, vt augeri mihi & adcumulari videantur vnâ cum pœnis. Iritamus cottidie magnum illud numen, & quasi puniendi iustæ causæ non sint, damus nouas. Quando luxus, fastus, libido maior, impunitior? & religio passim nunc in ore, improbitas in corde. Verba pietatem sonant, facta ambitionem, auaritiam: nec in vno altero, sed apud plerumque ordinem, ætatem, sexum. Itaque de pace aut tranquillitate, nihil ego spero. — *bella horrida, bella* exspecto: aut certè tyrannidem non optabiliorem quouis bello. Illi ad quos Victoria inclinare se videtur, irati veniunt: & si qui moderari volent, nescio an audientur. In omni bello cruda post victoriam principia: magis in ciuili, vbi odia & acerrimæ factiones. Sed Deus videbit. cui, quod ad me, curas has ex animo relinquo. Sicut & illam de valetudine meâ: quam nō ego quidem, Vir amicissime, neglego, nec mortem vltro appeto: sed cùm feci quæ humanitus possum, securus exspecto euentum. Hoc curo, vt vitam meam corrigam, vt deo meo placeam, vt sedem ab his nimbis quietam in superâ illâ arce possideam: vnde adspiciam humana hæc omnia, & contemniam. Interea tamen nec studia porcus omitto, nec ea omnia per quæ publicè aut priuatim humano generi videor posse prodesse. Ostendent id breui quædam etiam scripta nostra, quæ iterum paramus. De Floro tuo manuss. quem offers, valdè gratum. multa sanè reperio, non animaduersa Vineto aut Stadio ante me censoribus: & reperiam plura, scio, si auxilium mihi tui libri. Itaq; si cum quamprimùm ad me miseris, beneficio adicies me & posteros. nec id celabo. Vale, & fratrem tuum Graphiarium amanter à me saluta, cum gratiarum actione pro munusculo nuper ad me misso. Lugd. Bataurorum. xvii. Kal. Febr. ∞. Io. lxxxvi.

EPIST. VII.

*Antuerpiam.*FRANCISCO RAPHELENGIO *Filio.*

Tuas reuersus vidi libens: non etiam ea, quæ in ipsis. Languorem præferunt, & nauseam in rebus omnibus seriis &

R.

hunc

honestis. Vidi, mi Francisce, iam olim insitum tibi hoc vitium: quod ratione & curâ, quæso te, vince. Iaces, nisi facis. Quid hominis tam proprium, quàm erigi & spectare alta? Alta dico, id est, quæ ad ætheream illam partem pertinent, cælitus immissam nobis mentem. Hæc colenda. nec potest sine meditatione, sine actione: neque ista, sine labore. Hunc igitur vsurpa: quidquid reclamet fastidians illud tædium, haud longè à veterino. Tu deo, tu auo, tu mihi, curæ & cordi es: nec te deferemus, si non te ipse. Doctoris illius noui diem quòd obieris, benè factum: quod cum versu celebraueris, nec malè. Sapientiæ pars est leuiter desipere, & paullum extra viam rectam ire, ad vitandum violentum aliquem occursum. Vidēsne vt nautæ vela sinuent & obliqueant: & teneant nihilominus suum portum? imitare. Pietas tibi interna & vera sit proposita, Modestia & Virtus: in externis, personam interdum sume aut pone, pro re aut pro auo. Studia tua calere velim (ætas ista hoc postulat) & videbimus quid in rem tuam maximè sit vnà cum auo. Surge tantum, & confide. Ineptias God vidimus, & risimus. quis cōprimet Criticorum hunc luxum? Satyra mea frenos nō dedit: opus lege aliā aut rege. Vale. Ex vrbe, in quā tu olim, xvi. Kal. Decemb. ∞. Iō. LXXXVI.

EPIST. IIX.

HENRICO WILTIO IC.

CANTERVIS apud me erat, cum tuas accepi. dicam gratas? gratissimas, ita me Deus amet, vel hoc nomine quòd à sex mensibus primas & solas. Et tu de me quereris? bellè. at ego pluries scripsisse me scio (vide an deceat) quàm te respondisse. Excusabis non redditas. credo: feramus igitur inter nos & excusamus, nō tam culpam communem, quàm temporum sortem. Valetudo tua & studia prospera, mihi gaudio, perseuera. Nōne apud illum virum es, qui sæculi decus? vide ne frustra. frequenta, audi, disce. Pollio meus honore ab illo auctus: quòd ab illo, iure ante honorem ipsum censeat. Scripsi ad eum, & quàm grata mihi Dedicatio illa, ostendi. Vos, quæso, inter vos concorditer & amicè viuite: quia Belgæ, quia ex meâ domo, quia sacrorū eorundem & studiorū. Senectus mea, si ad eam pertingo, solatium sibi spondet, in vobis.

in vobis. Sed quando videbo? quando reditis? mihi placet non porro vos currere, in Germaniam flectere, illinc lares. Iuno Iuga vos exspectat, & Quies. Et si patria hæc etiam nunc turbulenta. Sed si non antè peregrinandi vobis finis, quàm hîc quies, quis finis? Tua ad Nonium grata, proba. Sed litteras vrge, & sapientiæ studium ne omittas: ad quam metam dirigi velim omnia tua. Infelix semper erro, si ab illâ aberras. Vt naus quæ inter fluctus sine clauo iactatur, sic mens quæ in hac vitâ sine sapientiæ gubernaculo. Mores illi plebeij, stolidi, vani, ne te inficiant caue. Alphæus mare Siculum subterlabi dicitur, sine mixtione vndarû, ad suam Arethusam: tu per leuitates, per vanitates, ad amatam illam Diuam. Vidisse ea vtile, non se inferuisse: transisse, nō miscuisse. Edidimus nuper Centuriam Epistolarum. magni illius viri mihi illic mentio, & sapius fuisset nisi impedisset ille vir quem hîc nosti. Scænæ feruendum est, quamdiu ego in hoc Theatro. Sed verum meum sensum breui aperiam magis & diffundam. Nec vos quidem omisi, te & meum Pollionem, vt videbitis, aut potius iam vidistis. Nam libri, credo, allati. Etiam nunc edidi De pronuntiatione Latinæ Linguae Dialogum, mihi probum. Tu salue, & redi si parenti tuo ita visum. De Italiâ, non tibi, non Pollioni nostro nunc ego auctor, ponite vana cogitationum. xvi. Kalend. Maias.

EPIST. IX.

IANO LERNUTIO S. dico.

Ita perpetuus inter nos amor sit, mi Lernauti, vt cum aculeo discessi a vobis. Cursim, inquit. Quid facerem? aliud animus, aliud res suadebat. Vitam meam nosti, & scenam cui seruimus. Si vnquam aliquid verè scripsi, hoc est. quasi anima à corpore, auulsus sum à vobis. Fuge aliud suspicari in me: quem, culpa tuâ est, si nondum nosti. Nam apud amicos nihil me vno simplicius: apud alios sanè sum quod Vlysses. Nōne & aulam, & Etruriam ego vidi? sed iis non vtor apud simplices & candidas istas mentes. De colligendis & digerendis poetarum nostrorum versibus, ego verò tibi iterum auctor. Famam tuam cum alienâ auctum ibis (quantum enim est, putas, illa recti iudicij gloria?

R. 2

apud

apud me, super ingenij aut doctrinæ.) decus item Germania & nostræ Gallia, quarum interest, non omnia ingenia intra Alpes clausa videri. Non exemplum nuperum illius vidisti, qui Italos poëtas digessit? sed vellein eius, imò ipsorum causâ, magis cum dilectu. Inter nostros Lotichium amo: Ianum Pannonium æstimo: Scaligerum patrem admiror. qui si felix illud ingenium & inuentionum inuidendum acumen, curâ temperasset & limâ, coronari contra omnes poëtas posset ab illo ipso æuo prisco. Hac, nisi fallor, deficitur. nec in edendis quidem eius adhibitum, quod debuit, discrimen. Eò suaserim, illius & aliorum optima quæque ab optimo iudice selegi. & tu is eris. Reliqua in sermonem reicio, qui inter nos proximo mense. Ita enim scribo, ita impero. Venies inquam ad hunc Iunium: & iam nunc aures claudo ad omnem excusationem. Extra iocum, Lernuti, in hac breui fugacique vitâ fruamur hunc fructum. Ferrum nostrum in igni est. Vale. x v. Kal. Iunij. ∞. I. LXXXI.

EPIST. X.

P. VILLERIO.

SOLATIO mihi anteâ amicorum litteræ, nunc remedio: nec vlla medicina magis leuat hunc languorem, quàm alloquia hæc à vobis. A te inter primos: qui me serîo amas, quem serîo ego amo. Vultum tuum videre nuper cùm Hagæ esses, optabam. Fefellisti. contentus manu sum, quia scio quæ negotia te circumstent & impliceant, atque abripiant sæpe inuitum. Ego hoc vno felix, quòd meus. Sed nimirum, ut qui semel nauim & mare ingressi, in arbitrio ventorum sunt, nec redeunt ad terram, cùm volunt: sic vos, qui in reimp. Tenet illa inuitos; & cùm terram maximè spectatis, retrahit aliquis æstus. Atque vtinam tui similes teneat semper: Remiges & sentinatores plerique sunt, qui nunc ad clauum. Hinc iactatio, & ad extremum, naufragia: nisi ab alto dirigat ille Deus. Inuitatio tua in Zelandiam, grata: & puto, parebo. non illi alteri consilio, de Galliâ. Nec vera nego quæ de opportunitate, salubritate, & suauitate locorum hominumque narras: sed peregrinandi mihi nunc vna causâ, Valetudo. Eam meliorem posse fieri per acidas illas aquas medici suadent, & (vt in speim nostram

fram proni sumus) persuadent. Tentasse quid nocuerit? eo certe animo, ut nihilo abiectior illinc redeam, quam eam, etiam si omnia sint contra. Vitam hanc magnificare Christiani non puto, quæ manet vita illa melior: sed nec abiicere, & remedia spernere, quæ data huic fini. Gallia vestra, si deo ita visum, sanum me videat; & exosculer magnas illas animas, quas ignotas amo: imò etiam, quæ ignotus amor. Nam si usquæ in Europâ, amicos mihi in eâ gente esse, hoc scio. Busbequius meus iamdiu inuitavit, differo. In grâdi illâ Epistolâ tuâ, de stylo & imitatione quod monuisti, verum est. Quam multi in iuventute nos æmulantur! & rideo. quia aut à me procul illi, aut procul certe ego à recto. Nihil magis breuitate amo, sed si simplex: nihil magis breuitate odi, sed si adfectata. Quid etiam, si fucata? nam verba emendicant, & abstrusiores aliquot phrasæ: ad quæ, non dicam risum non teneo, vix iram. Comprimam publico aliquo scripto, & de Imitatione totâ, quid mihi videatur, monebo. Nam ego ut inuitem, seruum est. arbuscula hæc, siue recta, siue aliter, creuit & induruit in hanc formam. Ciceronem amo. olim etiam imitatus sum: alius mihi sensus nunc viro. Asiæ dapes non ad meum gustum, Atticæ magis. De Lemouicensi: an frustra monueris, vide. Misi enim exemplar ad filium tuum, non ad te: quia parum dignum te argumentum. Sed tamen cum ad filium, nonne & ad te? qui imago vera tui, imò tuipse. Sanitas tantum ei adsit. quam Deus ille dabit, si salutare: & in eadem te Vir amicissime seruabit. Lugd. Bataur.

Kalen. April. ∞. Id. LXXXVI.

EPIST. XL.

HIER. GROSLOTIO LISLAE.

TANTVM non in procinctu iam eram iturus Ultraiectum, & inde Germaniam; cum me litteræ tuæ inuenerunt. Dicam grates eas? non gratior Gratiarum ipsa diua: per se, & non nihil à clausulâ illâ, quæ de Mercero. Illene illic? hîc mallet: & iam nunc vos inuitem, nisi abeam. In reditu fiet, si viri estis; & tam vicini videbitis & libabitis saltem oram Bataviæ nostræ. Mihi valetudinis vnius causâ susceptum hoc iter: inuis enim ad acidos, qui iuxta Confluentiam, fontes. Valebo per eos fortasse,

R 3

aut

aut valere iubebo hæc omnia humana. Ad alta illa ibo, nec ibi quoque me amor vestrum deseret, qui altè in pectore isto hæret.

— *Stol d'èrindapuegi èsuv.*

Lugd. Batavorum. VI. Kal. Maias. ∞. IO. LXXXVI.

EPIST. XII.

ELBERTO LEONINO *Geldrie Cancellario.*

PEC CARE mihi videret, si expertem te habeam consilij, quod firmandæ valetudini meæ cepi. Iter in Germaniam institui ad acidos fontes: in quo iam sum, sed forte non nimis fausta. Diserimen quidem adhuc nullum, sed in hoc opidulo, circumcludor à turmis equitum, quæ in Belgium parantur. Ita differtur mihi via, imò pænè aufertur: quia perit oportunissima pars anni, & hyemi sustinendæ haud planè firmum hoc corpus. Ambigo an pergam, an sub tectum me dem, & resistam in aliqua maritimâ vrbe, ad vos quidem bonâ fide redibo, nisi impediât me, ut vos Iurisconsulti loquimini, vis maior. Ego vir amplissime, amorem & officium omnetibi offero, ab animo non ficto: & iure debeo, quia te comperi mei amantem. Vale. Oldenburgi, Non. Octobr. ∞. IO. LXXXVI.

EPIST. XIII.

Francofurtum.

EVERARDO POLLIONI.

QUID ais? siluisse me? erras. Nullas ego à te vidi, ad quas non sedulò responderim: & habui te, mi Euerarde, semper inter primas curas. In languore tuo doleo: & miror quid illud mali morbi, quod vires tam valdè afflixit. Sed ætas tua est, quæ facilè resurget: & siquid spirituum aut sanguinis perierit, reponet. Tu modò te cura, sed sine curâ: & quidquid Deus ille noster dabit, excipe libenti, imò & hilarâ fronte. Vivere te vult? velis. Morì non opis. finis & initium nostri ab illo sunt: felices, si in illo. *Exordia* quædam sumus à magno illo Figulo: quid querimur, si fingit nos & refingit? Hæc tibi, & per te mihi dico: qui & ipse valdè inter imbecilles. Febris quidem nupera, vix vitam mihi reliquit: & eam ipsam, præter spem omnem medicorum Basileam, in eam placuisse tibi, gaudeo: urbem eo nomine planè dignam.

dignam. In Galliis nondum *γελῶν* & sanè doleo Wiltzium nostrum inuolui, nonnullâ suâ culpâ. Vt quid enim desidet & cunctatur, præter nostram & parentis mentem? Nam de abscessu in Germaniam, suasi pridem. At quod ad te nunc, mi Euerarde: ego de reditu seriò tibi auctor: siue quia pater ita poseit (scis quid illi debeas) siue quia tuâ valetudo. Amicus hîc & familiaris aër, facillè tibi dederit nouas vires. Et quid ibi hæreas? inter bonos & doctos, scio: sed sine magno tuo vsu. Meta itineris quæ tibi fuit, eam iam attigisti: nec tu mihi Vlysses aliquis esto aut Philoctetes. Terrent te hæc ambigua? quæ magis, quàm nos? Sanè infirmus hîc patriæ status, fateor, & qui sine manu Dei palàm ruit: sed valdè erras, si his pereuntibus, speras illîc firmitatem. Europæ libertas corrui, si semel hoc vallum. Ego hoc non suadeo solum, sed hortor: & fac, vt in viciniore te aliquando conquiescamus. *Ατενῶν* esse me scis: tu, & qui alij probi è disciplinâ nostrâ, mihi *τέλει*. De genere vitæ quod capias; hoc vnum dico, vt nullum. Late hunc & quiesce, donec desæuiat ciuilis hæc tempestas. Plura coràm. nam me spero ex primis videbis. Pridie Kalend. Mart.

EPIST. XIV.

FRANCISCO IUNIO S. D.

NON amore me præuenisti, sed significatione saltè amoris. Quis paullò humanior, te nō nouit? & qui nouit, quis non amet? At tu tamen affectû in me largiter sanè declarasti, cum epistolâ suauissimè scriptâ, tum munere adiuncto, quod meritò mihi carum. Monumētum enim ingenij tui est. parûm illud ad gustum vulgi, fateor: sed ambrosia & nectar nobis, quibus paullò acrior iudicij ille sensus. Sanè in implicatissimo scripto vtilè subtilemque operam nauasti: & lumen prætulisti locis, in quæis æternum fortasse caligassemus. Multiplex notitia linguarum hoc tibi dedit, vt talia ista interpretari nostro æuo possis vinicè, & dixeram penè, vnus. Iam de affectu tuo in Georgium nostrum quàm mihi suaue! Viuit enim in animo meo ille adolescens, magni ingenij, magni acuminis, & qui ad summa omnia venisset, nisi Deus ad verè summa illum euexisset. Felix, qui ereptus tot instantibus malis, & tot futuris. Nam fauillæ huius nostri incēdij spargi mihi videntur, & iam ad vos ire, comprehensuræ (vtinam fallar!) Germaniam

maniam totam acri igne. Sed publica omitto. De iis quæ Epistolis ad Atticum obseruitalle te scribis, & offers mittere: valdè velim. Nunc tamen in aliis curis sum, vt videbis. Nam, cum absoluero, mittam. In tuis ad Curopalatem de Aspro Turcarum legi: addas opportunè notulam è priscis Glossis, *Δωδέκων λευκόν, Asprum.* & iterum: *Ασπρότης, candor.* Vberiùs aliàs. nunc salue, vir magne: & tui amantem ama. Lugduni Batauorum.

EPIST. XV.

Leodium.

DOMINICO LAMPSONIO.

SPERABAM & aspirabam ad vos, mi Lampsoni: sed, heu, sperabam. Consilia illa omnia euertitis, qui meliùs nobis, nobis it consultum. Redij, & acquiesco. nisi quòd lepidissima tua epistola saluam mihi sapiùs mouet, & *περυίξεν* iterum ad vos facit, Amoris & Venerum ita plenos. Osermones nectarei, quos promittis! ô fabulæ! ô epulæ! ô Iunonem tuam mihi non timendam, quam placem nō verbulo vno sed oculo! Nullo Ioue opus ad iram eius leniendam in hunc *Æneam*: qui paratus est satisfacere, & altera tanta scribere aut dicere in viros. Viles mihi, & domi nascuntur tales sermones. Dic illi, saluta, disfluauia. Quid ais? satin? familiariter? non excuso, talis apud te volo esse. Noster *ἀντισμῦς* éstne Antuerpiæ? vbi cumque, ille meus. Imaginem nostram mittam breui: quam sculpi iussimus à Goltzio, qui te amat & multum sapere in isto quoque genere ait non falsò. Amici quidam in Germaniam, & vltra, me vocant: ego delibero, & caueo nequid temerè. * *Ζῶτες δὲ μακρόν ὄλεσθαι ὁπλίζομεν.* Quid ni circumspiciam? vbi que sunt quæ arceant, quæ alliciant: nec ad gustum humana omnia, quamdiu erimus in humanis. Contentus ergò ego meo Catone. Tamen Aufstelli nonnulli nos hîc turbant: sed adhuc occultè: si pergunt, & magis se aperiunt, mihi quoque ad alia consilia viam. Politica dogmata pango, selecta ex antiquis. Minus gloriæ ea scriptio habebit, scio: sed & minus inuidiæ, & fidei plusculum apud eos, quibus homines magni (vt poëta ait) *Propter mille annos.* Valetudo vacillat. sustentamus eam quantum potest, remissionibus, peregrinatiunculis, & præsertim hortuli deliciis. in quo leges ecce meas vide. Nam inserui, vt rideas. Vale.

XIII. Kal. Iul. ∞. IO. LXXXV I. I.

LIPSIÆ.

* *Διὺς
magis felicius
circū
spectatum.*

LIPSIANI HORTI

LEX

IN IP SO ADITV, SVB PERSONA

BIFRONTIS IANI.

B. F.

Quisquis es, ST A, LEGE, PARE.
IANVS, ad hoc limen sic EDICO.

K. I. **H**ORTO. HERO *fructu tibi ins esto:*

Sed illo ad ASPECTVM, isto ad SERMONEM.

Nisi OCVLIS, quidquid heic fatum aut natum, ne LIBATO.

TIRO esto, MANVM apud te habeto.

Sieffers ad TACTVM aut ad RAPTVM:

Verbo dicam, te EFFERTO.

K. II. *Sed nec HERO vsquequaque FRVITOR.*

Ante SEXTAM vespertinam ne ADITO:

Post SEPTIMAM ne MANETO.

Horæ aliæ, ad alias illi curas.

Heic cogitat, heic pangit:

STILVS heic est, Abi MVSCA.

Quid si CAENA? Abi MVSCA.

K. III. *SERMONES etiam ne exlêges.*

LOCARI licet:

NARRARE licet:

ROGARE licet:

Sed nihil SERIVM.

GRATIARVM hic locus est.

K. IV. *Siquid AMOENIVS tamen in STVDIIS,*

Inter AMBVLANDVM

Differe, doce, disce.

Et MV SARVM hic locus est.

S

K. V. Tu

K. V. Tu qui SERIOSVS,

Tu qui RIXOSVS,

EXESTE.

CLVSIVS ego sum vobis.

K. VIA CANIS, præter vnam, EMANETO.

HECVBA, præter vnam, EMANETO.

Habes? hoc etiam.

QVOQVÒ TE AGIS, TE VIDEO.

EPIST. XVI.
THEODORO LEEWIO.

Hagam.

ERGÒ tamdiu te expectamus frustra: non hoc pollicitum, cum nuperrimè istic essemus. Præsta age fidem, imò & amoremi: & veni non quia promissisti solum, sed quia cupis. Certè debes. quid iucundius quàm cum amicis versari, diu non visis, aut vix visis? Nam aspicere & non alloqui, nec videre quidem est: si non fallit ille Sapiens, *Loquere ut te videam*. Verborum satis habes, si vir bonus es qui soles: sin degenerasti, nec preces quidem te adducent. Quibus abstineo, quia amicis summum precandi genus est, Velle. Ego te die Dominicâ expecto vespere in cenâ, cum Dousâ & Hauteno. Hæc, ut iuris prisci verbis utar, summa dies esto. Vale & ambula, aut vehere potiùs. postrid. Kal. nouas. ∞. IC. LXXXVII.

EPIST. XVII.

Biturigas.

IACOBO CUIACIO IC.

DIV filui, sed inuitus. Bella hoc faciunt, quæ viam nobis omnem intercludunt, pænè & vitam. Ego Germaniam meditabar nuper, & tentavi, sed non volente Euentu. Nunc huic epistolæ spem fecit ad transitum Hier. Grosilotius, egregius adolescens, & quod inter laudes eius pono, tui amans. ideò amarus & mihi. Utinam ipsi mihi os illud intueri coram aliquando fas: quod vnum miror hodie (Scaligerum tamen adiungo) in Europâ. Vidi nuper Iuonis in misellum Titium. Perit infelicissimus

mus hominum, hoc vno tamen felix, quod ab illâ manu: tuânc an Scaligeri, an vtriusque? Nam præter vos, fallor, aut nemo sic scribat. Excitastis sanè quosdam, imò non excitastis: quia, certum habeo, immorientur ambitioso illi veterno. *Admonere possum*, aiebat ille olim ab Galbam, *corrigere non possum*: hoc hîc valet. Elogium tuum quo me consecrasti, legi. & ab amore amplector, à iudicio & admiratione (nam & eâ voce vteris) quâ ausim? Debeo tibi, Cuiaci, debeo: & falsa in me dictio, *Beneficia tam diu grata esse donec videantur posse exsolui*. Ego non possum, & quia non possum, vt infani illi amantes, hoc magis volo. Thuanum amo. vbi is est? Scaligerum depereo. quid agit? quid nō agit? vtrumuis enim potest & debet: illud ex voto nostro, hoc pro æuo. Politica nescio quæ ego molior, non à me, sed à priscis. illorum gnomas filo quodam verborum meorum necto, & irriso olim verbo, ferrumino. Vellem quædam de Iunonis filio, qui apud nos: sed differo, ne differat. Ventura enim hæc ad te quis spondet? Vale vir maxime. Lugduni Batauorum postrid. id. Mart. ∞. Id. LXXXVII.

EPIST. XIX.

IANO LERNVTIO.

IMBVISTI me liquore litterarum tuarum suauiter, aridum & iandiu earum sitientem. Reuixi. Tenuosque viuere & valere gaudeo: ego quoque vtrumque, etsi istud mediocriter. Animus me sustentat, & concepta opinio non fore perpes discidium hoc nostrum. Nōne ab Albione spem faciunt albe dex: hîc narrant. Politica etiam nunc me tenent, nescio an cœptum opus bonâ aui, certè lentâ. Pennas suas non habet. quin yellico & carpo eas yndique ex alieno scriptorum corpore: eoque res tardior. Quale futurum opus sit, nec ipse adhuc scio: & tamen auguror, melius quàm laudatius: id est, maioris rei, quàm famę. sed vos iudicabitis. In Senecam poëtam haud pauca notavi: quem legi his diebus, & nimis me cepit. vtique Medea & Thebais: quas supra omnes alias esse, nec eiusdem vatis, mihi certum. Tu quid censes? quid iuuas? nam aut ipsum dare melior, aut ad eum Notas. Idem de Liuiio, in quo nimia nobis bona. Senecam propriè meum, id est Philosophum, præcipuit mihi is, cui ego olim

Tacitum, vt aiebat. Quamquam non tam ille me absterret, quam hic Luterianus Faber, qui politè post illum dedit, & ne quid spei relinquat, pollicetur etiam Pratermissa. De rebus Amici apud Amicum, securus esto. excipio Farum aut Vim. Victoriolo nostro iamne melius? spero. causâ duplici: quia & sedes ei pinguior, & in Autumno iam messis. Reuirescite, me amate, planè planè tuum, & tuum. Propriid. Kal. Septemb. ∞. Id. LXXXVII.

EPIST. XIX.

ÆMILIO ROSENDALIO.

Vix legi tuas, & respondi. Quid ais, aut quid censes? illulisse me? Non is sum, nec qui amo verba, vt ille ait, blandicella. Strictim laudauit te, sed ex animi mei sensu, nec hinc vela te aut excusa. Diis gratia, ego is sum & eò veni, vt saltim iudicare possim de meliore & elegantiore ingenij venâ. Nec tamè feci aut facio, vt te attollam: quin contrâ, promouisse te cense, nō peruenisse. Modestia est, mi Rosendali, & pudor iste ipse quem in te amo, quæ sistere te debent in candidâ illâ Virtutis & Sapientiæ calce. Si ista deserunt, non velis vllis peruenies aut ventis. Pestem hanc video in plerâque iuuentute nostrâ hodie, quæ simul sapere coepit, iam sapit: & vix limen libauit arcana huius domus, putat penetrasse. Tu caue, quod facis: & sponforem me cape felicissimæ tuæ viæ, quem antea in parte ductorem. Seruæ quidem beniuolentiæ meæ hoc symbolum habe. quod tardè ad plerasque litteras & vix respondes: libenter & auidè ad vestrum talium, qui à nobis semel inducti in Viam hanc rectam, calcatis eam constanter pede recto. Pergite, crescite, viuite, in vestrum & patriæ bonum. Fratri vota eadem reddo, quæ mihi. Leida, in hortulo meo, quem cum voles, vide, propriid. Kal. Iul. ∞. Id. LXXXVII.

EPIST. XX.

HADRIANO SARAVIAE.

Certe mihi iucundum fuit litteras tuas, & in iis te, regere ex interuallo. Tamdiu cur filuisti? Scire debes me tui & fuisse, & esse, ex quo semel te noui, peramanter. Collegæ fuimus,

mus, iuncti sermonibus sæpe & consiliis: & ut illa nunc non sint (Deo visum aliter) manebimus tamen iuncti animo, optimâ illâ parte nostri. Dissident quidam à te, qui mihi assident: nihil ad rem. Amare, & iudicare, ego possum: nec probo sanè omnia, quæ fero. Naturâ mitis & lenis sum, ut nosti: nec faciliè me oppono, præsertim sine spe vllâ profectus. Me & mea, quantum possum, compono & curo: publica fateor me numquam tangere, nisi inuitum. Perpetuû hoc mihi iudicium est, nec faciliè vlla. Suada aut Sophia eripient mihi hunc errorem. Stoicos illos, quos sæpe miror, scio hac in parte esse alios: qui in rem eunt, &, ut poëta ait, ciuilibus vndis se merfant. sed mihi ingenium meum dictat aliud, & inprimis valetudo: quorum neutrum suadet mihi trahere hoc iugum. Itaque priuatim amicus esse didici, & fidus amicus: iuuare patriam aut rempublicam, animo & voto possum, vix consilio aut facto. Quod me in ea loca inuitas: vellem, sed valetudo nunc quidem arceat. Videbo quid hæc ætas feret: animus quidem iam diu auct videre pulcherrimam & maximam insularum. Vale.

x. Kal. April. ∞. IO. LXXXVII.

EPIST. XXI.

IOSEPHO SCALIGERO.

ADOLESCENS hic cum ad te iret, mi Scaliger, nefas putauit ut sine meis litteris. Utinam ego cum illo! sed *ἀνευέλπον* hoc votum: ita Gallia vestra, & nostra item, turbat. Quis prudens pedem nunc domo? & tamen ardet mihi animus amplecti te ante fatalem illum diem. Si vlla quietis aura adspirat, certus esto, nos ad te rectâ. Iamdiu ne publicè quidem nos alloqueris. quid tibi factum? Per deum nosce te, & sperne hoc æuum maior hoc æuo. Pungunt aut allatrant? qui? nempe ij qui palum non digni figere præ te in parietem. At nos amamus, miramur, & quicumque fumus *τὸ ἀμείνον* *ἁπλῶς*, facturi hoc æternum, ita amet me ille Æternus. Ad Senecam Tragicum aliquid meditatus sum. habes. nisi ferre gauabitur hic ipse, qui olim ait fuisse tuus: & ut nunc per me sit, rogo. Vale. Lugduni Batavorum. xi. Kalend. Maij. ∞. IO. LXXXVIII.

P. REGEMORTERO S. D.

EPISTOLAE ego tuae *ἀποκρίσειν* respondebo, & quaestiu-
culam libabo quam proponis, sed breuiter & cum Home-
ro *ἑπιπροχάδην*. Quid enim hūc vela pandam? hoc ipsum timi-
dē, quod pedem omnino pono in hanc cymbam. Quæris, an
sapienti fas aut ius consciscere sibi mortem? Olim id disputatum:
nunc decisum. & scis quid hac in re statuāt religionis nostrę leges,
quas improbē sollicitemus. Tamē vis aliquid pro veterum men-
te? distinctē & breuiter. Stoicis adhæream; quibus *αὐτοχειρία* pla-
cuit, sed non *ἀσπείρας* aut semper. Cum necessitas suprema ingruit,
puta atyrāno aut aliā vi violentā, nec mori tibi fas decorē aut ho-
nestē: putant arbitrij nostri esse vitam nostram. Pauculos dies aut
horas quidni præueniam, non metu aut ignauia, sed honesto illo
fine? nō, inquam, vt euadā, sed vt aliā viā vadā. Quid si morbus
etiam vrgeat difficilis, pertinax, & sine spe medicorum? videatur
haud improbum, non diu iactari in hoc mari, & transire cōpen-
dio ad portum. Idem in acerbitate tēporum, & cū omnia mi-
seriarum plena, sine spe allevationis. Atqui durare melius est, in-
quiunt alij: & hoc viri fortis. Non negamus, vbiq; breue ali-
quod malū est, & quod habere possit medicinā: vbi aliter, ō igna-
uiam mori toties & nō mori! *Rebus secundis seruare* nos poēta iu-
bet: sed non per aduersa aduersis. Vt in domo cōducticiā si habi-
tem, nihil peccem si paullūm exeam ante diem pensionis: ita hūc
videtur. sed videtur: & nihil definitio (absit, absit) præter definita
piis sapientibusque viris. In Thrascā nostro locum hunc magni-
ficē tractauimus, & vt viro illo dignum. quem tamen premimus,
quia nimis nos premant iudicia aut voces calumniosi æui. An
iam nunc non pecco, quod hæc *ἀποπρόχια βάλω*? sed apud te vnum,
& ex lege dictā. Scribis ampliū de Galliæ rebus: quę hercules in-
certæ, & nescio an id quoque regnum venerit ad fatalem metam.
Nos quieti per illas turbas: nec præter votum etiam mors illius
Albionij, quem putant parum in nos fuisse æquum. Adolescens
quem mihi commendas, ita erit: & ex vultu ac moribus iudico
merci. Vale. Lugduni Batauorum, i x. Kalend. Febr.

EPI-

EPISTOLA XXIII.

DOMINICO BAUDIO.

DOLOREM tuum quod apud me effundis, gratum: certè apud amicum, & de amico. Collegè illi meo non ego volo, & semper volui? ex animo. nec moror quid maligni suspicentur aut effutiant pro suo more. Deus, ego, res mihi testes: & tempus quædam aperiet quæ nunc latent. Eò dico, quia hæc res ita gesta est, vt me celata omnia sint, & nunc adeò celentur ab iis, qui nihil aliarum rerum me celarunt. Non credunt? esto. hilum non ego deterior, sed nec tristior: qui sto apud iudicem, cui nemo mentitur. Curuæ illè mentes sunt, quæ de me tam curua. At tu Baudi esto quod semper: id est, bonus & volens & equus in eum, qui talis in bonos. Sed de fermunculis parum est, quos nemo par mihi vitauit, nemo maior: res magis ipsa me angit, cui vti-
nam à me medicina. Nec de causâ inquirò, quam tu tangis: vulnus ipsum quî coibit tam grande, tam patens? Auctoritas alterius partis agitur, alterius honor. & scis alioqui quàm lenti cedere isti nostri. Heu multa in hoc æuo quæ publicè, quæ priuatim molesta! illud in primis, quod rebus miscentur, suspicione aut voluntate vulgi, illi ipsi qui extra res omnes se proiciunt animi quodam decreto. Talis ego, nec mentior. sed rarum tamen aliquid in hac vrbe, non solum Scholâ, cui Lipsij nomen non infertur, verò siue falsò. Doufam nostrum ama, excusa, & inter plures scito esse vnum: aut certè ne damna (quod in hac mis-
sione maximè damnatur) inauditâ causâ. Ego cum à diebus aliquot non vidi: & me subtraho, & manum cum Milone haud temerè infero inter hiantes has rimas, quæ (Deus ita faciat) co-
ibunt. nisi, quod ea quæ munus Recturæ & officium amici mihi imponunt, non defero, non deferam, nec cum offensâ. Salue mi Baudi. III. Non. Maij. co. IO. LXXXV. II.

EPIST. XXIV.

Viennam.

CAROLO CLVSIO.

SCRIBERE me ad te, mi Clusi, mirum est: & non ego, non salius quispiam id censuisset, ante menssem. Ipso enim natali
meo

meo XIV. Kal. Nouemb. acris & feruida febris me inuasit; quæ corpus per se haud validum ita duos menses panè afflixit, vt omnium iudicio iam in ipso Fati limine starem. Viuo tamē, clementis dei beneficio palàm — *Σάρατον & κῆρας ἀλύζας*. Meas accepisse te gaudeo, & quæ in Senecam adiunxi. Ea nata mihi subito, nec otium habuisse aut animum plura exemplaria cōferendi, tute facile vides. Gratum mihi quòd Excerpta tui codicis miseris, quæ inspiciam opportunè. Lapidem Ancyranum accepi. & iam antè habebam descriptum à Busbequio: sed tamen gaudeo firmari eius fidem & industriam alterius etiam descriptione. Nam tua hæc, parum aut nihil mutat ab illius. Vtui ea nobis in volumine Antiquitatum Smetij (vbi crebra tui quoque mentio) quod hîc edimus elegantibus typis, nec sine publico, vt speramus, bono. Vnde vos illud nacti? inquies. Dicam quod rideas, Prædones à prædonibus. Milites, inquam, nostri in tumultu hoc Belgico res Marci Laurini diripuerunt, inter eas, hunc Thesaurum. Centurio qui habuit, in Angliam venalem detulit: emerunt illîc Academiæ nostræ (cùm casu pro legatis adessent) Curatores. Ego auctor diuulgandi, & adiutor. Auctarium enim addidi Inscriptionum aliquot, quas Smetius aut non vidit aut omisit. Vtinam tu propior nobis fuisses! nec enim dubito, quin iuuare largiter potuisses, & bonam symbolam conferre ex ære quod peregrè collegisti. At nūc seruum, nam liber lucem iam spectat. Quòd desides, me cruciat: & utinam agere ac peragere tibi fas vtilissimè cœpta! Dacia non miror si te trahit, me quoque, si deus meus pateretur, in primis delectaret ea loca lustrare, quæ trita scio vestigiis Romanis. Quot illîc lapides & monumenta prisca! Lazius me docuit, qui multa adfert, nec adfert: ita exscripsit parum fidè aut curiosè. Nos etiam nunc in spè de Irene. Illa quæ Albioni præfider, legatos missura, imò iam misisse dicitur ad Principem scuti equestris. Tū quid ais? diffidis. Ego illud cogito, *Optare liceat, si potiri nō licet*. Illi viro Vincentio Pinello cū scribes, quæso te, salutem ei à me dicito, ignoto de facie, non de famâ, Amo virum, magnum meritò apud omnes magnos. Idem te rogo de Hier. Mercuriali, quem Felicitas mihi dedit vt coram etiam Romæ nossem. Vale. Postrid. Id. Ianuar. ∞. IO. LXXXVII.

EPI-

EPIST. XXV.

IOHANNI AR CERIO.

LITTERAE tuæ honestissimi amoris indices, mi Arceri, an gratae mihi fuerint ne quære. Gratissimæ. & in iis ἀφελότης illa tua & candor, quem haud minùs quàm doctrinam amo. Pauci hodie tales. & pleræque, quod doleo, πολλοὶ αὐτὴν cū suæ mentes. De morbo meo & eius gravitate nihil vanum audisti. Pænissimè factum (cum Plauto meo loquor) ut irem ad beatos. Sed tamen vivo, imò & dei benignitate meliusculè etiam habeo quàm ante morbum. Quòd autem rogas ut te quoq; in cohortem meam adscribam amicorum, frustra rogas: quia reuera iam adscripsi. Notitia mihi aliqua tecum dudum fuit, & nuper instituta etiam amicitia, idque in sacrâ mensâ: nec violabo, quamdiu me violenta illa dea non violabit. Spondeo. & arram velut pacti huius mitto syntagma nostrum ad Senecam, haud magnæ rei aut molis, in quo tamen (nisi mea me fallunt) non vulgaræ aliquot Notæ. Vale mi Arceri, & vxorem tuam à me meâque saluta. Leidæ. Kalend. ipsis Ianuarij: quas salutes tibi precor & faustas. ∞. IO. LXXXVIII.

EPIST. XXVI.

IOH. GVLIEL. STUCKIO.

QUOD gaudes & gratias mihi agis, Vir Clarissime, pro testimonio quod in Epistolis meis tibi reddidi: ego quoque gaudeo, & si pateris, gratias etiam tibi ago. Quidni pro tantâ & tam rarâ gratitudine? præsertim quam elicit beneficium à me nullum. Quid enim mi Stucki in te contuli? paucorum verborum testimonium, doctrinæ & industriæ tuæ ita debitum, ut non qui dixerit benignus existimetur, sed qui tacuerit, malignus. Abest autem à me hoc vitium, & absit in omne ævum. Candidum mihi valdè ingenium fateor, & quod alias virtutes siue dotes videt facilè, & visas amplectitur atque amat. Hæc mihi causâ eius elogij, à naturâ meâ profecta: nec magis de te demerendo cogitavi, quàm sol ille cū nobis lucet. Tamen hoc quoque laudibus tuis nunc accedito, quòd non solum doctus,

T

probus

probus(hoc sciuiimus,)sed etiam mirificè gratus esses. quod nunc disco, & eò magis exemplum exosculor, quò rarius in hoc æuo. Passim ambitio, infidia, detractio, & commune paruis magnisq; ingeniis vitium ingratitude. A veteribus haurimus cottidie quæ scribimus: quotusquisque fatetur aut meminit? A nouis multa subducimus: & dissimulamus callidi, quasi hoc vno magni, si nemo præter nos magnus. Sed quod mimis, hoc istis sæpe euenit: & vestis iis sæpe detrahitur in publico hoc theatro. Sed quorsum ista? vt producam, & paullisper tecum fabuler: quem æstimatum mihi antea, certum est iam dehinc amare. Tu me quoque Vir clarissime; & salue. XI. Kal. Sept. ∞. IO. XC.

EPIST. XXVII.

ABRAHAMO MYLIO.

LITTERAE tuæ quomodo mihi non gratæ? Adfectus in iis vndique elucet: sed vereor, vt adfectus. pro scriptis meis & pro famâ pugnas: sed rem audi, amanter magis quàm prudenter. Quid enim acri hoc amore tibi vis? probare me aut mea iis qui non probant? frustra. & hoc est quasi cibum aliquem conciliare illis, qui abhorrent. Vt palati inclinationes quædam sunt, quas haud mutes: sic iudicij. nec in probando minùs differimus, quàm in agendo. Vt hæream in hac stili lineâ: age, quis inter veteres & inter nouos, eâdem ratione scripsit, aut scribit? Similes fortasse aliquos reperies, & id ægrè: nullos pares. Natura in corporibus raro hoc commenta est, vt vel ab eâdem parente fætus assimilent: vis tu à diuersissimis ingeniis stilum? Quòd si ille variat: necessum est & iudicia. quia quisque optima assequi, aut certè sequi se, censet. A fonte ingenij interno, Myli, ista sunt: & diffusa oratio, stricta; læta, seuera; quemq; delectat aut indelectat, vt quisque est talis. Hinc nationes olim totæ diffederunt de optimo genere dicendi: & nosti oratores Atticos, Asiaticos, Rhodios: quid miraris homines singulos? quid hoc æuo? cum imperitissimus quisq; audacissimus, & iudicij hunc calculû sibi sumit quilibet è litterariâ plebe. De eloquentiâ iudicant, qui non dicam cuius coloris illa sit nesciunt, sed vix Latinâ linguâ. Itaque Myli non tu, non ego, his sermonibus moueamur: & de Apellæis istis lineis Protogenes aliquis

aliquis iudicet, non qui auersi ab hac arte aut Musâ. At Critica nostra non effugiunt etiam κρίσις. Gaudeo, & ideò scripsi. Præter naturam cuiquam hoc videatur, at non meam: qui tam libenter iudicor, quàm iudico ipse. Cur in tam libero scribendi genere non liber cuique sensus, dissensus, imò & lingua sit? Lior modò absit & malignitas, quam odisse me, cum Homero, fateor

— * ὁμῶς αἰδῶο πύλῃσι.

Sed in eo suaves, quòd Orationes me negant scribere. Vellem dixissent, edere: agnoscerem, & causam darem cur laudem non quæram in hac arenâ. De scriptione quis abnuet, qui vel puerum me nouit? Iactantiam omittamus, sed audi simpliciter. hæc palæstra mea vetus est, hoc studium quòd vsus me duxit & natura. Vix duodecennis orationes scripsi, habui: pueriles scilicet: sed quas grauior etiam ætas laudaret in illâ ætate. Nec destiti postea: & credo me specimen etiam dedisse in Batauo hoc solo. Improbulum aliquid addam. si studium istud eloquentiæ aperuisset mihi mos mei æui, decurrere id ausus essem cū nonnemine priscei. Nec verbū vltra addo. erubui. Tu vale. Lugd. nostræ, Kal. Iuniis.

* ἀγνὸς ὅτι
Ὀρί πο-
τας.

EPIST. XXVIII. *Coloniæ Vbiorum.*

CHRISTOPHORO PLANTINO S. P.

IN curâ de te fuimus, mi Plantine, ob tempestatem quæ præter anni tempus sub discessum tuum exorta. Venti quidem prosperi, sed violenti, grandes. deus faxit, vt breui audiamus fuisse, sine tuâ noxâ. Imbecillitas etiam corpusculi tui nos torquebat, timentes vt parum esses ferendæ agitationi inter vndas. Solatur me vnice tuus animus, magnus ille semper, & se maior, vbi discrimen. Apud te, vt volumus: apud me, vt possumus. Nam morbus meus non deserit etiam hanc materiem, & ignis ille interior in eâ lentè ardet. Sustentamus tamen, & corpore atque animo repugnamus. Typographia bono loco. operæ modestæ. nos Tranquillum daturi videmur cis paucos dies. Nam de Thraseâ (etsi bona pars iam parata) tardamus, offensusiuncularum quarundam metu. etsi non negamus multa iis inesse, quæ non ad famam meam magis, quàm ad publicum bonum. Videbimus porrò, & statuemus. Franciscus tuo-meus rediit ante biduum, mihi quidem valde

T 2

gratus.

gratus. Litteræ quas ad me teque adfert, testimonium de ingenio & moribus habent valde honestum. Qui hæc dedit, seruet quæso augeatque. Sed eo quid fieri vis? hîc habes, an euocas ad te? Si hîc: dabimus operam ne otio abutatur, & ut id locet in studiis benè cœptis. Si illuc traducis: (nec id fortasse, ut tempora sunt, abs re) tua hæc cura, ut collocetur apud eos qui iuuentutem benè & peritè formant. Scis quid in sermone suaserim. Plura hîc non innouata à tuo discessu, qui nunc me sanè mordet. Ludouico Persio amico nostro & M. Varroni, item Ximenio, Metello Sequano à me officiosam salutem nunciato. De rebus tuis & consiliis exspecto auidè. Vale ego alter. Lugduni Bat. iv. Kal. Septemb.

EPIST. XXIX.

Lutetiam.

THEODORO MARCILIO.

CLARVM insigne beniuolentiæ in me edis, Marcili, litteris vltro & tam amanter ad me scriptis. Quæ ita gratæ mihi sunt, ut velim omnia quæ publicè scribo. Nam quod tu me ames, æstimes, quâ non amem? Ingenij tui factus vidi, noui eos qui te nôrunt: in illis omnia erudita, bona legi, & ab istis audiui. Hęc de te *παύει με, ἀλλὰ μάλα πικρῶς*. — Nam in me, vereor ut tu & tua Gallia parum veri. Ab amore vel ab humanitate effusæ illæ laudes sunt: quorum ille in te nuper natus, hæc à veteri æuo insita præter omnes gentes huic genti. Error iste est, error: sed amicus, & nescio quo modo sapientissimo cuique etiam gratus. De tuâ meaque patriâ quæ auguraris, vtinam ne tam certa! lætamur, imò mergimur, nisi quid adiuuat supera illa manus. Arcturus tuus turbat, & rex quispiam etiam ab Arcto: qui clauso freto, minatus nobis nuper miserrimam omnium mortem, Famem. Quid censeas? nisi in totâ Europâ, sed non sine sonitu, inuerti orbem hunc rerum. Id ego video & fero: non solùm præceptis ab arcanioribus libris firmatus, sed malorum vsu ipso, qui in animo isto genuit callum. Valetudo nostra anceps, propior tamen bonæ, qualem tibi longum, longum, mi amice Marcili, (is mihi deinceps eris) opto. Lug. Bat. iv. Kal. Iun. ∞. I. LXXXVII.

EPIST.

EPIST. XXX.

PAVLO MELISSO S. D.

CERTE postremae tuae mihi tradita, una cum Exsequialibus quae fecistis pie & legitime Principi Anhaltino. Tot aliis tuis quid factum? illud, quod non insolens hoc aëro, abiectae credo aut interceptae. At carmina illa vestra me recrearunt, tua imprimis, sanè docta: sed & F. Iunij, quem ego nesciebam harum etiam esse Musarum. Ille autem est in primo choro. Stenius etiam vester adprobatus. Quid dicam? Aonij illic montes, & nisi Doufa vnus veter, nobis luridæ, imò Stygiæ paludes. Quidni sic appellem, per funesta hæc bella? Nos tamen obduramus, colimus, & vi quadam retinemus abiturientes illas Diuas. Iustitia minatur: cuius (hoc quidem loco) præses, abijt & deferit Donellus. non sponte: missus enim est à Scholarchis, causis quas non dicam. Sed de Pronunciatione etiãne vidisti? gaudeo. magis, si apertè mentem explicares, & aut consensum in eâ re mecum aut dissensum. Nam nunc quæ loqueris, merae mihi ambages. Hortensius non sum, nec Sphingem accepi, quæ adiutet. De poematis Bargæi monui Plantinianos. aiunt se misisse, & in vasis inclusa, quæ sunt nunc (esse certè debent) Francofurti. Baronem Serotinum vidi, stellam, verbo dicam, Germaniæ vestrae. Iani Gulielmij poemata, premis, an edis? Neutrū suadeo, quia incertum mihi an pro ceterâ eius famâ. tu dispice, & tui amantes nos ama. Lugd. Bat. Kalend. Iuniis, ∞. IO. LXXXVII. V. Nob. Othonem Grynradium salutes à me velim.

EPIST. XXXI.

IOSIAE MERCERO.

LISLAEVS apud nos fuit: cur non una tu? Bella occasio erat: quam vereor ut nunc amissam, frustra postea requiras. Atqui, cum illic sis, Bataviam te nostram & in eâ Lipsium non videre, dedecus sit nostrum mi Mercere, me coniungo. Non enim tanti ego tibi? Nec crede hanc esse — * *δολεχὴν ὁδὸν ἀργαλίην τοῦ* * *longam viam asperam*
diei vnus res est, cum leuiter fauet ventus. Sed, spero, emendabis. Nostra ad Senecam Tragicum iam mitto. quid censes? & an

T 3

non

* cæci cor
habet ple-
taque ho-
minū tur-
ba.
* eximè
* veneratio
me habet.
* stupor.

non mecum facis in iudicio illo quod de scriptoribus feci? Nam
* τυφλὸν ἔχει ἡτορ ὁμιλῶν ἀνδρῶν ὁ πλεῖς, ait Pindarus: non etiam tu.
Profectò si consideras, Thebais illa, Thebais, * ἐξαίρετως pulchra
est: & quoties lego, * σέβας μ' ἔχει, vel potius * ἄλῃ. Nemo vatū
visus mihi tam altè, & tam feliciter, volasse. Iuonis Villiomari in
Titium ante paucos dies vidimus. Nescio an recens lectio me ita
ceperit; sed non videor scriptum bellius legisse à multis annis.
Non decima illa Musa Plautus possit aliquid magis Musæum.
Sed dic sodes, quis scriptor? Non enim ille falsus Iuo.

* Mentiar,
an verum
dicam in-
bet me ani-
mus.

* Ψεύδομαι, ἢ ἔτυμον ἔρέω. κέλετ' δέ με θυμός.

Scaliger noster est, lumen illud & columen litterarum. Non di-
uinaui? Quæ tamen ibi correctio inter basilicas videtur.

Discit ab hirsuto iaculum torquere Capellâ,
nondum mihi proba. Nos aliò longè ducimus Iuuenalis eos ver-
sus. Sed hæc talia (deus faciat) aliquando coram. De patriâ, valdè
πῶς μὲν, mi Mercere, noster hic status. Mihi parum certum est
hîc manere, imò certum non manere si hæc manent. Turbones
nimis multi: vti nam vnus aliquis, qui sub Hadriano! Sed tu vale,
& nos ama. Lugduni x. Kal. Octobr. ∞. Iō. LXXXVII.

EPIST. XXXII.

Basileans.

I A N O. D V Y S T I O.

SI vlla res me delectat, mi Duysti; ea est cum vos tales video;
qui me audistis. Amantes mei, æstimantes: suprâ quàm me-
ritum fortasse est: at non suprâ quàm vos decet. Tu inter eos in-
signiter gratus: cuius beniuolentiæ in me, iudicij apud omnes de
me, clara in litteris tuis video signa. Perge verò, amare inquam
non tam me quàm ea quæ censet in me, Virtutem & Doctrinam:
quæ te clarum aliquando efficient, & mihi certè effecerunt iam-
diu carum. Studium tuum cognoscendi & compellendi illustres
viros, laudo: & pudorem in omni re ama, non in istâ. Hic fructus
inter alios peregrinationis tuæ sit, vidisse illa lumina, quæ co-
gitatione ipsâ te illustrent, excitent ad sui imitationem. Rui-
næ & monumenta veterum heroū nos commouent aspectu:
quidni istæ viuæ imagines virtutum? Itaq; quòd Italiam etiam ex
Germaniâ cogitas, approbo: cum cautione tamen illâ quam
olim.

olim Lanoyo meo (nam Epistolas meas video te vidisse) provide præiui. Non repeto. Hoc tantum Varronis inclamo, CAVE CAVE CANEM. Multi in animo, nonnulli in corpore adinorfi, æternum dolorem retulerunt è pulcherrimâ illâ terrarum. Tu me capis: audi tantum, imò ausculta. Patauij si Hier. Mercurialem Clarissimū Medicum, imò eui nostri primarium, si inquam vides: à me saluta, & dic ad suauissimam eius epistolam respondisse. O vñam anni & vires mihi quæ olim! profectò lustrarem amata mihi loca, & amplecterer viros quorum nomen me recreat & diffundit. Sed coërceo exsiliensem animum: te rogo, vti in meis quem ostendis, certus à Lipsio eadem tibi fore. Lugd. Batavorum, Kalendis Iuniis. ∞. ID. LXXXVII.

EPIST. XXXIII.

DIONYSIO GOTHOFREDO.

BREDERODIVS noster, dum ad vos iter affectat, desiderium & memoriam mihi excitauit tui. Merito te amo, qui iam dudum me: & id ostendisti non vno signo. Scripta tua, quæ in publicum elaborasti; nobis grata, tibi honesta. & in similibus edendis vt perseueres, te hortor. Vides languescere Galliam tuam, & ponere paullatim ardorem illum discendi, docendi, scribendi. Vos pauci è subsidio adeste. Malum illum deum & βροτανοῦ abisse à vobis, gaudeo: vtinam & λυβός! quod, vt hæc tempestas anni est, spero. Nos pessum imus: aut valde fallor: nec sustentat scirpea illa, quam induximus, ratis. Fraudes, inscitia, calor, quid non corrumpunt? Fuit apud nos nuper Paulus Stephanus Hen. F. mitis animi adolescens. quod velim patri nuncies, & à me salutes. imprimis autem Casaubonum, eiusdem, vt audio, generum, cuius ingenio & crescenti famæ valde faueo. Placent nimis scripta eius quæ vidi. Cetera à Brederodio nostro audies: quem vt commend tibi, à se commendatum, non laboro. Tamen vno verbo id facio, sed seriò prorsus. Vale V. C. & me ama. Lugduni Bat. Idib. Sextilib. ∞. ID. LXXXVII.

EPI-

FRANCISCO RAPHELENGIO *Filio.*

Si paullo tardius, mi Raphelengi, ad litteras tuas respondeo, non miraberis, si me & te videbis. Me: qui ita cottidie interpellor & occupor, ut omne tempus sermonibus aut colloquiis penè dandum sit, exiguum aliquod meditationi aut stilo supersit. Te: qui ipse in hoc largo otio, in flore ingenij, aut spissò ad nos scribis aut files. Et tamen scito affici nos tuis litteris, & hærere in istis medullis semel conceptum tui amorem. Postremæ tuæ me recrearunt. in quibus omnia beniuola in nos (de quo numquam dubitavi: nec aliter tibi facere fas est) & de te ipso plena bonæ spei. Vitia vides mollioris illius præsertim & residis animi: quem utinam, utinam, semel excites & erigas, mi adolescens, non tam citò relapsurum. Contemni à te humana, gaudeo. quæ me quidem auctore pedibus etiam trahe: sed ita ut cõtemtus iste ab alto quodam animo sit, nō qui ipse se contemnat. Pars illa ætherea in te viuat & vigeat: cetera illi seruiant, sed non ut cum illis ipsa. Hoc modestiam aut sapientiam censes, iacere? nihil agere? ad nullum vitæ genus collineare? Ignauia est, magnorum etiam sæpe ingeniorum pestis. *Subit enim, ut ille inquit, inertia ipsius quadam dulcedo, & inuisa primò desidia postremò amatur.* Ut lignum occultatere do consumit: sic animum delinat paulatim & exedit ignauus hic affectus. Homo es, è duplici materie, cælesti & terrenâ. ad duo etiam natus, cælum & terram. Illud in primis: sed nec hæc negligenda est, quamdiu es in istâ. Id est, famam, opes, amicos, doctrinam, hæc omnia modicè parare debes, quæ magna esse vides apud homines magnos. Ad vanam & validam ambitionem non te voco: ad media tantum illa: quæ vsum sui varium præbere nata sunt, bonum bonis, malum malis. Per hunc omnium rerum immodicum contentum, vide ne in contemptum veniat vita ipsa. Tempora me dant in languorem, inquires. quid tempora? tu semel statue quis esse debeas, illuc cogitationes actionesque dirige: cetera eo loco habe, quo tempestates aut ventos. Munies te contra illa, ut poteris: neminem contumaciâ aut loquentiâ irritabis: cetera permittes illi, qui tempora & temporum dominos regit. Rarò allisa navis est, quæ modico velo legitur. Eminentia feriunt

feriunt procellæ. Hæc cogita : & illud inprimis , vt attemperes te ad consilia aui tui siue iussa. Quis illo tui amantior? quis vsu rerum peritior? nec puta prudentiam omnem à litterulis manare aut nescio quâ hac doctrinâ. Telum ea & adiumentum acre, fateor: sed non sola.

Tua in Senecam mihi proba sunt. quid si aliud tale in alium oratorem, siue poëtam? Elige. Quæ conferre cœpisti cum Ortelij nostri libro in altero Senecâ, video non mala esse: cupio vt perseueres, & vt quemque librum absolueris, ad me mittas. Ego his diebus Controuersias contuli, & repperi haud pauca Censoribus non visâ nec Romanis nec Gallicanis. Res nostræ fluctuant, & turbat vicinum mare: nos illi (Deo hoc debemus) qui solemus, inconcussi. Vale mi Raphelengi, & si me amas, te ama. Lugduni Batauor. propriid. Kalend. Septemb. ∞. IO. LXXXIIX.

EPIST. XXXV.

Marpurgum.

NICODEMO FRISCHLINO.

SEROTINAE tuæ ad me litteræ, tamen gratæ: vel quia tam samanter ad amadum prouocas, vel quia communicas iis rebus quæ in Germaniâ geruntur. Quam terram velut alteram parentem (origine enim nos Belgæ inde) iure diligo, atque eo magis quod benigna ea nutrix mihi per aliquot annos. Statueram regustare liquores eius, & in itinere medio fui: reppulit me aduersantis Fortunæ velut ventus. Ergo nunc iterum in aquosâ Bataviâ meâ, mihi tamen carâ, quia carus ego illi. Cum Crusio tua liticula nonnihil me cruciat. nollem in hac paucitate eruditorum eos inter se — * ἀντιβόισι μαχέσασθαι ἐπ' ἐκαστῷ. Sed tamen, liberè dicam, etsi ætate ille grandior; tu mihi in hoc certamine Achilles, ille Troilus videtur. Plus virium in tuâ hastâ, imò & causâ: si tamen eam per calorem & immodestiam (quod spero longè à te esse) non corrumpis. Ego miror homines esse qui plus Grammaticorum præceptis tribuant, quàm illis per quos Grammatici viuunt. Mihi probum & rectum est, quicquid proba & prisca illa ætas scripsit, etsi Grammaticorum omni cohorti aut non lectum aut neglectum. Tamen Crusiana illa nondum vidi, & ideo

* aduersis
sermonibus
depugnare.

iure amplio, ne audiam illud, *μὴ δὲ δίσκω*. Te amo, & saluere iubeo, & crebrò terere hoc litterarum iter. Agere te Marpurgi gaudeo, apud Principem, qui sapientiâ Germaniæ princeps. Vale. Lugduni Batauor. vii. Non. Ianuar. ∞. Iō. LXXXVII. stilo nostrate.

E P I S T. XXXVI.

FRANC. NANSIO V. Cl.

SALVE mi Nansi. en habes Nonnum tuum, quem remitto Slectum à me cum voluptate. Ipse poëta mirificus (vt res quidem illa & versio patitur) & tu Cenfor, in eo emendando. At defectus quos in eo supples, iam non defectus: cum tam felici & pari venâ carmina addideris tua, nec tua. Nonnum enim totum spirant, quem concoxisti. Perge, & ede. ego suadeo: quem scire debes tui amantem esse. Prid Kal. Iunij. ∞. Iō. LXXXVI.

E P I S T. XXXVII.

ABRAHAMO ORTELIO.

THESAURVM abs te, mi Orteli, vidi & in parte legi: verè Thesaurum. Condita in eo habes, quicquid Græcia aut Latium habuit, in eâ quidem argumenti parte. Placet materies, ordo, industria: illa vtilissima, iste facillimus, hæc summa. Iam præloquia illa & velut lumen operis, quid? bona. Bochij vestri & Vackheri versus laudabiles: quos ex vngue illo viros puto, & gratulor vestræ vrbi. Quæ iamne respirat? Diu fauces vobis premit atra & famelica illa Diua: quam pellet, nisi fallor, nata mox copia pleno cornu. Deus faxit: ciues enim certè amamus, & quicquid Belgarum est, longè ab odio quod factio gignit. Byzantina Imperatrix (Irenen dico) quando ad nos? heu, tardè. nec viam video: nisi quia Deo, cum volet, * *ἀπὸ τοῦ ἀποεῖν, ἀποεῖπον*. Cratonem medicum abiisse audio, & doleo. amavit me vir, ego illum. At nos manemus, in extremâ velut Vitæ lineâ stantes, & animo duntaxat, non corpore, fortes. Politica nostra pergunt, sed, vt familiaris poëta meus loquitur, testudineum gradum. Ita sæpe interpellamur, ab amicis, à munere quod sustineo, à morbis. Fero omnia, & te in pectore æternum. Vale. Prid. Non. Iulias. ∞. Iō. LXXXVII.

* omne in-
uicem, por-
num.

EPIST.

EPIST. XXXVIII.

Erfordiam.

MATTHAEO DRESSERO.

ETIAMNE ex diffitis illis locis aura ad me beniuolentiæ?
 etiam. & spirat ea suauiter in tuis litteris, quas ante paucos
 dies accepi amoris & honesti iudicij plenas. Vtroque gaudeo, etsi
 illo magis quàm isto: quia riuus hic ab eo fonte. multum me esti-
 mas, quia multum amas. Et verò iam pridem inter nos cognoui-
 mus; cùm in Germaniâ vestrà aliquamdiu Ienæ agerem, & ad
 meliores artes præirem iuuentuti. Tunc (memoriâ teneo) coitum
 inter nos fœdus amicitiae, non nisi nobiscum moritura. Perseue-
 ra: ego de me hunc affectum tibi spòdeo *εἰς αἰῶνας*. Quem vrinam
 tempora & res nostræ ferrent, vt aut præsentis, aut certè vicini
 magis ostenderemus! fruerer te non solùm cogitatione, sed etiam
 possessione, & manum iniicerem in ceruices tam amicas. Fata
 negant. nec aliud relinquitur, quàm arcta & arcana illa animo-
 rum coniunctio: quam magis magisque ligemus per epistola-
 rum hæc vincla. Verba ista sunt, fateor: sed * *ὅτι βέλτερος ἔστιν, & * à profun-*
 re comprobanda cùm res se dabit. Salue Vir. eruditissime. Lug-
 duni Batauorum.

EPIST. XXXIX.

Patansium.

EVER. POLLIONI.

ITALIANE te tenet? præter opinionem meam, fateor: & ta-
 men gaudeo. Quî non amem illum locû, in quo iucundissimè
 viximus ipsi olim? qui ante nos, sedes tot illustrium animarum?
 Sanè amo, & si adire aut peregrinari in eo dissuadeam, repugnem
 interiori meæ menti. Tamen tardè nec libenter concessi hoc tibi.
 quid mirare, si timidus amor est? si iusta etiam mihi causâ timo-
 ris? eò magis quia gentem & loca illa penitiùs paullò introspexi.
 Ad Lanoyum quæ scripserim, legisti: crede non scripta ea animi
 causâ. Mare, mare, nauigas, & id scopulosum: caue ne obhæreat
 alibi ista ratis. Cautè inter captatores homines ambula, te cela,
 linguam preme, omnia proba etsi non probas. Certamen aut dis-
 sensus omnino tibi cauenda, & vt feliciter hospitem agas, age
 seruum. Iactantia aut libertas nobis seruentur. nobis etiam omnis

V 2

tuus

tuus amor castus, purus, & nequid delibent ex eo obscenæ illæ aues. Quantumvis formâ aut plumis blandiantur, ah fuge; aut potius pugna, quod dicitur, *ωρελ κρεων*. Reuera de illis agitur. Præsidium tu in motu ponis, & quod nusquam, ut ais, figes pedem. malo ut nusquam oculum, inprimis ne animum: & ut ille semper munitus sit in eiusmodi occurfus aut aspectus. Hoc tamen suadeo, ut vidisse Italiam satis habeas, hoc quidem tempore: non placeat tibi pernouisse eam aut infedisse. Viros magnos regio fert, scio: sed sepositos aut subductos. & ut prompti sint, vix per illa discrimina adeundos. Minus mihi sape, & diutius viue. Quibus nunc velim te innotescere, paucos noui. Anni octodecim sunt, cum Italiam ego reliqui: & qui tunc vigeabant, plerosque ex iis reliquit vita. Ad Hier. Mercurialem litteras tamen dedi: virum probum, candidum, illustri doctrinâ & famâ. Bononiæ, opinor, nunc reperies. Romæ est Fuluius Ursinus, cui salus à me fortasse tibi dederit Admissionem. Est ibidem Latinus Latinius, si tamen viuit, probissimus senum quos ego noui, & omni litteraturâ instructus. Eum quoque à me saluta. Reliqui è grandibus sunt, ad quos te non mitto: qui rem, ut opinor, quæris, non splendorem. Quod superest, Deum, ut Comici verbo utar, animitus rogo, cautam circumspectamque mentem tibi det, & auidam ad tuos redeundi. Wiltzium meum, si illic est, à me saluta. à quo iam pridem nihil audire me. sed cohibeo. Tu vale. Postrid. Kalend. Septembr. ∞. I. LXXXIIX.

EPIST. XL.

PETRO ALOSTANO.

DOSA meus ad vos venit, & est in quo operâ tuâ ei opus: quam ut benignè, & ut ingenium tuum est, comiter illi exhibeas, te rogo. Resp. nostra quo loco sit, vides: & quò perduxerint nos acerba quorundam consilia, nec percocta satis ad Prudentiæ solem. Hinc imminites isti fructus, quos ciues illi vestri nunquam gustarunt, te regente. Utinam & nunc (tibi hoc, nec tuâ causâ dicam) eiusmodi aliquot ingenia nobis ad clauum! facile sedarent hi fluctus. Nisi sit, mergimur, mi Alostane, mergimur. Deus iuuat, & te Vir Clariss. feruet. Postrid. Kalend. April. ∞. I. LXXXVII.

EPIST.

EPIST. XLI.

Burdigalam.

MICHAELI MONTANO.

SCRIPSI ad te ante menses. & ut tempora hæc sunt, suspicor nō vanè, parum rectè eas litteras, certè parum feliciter, datas. Nam nec ab eo cui tuas Lutetiam curaueram, respondi quidquam accepi. Itaque iterò scriptionem. non quia tuâ magni interest, sed quia meâ, scire te & accepisse me humanissimas tuas litteras, & eo quidem animo quo à tali viro merebantur. Non blandiamur inter nos. ego te talem censeo, qualem publicè descripsi vno verbo. Inter septem illos te referam, aut si quid sapientius illis septem. Nam externa & polita ista doctrinarum, sermonis & linguarum ad fastum & fastidium vsque scientiam (audi intimum meum sensum) sperno ego valdè, nisi cum prudentiâ quadam & recti iudicii normâ coniuncta dirigantur ad vsum vitæ. Ea duo postrema in te esse vidi, & illa non deesse. Nos in Politicis aliquid meditabamur, desumptum ex veterum agro: & iam pars non scripta solum, sed tradita typis. tamen differo, & sustineo me temporum horum adspectu. Ego enim, ut pericula quæ obueniunt, non timeo aut vito; ita non temerè ea prouoco aut arcesso. Scio autem quàm facilè vel in optimis consiliis peccetur, & quo quod impetu, non consilio fertur. Intereà in Senecam Tragicum aliquid Criticum dedi: quem scriptorem, vel ob nomen, scio & te amare. Nunc edo *Curas* meas *secundas* (ita appello) in Tacitum. Quid faciam? aliquâ fallendum hoc otium est, si non salubri, certè non inutili occupatione. Tu vir magne ecquid agas, & in primis ecquid valeas in Regni vestri morbo, fac me tui amantem scitorem. Lugd. Bat. xvii. Kal. Maias. ∞. Id. lxxxix.

EPIST. XLII.

THEODORO BERNARDI S. D.

BENE habet, mi Theodore. de Amico illo nostro extra metum fumus, inò extra suspensionem. Ille viuit (ex litteris eius mihi constat) & viuet, ut spero, in multos annos. Heu dolorem meum, si aliter! Variis virtutibus amorem nostrum meretur, & certè amore. Quod quæris à me de Appellais illis lineis, verâsne

V 3

cas

cas censeam, & quales? ad prius respondeo, veras. nec fas ambigere, nisi si fidem spernimus historiae omnis priscae. Ad alterum nunc fileo: & censeo ut prius ab Amico illo nostro quæras, cuius ingenium grande & capax, diffusum per has quoque artes. Mirificus ille vir est, & quem Homeri verbis iure appelles

* prudentem, variâ mente præditum.

— * δαίφρονα, ποικιλομήτην. Ego coram aliquid tecum. quem decretum mihi visere ineunte hoc Vere, atque unâ cum Henrico Spiegelio meo amplecti. Amo utrumque: uterque me amate. Lugduni Bat. Prid. Kalend. Mart.

EPIST. XLIII.

THEODORO LEEWIO.

GAVDEO & gratulor (hinc enim primum ordiar) quod iterum te dedisti in iucunda hæc nuptiarum vincla. Deum queso, uti felix tibi ea res & salutaris sit: id est, matrimonium concors. Nam in eo voto, includi censeam reliqua vota. De quo mihi magna spes est, quod eam non ex dote legisti, sed ex naturâ, & ex ipsâ. Sic decuit (quidquid vulgus hîc dicet): & equam emere, non fellam aut strata. De rep. nostrâ nec ex tuis litteris mihi magna spes est, nec ex rumoribus vulgi. Si utrimque pertendunt, quis exitus? Cedere altera pars debeat, aut potius utraque, & sic coire in arcum & amicum foedus. Amentia hostis in latere, & tantum non ad portas Annibal: & nos litigamus? Atque hæc per eos eveniunt, qui sententiæ suæ tenaces, iudicia omnia & consilia spernunt aliorum. qui quam viam semel ingressi sunt, nec omitunt etiam in errore manifesto. Pestis iam olim huius & plurium rerum publicarum: nec facile excutienda, si aut ipsa potens, aut obsedit potentes. Felices illi Principes, quibus electio & iudicium est hominum, quibus fidant & credant. Interea quocumque loco nostræ res: nos, mi Leeui, nostro maneamus, id est, inconcusso illo & firmitate. A deo & à fato eius pendeamus, certi subire fortem omnem quam ille dabit patienti ceruice. Calcitriones isti & refractarii equi, hoc consequuntur, ut verbera etiam aliquot excipiant, nec excutiant tamen iugum. Omnino lenius omne malum fit, leniter ferendo. Qui interpretando auget, qui velut scalpit suum vlcus: facit, quod qui onus ad onus sibi addunt. Ego tecum

tecum sentio. standum in hac acie, & sine fugæ ullâ cogitatione, vincendum aut cadendum. sic tamen, quamdiu palam aliter non suadebit ille Imperator. Lugduni Batauor. XI. Kal. Octob. ∞. ID. LXXXVII.

EPIST. XLIV.

IANO DOVSAE Filio.

SCALIGERVM patrem, quem sæpè tibi laudo, mi Doufa, Sipsum hîc vide. Quis depinxit? quo nemo melius aut verius potuit, se ipse. Quando? cum fallere ei minimè libitum, paucis diebus ante summum diem. Heu, heu, quis ille vir! pænè ausim dicere,

— * σοφίην μὲν ἀνθρώποις ἀθανάτοισι.

Tres sunt quos admirari vnicè soleo, & qui in hominibus excessisse mihi humanum fastigium videntur, Homerus, Hippocrates, Aristoteles: sed addo hunc quartum, qui natus in miraculum & gloriam nostri ævi. Scripta docent (etsi bona, imò optima, eorum pars periit:) tum hæc Epistola. quam tu mi Doufa, quantum potest, lege, describe, remitte. Nam Pici non ita aurum suum custodiunt, ut ego hunc thesaurum.

* sapientiâ
similis diis
immortalibus.

EPIST. XLV.

IOS. SCALIGER IVLI CAESARIS F.

Francisco Vertuniano S.

INCIDI in Epistolam Patris mei, quam ultimam prudentissimus Senex dictavit. Agnosces, puto, manum meam. eam ille dictavit inuitissimus. hoc est, rogatu Paschaly illius qui se historici Regy non tam munere quam nomine venditabat. Quod nisi te ex Epistolâ ipsâ cognoscere mallet, pluribus tibi explicassem. Hoc vetabat ingenuus pudor: sed officium scribendi expressit importuna hominis loquacitas. Quare, quum te videam studiosum Scaligeri nominis, non dubitavi te hanc Epistolam non solum in deliciis sed etiam in miraculi parte habiturum. Adde quod eam in parte officij te habere volo, quod ad me pertinere putem te nihil ignorare eorum, quæ ad amicitiam nostram aut augendam aut conservandam spectare videbuntur. Quum Epistolam eam descripseris, remittito. Nam non tantum meâ, sed etiam omnium bonorum interest, eam non perire. Vale, ac me ama. Ultimam nostrum saluta. Abenri. pro prid. Kal. Iun.

EPIST.

IVL. SCALIGER FERRERIO S.

QUOD tuis elegantissimis litteris non responderim, multas affer-
 re causas possum, sed omnes quidem præter meas occupationes.
 Nam quemadmodum iucundissima mihi fuit salutatio tua, ita nihil mihi
 prius esse oportet, quàm ut omnibus ommissis ostendam diligenter & mihi
 fuisse honori, & dandam esse operam ut mutuis officiis eliciam frequen-
 tiorem. Ceterum ad hanc usque diem nemo se obtulit nobis, qui isthuc iter
 faceret, nisi Quæstorum magistri, quorum tanta est superbia, ut præ se
 contentis cæteris omnibus panè regnent. Podius verò noster panè prius
 abiit quàm accessit. Atque nunc etiam ita scribo, non qui habeam quidem,
 sed ut ne mihi desim, si fortè quopiam meliore fato nactus fuero nuntium
 aliquem opportunum. Scriptionis verò meæ summa in eo potissimum ver-
 satur, ut quammaximas possim gratias agam viro de nostro sæculo bene
 merito Paschalio, qui ita censuerit, me augere posse numerum virorum
 illustrium, præsertim in Regiâ historiâ. Ac quamquam diuturnâ ambitio-
 ne meus animus ager sibi studuerit aliquid comparare, quo se humo, ut
 ait ille, tolleretur, sæpe tamen sese respiciens ac sui compos factus, faciundum
 putavit, ut iam partem gloriæ acquiesceret: non quod vel recusem, vel par-
 uifaciam me uti beneficio tanti viri, sed satis habiturum me debere ar-
 bitror, si quantus illi modò notus sim, tantum me ostendat posteritati.
 Nam quod tam gratiosè atque humanè petit, de me ut historiam conscri-
 bam, quin ad id adducar faciendum, tres omnino causæ prohibuere. Ac
 primum quidem pudor ingenuus, & dignus vel familiâ nostrâ vel meâ
 institutione. deinde quod quammaximis atque illustrissimis de rebus
 meis ubi narrauero, tum maximè dixerint me mentiri, quicumque tan-
 tum litterarum cum tantâ belli gloriâ in seipsis coniunctum non esse in-
 dignantur. Tertium verò illud est, quum elogio simplicissimo transigen-
 dum illi video, quæ ne maiori quidem libro comprehendi possent. Pugna-
 ui pedes, eques, adolescens, iuuenis, miles, præfectus, certamine singulari,
 in obsidionibus, in campo civili, ad ludos equitum ordinarios, in excursio-
 nibus, in exercitiis: sapius vici, aliquando victus sum, corpore, non ani-
 mo, non virtute. sed fato: sed ita ut etiam aduersi casus ipsi maiori mihi
 fuerint honori propter egregia facinora, quàm ipsis hostibus victoria. loca
 infinita non designabo. Familiæ nostræ merita à Taxili usque temporibus
 erga regnum Gallicum ad meam usque operam notissima sunt. Quod si
 exempla

exempla non sunt odiosa, poterit illius erga me amor eius animum eò impellere, ut simul & Massinissam & Xenophontem componat, quorum utriusque idea vix me vnum exprimat. Vides quàm ridiculus mihi ipsi factus sim, quùm vix centesimam quamque partem delibarim. De his omnibus ita ut volet. Nam familiam meam quotusquisque doctiorum neget, si nobilitas in vetustate sita est, esse omnium nobilissimam? cuius lux in Alani splendore ac virtute aduersus Attilam primum resulsit. Si ad capita Principum spectes, liberalium, magnanimorum, fortissimorum, perpauca gentes cum ea sint comparandæ. Si quis malit intueri cognationes, deductos nos sciat multis ex Imperatoribus. Quintus enim ego sum ab Imperatoris Ludouici Bauari filiâ. Si quid verò conferunt etiam adfinitates, quis ignorat Massini Scaligeri filiam Beatricem, Barnabæ Ducis Mediolani uxorem, decem filias peperisse, quæ omnes maximis Europa Principibus nuptæ fuerint, vna etiam Edouardo Regis Angliæ filio, quo defuncto duxerit eam uxorem Dux Andegauensium; altera verò Sicilia Regina fuerit? Sed ut parcam historie, hic est ille Barnabas, cuius fratri nupsit Valentina, & quam honoris causâ nomino, & quâ nominatâ finem statuo gloriæ nostræ. Nihil enim mihi honorificentius contingere potuit, quàm ut essem sub luce Regum Francorum, non solum tanquam etuis adscitus ab Opt. Max. Francisco Rege diuino, verum etiam particeps benignitatis atque pietatis Regis incomparabilis Henrici secundi. De meis verò vel studiis vel scripturis nihil ad Paschaliū mittam. De iis moribus, qui ad vegetum robur animi pertinent, etiam in hac extremâ senectute, qui penè octogenarius sum, perpauca poterit, nisi graue est. Omitto frigoris, æstus, inedia patientissimum, dies integros laboribus fregisse, noctes etiam continuasse. Hoc multis fortasse commune: illud non fortasse multis, vespere post expedita diurna negotia ad sexaginta versus commentum esse, deinde cœnasse, post cœnam dictasse quæ ad ægrotorum postriduanas præscriptiones pertinerent, postea somnum cepisse; summo mane experretum fremitu nuntiorum qui opem meam petunt cottidianam, interrogasse, respondisse, dictasse sub prandium usque, meridie pransum illos ipsos versus quos vespere concepissem, ad verbum sine vllâ hesitatione scribi iussisse. Qui hoc non mirabitur, fortassene illud quidem, decem & septem Æschyli versus semel modò lectos summâ fide memoriter illic reddidisse. Habes quæ à Paschalio humanissimè rogatus, à me ipso cœctus effudi; non quòd digna putarem tanti viri lucubrationibus

X

atque

* Sed cxx.
fuisse, eoq;
Ionicos
maiores,
Ios. filius
dixit; nam
& ipse de-
scribebat
dictante
Patte.

atque admiratione posteritatis, sed ne viderer barbaro fastidio tam luculentum officium contempsisse. Vale. Agenno. Prid. Non. Iulij.

Tuus Scaliger alienâ manu. meâ enim ægerrimâ hoc tantum subscripsi.

EPIST. XLVII.

Patauium.

HIERONYMO MERCVRIALI.

Ad litteras quas à te vnas accepi, iamdiu Vir Cl^{me} respondi. Utinam sapius scriptionis hoc mutua iter teramus! quid mihi iucundius? Sed, vt ille ait, multæ inter nos terræ sunt & multi montes. qui tamen separant me à te, nec separant, ad quem sæpe tranfuolo cogitationum & desiderij leui alâ. O Italia, quam vidi olim, non pernouî! quando te regustabo? Ita me deus amet, vt hoc auco. vereor vt frustra, cùm tempora video, & valetudinem quoque istam, quæ ambigua & infirma. Sed vt hoc non sit, fas mihi tamen vos interdum litterarum hac viâ adire & alloqui. quod facio nunc ex occasiunculâ, quam mihi præbuit egregius & ingenuæ doctrinæ iuuenis Euerardus Pollio; cui apud te commendando hoc satis erit, quòd vsus olim sit domo meâ & mensâ. Si te videt, ama iuuenem, & benigniore vultu excipe. nec enim aliud pretium quærit, aut certè non maius, peregrinationis suæ, quàm eiusmodi viros & hæc lumina vidisse, iisque innotuisse. Adolescens est & ἄλλος πολλῶν. Idem à te peto pro Henrico Wiltzio, siis quoque templum tuum adibit, excipias propitius & volens. Hypochondriorum meus morbus remisit, sic tamen vt intemperies & imbecillitas in hepate remaneat: cui vt possumus, non tam *παρρησια* quàm diatâ incedemus. Abiisse te honestissimâ vocatione Bononiam audimus. ni id esset, valdè rogarem in Viri magni Vinc. Pinelli amicitiam me insinuates: quem ego iure æstimo inter Itatorum primos. Vale, & seriò amantem tui amapostrid. Kal. Sept. ∞. 15. LXXXIX.

EPIST.

EPIST. XLVIII.

Zyrollam.

LAMBERTO CVLENIO.

Siquam, lubens litteras tuas & te in iis regustavi ex intervallo. Molestus mihi esse vereris? nunquam potes caput tam amicum. atque hoc debeo Brønchorstio, qui ut beneficium à me impetraret, prior mihi obtulit litteras tuas. cui adfuturum me in omni re noli ambigere. Ipse id videbit, & scio scribet. Utinam potius tibi in re simili gratificandi occasio esset! sed patria te & publicum munus tenent, & (ut verum fatear) ita hoc rerum statu omnia hîc & alibi ambigua, ut nesciam an amici sit alium temerè commendare. Dissidij semina palàm video: Deus ille faciat, ut opprimantur in herbâ. Animos magnos illa gens auxiliaris gerit, & nostris certum non cedere de priscâ libertate. Vtrique tamen ut spero aliquid remittent, nec funem hunc contentionis trahent, quod non potest sine casu & pernicie alternâ. Nobis enim, quod Deus auertat, oppressis, quæ illis perennandi spes? Huic rei symbola aliquot conscripsi, quæ hîc vides, in vsum & gratiam præfecti vestri monetæ. Arcanum omnem sensum non explicui; nec opus, perit enim horum talium Venus, nisi aliquid sit, quod Lector & inspector quærat, & inuento eo gaudeat. Comitum Dordraci fuisse, sed statim in Zelandiam rediisse, credo te scire. De summâ rerum nō aliud habeo quod nunciem. Suspecta enim adhuc omnia, & mutuâ quadâ diffidentiâ suspensa. O Belgica, hūcne redacta es, ut timere eos ipsos debeas, quos euocasti ne timeas! Impedior, ignosce. nam animus mihi certè diutius tecum fabulandi, quod aut coram aliquando fiet, aut per litteras ocio meliore. Vale Vir Clarissime & prorsus mihi care. xi. Kal. Sextil.

EPIST. XLIX.

Brielam.

PETRO REGEMORTERO.

ERGONE meas nondum accepisti? at dedi illi ipsi qui tuas adtulit, atque adeò etiam ad Baudium. Socordia hæc hominum, an perfidia? Tamen amorem & curam tuam amo, qui me alteris etiam compellas, & significas quæ gratum mihi intellegere & scire. Nam etsi, mi Regemortere, reip. non misceor (scis hac

X 2

hac

hac in parte decretum meum, quod nulla res mutabit) tamen non ita *μετέωρος* sum, aut ab communi hac vitâ abeo, ut exuam sollicitudinem de patriâ & affectum. Ego illi benè cupio, & ex animo iis omnibus qui hanc procurant. Utinam concordia illa inter nos, quæ esse debeat: & quæ nisi breui corit, perimus. Ego tecum quoque sentio, legum ita habendam rationem nobis, ut præualeat suprema illa lex, Patriæ salus. cum hæc periclitatur ob priuam aliqua scita siue leges, scio non solum flectendas istas sed frangendas: & improbus, quisquis aliter sentit. Sed tamen videndum, nequid nimis tendatur: & ne acriter contentione rumpatur, quod dicitur, hic funis. Vtrique cadimus, si id fiat. Principibus honorem & dignitatem seruari, æquum & verum est: sed, per deum immortalem, ne ita illa omnia ad exactâ & summam rationem reuocemus, ut neglegamus salutem. Tempestas & vēti in hoc mari sunt. quis ille nauta, qui vno cursu & certâ, ut sic dicam, lineâ peruehi conetur in portum? Flectendum est, vela commutanda, obuertenda: & curandum, ut tutò potius perueniamus quò institimus, quàm ut citò. Dies multa dabit quæ nunc ardua videntur, & ille * *ὁ πάντων πατήρ* *ἡρόν*. Calore quisquis utitur apud frigidas has gentes, fallitur & labetur. Duci volunt, non trahi. Ille noster *μεγαλήτωρ* utinam largiatur aliquid istis cum vsurâ recipiendum, & submittat se nō nihil ut crescat. Liberè hæc ad te scribo (sed solum) nec cælo sententiam meam in hoc dissidio non dissidio, quæ est, Indulgere. Si pertendimus: è leuiculis rebus veniemus ad image maiores rixas. Cum Ordinibus ut conueniatur, id est opidis, caput rei est: de hominibus singulis, quales & quanti illi sint, quis laboret? Sequentur, aut ruent. De collegæ mei negotio, rogari nolo. Non dicam fenestrâ, sed rimâ mihi apertâ, omnia conabor ad perfringendam hanc arcem: quamquam ille, quod scis, nescio quâ causâ alienior à me in totâ hac causâ. Sed nihilominus *μελήσει*. Tu Vale. x i i. Kalend. Octobr.

* omnium
pater Tem-
pus.

EPIST. L. *Leodium.*

DOMINICO LAMPSONIO.

HEV S tu, quid nuntij habes non intempestiui solum sed infidi? Ille me in horto subito opprimit, litteras tuas porrigit

git (illas quidem optatissimas) poscit illicò responsum. Intra horulam, inquam. negat. Intra semihorulam. negat. Quid ergo faciam? inquit. Mitte sodes, inquit, Hagam: totum diem ego cras illic, & in tali domo. Ego, mi Lampsoni, testor Genium Amicitie, nisi: sed litteræ ad me remissæ, cum ille nusquam comparuisset. Hoc præfari volui, & silentium excusare. nunc ad tuas. Vrges valdè ut concinnem De institutione Iuuentutis. fiet: sed non antè potest, quàm hoc pertexuero in Politicis quod sum exorsus. Valdè id opus me tener: magis quàm vllum meum, etsi nec meum. Colligo enim & consarcino ex scriptis alienis. Quid faciam? vereor ut error iudicij mei fuerit in ordiendo: nunc constantiæ laus est in absoluendo. Quædam etiam interueniunt, de temperie in Religionis rebus, & talia, quæ hoc æuo cum omnium gratiâ aut veniâ non dicas. Tamen faciam, & breui ut spero habebis. Nunc istud breue adtextum siue *epistola* habe ad Cornelium: non gustandum, nisi illo lecto. Opus eo edito fuit, quia iterum Commentarij nostri eduntur cum hoc augmento: quos qui non habebunt, contenti sint illo. Status publicus apud nos valdè *nostra fluctuat.* *et* de Pace multus sermo & multa spes fuit: nunc iterum languescit. P. Oranium quod amicum mihi conciliasti (tuum hoc esse scio) gaudeo. Virum magnum, & quod caput est, bonum esse, quidni credam, qui tibi sic placeat? Itaque responde illi audacter de mutuo meo animo: quem factis verbisque ostendam, ubi res curnque feret. Sed nonne ego Oranium noui aliquem Colonia olim? opinor, & qui erat ex Leodiensium gente apud Patres illos meos, quos nosti. Nec tamen opinor hunc esse. Tu quæ promittis, aut ut verius dicam, offers, de institutione à Ximenio scripta, si me amas, fac videam. Valdè me iis aut adiutum iri scio, aut firmatum. Lugd. Barauor. xv. Kalend. Iul. ∞. ID. LXXXIX.

EPIST. LI.

Dantiscum.

IANO GRVTERO.

BREVES & tristes tuas nuper accepi, de parentis optimi facto: & nunc vberiores paullo, non latiores. Nimis, mi Grutere, iaces. Quid te moneam? scio te hanc in rem omnia quæ me scire: hoc deest, quod non usurpas. Remedia habes, sed recondita

X 3

velut

velut in thecâ tuâ mentis. non expromis. At nunc est vsus eorum, aut numquam erit. Vides publicè, vides priuatim omnia aduersa, tristia: nec spem cuiquam nisi in se, id est, robore & contemptu quodam omnium rerum. Quid alios, quid me censeres? agere scilicet dies festos? in morbo iam biennium non cubo, sed, quod deterius ego censeo, ambulo. Æger enim omnia munia fungi cogor sanorum. Alius me scribere, legere vult, alius conuiuari, hilarescere, & omnia agere vt solebam. Et tamē, mi Grutere, apto me huic scenæ, & hilari vultu personam sustineo quam imposuit magnus ille Ædilis. Tu idem fac. Non es qui ille, & ille? at multi etiam infra te sunt, & qui in cælo sibi videantur, si tuo loco. Alia solatia omitto: hoc quòd sapere & scire supra vulgum aliquid tibi datum est, quanti æstimas? Si vero pretio, supra omnes debes humanas opes. Descende in te, subtrahe ab circumfusus & externis, & oblectare cū interno illo deo qui in te viuit. Ille, ille melior ignis, nisi opprimis, extinguere vnâ flammulâ potest humida hæc omnia & lenta curarum. Huic rei en nouum subsidium, libros. Missimus enim quos petisti. At tu *Pericula* tua cur nobis inuides? irascor. Ego me velut Familiarem aliquem Larem vel primum placandum censebam hisce libamētis. Culpam vides, tu emenda. In Plautum iam nuper accepi, & sanè placuerunt. Non scripsi: quia tunc nullus videram, & hæserunt eæ Notæ apud Æmiliū nostrum Rosendalium, me non inuito. Amo enim & illum adolescentē, ingenij planè boni & recti, id est tui. De Constantiâ nostrâ quod etiam nunc quidam carpūt: securus esto, mi Grutere. Morbus hic quidā animi est, & nocere magis volunt quàm nocebunt.

Illam aget pennâ metuente solui

Fama superstes.

Αφθιτον inquam, etsi non ἀφθονον hoc scriptum. Semel hoc dicendum fuit, ob Lentulos istos, quorum abundans ea ora. At tu vale. Lugd. Bat. Prid. Kalend. Septemb.

EPIST. LII.

FRANCISCO RAPHELENGIO *Filio.*

PRÆFATIONEM tuam duplicem vidi, mi Raphelengi, titulo ipso alteram mihi gratam. Ad me enim est. in quo non tam memoria mei delectat, quàm gratitudo, quàm meritò

ritò declaras in eum qui voluit tibi semper, vult, & vult. Vtraque proba satis: vellem paullo longior. Nā etsi breuitas mihi amica, in quo haud infelicitè me sequeris: tamen in adolescentiæ isto æuo maior quædam ybertas mihi haud displiceat. quæ ipsa etiam esse potest, sine fraude vllâ breuitatis. Plura cur non scribis, etiam si non pluribus: id est, cur non extēdis siue Epistolas siue Præfationes tuas, & materiæ plusculum addis? Nam verba nō desidero: & in eo mihi places. Vide ne rem tibi dicam: nec tu iudicio istud facias, sed fugā quadam laboris aut intētionis. Ingenium tuum, mi adolescēs, in omnia validum. vtinā tu exerceas, & solum illud fertile magis assiduo, vt sic dicam, vomere inuertas! Diligentiam à te volo, diligētiam: nec eam cum impetu, sed stabili quodam animi tenore. Quid? influere eruditionem aut virtutem ipsam cēses, famam aut opes affluere, sine contentione & labore? erras. * *Deo t* ἀγαθὰ πόνους πωλύνει, vetus & vera gnome est: quam, si quid me aut te amas, ama. Manutium & Stephanū quoties tibi ingessi? tu supra eos esse potes (verè tibi vaticinor) magnā conciliatrice Aui tui Famā: quam illi non habuerunt. At tu hæc cōtemnis. vtinam omnia externa! sed contemnas tamen cum modo, qui nisi adest, inficiens omnis Sapientia est. Homini ego nihil humanarum rerum magnum esse fateor, si animū & cælestem illam particulam spectes: si corpus, & si vitam, cur negligas ea, quæ ad modicas opes faciant aut honores? Abiectè sapit, quisquis ea abiicit. Erige igitur te, & aptum præbe iis ad quæ Auus, Pater, Ego, te destinamus: adiuturi omnes in hoc honesto cursu non clamore solum & fauore, sed & rebus. Ego quidem non opem solum meam, sed & opes ad hanc rem polliceor: vt te præbeas dignum iis qui genuerunt, iis qui docuerunt. Omnino autem (hæc summa admonitionis meæ est) magis assiduum & crebrum te velim in scribendo, in legendo: magis etiam tui amantem, & æstimantem. non quò ad superbiam te vocem (absit, absit illa pestis) sed vt ad tui pretium: id est, ne dona quæ magnus ille Deus in te contulit, vt aquam immotam, sordescere patiaris & obsolere. Senecam tuum exspecto cum iis ipsis Præfationibus, in quibus nihil muto. nec in meis quidem laudibus: quas decore tu mihi das, etsi nūquam recepturo. Ad te redeunt. Mitte quamprimū exemplar. In Thebaide versum repperi (nescio an ita in aliis libris) *Meosque*

* *Dij bona laboribus vendunt.*

manes

manes manibus infestis petit Fœdatque vultus. ineptè. cùm legendum sit, *Meosque inanes.* De Senecâ Ortelij nostri gratiam illi habeo, & tibi facio gratiam conferendi. Nimis nouitium exemplar est, vt video ex iis quæ adnotasti de æuo. Nos in Tacitum damus *CVRAS SECVNDAS:* in Politicis paullùm resistentes, in temporum hoc flexu. Vale. Lugd. Bat. VI. Kal. Maias. ∞. IO. LXXXIIX.

EPIST. LIII.

IANO LERNVTIO.

AVDES, non dicam scribere, sed cogitare, quæ scribis? Ego tui obliuiscar? ego te deferam in hoc casu: Ah, mi Lernuti, pectus mihi scindunt hæc tua verba. Sol citiùs suum cursum, quàm ego relinquam tam diu sanctè habitum amorem. Negas scripsisse me. quì potes? Ternas dedisse me scio. vnas famulo tuo ipsi in manus: binas misisse ad vxorem. Quid possum, si ex perierunt? Iam in re tuâ, & ad leuandum miserum hunc casum, quid omisi? Scripsi ad, scribi iussi ad: nec vt pro amico, sed vt pro me ipso. Nihil factum, inquires. Doleo. nec nimis miror, qui scio (vt nunc se verterunt vices) gratiam meam leuem esse apud hos è stirpe Bruti. Vtinam qui hîc potiuntur rerum, ius habeant in eo loco! Lipsius non essem, aut tu non illîc. Tamen scripsi in Britanniam ipsam: & inprimis ad Thomam Henneagium, virum illustrem & mihi amicum. Daniel etiam Rogersius redux è legatione Danicâ hîc fuit. seriò cum eo egi, nec solum vt ipse adniteretur; sed vt apud quos ipse aliquid posset. quid tamen dicam? quod res est: rem volunt isti. Castorum fabulam legisti? cùm omnia fecerimus, vsurpanda erit, & non eripies te nisi abiectâ tui parte. Mihi si valetudo paullummodò firmior (caput hoc iuro) iam in Britannis essem, aut in tuis vinclis. Sed quàm vacillem, & quàm agrè *συνεταίριον* hoc sustineam, credo te audisse. Ceterùm spero aliquid à promissis Rogersij, quem ipsum audio futurum inter Legatos. Tu interea, mi amice, esto quem esse te expedit; id est, vir, & fortis. En palæstra & arena, in quâ Dens spectandum te præbuit: exerce insitum tibi robur. Clama in Fortunam, Nihil agis: non si libertatem mihi eripias, sed si ipsam vitam. Ignavi animi ad primum ictum concidunt: tu ostende

ostende aliquid in te esse altioris auræ. Ego, imò nos omnes quotquot hîc, planè tui sumus. si quid possumus, viam præsigna: inibimus, pænè dixerim, vel illam quæ fert ad Orcum. Tu interea vale, & *Αλχιμός εὐς, ἵνα τίς σε καὶ ὀψιγόνων εὖ εἴπῃ.* v I. Idus Martij, ∞. IO. LXXXIX.

EPIST. LIV.

HENRICO WILTZIO S. D.

GRANDIVSCVLVM interuallum fuit à te litterarum, mi Wiltzi. Accepi nunc demum, quæ te Neapoli fuisse nunciarent. Gaudeo, & gratulor vniuersam hanc peregrinationem adhuc cessisse ex voto. Deus reliqua sic secundet. quanquam quid reliqua? Deus te ad nos reducat, quod & suadeo & opto. Satis vsui datum, satis etiam voluptati. longior emanatio discrimen fortasse habeat, non fructum. Si patriâ decretum carere vobis, donec omnia hîc tranquilla: quando fiet? In omni Europâ turbas subseri vides turbis. Tu nobis te redde, & componere ad hoc æuum: in quo ipso minùs recto, viuere semper tibi sit rectè. Externa ista vis si nos cogat, malè agatur cum diuinissimâ illâ parte. Athæc talia coràm. Nam ego non consilio, non auxilio vinquam deero: & amo vos qui apud me olim, vt si ex me essetis. Meus Pollio, vbi est? audio cogitare Viennam & illum tractum. Nolim. & si propior sim, (quoniam verba nostra neglegit) manum iniiciam huic errori. Redite. in patriâ, apud parentes viuite, atque ita mihi valete. Ad Franc. Bencium scripsi ante menses pauculos. O virum, quem ego olim & nunc amo! Frater mihi fuit, nec solui vinquam possit artus ille amor. Iam dotes in eo sunt, dignissimæ vel admiratione vel amore: quas tu coràm vides & gustas. Da te viro. paucos meliores aut maiores dabit tibi ille tractus. Vale. Lugd. nostræ, III. Kal. Maias. ∞. IO. LXXXIX.

EPIST. LV.

Burdigalam.

MICH. MONTANO.

IAM semel ad te scripsi, Vir Nobilissime: nec satis certum habeo, an litteræ ad te perlatae. Interuallum locorum grande est: & addo, quòd nihil hodie tam receptum, quàm fallere fidem.

Y

Iteraui

Iteraui igitur. & scire te hoc volui, cum gaudio me litteras tuas accepisse, & legisse cum voluptate. Diu est cum te noui: nec noui: à mente & scriptis, non à corpore. & admiratus sum (nihil hinc vanum) rectitudinem iudicij tui, eò magis fortasse quòd in plerisque simillimum id meo. Nam fateor: in Europâ non inueni, qui in his talibus sensu mecum magis consentiente. Vtinam plura tibi scribere mens, aut otium! quamquam istud fortasse, non illa: quia auersum te ab omni gloriâ video, etiam verâ. Non debebas. & habere in oculis si non æternitatem temporum, at miseriam hominum: qui talibus monitorum auxiliis omnino ducendi, fulciendi. Me valetudo prohibet ab iis, quæ vellem. tamen, ut languidi, conor & serpo: & nescio quid in Politicis breui dabo, meo textu, non tamen filo. Videbis inter primos: utinam & probes! De Galliâ tuâ & te videndo, quòd inuitas & offers: gratum est. sed quæ possum? valetudo me ligat: & si nō illa, etiam turbæ. quas non effugiam, ut video, nisi in plenâ illâ libertate. Salue, vir nobilissime, ab eo, cui tu semper carus & magnus. Lugduni Batauror. III. Kalend. Septembr.

E P I S T. LVI.

MARIAE GORNACENSI, *Virgini nobili.*

QUAE tu es, quæ sic ad me scribis? Virgo? vix facis fidem. Hæcne, non dicam lectio & ingenium, sed prudentia & iudicium cadant in illum sexum, in istud æuum? Comouisti me virgo: & nescio an gauisus sim sæculi, an doluerim sexus nostri eausâ. Accedere tu ad nos vis? imò supra nos ascendere. atque ita facito, deo hominibusque fauentibus: certè me. qui te ignotam amo; & quem affectum paucis præbeo, miror. O mihi lucem, quæ te propius nōrim? non enim dicam probius. adeò satis te nosse videor è pauculis scriptis, atque adeò vel sine scriptis. Ex vno iudicio tuo, quod de viro illo magno fecisti, non ego de te iudicem? Non cadit hoc nisi in illum, illamve (tu ad cautionem hanc nos ducis) qui ipse valde magnus. Ut animam nisi anima non capit; sic sapientem nisi sapiens. Maesta tu, & persta in hoc ad Virtutem & Sapientiam gradu; tum etiam in illo iudicio, quod frustra vereris ut mutem. Darem, nisi dedissem. & vellem vberius: imò

imò non vellem, adeò tu benignè id explicas & peritè. Intellegi
 sape mihi detur à tali mente, loqui per talem linguam. Itaque ne
 me roga quid hîc castigem: hoc vnum, quòd rogas. siue etiam
 hoc alterum, quòd à me illustrari censes Græcas litteras Latinas-
 que. Cetera in parte amplector: hoc de Græcis, omitte. Candidè
 ego apud te candidam. videmus aliquid in Græcis, sed haud mul-
 tum supra vulgū: & satis mihi, si haurio ex eâ linguâ quæ ad ani-
 mi aut. scriptionis meæ vsum. At tu iam corrigenda seriò, audi.
 Peccasti. quid ita non plura ad me libri tui misisti? Si piguit, cur
 non argumentum & materiem saltem perscripsisti? Curiosus
 enim sum, vt sciam (nouum monstrum) quid paritura sit virgo.
 Ad nostrum illum amicum & tuum, vt appellas, patrem Mich.
 Montanum, scripsi ante mensem, nisi Antuerpiensi viâ. spero ac-
 cepisse. Tu vtinam istas, & in iis spirantem nostrum affectum!
 Vale, vale, æui nostri (viue tantum) vera Theano. Lugd. Bat.

EPIST. LVII.

I A N O D O V S A E.

QUID in Bembi historiâ reprehendam, singillatim & di-
 stinctè vis tibi scribam. Estne, mi Doufa, tanti? aut an ego
 natura * φιλόφρων? neutrum: sed tamen quia valdè vis, age,

* Τοι μὲν ἐγὼ τοι ταῦτα μάλ' ἀφεικέως ἀγορεύσω.

Stilus est quem reprehendo, supinus, languidus, & affectatâ imi-
 tatiunculâ fractus. Vt pueri pedes per delicias malè ponunt, &
 imitari varias discunt: sic iste, cum rectè scribere posset, maluit
 prauo elegantia studio flectere orationem & enervare. Magnos
 viros ea ætas sub magnanimo Leone tulit: sed quosdam qui
 in puerili illâ hæresi, vt religio iis esset scribere aut dicere aliud,
 quàm à Cicerone scriptum aut dictum. Inter eos Bembus. Itaque
 vniuersa scriptio, composita & formata ad æuum priscum: &
 omnia sic de re Venetâ, quasi de potenti illâ re Romanâ. Hoc fe-
 ro. etiâ mne verba omnia ex illorum moribus tracta ad hos no-
 stros? & vbi ea non sunt, nescio quid plurium ambitu dictum,
 quod assequi debeamus diuinando? Hoc, vt mea quidem mens
 est, damno: & fallor, aut tu & viri omnes mecum. Ecce. *Patres*
conscripti semper, Venetorum Senatus: ipsæ Venetiæ κατ' ἐξοχὴν,
 Y 2 Vrb.

* carpendi
 cupidus.

* Ego tibi
 hæc valdè
 veraciter
 dicam.

* ridicula
& non to-
leranda.

Vrbs. anni numerati: non à Christo nato, sed ab *urbe conditâ*. qui militiæ eorum Præfectus, *σευασ* vbiq; *Imperator*: etiam tunc cum alienis auspiciis ductuq; militat, vt in bello Neapolitano Contarenius. Atque hæc inter minores noxias Illa iam * *γελασὰ ἐξ ἀπαισιότητος*: *Rex Urbini, Rex Mantuæ, Rex Populoniæ, Rex Camertium*. Quid censes eum dicere? Duces. Atque item Ducatus ipsos, *Regna* Quin disertè etiam scribit, Gallorum regem ab Imp. Maximiliano impetrasse, *vt is se Regem Mediolani diceret*. Heu vanitas! quâne Cicero nouitium hunc titulum non nouit, confundendi minuti isti dynastæ fuerunt cum vero aliquo magnoq; rege? Saltem *Regulos* dixisset, & ferrem. Ab eadem mente & causâ sunt hæc: *Sophi rex Armeniæ*, qui nobis Persarum: *rex Thracum*, qui nobis Turcarum. Tuam fidem, siue frontem potius, Bembe. ille tibi Thracum modò rex, cui bina Imperia subiacent, & triginta amplius regna? Nec in titulis solùm isti lusus, sed in nominibus ipsis. Quale illud de Ludouico Gallorum rege, quem *Aloysium* (magis *πολυαῖος*) scilicet) vbiq; appellat: & alibi cum facerâ additiunculâ, *quem isti* (qui isti? barbari nos & inepti) *Ludovicum appellant*. Quid, quòd etiam in diuinis rebus hæc sibi permittit? & Fides nostra non nisi *Persuasio* illi est; Excommunicatio, *Aquâ & igni interdictio*: Peccata morituro remittere, *Deos superos manesq; illi placare*. Ipse Deus rarò in stilo aut animo: sed prisco ritu, *Di immortales*; idq; in seriis maximè sententiis aut rebus. Atque adeò, quod omnem stultitiam superet, prudens ille Senatus Venetus ad Iulium Pontificem publicè scribit, *vti fidat diis immortalibus, quorum vicem gerit in terris*. Felicem te gentis & patriæ, Bembe! quia si nostrum aliquis trans Alpes sic scripsisset, profectò non tulisset impunè. Iam quæ periphrases in eo & circuitus verborum? Senatus Venetus dono misit Aloysio regi Gallorum *Aquilas sexaginta, ex earum genere quibus in aucupio vt reges consueuerunt*. Quid Aquilas? Ita Falcones tibi dicere religio est? quâ tamen voce * Iulius Firmicus vsus. Accipitres igitur dixisses, vero magis et si minùs augusto verbo. Sed addis etiam *Reges* vt consuefle. *Reges tantum?* rideo, & pergo. Scribis ibidem, *donatas regi pelles pretiosiores, canis ab summo inter nigrum colorè conspersas, ducentas*. Quæ istæ sunt? Genettas dicis, an potius Zebellinas? Quin, malum, exprimis: & res nouas nouo aliquo nomine dicis? Si puritati sermo-

* Imò &
inter cog-
nomina
prisca Ro-
manor.
Falcones.

nis

nis tui metuis, adde, *ut vulgò dicimus*: in nihil infuscas. At illud ambiguum etiam nunc me habet, quòd Iulius Pontifex *Contareno*, cum classem Hostiam adduxisset, vini Corsi carros sexdecim, boues sexdecim, hircos genitalibus defectis bis totidem dono misit. Qui enim isti Hirci? maritine caprarum per delicias in Italiâ exsecantur? an vis dicere Verueces? O Crasse, ô Heraclitè, ridete. Quòd si ad Verba & Phrasas etiam venio: benigna hercules materia cauillorum. Ecce scribit, *Velle se hominem suum Byzantium mittere*. Iterum: *Reip. hominem ad se missum*. quod nos diceremus, Actorem aut Legatum. *Turrim terream* appellat, Propugnaculum siue aggerem è terrâ. quo exemplo? *Sumpti, Tumulti, Senati*, inflectit ad Plautinum æuum, cum reliqua omnia minimè antiquarij sermonis. *Neminem vnâ partem muniunt*. pro, Nullam: quia Ciceroni alibi *Nemo de fœmina dictum*. *Prooppidum* sæpe, quod nos Suburbium: *Prodominus*, qui Vicedominus Venetis: itemque, *Proimperator*, & *Proordines*. putidè, ut sentio, aut nouè. *Rebus suis veritus*, crebrò & ad nauseam, pro Timens aut Diffidens. quia idem ille Cicero semel fortasse, Vereor mihi. *Senatus decreuit, ut eorum qui fortiter atque amanter ad flumen Tarum contra Gallos remp. gesserant, ratio haberetur*. Iterum: *Præfectos, qui se omnes nec strenuè nec amanter eo bello gesserant, missos fecit*. Sæpiusque. & illud *Amanter inuitâ fanè Venere amat*. *Lauredanus naues onerarias quattuor secum asferens*. Hem! pro monstro est. Attulit? imò adduxit. Tamen iterat alibi: *Legatus Baiæ etis equum Patribus attulit*. γαλοῖος & ineptè, siue: mariis venerit, siue terrâ. *Pensionem annuam, quam posterius eius sequerentur, Senatus instituit*. Imò, quæ posteros eius sequeretur. *Petunt, ut quòd celerius fieri potest, via se dent*. Solœcum est, nec à Latio, sed ab Idiotismo Italicorum. Plura sunt. cur ea colligam? Ipse vide. & fateberis pleraque talia affectatè atque improbè scribi; certè indecorè. In pueris ista vix ferimus: te virum, & in tam serio scripto, Bembe, deceant?

— * ὅδ' ἐπὶ τοῖς ἑσπέραις
 Νηπιδας ὁ χέειν ἐφεί εἰς ἐπὶ τῶν ἐσπέραις.

At tu Doufa vale, & si quid temerè culpauī, mone. In Musæo meo. H. III.

* Neque te oportet
 Puerilis
 scitari. nō enim ultra talis es.

EPIST. LVIII.

HENRICO BORBONIO, PRINCIPI DVMBARVM.

ILLVSTRISIME Princeps, noua & prædicanda hæc humanitas, quâ ultro ad me scribis. Quis ego sum? vnus aliquis è vulgo litteratorum. Tu quis es? inter Galliæ primos, regiâ stirpe; & quod magis est, indole ac virtute. Atqui etiam amas me, & amicitiam meam (ita scribis) poscis. Illust^{me} iuuenis, commutatas nomina rerum. officium & cultum nos tibi debemus: amicitia est inter pares. Tamen & hanc, aut certè amorem, tibi spondeo: qui ita me cepisti, vt nihil magis in votis sit, quàm palàm ostendere hunc in te affectum. Natales tui ad magna te vocant, ingenium ad summa: ecce me non solum approbatorem fautoremque tuæ laudis, sed voce & stilo præconem. Deum ego quæso, vt mētem hanc tibi, quâ ad optima optimosque accensus raperis, feruet; & te afflictō regno. quod nisi per eiusmodi columnas stat, ruit. Illustrissime Princeps vale. Kal. Augustis.

EPIST. LIX.

ABRAH. ORTELIO.

COGNATVM tuum, mi Orтели, modestissimæ frontis & canini iuuenem eò libentiùs vidi, quia litteras à te attulit: nec eas tantum, sed & munus. Adiunxisti enim Tabulâ Hispaniæ veteris, iucundam mihi & valde opportinam hoc tempore, quo Liuium & bella Punica auditoribus meis publicè explano. Scis tu, quàm multa illuc mentio passim & bellorum in Hispaniâ & locorum. Itaque & gratias tibi habeo, & te planè hortor vt eandem operam in Galliâ etiam nobis præstes, nam de Germaniâ, iam effecisti. Tum si Illyricum voles, aut Græciam, aut Africam, iudicij tui esto. Cessaturum enim te non esse, omnino mihi persuasi, præsertim cū & grati labores tui sint, & otio (rebus illuc tam quietis) iam abundes. Monauij amorem in me pridem noui, & nunc ex litteris eius recognoui. Oro, saluta amanter à me virum probum, doctum, & gratum mihi inter paucos. De Thraseâ meo, tu & ipse vrgetis. quid pollicear? aliud mihi nunc sub manu: & eo absoluto, videbo quomodo me impetus, aut potius iudiciorum

ciorum hæc aura feret. Nam, quidquid ego constans, tamen mi Orтели egrè obduramus contra minutos istos & cottidianos morsus: præsertim ubi aliquid, quod tangere fines Pietatis videatur. Doctus scio, quid sit irritare hos Cantharos: qui omnia peruolant, & olim etiam ad cælum. Nosti apologum. Nos hîc in otio, an in longum? nam minas iterum audimus & apparatus. Deo rem committo, qui publica ista ex sui numinis & nominis gloriâ dirigat, & te mi Orтели seruet, Lugduni Batavorum, I V. Id. Decembr. ∞. IO. LXXXIIX.

EPIST. LX.

Amstelrodamum.

PETRO PAWIO.

QUID QUID damnaturî me Stoïci nostri sint, miseratus sum & dolui duplicem tuum casum. Illum de amissio parente: hunc nouum, de libris & scriptis. Ego scio quâtuin vtrumque vulnus sit, vtrumque expertus: & hoc postremum in nostro animo valet, quod in multorum omnes Fortunæ. Nónne hæc diuitiæ nostræ sunt? suauia mellificia, è tot scriptorum flosculis confecta. Et multa, vt breuitas huius æui est, haud facîle refinguntur. Addo, quòd nescio quomodo delectant nos iuueniles illi & primi nostri labores, quos velut primitias libauimus & intulimus in aram hæc Musarum. Me vndecimum iam annum carentem patriâ vides, itemque agris & opibus, quas mihi Deus modicas, sed ad meum vsum vberes dederat: tamen mihi crede, nulla iactura propius mihi cor tetigit illâ librorum, quam feci in Louanienfi vrbe. Subitò enim abeundum fuit, & nisi sic abissem, numquam abissem. Tuas miseras narras, inquis: sic me solaris? Ego verò, mi Pawi, vel sic. Parentem alterum amisisti: ego vtrumque. Libros naufragio: ego, quod magis mordeat, furto. Quid tibi igitur eximium euenit, quod eximiè doleas? Fero meum casum, quem non muto: tu quoque fac, hoc exemplo. Vis communia illa me dicere? Hominem te esse: Euenire hæc in vitâ: Deum voluisse: Dolendo nihil te profecturum? Hæc omnia verissimè possem: sed subiici ea tibi à te scio, aut certè ab iis qui apud te. Ego simpliciter & pro amico ago, & hortor te ad incommoda pari mecum mente ferenda. De munere tuo apud nos moneri nolo.

semel

semel dicam, quidquid mearum virium erit, faciam: etsi nihil, in re quæ alieni arbitrij est, polliceri possum de effectu. Iudicium meum & commendationem largiter habebis. Vtrumque auunculum tuum amicè à me saluta: & Henrico hoc amplius nuncia, bene redditos mihi nummos quos Hamburgo acceperat: etsi puto eum id scire. Vale. Postrid. Idus Nouemb.

E P I S T. L X I.

Lutetiam.

IACOBO AVGVSTO THVANO.

DI V, mi Thuane, siluisti; nec eò minùs tamen, vt spero, amasti. Spero? imò video, cum ex epistolâ tuâ amicissimè scriptâ, tum ex munere quod beniuolè adiungis. Amo illam, & hoc laudo: argumento eximium, tractatu arduum, & in quo verè alti atque acris ingenij tui signum. Perplexâ illa & breuiâ, tam aliena non solùm à sermonibus nostris, sed à moribus, vertere magna laus sit: quid carmine & versu illigare? & id dilucidè atq; eleganter. Non blandiar. sed, mihi crede, rem magnam confecisti, inuidentiam celerius quàm imitandam. Nobis humilior per hos dies labor, in additiunculis ad Commentarium Cornelianum. *Curas Secundas* appellauì, ab ipsâ re. Velim non videas solùm, sed censes: quoniam illud cuiusuis est, hoc verè amici. Cuiacius ille magnus estne apud vos? ego ita accepi. Si est, eius causâ nihil doleo: sed periit illa, cui ipse anima, Schola Bituricensis. O virum, quem miror, quem amo, quem vtinam complecti mihi fas ante excessum! Scaliger quid? valere intelligo, sed cessare. Non sic oportuit ingenium natum ad tam magna. Si piget huius sæculi (nec immeritò) at cogitet natorum natos. Res apud vos, vt audio, mirificè calent. Si vera adferuntur, nihil inuidebimus vestræ quieti. Nos Velleium, Florum, Liuium ordine cogitamus. deus mihi vires, & ô vtinam copiam iudiciorum vestrorum! Nam hîc ego in solitudine: vna vrbs vestra abundat supra reliquam Europam. Librum tuum, quod volueras, misi ad I. Drusium. responsum ecce habes. Ecquid tu, ecquid alij vestri parent, velim scire: si quid tamen per has turbas. Vale. Lugd. Bat. III. Non. Iun.

EPIST.

EPIST. LXII.

THEODORO CANTERO.

QUOD silentium excuses apud me, mi Cantere, nihil est. Siluerunt tuæ litteræ? at non amor: quem viuere in te scio & spirare. Quod tamen occupationibus meis id adscribis: nolo. Cantero meo non ego semper vaco? verè dicam. Tua probitas & modestia, in litteris studium, in litteratos amor, admissionem tibi tuo iure apud me dederunt inter primos amicos. eaq; vtere: numquam non Lipsius tibi patet, leuato, vt sic dicam, velo. Iuuenalem quod doceri totum à me velles, & probas quæ in eo lègi, gaudeo: sed vereor vt id ex omnium gustu sit, qui volunt Historias & alia (vt censent) magis ardua, à me legi. Ego tamen scriptorem eum inter apprimè viles numero, & dignum serio interprete & accurato. Itaque occasione captâ Satyram vnâ publicè prælègi, sed extra ordinem *καὶ ὡς ἐξ ἐπιμέλει*. Siquid vltà tētabo, vt ar libro quem mihi offers: etsi ipse bina exemplaria habeam satis proba. Sed tu quid agis? nouum aliquid cogitas? an Arnobium refingis? Colli-go enim ex epistolâ tuâ nec hanc quidem curâ te posuisse. Cupis vt ad Cuiacium scribam pro Excerptis exemplaris Regij: quod facturum me polliceor primâ occasione. Ceterum in republicâ an apud vos quies? ita videtur. Vtinam & concordia cum finiti-mis prouinciis, sine quibus firmum nihil esse vobis potest contra hostem. Bene, quod ille alibi diftringitur, eoq; similtates exer-cere vacuum nobis fuit. Classis illa magna ab Occidente, nunc apud Orcadas stare dicitur, expectare ventum quò redeat ad in-coepta. Videbimus quò recident magni isti & planè regij cona-tus. Latrocinia adhuc fuerunt, nunc bella. Heus tu, audisti in capti-uum Hagæ Hispanum Doctorem Medicum esse, virum littera-tum (mirare in Hispano) Latine disertum, carminis etiam pan-gendi nō ignarum? Is ad nos scripsit, & subleuari miseriam suam cupiit vt consecrarei corundem studiorum. Fecimus in parte. Vale mi Cantere. Lugduni Batauorum, Postrid. Kalend. Se-pteimb. ∞. IO. LXXXIX.

Z

EPIST.

ALTERA scriptio me occupas, priusquam priori responderim. Et cur silui? non tui contemptu, aut negligentia: absit. sed quia ipse venire Hagam parabam, & in sermone vberius liberiusque tecum agere, quam litteris possem. Id consilium meum euectio vestra subita impedit: & prius audiui Medemblickæ vos esse, quam ituros cognovissem. Excusa ergo silentium à causâ iustâ. At nunc scribo, & te, mi Iosephe, per deum & per salutem tuam rogo, ut animi attollas contra Fortunæ vehementem hunc ictum. In carcere es, à tuis & à patriâ remotus: quæ graua esse fateor his, qui parum exploratos habent casus & res humanas. Te quid hinc fugiat? si vsu non didicisti, quàm fluxa & caduca hæc omnia nostra, imò & nos simus: hausisti certè è litteris, & illæ tibi millena exempla suppeditarunt casuum similium aut grauiorum. Tricæ & spinæ, hæc omnis vita: & falleris, si quæris in eâ gaudiorum flores. Nos ipsi, quid?

Ut herba solstitialis, paulisper sumus.

Abeunt hæc vana, & nos abimus: nec quicquam firmi, nisi in firmo illo loco. A Platone tuo didicisti, * *παρεσιδήμιαν τὴν εἶναι τὸν θάνατον*. Hæc cogita. & propriè ad tuum casum, assiduum & pænè sollemnem hunc esse fortunæ ludum. Quid crebrius in omni memoriâ quàm carcer? quæ conditio aut ordo ab eo liber? Nobiles, ignobiles; seruos & reges accepit, & capiet. Perseus ille Macedoniæ rex, sceptro simul & libertate spoliatus, spiritum non traxit solum in carcere, sed effudit. Idem Gentio, Iugurthæ, Ptolemæis aliquot euēnit. & ne ad vetera te mittam, tua gens, illi ipsi Hispani, regem Galliæ Franciscum in custodiâ habuisti; & reges Mexicanum & Peruanum etiam in vinclis. Heu sortem humanam! nasci, dolere, mori. Et tamen felices inter omnes miseras, hoc vno Christiani: quòd via nobis per hæc ad aliam vitam, in quâ gaudiorum nec modum ullum esse scimus, nec finem. Huc aspiremus, hæc spernamus: & vocem illam ex pectore efferamus, *Dissolui velle, & esse cum Christo*. Mitto ad te libellos nostros de Constantiâ, quos petiisti. magis tamen ad Sacros libros te horter, è quibus vera solatia petas omnium malorum. Mittam ad te Biblia

* peregrinationem quondam esse hanc vitam.

blia minuscula, vti cupis, quumprimùm nancisci potero. Nam Antuerpiâ petēda sunt: quoniam hîc inopia eiusmodi exemplarium. Vale Clarissime Doctor, & confide. Viuit Deus. Lugduni Batauorum IV. Eid. Nouembr. ∞. IO. LXXXIIX.

EPIST. LXIV.

Hagam.

MICH. HYRALTO HOSPITALI.

TVNE ad me vltro non scribis tantum, sed & venis? tu ille maxiimi viri magnus nepos? O mihi iucundum lectu Hospitalis nomen, quod nisi iure quodam sanguinis ferres, posses similitudinis & exempli. Scripta illius per te edita, dudum vidi; & habeo (certum me scito dicere) vt Homeri libros rex ille Magnus. Litteratius aliquid edi fortasse potuit & poterit; nego quidquam litteratius & prudentius simul. Pulchra hæc coniunctio; & quæ nisi sit, abite qui in studiis queritis solidam & veram laudem: me iudice non feretis. Quod amanter Hagam vocas, inò lictoribus missis pænè ducis: ignosce si non pareo, parebo. Nam dies Mercurij, qui feriatu nobis est, nisi quid interuenit, tibi me sistet. Ita dico, non vt occupationes excipiam aut talia impedimenta: sed vt vnicum morbum, qui etiam à vadimonio, vt scis, excusat. Ego autem iam annos aliquot nescio quomodo non tenui solùm, sed incertâ valetudine: nec quicquam promittere de me non dicam in diem possum, sed in horam. Tamen fauebit & faciet Genius meus, spero, eo magis quod nō ad seria vocor (cum Teridate quid mihi?) sed ad risus & Plauti mei sales. O te virum argutum! qui vidisti, quo vno possim capi. Veniam, veniam, & hic mecum. Vale. III. Non. Septemb.

EPIST. LXV.

FR. RAPHELENGIO Filio. S. D.

CARMINA tua de me legi: proba & arguta. & in quibus hoc vnum moneo, vt videas sic me deinceps laudes, nequid offendas eos apud quos viuis. Temporum nō ignari sumus: cum quibus pugnare te nolo, etsi haud seruiliter seruire. Apud te & interiorem tuum animum liber esto, recti iudicij & sensus: in

Z 2

sermo-

sermone interdum tempera, nec offende qui possunt offendere. Sapientia vera firma est, non tamen elata: non timet pericula, sed nec prouocat aut laceffit. Ascanij illius apud poetam iuuenilis nimis ardor est, qui

Optat aprum, aut fuluum descendere monte leonem.

Non ita nos. qui abundè fortes sumus si excipimus, non etiam iucurrimus in discrimen. Plura vellem, non vult hoc æuum. Senecæ Excerpta tua, accepi: & erunt vsui, si deus volet. Nam ego amo & adiutum seriò volo scriptorem illum, præceptis optimum si non vitâ. Quamquam in ipsâ vitâ, si consideras, præponderant vilibus aut seruilibus, recta eius facta. Certè extremus ille Actus si in fabulis poscit palmam: laudabilis valdè in isto. Iure doles & culpas, quæ ad Polybium scripsit, vt opinor, exsul. Quid facias? verè tunc iacuit: nec credam animo eius plenè adhuc impressum à Sapientiâ robur. Ego non tam miror scripsisse ea hominè, quàm indignor edidisse. Quiddam temporibus sæpe damus, sed fur- tim & apud vnum alterumue: quod nō nisi propudium aliquod hominis diuulget. Sed de isto aliàs, & fortasse Ad ipsum. Esse qui opinionem tuam fefellerint in amore & honore litterarum: non miror. Per bella ciuilia non spirant Musarum venti. Tamen, mihi crede, illæ viuent, & in portum venient inter medias turbas & naufragia multorum. Tu eis adhære, & Pietati ac Virtuti inprimis: sine quibus nec verè honestus vnquam eris, nec Meus. In nummo Orteliano (frater tuus me consuluit) nihil video, nisi ipsum sciam & quæ adiuncta: id est, quo tēpore, quid symboli. &c. Lugd. nostræ, IIII. Kal. Nouembr. ∞. IO. LXXXVII.

EPIST. LXVI.

Burdigalam.

PETRO BRACHIO.

LITTERAS à te accepi, mi Brachi, bene amicas. Etiamne amor ad me penetrat è locis tam longinquis? nec tamen de te miror, qui totus es ipse Amor, sed fidus ille honestusque. Ita me Fama & tui similes amētis, vt cor mihi tetigit tam pius ille tuus in tuam affectus. O exemplum in omni æuo rarum! & magis in isto, quo non solum desumus laudanda facere, sed etiam laudare. Liuior & obtrectatio passim, bonorum operum impedi-
menta

menta aut venena. Quid tamen te morentur? qui vitæ delinimenta proiicere & conculcare potuisti, nōne facilè ista? Mihi constancia tua admirabilis est, amicitia grata, scripta nuper visa & probata. Nam tulit ea ad me noster Doufa, quem nihil eiusmodi florum, quos Musarum vspiam hortus alit, potest fallere. Tu verò salve poëta, non poëta: ingenio talis, moribus iuxta Socrates omnes aut Catones. Ab eius filio habes carmen quale petiisti. Cur non à me? iuro salutem meam, ab aliquot annis nihil tale iam scripsisse, & vix posse. Morbi quid habeam, tenes: & quā non per eum alacris animus & poëtafter. Ignosce. volui, sed hoc tantum. Tamen aliàs videbo, & si quis etiam halitus me adspirabit ex illo vestro & veteri meo fonte; seruiet cælesti tuæ AMATÆ. Nunc festinabat Faius Hospitalij magni nepos, cui litteras has dabam. Vale, & qui constantis amoris exemplum es, constanter etiam me ama.

EPIST. LXVII.

IANO LERNUTIO.

LITTERAS tuas ad Coluium vidi, non ad me: nec indignor. Illud indignor, quod tamdiu in tristissimo illo squalore sedes, & nonnullā tuā culpā. Quid expectas? liberari *quid?* numquam fiet. Scribamus omnes, & ad omnes: numquam nisi minis extis placabimus tuum illum Ditem. Fuge, fuge, ab Acheronte: præsertim cum de Irenes accessu nulla vltra spes. Decedet aliquid rebus tuis. Vbi sapientia? hoc scilicet mauis, vt tibi? Percant illa omnia, dum saluus nobis noster Lernutius. Quamquam nonnemini, quem non nomino, exigua sit è magno metallo illa rasura. Sed qualisqualis, ferenda, subeunda. Aliā viā qui effugium tibi esse suadent, non suadent vt amici. Torqueor cum hæc scribo. Tūne illis aliquid credis, quibus nequid ego crederem, tu mihi primus auctor? Sperne, & sape. Litterulas cogitas, & nostras deas. valdè scilicet gratiosas apud illos *ἀγαποῦντες* & militares. In pretio pretium est, mi Lernuti: & cetera in fronte grata sunt & verbis. Verba egotibi non dabo. Siquid possum, non pete, sed iube: siquid non possum, abstine tormentum mihi dare, cui hoc satis tormenti, quod tu tamdiu in tormento. In Rogerio specula

Z 3

aliqua

aliqua erat: ille nunc in Daniâ. Ad Tho. Hencagium bis scripsi, sine responso. Præfectus Brielandus & per eum rogatus Vlissinganus scripserunt; sed non alio effectu, quàm ut meliusculè habereris. Ipse mihi Brielandus coràm dixit (probè autem nouit hominem) precibus aut intercessione solâ nunquam te liberandum. Habes meam sententiam. utinam ad eam tua inclinet, & omittas aliquid siue de constantiâ illâ tuâ, siue de rigore! Quod mihi, hoc amicis & notis omnibus tuis videbatur. Cistas & quæ in iis, confecto rerum Indice, traditas scito Sayonio cognato tuo. ille porrò misit, quò debuit: & credo, iam appulisse. Nos cum certum aliquid in rebus nostris statuerimus, te non celabimus. Vale. & illinc euade, si nos valere vis. iv. Idus Septemb. ∞. 10. LXXXIIX.

EPIST. LXVIII.

THEODORO LEEWIO.

DE silentio ne excusa, aut me accusas. Nónne & ego filius? Sed profectò, quod aliàs scripsi, serius & fortis iste amor delectatur quidem fomentis litterarum, sed & sine iis uiuit. Noster, ut spero, æternùm. Cogitatio eum pascit, cum non sermo. De pede tuo molestum mihi audire: id què ex meo sensu. Nam ego eam partem tam caram quàm ipsum caput habeo: cui vita sedentaria, non sit vita. Scis quàm ambulatione delecter & motu. Cura eam igitur, sed lentè & molliter; quia nerui reduci ad officium volunt, non cogi. Filium tibi agnatum ex animo gratulor. deum precor ut is tibi hæres sit non opum magis, quàm animi & virtutum. Crescat, crescat. Ego illum & te videbo, cum primùm se aperuerit & diffuderit stricta hæc aura. Nónne in mediâ hieme etiam nunc videmur? Quòd catellum illum diu mihi visum & simul amatum offers: agnosco amorem. Accipio: & habeo pro munere magis mihi caro, quàm si gemmas à te vel aurum. Non rideo. amauit à puero totum hoc genus, & video idem fecisse præstantes aliquot animas ab æuo prisco. Telemachus ille Homeri in concionem etiam uenit canibus duobus affectis; & Patroclus fuisse nouem * *νῦν αὖτε Τρωεὺς ἦσθε*, idem vates tradit. Non enim ad uenationem, solum aut Dianæ studium: sed ad voluptatem & turelam habebant

* *canes
mensarios.*

Hæc

Hæc leuifomna canum fido cum pectore corda.

Ad summam, mitte, sed per fidum aliquem: ego eum paullò amplius amabo, etiam tuâ mittentis causâ. Sed bonâ fide, vxorcula non ringitur? carere eo potest, aut vult? absit vt iratam habeam tuam Iunonem: quamquam ea tam mitis, vt nesciam an habeat bilem. Sed eâ lege tamen mittito, si volet illa. De rep. nostrâ non vanè asseris pendere eam ab alienâ. Ita est. In Galliâ certamen nostrum cernitur: & qui ibi exitus, exspectandus & nobis. Vt cymba magnæ alicui naui annexa, ita nos Galliæ sumus, imò pleraque adeò Europa. Exspectemus euentum fortes, erecti, & si volumus numquam ferui. Poëta Ennius olim egregiè:

Ea libertas est, qui pectus purum & firmum gestitat.

Alia res obnoxia nocte in obscurâ latent.

Tale pectus induamus, non concutient nos omnia humana. Vale, & vxori tuæ salutem dicito, pusionem etiam tuum à me suauiare. Lugd. Bataur. vii. Kalend. April.

EPIST. LXIX.

Lutetiam.

FEDERICO MORELLO V. C.

TVNE ille es, mi Morelle, qui amicitiae meae fores suauiter pulsas? ades, ades. nemo hoc anno gratior mihi hospes. Præsertim qui Florente illo comitatus ad me venis: quem quis excludat, nisi quem Gratia & omnes Musæ? Nam profectò illud Siculi vatis in eum conuenit — *χρῆττον ἰεὸν φυτόν.*

Deus bone, quàm me delectârunt illa Tragica eius siue Comica! Altera res tentata magno nostro Scaligero, altera nec illi. Gratulare viro: cuius ego labori faueo, & maximè argumêto. O quando nos & vos inuisset candida illa Diua? Si quando; certè ego recto pede ad vos, mihi populariter tam amicos. Libellos epistolæ tuæ adiunctos percucurri: sed hoc tantum. nã herè demum accipi, cum in viâ diutulè hæsisent. Amaui & exosculatus sum tuum iudicium in Thebaïde, quam voluisti etiam producere in illud Europæ theatrum. Age, age, sic oportet: inferere inquam iuuetuti non ea quæ probantur maximè, sed quæ probanda. Certè illa fabula sublimis & ætherei spiritus est, & soni in versibus supra omnes tubas. Tu, qui legisti, agnoscis. Notas ad eam Florētis vidi, & amaui. Cui à me dicito, scriptum illum vnà tecum non in externo &

no & ambizioso isto amicorum albo, sed cum paucis *ἐν ταῖς φρεσὶν δέδοται*. Qui quòd elogia aliquot tam amica mihi tribuit: quædam non agnosco, in quibusdam nec ignosco. Irascor in illo ad Thebaidem, quòd me Prætoris magni loco habet, se nec lixæ. Apage immodestam hanc modestiam: & ita me nôrit atque æstimet, vt etiam se. Eiusmodi viri (non sinuoso pectore hoc dico) magnus honos mihi, si non affecit mei, sed collegæ. Illa iudicia eius de Scaligero patre castigatiora, & planè ex meo sensu. Laudabilior ipse apud me, ob eas laudes. Nam quod de Tullio dixit vetus magister, *Profecisse multum cui is placeret*: ego veriùs, Magnū esse cui Iulius iste magnus. Cuius ego vitam iamdiu haueo mittere in scripta, si aliquod mihi auxilium ab iis qui interiora & minuta illa vitæ nôrunt. Nam maxima nobis patent, mirâ & ingeniosâ de se alibi atque alibi scriptione. Tu mi Morellè, vt claudam & coërceam animum nimis se diffundentem, me amare perges, vel constantiæ tuæ causâ: ego quidem te seriò, per vestigia Turnebi nostri & munera euntem ad illud ipsum veræ gloriæ culmen. Lugd. Bat. vi. Id. Decemb. ∞. IO. LXXXVIII.

EPIST. LXX.

HADRIANO SARAVIAE.

QVOD siluisse me scribis, miror & dolco: cū plenè & seriò responderim ad priores omnes litteras tuas. Quas ab aliquo iam interuallo nullas vidi, præter has querulas & breues: sed ideò mihi gratas, quia tales. Nisi & me & mea amares, non quererèis de officij huius intermissione. Illud grauius, quòd de morte filij tui (heu vnici) scribis: in quo, numquam ex animo gaudeam, nisi ex animo sum tristatus. Amabam modestissimum ingenium, nec vltra laudandum, ne desiderium & causas dolendi tibi augeamus. Scis communem legem, Dei ab æterno decretum, & alia quæ alij hauriunt à tuo fonte. Hæc ipse tibi nunc instilla. Imus huc omnes, mi Sarauia: nec seiungimur, sed leuiter alter alterum antimus. O beati, qui in beatâ illâ metâ! nam hîc etiam in optimo statu, quid nisi miseriæ? quanto magis in his publicis Europæ ruinis? Nam mutari eam totam & inuerti, nemo prudens non videt. Censebam Po-
litica

litica nostra posse me mittere sub hoc tempus, trina aut quater-
na folia etiam nunc restant. Firmioris attentique iudicii Lectori-
bus probaturum me id Opus spero, numquam iis qui peruolant,
& instar apum scripta saltem delibant. Thomam Heneagium à
me salutes velim, virum Musis & mihi valde carum. III. Kal. Sext.

EPIST. LXXI.

FR. RAPHELENGIO *Filio.*

SENECAM tuum sub vesperam accepi, & cum ipsum ad lu-
cernam libaui. Placet serio. Perge, perge. Male cœpisti, si hîc
desinis. Saliuam tantum, quod dicitur, nobis mouisti; exple desi-
derium vberiore aliquâ mensâ. Quid tam proprium huic studio
quod auum tuum immortalem reddidit, quàm Critice? quam si
adiungis iudicio, vt cœpisti, & opportunè: non rem solum ma-
gnam feceris, sed famam. Neutram harum contemne, etsi ali-
quid ante eas pone. In poëtis aliis velim te simile aliquid aggre-
di. an in Iuvenale? iuuabo: aut in quocunque alio, quem le-
ges. Nam hoc Poëtices studium, & in eâ emaculandâ labor, non
dedecet hanc ætatem. Postea ad grauiora te ducam. Hortamina
quæ nuper ad te scripta misi, credo legisti & imbibisti. O vti-
nam! vtinam erigas, inquam, te, & vno certoque tenore eas, alacer
semper & vegetus, quid non effecture? Velim ad me serio & libe-
rè scribas siquid est quod te mordeat aut absterreat. depones
in fidum & amicum planè sinum: nec id tantum, sed etiam auxi-
liatorem. Nam ego te, mi Raphelengi, quamdiu ero, non dese-
ram: & iuuabo consiliis & quâ aliâ re potero. Confide. cum leni
non medico solum, sed amico tibi res erit: indica si quid est mor-
bi. Spero sanè nihil esse, & scio causam tibi non præberi ab Auo,
qui te amat vt ex se natum, non vt nepotem: tamen cum inter-
dum iacere te ex litteris tuis intellego, suspicor nescio quid non
esse ad tuum sensum. Æuum & mores illos noui. torquent? indi-
ca. si concoquere non potes, subueniet *ἐπιδημία*. Ego scio non
omni ingenio conuenire, quod Homerus Marti suo ascribit,
ἀλλοπρόσαλλος. Reperiemus quod ex vsu tuo fiat, & cum gratiâ
tuorum. Deum rogo vt te firmet, iuueniles leuesque animi mo-
tus tollat: quibus subiici te non ignoras, & vincere eosdem debe-

a

re ac

re ac paulatim atterere, hoc quoque non ignoras. Vale. Ex vrbe nostrâ veteri. vi. Id. Nouemb. Optimô Ortelio salutem. Nos è Nundinis nec litteras, nec Catalogum, satini seriò vestri nos curant aut cogitant?

EPIST. LXXII.

Francfurtum ad Oderam.

FRANCISCO HILDESHEIMIO.

TAM benigna tua salutatio meritò litteras meas elicit, etsi breues. Multa mihi tribuis, Vir Clarissime, sed, vereor ut amore inductus, qui in hanc laudis partem, nō bonis iudex. Ego te alio ob amorem, & seriò deinceps censeo inter meos. Quòd si in Germaniam aut loca propinquiore vniquam venero (ita autem statui:) crebrioribus istis litterarum alloquiis fouebitur amicitiae hæc herba. Sin hic mansero, profectò id arduum in tanto interuallor. Rari à nobis homines illuc, nisi ad mercatus Francofurtenses: nec ij semper certi. De Plinij loco eruditè disseris, nec quidquam addidero aut. mutauero in tuis dictis. Maecte virum te esse video, quales in illo orbe pauci. Sed, nisi fallor, breui eas quoque oras illustrabit melior hic Phœbus. Vale. Lugduni Batavor. Postrid. Kalend. Sextil.

EPIST. LXXIII.

Antuerpiam.

CHRIST. PLANTINO.

MI amice, nulla vnquam epistola tua aut gratior mihi aut tristior fuit hac postremâ. Languidâ manu scriptionem tuam nimis exosculatus sum, & seruabo pignus fidissimi inter nos amoris. at dolui in tuâ afflictissimâ * valetudine, quam tamen mens mihi dictat & præfagit iam esse meliorem. O Deus, & tu, facite me compotem huius voti. Aliud nihil scribo nisi hoc. quicquid à me factum voles, etiam cum me præcedes & in vili hac terrâ non eris, impera. non viuum magis amaui, quàm postea verè viuum amabo. Salue, Salue, Salue.

* Quæ illi postrema.

EPIST.

EPIST. LXXIV.

FRANCISCO RAPHELENGIO *Filio.*

CERTE, mi Raphelengi, tristi nuncio percussus sumus, tristis nec cuiquam vestrum qui sanguine iuncti estis, aut in amando cessi, aut nunc in dolendo. Amisisti tu avum optimum, alij patrem, ego amicum, sanctum nomen & rarum hodie in terris. Heu mi Plantine, quis mihi post te alter? nemo; non magis quam ante te talis quisquam fuit. Beatum quidem te qui extra praesens & imminens omne discrimen, extra molestias quae senile etiam caput tuum circumstabant: at nos voluimus & reuoluimur in medio aestu. Tuum filii impactum amisisti, in omni fortunâ tuâ consilium, solatium, opes. Amabat te, hoc fecit. Sed feramus, & illius maxime exemplo (in quo enim haec virtus clarior?) prompti volentesque sequamur magnam illum Deum. Scripsissem ad Moretum & heredes, sed ita me salus amet, ut ego minime aptus sum ad solandum. Non quia iaceam (hoc dedecus Constantiae nostrae non imprimam) sed quia haud ita firmiter stem, ut erigere alios possim. Vacillo ipse, & rationum idem idem fulcro me sustento. Ad te nuper breuiter scripsi de Italia: hunc hoc addo, omnino ad nos venias, priusquam in alterutram partem aliquid decidas. E re tuâ erit: nec quicquam suadebimus, non dicam praeter utilitatem, sed fortasse nec tuam voluntatem. Ades. Postrid, Idus Iul. *Id. LXXXIX.*

EPIST. LXXV.

Romam.

FRANCISCO BENCIO.

TANDIEM, tandem, vias atque litteras. Nam & ego ordiar à quæstione. Tu ne mihi si quidem fateris, ego scripsisse scilicet me testor, sed tamen frustra. Quae autem mea culpa est, si homines parum fidi hodie aut diligentes? Ego te, mi frater, diligo: & nunquam suavis illam consuetudinem nostram ramminor, sine interioris animi motu. Tua littera me excitant, & velut adspirant in hoc languore nostro vitalem aliquam auram. O terra, o viri! utinam per vires aut tempora vos regissem! Sed ego, mi Benci, inclino, non tam avo fractus (eâ parte adhuc vireo) quam

EPIST.

a 2

lento

lento & nescio quo intestino morbo. qui tamen vitæ officia atque ipsa studia leuiter interpellat. Vos iacturam ante biennium in Mureto fecistis: cuius Senecam, extremum opus, omnino probamus. Orationem tuam in eius funere, & quicquid tuum, vidisse velim. Rarò ad nos veniunt meliores cæli illæ deliciæ: & possunt tamen per Plantinum. Ad eum virum mitte, quidquid ad me voles: & inprimis (per sacrum illum Amorem te rogo) si quid editum à te, aut edendum. Cæsura vis: libera erit. Laudes effusa. nec alius hodie id fecerit magis ex affectu. Amo, amo, prius illos meos ignes, & in iis puriter liquefco. Illustrissimum Sirletum superesse apud vos gaudeo, columnen perfectissimum virtutis & doctrinæ. Fulvio Ursino quid sit, quid Latino Latinio optimo seni, grati si per te sciero: & si à me eos salutabis. Edidi quædam nuper, sed leuia, nec nunc mittenda. Vale, & me ama tui & probitatis amantem. In Bat. prid. Kal. Septemb. ∞. IO. LXXXIIX.

EPIST. LXXVI.

GERARDO TVNINGO.

Ad litteras tuas, mi Tuninge, breuiter respondeo: & hoc ipsum amoris est, quòd respondeo. Nam etsi vis illa morbi me reliquit, tamen languor & debilitas manet: nec mens aut manus satis apta ad suum munus. At ego te ex animo amo, & crescenti virtuti tuæ faueo: eoque expressa mihi hæc scriptio, eius iudicij mei index. In foro versari te iam credo: & quamquam res nondum calent (tempus ista adfert) tamen carceres tibi aperti ad cursum. Stadium hoc sub initia molestum & arduum fortasse videbitur: dies molliet, & scopus qui tibi in oculis esse debet, cum Lucro Honor. Dignitas enim & splendor plerumque ab isto campo. Ego ad amicos meos cum scribam, nò deero te commendare de eâ notâ quâ te noui. Tu confide. sponsor ego tibi, si perges hac Virtutis & Modestix viâ, quâ cœpisti, de optimo successu. Vale, & duo illa, ac me vnâ, ama. Lugd. nostræ Bat. v. Kalend. Decembr.

EPIST.

EPIST. LXXVII.

THEODORO CANTERO.

CVM mutationem rerum audiui, quæ apud vos facta, lætatus fanè sum, quia omnia in melius versa & modestius: nec tamen valdè miratus, quoniam veterem illum statum violentum & turbidum, sciebam non posse esse diuturnum. Illud nescio an lætari debeam, te potissimum electum qui clauum teneas in hac tempestate. honori tuo quidem gratulor, idque amicissimo animo: sed molestias video, atque adeò discrimen etiam quod adiunctum, nisi clementer te dirigat & seruet ille qui te huc destinavit. Id quod spero, & eum ex affectu rogo. Illud ego valdè velim & suadeam, ita clementer & leniter omnia nunc administrari, ut vix appareat cōuersum esse orbem rerum: appareat, inquam, dolore cuiusquam aut pœnâ. Vltio & affectus seponantur; & satis sit (meo quidem iudicio) inutiles homines remoueri ab reip. administratione. nisi si quis est vnus aut alter, qui palàm in eâ se gesserit malâ fraude. Sed nec omnia subitò mutanda, etiam quæ mutari melior ratio suadet: lentè, lentè, & minimo sono. Pro nostro Arcerio sollicitor. manebit illi sua conditio: velim, quod in te sit, iuues. Non enim puto virum è calidis illis esse, qui omnia & omnes turbant. Thinnius noster an redierit, nōdum audiui. omnino ego opinor: & ad mouendum iterum rebus virum peritissimum rerum. Quod cū sciero, ad eum scribam. De Prætoris reditu, audiui: & velim meo nomine illi gratuleris. Nisi aura hæc turbida impediret, ego fanè ad vos euolarem, & facerem linguâ quod nunc stilo. De filiis tuis, ij mihi curæ erunt. Sæpe me adeant, semper mihi grati. Vale. I V. Idus Octobr.

EPIST. LXXVIII.

Preslaniam.

IACOBO MONAVIO.

LITTERAE tuæ à se gratae, mi Monavi, hoc asperum habuerunt & triste, quòd nunciârunt de morte Andreae Duditij, magni & sapientis viri. Qui, etsi præter ætatem nihil passus videri potest, aut præter communem illam legem: tamen profectò dolori est, & amicum nos amisisse, & Germaniam in hoc statu

* ignem ad
ignem.

fratu rerum spoliatae notae modestiae & prudentiae viro. Nam in aulis Principum, quam multi passim, ut sic dicam, incendiarij turbarum, & qui ^{* πῦρ ἐπὶ πῦρ} addūt: à quorum ingenio alienissimus hic noster, natus sedare civiles istas tempestates, non excitare. Sed deo pacis visum vocare ad se istum Pacatorem: ideoque feramus, in Constantiae nostrae monitis fixi. De amore tuo in me, gratiam non habeo solum, sed refero. quomodo? amando. atque ego te vnum hoc pretium expectare scio tui affectus. Mihi quidem iucundum & quasi pabulum quoddam studiorum est, amari non tam à magnis, quam ab eruditis & vitâ quoque probis viris: quâ in classe te scio esse, optime Monavi. Nos valdè nunc distringebamur editione Politicorum. quod opus Regibus Principibusque scriptum, utinam vsui quoque iis sit quod non despero, si capere tamen poterunt eius generis scripta. Sed deus videbit. ego arduo labore defunctum me scio, & soluto pede ad mitiora & planiora iturum. Thraseas noster omninò differendus est, & te aliosque rogo, nequis me roget. Vale Clarissime Monavi, reliquum in iis locis affectus mei fulcrum. Nonis Iuniis.

EPIST. LXXIX.

LAEVINO CALVARDO.

SCRIPTI O tua mihi grata, & scribendi causa. Amor in me, & humanitas in adfectos te impulit: quorum utrumque amo, & hanc etiam laudo. At illud mihi iuxta ac tibi novum, fuisse in eo grege Hispano hominem Latinas quoque litteras doctum, & doctorum amantem: cui auxilium, aut certè solatium, meritò debemus. Id, quod in me est, non faciam solum sedulo, tam amicâ praesertim tuâ rogatione inuitatus, sed iam feci. Conueni quosdam qui cum Praetore huius urbis agant, qui nauim eam cepit, & in cuius hic est manu. Videbo an in urbem nostram adduci possit, eamque habere pro custodiâ. Sanè Musarum illum alumnum, a quo iure censeri cum Barbaris, ignominia nostra sit mi Caluarde, quem ex animo saluere iubeo, & me amantem tui quoque amare. xv in Kalend. Septembr.

EPIST.

EPIST. LXXX.

DOMINICO BAUDIO.

PLYSCVLAS à te litteras accepi, fateor: ad quas filui, non voluntate aut subitâ ignauia, sed quia deinceps sic cogit valetudo. Tibi narro Baudi. frangor paullatim, frangor: & per assiduum hunc languorem deserit: ponitque calor & vigor ille in nobis, velut ventus. Velo ferri solebamus, nunc vix remis. Politica etiam mea, serium opus, valdè me tenuerunt. Nunc ipsa absolui, nondum quæ ad ipsa: id est Notas. Inuidia fatebitur arduum & operosum opus esse, nescio an probum. Tu certò & semel sic existima, te à me æstimari, amari: & semper id fore, siue scribo, siue fileo. donec perpetuum tamen filebo. De munere siue titulo, quo non sine fructu gaudes, tibi gratulor, & voueo atq; auguror maiora. Amande ama. Idib. Iul. ∞. IO. LXXXIX.

EPIST. LXXXI.

In Hungariam.

MICHAELI FORGACZ, libero Baroni de Gimes.

AMANTER valdè me prouocas ad scribendum pariter & amandum. quis tu es? ignotus mihi, imò notus, vel ex vnâ epistolâ istâ, in quâ faciem video pulcherrimè mētis. Etiāne ille vester remotus & verè Martialis tractus, educat ac profert Palladias istas proles? gratulor tibi hanc indolem, te patriæ: quæ profectò præsidium grande & lumen exspectat ab eiusmodi alumno. Quòd si hanc directam ad laudem & Virtutem viam, plerique è tuâ classe ingredi vellent: quid Europâ beatius? quæ nunc iacet misera vndique telis confixa ciuiliū barbarum. Sed resurget profectò aliquando (& ea certa spes me tenet) eiusmodi adminiculis & fulcris. Tu perge, & te litterarum ac Sapientiæ studiis primū, mox patriæ trade: palàm facturū, quantum interfit inter doctos cultosque Nobiles, & istos, qui nihil lucis habent nisi à luce maiorum. Meam quidem amicitiam quòd appetis, ita cupidè offero, vt ipse propior appetenti sim: & in tempore ostendam. Lucubrationibus nostris quòd delectari te scribis, vtinam & iuuari! Spero tamen id facturum opus quod nunc edo, in quo Principem formo & eos qui ad gubernacula rerum admo-

ad inouentur. Laboriosè mihi opus scriptum fateor: sed vobis, vobis, non huic vulgo. qui nec capiet, nec si capiat, fructum faciet in præceptis quæ nihil ad ipsum. Regendi imperandique munus vobis conuenit; plebi *obsequij gloria*, vt ille inquit, *relicta est*. Nobilissime Baro vale. Nonis Iuniis, ∞. ID. LXXXIX.

EPIST. LXXXII.

Coloniam.

GVLIELMO CRIPIO *Filio.*

* omni vir-
tute deco-
ratum.
* Sanguis
es boni cave
pner.

* malum
vana dice
re.

AD epistolas tuas respondere, mi Cripi, magis volo aliquando quàm possum. Distringimur nimis sæpe, nec cùm nuncius appellat, vacamus illicò ad scribendum. Addo, quòd plerumque ille festinat. Hoc semel scito, & excusa. Aliàs, amo te, tuumq; ingenium: quòd excitari etiam nostrâ voce non nihil velim ad pulcherrimas artes. Etsi enim per te promptus erectusque es: tamen vt equum in cursu plausus, sic optimam indolem laudes & approbatio iuuant. Quanquam quid valdè iis apud te opus? patrem habes, * *πατρὸς ἀρετῇσι κεκασμένος*, vt ait Homerus de Vlyssæ: virum reuera & vsu & doctrinâ inter Belgarum primos. Hunc audi. * *Αἷματι εἰς ἀγαθὸν φίλον τέκνον*: quæso ne degenera, & lucem quoq; à te aliquam adfer ad illam lucem. Quod porrò scribis de libris illis prisca: magis est vt voueam, quàm vt credam. Sæpe iam ita decipimur. Blandi rumores sunt de *Ciceronis Republicâ*, de *Linij reliquis*: sed rumores. — * *καὶ δ' ἀνεμώλια βάσεν*. Vale, & in virtute ac doctrinâ pariter mihi cresce. Lugduni Bat. Postrid. Idus Mart.

EPIST. LXXXIII.

IOH. ARCERIO.

* & ab in-
timâ men-
te gaudeo.

VIR doctissime, Res tuas iterum stabili loco esse, idque in ipsâ patriâ, valdè tibi gratulor, * *καὶ ἐπὶ βαθείας γνῶμης συγχαίρο*. Præsertim cùm honestissimum illud munus adeptus sis, & in locum successeris viri nobis olim amici. Ita profectò est. Deus non deserit suos, sed abducit à loco vt ad meliorem reducat, & obiicit sæpe non sperata. Nos in tenui & veteri nostrâ valetudine tamen Politica absoluimus: quæ vtinam ne mecum lan-
gucant,

gueant, & sint, quod dicitur, * *ἵππευ γῆρας*. Mihi tamen firmum * *equi se-*
compactumque opus videbatur, & ferendo æuo: sed mihi. Ve- *nium.*
stra aliorum iudicia exspecto, nec ante me do ad absoluendum.
Nam quod ad notas attinet, * *μέγα ἔργον ἀρεκτον*, vt ille inquit: & id * *magnum*
quoque fecit morbus. Exemplaria quattuor ad te mitto, distri- *opus imper-*
buenda pro inscriptione singulorum. De Galliâ, credo vos au- *fectum.*
disse magnum illud facinus, & inopinatam Regis cædem. Ego vi-
deo Deum res magnas, res novas moliri, & conuersionem status
in vniuersâ Europâ.

* *πολλὰν πόλιν κατέλυσεν κάρλω,*
H δ' ἐστὶ καὶ λύσει.

Vtinam saluis nobis! Vale vir ornatissime, & cum vxore tuâ a
me meaque salue. Lugd. Batauorum, x i i i. Kalend. Septemb.
∞. Io. LXXXIX.

* *multarū*
urbium
soluit cul-
mina: Atq;
etiam sol-
uit.

EPIST. LXXXIV.

ISAACO CASAUBONO.

NON redditas tibi litteras meas, mi Casaubone, non miror
solum sed indignor. Spernam ego te? ne differam quidem:
& respondi illico vt accepi tuas. Grata mihi & à tali ingenio,
quod iamdiu æstimo: & à tali affectu, quem calidum profecto
in me promissis. Amo, amo vicissim; nec tam frigidum aut rigi-
dum mihi pectus, vt non incalescat & moueatur ab hoc igne.
Strabonem tuū vidimus, & multa in eo proba. perge per Deum,
& quoniam Scaliger noster in hoc genere toto silet, tu prodi &
age hanc personam. Decenter, mihi crede, potes. Sed, heu, Gallia
vestra quam æstuat! vetus, flores, & illud regnorum, vt sic dicam,
regnum, quam periclitatur non conuerti sed euertere! Illacrumo.
nam fateri debemus illustrium ingeniorum iam ab aliquor annis
hanc matrem fuisse, aut sedem. Nos quoque in veteri nostro bel-
lo: sed minus feruido, & consumimur lento quodam igne. Fera-
mus; & nos, mi Casaubone, istis litterarum Sapientiaque studiis
inuoluamus: in quibus subductio, aut certe aliqua seductio est
à turbis. Vale. Lugd. Bat. Postrid. Non. Sext.

b

EPIST.

PHIL. MARNIXIO.

ACCEPISSE te librum nostrum, legisse, probasse, serio ego gaudeo. In tuo iudicio quidni acquiescam? qui secasti hos fluctus; & bene penitus te immerfisti in rerum ciuiliū istud mare. Nosti ergo, & peritiam tibi ingenuit ipse vsus. Qui nobis quidem modicus adest, & liberè cum Homérico adolescente fateor,

* Neg. ego
adhuc ser-
monū pru-
dentium
usum ha-
bio.

* Οὐδὲ τι πῶ μῦθοισι πεπερημένοι τυχεροῖσιν.

Quò magis vestrum est, monere & dirigere siquid peccamus. Quòd malles in Eusebeas illà re verbis quoque me εὐσεβῶν, spretis illis profanis: fecissem profectò si distinctius & accuratius dicen- dum de iis mihi putassem. Hoc omisi, aut distuli: & causam nòn- ne vides? Cùm tam pauca & timidè dixerim, nunc quoque vn- dique incurrunt, pænè dixerim,

* aggressi-
bus suis
similes.

— * ἀγροτέροισι σὺ ἐσσι μοιότις.

quid futurum erat si magis me diffudissem? Libaui igitur: & ideò in stilo quoque nihil mutauī, & exiguam illam laciniam pertexui filo quo reliquam vestem. Quod si tamē tibi hīc aut ali- bi aliud videtur; mone, & me deuincies. Aliorum voces siue ca- lumnia, asperæ: ἀγαθὴ δὲ παροργισίς ἐστιν ἐπαίρη. Tuus Gedeo Bot- zelarius mirum est quàm se nobis probet, modestiā, diligentia, profectu. Stirpe suā dignus euadet. Vale. Lugd. Bat. Prid. Kal. Oct.

* bona ad-
monitio
amici.

EPIST. LXXXVI.

Leodiam.

DOMINICO LAMPSONIO.

IAM nunc mihi adest, qui ad vos abit. Ipse tibi dicet, tempus mihi non fuisse ad longam scriptionem: atque adeò, vt fami- liariter tecum loquar, è lectulo me excitauit. Sed vigilo, vigilo cùm Lampsonij nomen auribus & mēti meæ insonuit. Iamdiu etiam ego à te nihil. quid tum? tam scio amare te quàm me spirare.

* Non est
amator,
perpetim
qui non
amat.

* Οὐδεὶς ἐραστὴς ὅστις οὐκ αἰεὶ φιλεῖ.

Politica nostra absoluimus: cape, lege, arbitrare. Nam iudicem aliquem te tuique similem, valdè mi Lampsoni volo: versatum in rebus scilicet, nec à lectione solùm, sed ab vsu doctum. Vide sicu- bi erra-

bi erramus. Breuia ista sunt, & adstricta, fateor: sed apud te quid excusam? scio in eiusmodi rebus rem te velle, non supina aliquot & natantia verba. quò nimis ferè inclinant, qui res Ciuiles hodie scribunt. Nimis, inquam, se per disputatiunculas diffundunt. At mihi Cretenses illi probi: quos Plato ait * πολυλογιαν μᾶλλον, ἢ πολυλογίαν ἀπεισσαι. Nos iam in manu habemus Dialogum *De magnitudine Romanâ*: & perficiemus si Deo visum. Epistolarum etiam Centuriam alteram extrudimus, & priorem reformamus. Apud me ista: tu quid? scribe, scribe, nec (quod callidæ amantes solent) desiderio nos torque. Lugduni Batavorum, Postrid. Idus Sext. ∞. IO. LXXXIX.

* multa
menti ma-
gis, quàm
multis ver-
bis studere.

EPIST. LXXXVII.

FR. RAPHELENGIO *Filio.*

MI Raphelengi etiam nunc fluctuas? quousque? Semel statue rationi & nobis pareas, an tibi. Illa suadet differri iter in proximam æstatem, ob causas multas. E famâ tuâ erit, è re tuâ, ex vsu familiæ Plantinianæ. Tam citò solui & abrumpi illum cœtum sublato capite, sit indignum. Causas quas habes, ego quoque intellego, atque adeò approbo: sed calidè nihil fieri volo aut importunè. Ne nimis cupidè cupe quod cupis. Mali ominis sit nimia hæc festinatio. Audi me ex animo loquentem. Ire te in Italiam ad multa vtile est: vt absis ab his turbis, vt videas & discas, vt locum & occasionem quæras emergendi. Hæc omnia vera sunt, & suadeo: sed hoc quoque verum, magis decòre te iturum post aliquot menses, magis tutò sub æstatem, & magis prouidè omnia ac dispositè acturum. Vtinam antè te vidissem! id quoque è re tuâ fortasse esset, & certè ex meo voto. Sed nos ea audimus, vt verear ne breui interclusæ omnes viæ. nisi si ipse sub Ver proximum in Germaniâ me sisto, quod haud despero. O iuuenis in quod æuum incidisti! sed tene viam rectam, haud pœnitebit. Ne pugna cum temporibus, & serua te ad meliora fata, sed sub tegmine & vimbâ semper modestæ Virtutis. Ego desino: haud multa libet. XIII. Kal. Sextil. ∞. IO. LXXXIX.

DISTVLI respondere litteris tuis, sed sine tuâ vllâ noxâ. Nunc id facio per Legatum Regis, cuius negotia tibi commendo, & peto, quod in te est, ea matures. Nostri quàm lenti sint, præsertim vbi pecuniaria res est, non te fugit. Politica grata tibi fuisse gaudeo: quæ tu quod thesaurum appellas, magis ex amore facis, quàm quia merentur. Hoc tamen liberè dixi & repeto, ruminanti ea plusculum aliquid semper suboriturum quàm primâ specie visum. Hortaris me ad reliqua, & præsertim ad Aristocratiam. quam ego quoque probo mi Vosbergi, sed bene compositam, & qualis illa Spartanorum fuit aut hodie Venetorum. O quis deus eam dabit! Tamen illam quoque conceptam in mente habeo, & vnius omnino libri res erit. Sed priusquam aggrediar, certum mihi audire & libare iudicia de toto hoc genere scribendi. & si vniuersum displicebit, filere; (cur enim vela faciam aduersis ventis?) si in parte; cognoscere, & refingere siquid minùs rectè aut considerate à nobis scriptum. Nam id numquam pigebit. Apelles in magnis suis laudatisque operibus hoc seruabat, vt ea publicè proponeret omnium oculis ac linguis, atque ipse velo aliquo rectus iudicia venaretur etiam minimorum: cur nobis hoc non fas in opere quod tangit omnes? Sed nec Notas, vt vides, plenè absolui. quod caloribus istis immodicis tribues, qui valde me dederunt in languorem. Te valere opto, & nos amare. Lugd. Batauor. XIII. Kalend. Septemb. ∞. IC. LXXXIX.

EPIST. LXXXIX.

NATHANI CHYTRÆO S. D.

ACRES quasdam faces epistola tua mihi subdidit, quam ipse amor tibi scripsit. Non me fallunt supina quædam aut natantia verba, & illa quæ ab imo pectore profecta. Talia tua sunt. & iam mihi carior noster ille Lydius, per quem tu quoque inter meos caros. Quid verbis me diffundam? redamo sic amantem: virtutis doctrinæque tuæ merito primùm, sed etiam fratris aspectu, qui mihi inter Germaniæ primos. Scripta tua &
illius

Illius iam olim vidimus, & tenuistis nos sæpe illâ * γλυκεία Σειρήνι * *dulci Si-
rene ser-*
* λόγι. Non plura apud te. pergamus in hoc cursu, & quod re- *monum.*
liquum est vitæ viuamus — * φίλα εἰδότες ἀλλήλοισιν. *Accipe daq;* * *mutuum*
amantes.
fidem. & salue. Lugd. Bat. Idib. Mart. ∞. Id. XC.

EPIST. XC.

MARTINO LYDIO.

AMICA tua epistola, vt semper, atque etiam anxia pro no-
strâ famâ. Agnosco amorem: sed de purgatione, quod scri-
bis, quæso omitte. Quid me eluas apud eos, mi Lydi, quibus de-
cretum quacumque de causâ * μάμον ἀνάγει? Ieiuna imò turpia * *maculato*
sunt quæ adferuntur (ago liberè:) & te aut me non noui, si hæc *inurere.*
* ἀπεδαιότῃ excuso. Impiè hoc scripsi, inquiunt, quòd Religio- * *diligen-*
nem omnem tolero in repub. modò vetus. Etiãne gentilium? *tis.*
etiãne Turcarum? etiam. Vbi hoc scripsi? Verba adfers. sed ô
boni, ergo notulam illam graue iis legere, quæ ad oram? Coërcui
enim ecce, & restrinxi: **M O S P R O B V S** & *vetus seruandus.* Sa-
tin' clara hæc verba: ita vetus tenendus, si probus. Iam illud al-
terum, in quo sæuitiæ me arguunt, bellum. Quis verba ea bonus
integerque vir legit, qui non capiat ex meo bonoque sensu? At
possunt aliorum flecti. Multa talia in omnibus scriptis: sed eos
nempe carpinus, qui sic flectunt. Melissæ aliquæ flores nostros
insideant, non istæ Arachnæ. Quid verba facio? his talibus sua-
deor, non vt aliter scribam, sed vt ne scribam: & silentio tuti si-
mus, quoniam ratione vix licet.

* Δυσμενέες γὰρ πολλοί ἐσ' ἡμῶν μηχανώονται.

Ego tibi verum verbum dicam. Quosdam ex istis torquent non
quæ scripsi, sed quæ non scripsi. Intellege, & me iam olim tuum
ama. Lugduni Batauorum, xvi. Kalend. April. * *Multi*
maluisti
in nos ma-
chinantur.

Qui has tradet, Nansius Filius erit, vt opinor. Faucas ei quæso
meâ causâ, & aut cœptâ spem promoue: aut si ea mortua, in no-
ua hac iuua. Ab ipso audies. Saluta amicos Arcerium, Drusium,
Eilardum. Ecce responsum etiam ad Nath. Chytræi episto-
lam: rogo te cures.

EPIST. XCI.

REGNERO GRUTERO.

GRATAE mihi tuæ litteræ, mi Grutere, nec est quod excu-
ses. Peccares, nisi sic peccares. Ego, etsi non semper respon-
dere aut scribere vacuus, tamen legere: & nimis quàm libens ser-
mones vestros libo, qui aliquando in nostrâ disciplinâ. Statum &
formam Academiae vestræ per te cognoui. probus est: sed in pri-
mis ille vir magnus, quem iure laudas. Iunium intellego: cui tu,
mi Grutere, adhære, & recondita multa hauri ex arcano illo vbe-
riq̃ penu. Chrysmannus aliquîdne De tēporibus post Scalige-
rum: durus ille concursus est: & tamen scio esse, quæ post eum ad-
di illustrariq̃ possint. Nos post Politica edita redimus in vete-
rem campum; & vel mores Romanos illustrabimus, vel spinas
aliquot in eo runcabimus Criticâ istâ falce. Deus valētudinem
modò & otium mihi det: de quorum altero vix spero, cū tur-
bas video quæ in Galliâ natæ. Vale mi Grutere, & idētidem
me appella. Lugd. Bat. III. Id. Sextil. ∞. IO. LXXXIX.

EPIST. XCII.

MICHAELI MONTANO.

VIR Nobilissime, per epistolam rarò te alloquor, sæpissime
animo & affectu. Vtinam res vestræ aut nostræ quietiores!
numquam ego deum videam, nisi te viderem. Nam litterarium
hoc colloquium, nugæ: meri amores & mera suauitas, os ali-
quod amicum intueri & amplecti. Sed, ut ille ait,

* Νῦν δ' ἐρέω εἰς ἄλλοιτο θεοί. —

Politica nostra tandem edidi, diu pressa, & nescio an vel nunc
emissa aue satis faustâ. Æuum ego & hæc præiudicia an ignoro?
sed tamen temperasse me videbis, & nihil nisi communibus præ-
ceptis scripsisse: excipio paucula de Religione. In quâ consilium
nostrum nec improbum, nec imprudens fortasse apud probos.
O tui similis mihi lector sit! & tu iudicium tuum liberè, & ut vir
es, scribe. Turbæ apud vos magnæ: si ingenium tuum noui (ut
certè è scriptis noui: in quibus non fallax tui imago.) quiescis.
Quod ut tutò & diu possis, æternū Deum rogo. xv. Kal. Octobr.

EPIST.

EPIST. XCIII.

NICOLAO OVDAERTO.

ACCEPISSE te libros Politicorum, mihi gratum, & magis, te probasse. Ex animo tibi dico, probari tui similibus lucubrationibus nostras gaudeo, etsi pleraque scribimus non huic ævo. In illo ipso opere Politicorum, quàm multa parùm ad palatium huius illiusque partis! nec aliter fuit, aut erit, ubi sunt partes. Veritatem puram candidamque ego scio, & immunem ab omni affectu. Ut oculi, ubi glaucoma obsidet, puriter non vident: non item mens, ubi adfectus. Præiudicium iudicium omne tollit. At in iis quæ de Fato scripsi, gaudeo quòd liberè mones. etsi ego me insistere tritam & priscam viam sentio, nec in alià mēte esse Thomam & argutos illos in Ecclesiâ Doctores. Tamen si quid aliud, videbo: & tuo monitu libens non explicabo solum; sed, si opus, retractabo. An me pudeat? numquam. & veram rectamque viam tardè videre & inire possumus, numquam serò. Magnum illum virum nobis obiisse, doleo: & heu patria, quàm talibus nunc eges! Imperus & calor est, qui nos perdiderunt & perdent. Sed ego longius progredior. cui hoc tantum propositum scribere: me te amare, & gaudere in amore tuo mei: quem ut propages deinceps ac serues, consuetudinis causâ, rogo. nam necesse non esse, facile ex eo mihi liquet, quòd sine vlllo nomenclatore, tot annos firmiter eum in arcanâ istâ mente coluisti. Vale Vir amicissime. v. Idus Nouemb. ∞. IO. LXXXIX. Berchemij nostri mentio in epistolâ me excitauit. quid illo sit? ubi est? amo, amo, virum.

EPIST. XCIV.

HVG. BLOTIO.

VERE diuinasti. perierunt litteræ tuæ quas Thisio dedisti: neque ego vllas, præter has à συμβιωταῖς meis, vidi. An ego tam diu aliâs siluissē?

* Ζεὺς τό γ' ἀλέχησεν ἐν ἀθανάτοι θεοὶ ἄλλοι.

Meritò amantes ego mei redamo, & te mi Bloti inter primos, verum & veterem Musarum mystam. Ergo scito amicitiam tuam mihi caram, gratum etiam de scriptis iudicium: quod

* Iupiter
hoc auer-
tat, & im-
mortales
dij alij.

etsi

et si nimis sumit ab affectu, tamen, liberè fateor, his talibus

* *augetur
intus ani-
mus.*

— * *αὐξήσεται ἐνδοῦ θυμός.*

Tu si me litteris tuis sæpiùs appellaueris, & in iis rerum etiam aliquid asperferis quæ istuc geruntur (præsertim siquid ad nos & hæc studia:) beabis, & reipsâ videbis prouocatum à te, quod dicitur, * *ἡ πόλις εἰς πόλιν*. Vale. Lugd. Bat. Idib. Martiis.

* *equum
in plani-
ciem.*

Illustri Baroni Hieronymo Beck à Leopoldstorf gratiam debeo pro affectu in me, quem ex animo iubeo saluere. item nostrum Leunclauium.

EPIST. XCV.

EVERHARDO REIDANO.

SCRIPATIO tua me affecit, & iudicium de Politicis; quæ votum mihi præcipuum est vt approbem vobis. Aliorum fermunculos quid curem? placere iis & satisfacere in alio quouis argumēto magis possum, quàm in isto. Ego liberè quod mihi visum est dixi, & sæpe magis ex vsu publico, quàm ex gustu. At sunt etiam quidam qui Batauiæ finibus me includunt, & omnia scribi volunt pro hoc statu. Inepti! quod non Plato, non Aristoteles, non quisquam veterum fecit, qui scripfere aliquid in spem diuturnioris æui. Hic illa forma reip., alibi alia: atque vtinam nobis Princeps sit, sed ille astrictus & legitimus, & qualem formo. Iam etiam quidam diffundi me voluerunt, & iuisse potius per liberam semitam & vestigia nostra. Haud difficile mihi, fateor: sed aliò me duxerunt rationes quas dixi, & quas non dixi. Faciam tamen aliquando, si viuo, & Notis meis siue Commentariolis abundè explebo hanc sitim. Mihi iam nunc materies ea parata, sed premimus, & calamus paullisper retinemus scripturientem. Ego, vno verbo, te amo, & id mihi fieri à te percipio. Vale. Lugd. Bat. XII. Kalend. Mart. ∞. IO. XC.

EPIST.

EPIST. XCVI.

Londinium.

LANCELOTO BRUNIO.

PADDEIVM tuum insignem virum libens vidi, & officia præstiti quæ potui prolixè. Malo ab ipso hoc te audire. Sum naturâ in omnes benignus, tum maximè in nostri gregis homines, & qui commédant se colore isto litterarum. Colore inquam, non fuco. quia reuerâ Paddeius tuus, imò iam noster, seriò se melioribus istis scientiis tinxit. Nos titulum ei dedimus, sed rem attulit ipse ad nos abundè. De valetudine meâ quid scribam? potes ex ipso audire, qui *autòr* *est*. Tamen vos medici probè scitis, quicquid dissimuletis, leniri non tolli hos morbos. Vbi semel radices egerunt, hærent. Itaque languco, & præsertim per hos Caniculæ insanientis æstus, qui corpus hoc per se siccum & aridum, pænè reddiderunt cornu. Animo tamen egregiè adhuc sustento: & deus mihi seruet hanc mentem, nunquam eâ parte succumbam. Britanniam vestram & vos amicos videre iam diu gestio: sed nescio quod impedimentum mihi nascitur aliud ex alio: & ægrè muto locum, quem nunquam tamen sine fructu & bono valetudinis muto. Sed videbo, & fortassis aduolabo *παρά δ' ὄζαν*. Franc. Vlmi *De Liene* iam diu lêgi, missum ad me è Galliâ. nam ego vestra medica, præsertim si quid elegantius, valdè appeto, & diuerto suauiter in illos Naturæ hortos. Tunc in eodè argumento diuulga, & doce nobilem aliquem vsum in nobili illâ parte.

Sed heus tu, quid Typographis vestris visum Politica mea recudere? non debebant. *Ατελές* adhuc opus est: & præterea, prima illa exemplaria ad vos missa, haud satis emaculata. Alia aut emendatiora sunt, aut præferunt certè suas mendas. Itaque factum hoc non amo: sed te fideliter mi Bruni. Vale.

c LECTO-

LECTORI.

ERANT in editionibus aliis Epistola quaterna, qua
Eioci aut salis aliquid haberent, non in gentem, sed in
hospitia gentis, & praesertim rusticana. Aliqui morsum
aut lesionem interpretati sunt: & quia non est, nec fuit is
animus, nunc omisimus induximusq. Earum loco ista
Centuriam expleant: qua defensionem habebant, & si-
ne cuiusquam malâ gratiâ, opinor, legantur. Vale.

EPIST. XCVII.

TYPOGRAPHVS LECTORI S. D.

EDIMVS hanc Epistolam, Lector, etsi auctore non tam volente, quam non nolente. Nec enim edidit, ut ederet, non certe sic sola: sed quia iam factum in Germania ipso ignarissimo atque inuito, frustra teneri videt quod effugit. Evénit etiam, quod solet, ut fugitiva parum compta esset atque ornata, imò parum recta. quæ causa illi maxime, ut edi pateretur iterum, minus mali scilicet si minus malam. Itaque propriam ei vestem reddidit, & qualis in arculâ remansit. Hoc tantum serio testatur: ne nunc quidem ista quasi publicè responsa velle. quid opus in rebus leuibus? & abest alioqui animus eius ab omni non solum concertatione, sed defensione: & putat sapientius spernere hæc talia, quam refutare. Presidium famæ, non in verbis, sed in vitâ suâ ponit: atque illam integram sperat apud eos, qui hanc norunt. Quod ad scripta etiam attinet, acrem sed æquum iudicem non recusat: in quibus siquid erroris alibi aut caloris, prouocat ad humanam conditionem, cuius hoc proprium, sicut nusquam labi diuinæ. Id tantum rogat, Lector, ne leues aut liuidi homunciones te moueant, neu calumniis istis temerè acceptor sis: quia illud verissimè dictum, *Διαβολὴ ἔστι δεινότερον ἐν τῇ δυνάμει αὐτῇ ὡς οἱ Herodot.* *ἀδικούντες, εἰς δὲ ὁ ἀδικούμενος.* Calumnia res iniquissima: in quâ duo VI. quidem sunt qui inferant iniuriam, vnus qui ferat. Tu ne alter ex his esto, & hoc Menandri cogita.

Ὅστις δὲ διαβολῇσι περὶεται ταχὺ, τοῖς ἄλλοις ἀντιπαραστήσειται.
Ἡ τοὶ κοινὸς αὐτὸς ἔστι τὰς πόλεις,
Ἡ πάντα πᾶσι καὶ δαίμων γινώσκων ἔχει.
 Calumniis quisquis fidem præbet citò,
 Aut ipse mente moribusque est improbus,
 Aut mente eadem cassus, & prorsus puer.

Vale. Antuerpiæ. Kal. Septembr. 1610. XCVII.

EPIST. XCVIII.

I. LIPSIVS IACOBO MONAVIO S. D.

IN C O L V M E M te rediisse ex Pannonicâ peregrinatione (Ortelius indicium fecit) ex animo, mi Monavi, gratulamur, &

c 2

Deum

Deum rogamus, ut in patriâ quoque talein te seruet. Nos adhuc in peregrino solo apud Eburones : vrbe, in quâ olim & nunc, in nos proni & benigni. Tamen deliberamus sub æstatem de sede aliâ, & magis certâ: si quid tamen certi in hoc motu rerum. Nam quocunque me verti, in hoc ambitu aut palâm bella, aut eorum metus. At nos quietem, ut scis, quærebat: ubi inueniendam nisi in superis illis locis, & æternum quietis? Tamen de pace nunc aliqua mentio. sed mentio magis, quàm adfirmatio: & qui statum rerum peruident, parum etiam sperant. Sed cum Poëtâ,

* Verum
Iupiter hæc
scit Olym-
pini: æthra
habitor.
Homer.

* Ἀλλὰ τὰ γὰρ Ζεὺς οἶδεν ὀλύμπῳ αἰθερὶ ναίων.

Ei nos hæc, & nosmetipsos permittimus: certi, quod non magnam illam solum orbis nauem, sed hanc quoque cymbulam dirigit Providentiæ suæ clauo. Sed quod ad Quietem, fascinare eam nuper Saturnius quidam oculus voluit, calumniis in me iactis, quas vidisti. Voluit, non fecit: nam nos hæc talia adeo ad animum non admittimus, vix ad oculos: & sciunt amici, quàm multis denique mensibus post inspectus mihi hic libellus. Curiosi & auidi quid simus talium? quæ certum nobis est contemnere magis, quàm vindicare. Atque adeo, bonâ fide, nec nunc vidissem: nisi ijdem monuissent, inesse quædam, quæ non ad famam doctrinæ nostræ solum pertinerent, sed & probitatis. Inspexi igitur, & quid dicam? Scriptum vniuersum est compositum ad inuidiam pariter & infamiam, quam mouet mihi apud homines singulos, & apud gentes totas. Deus immortalis, hanc acerbiter cadere in Christiana pectora? idque ob leues aliquos, scanatiles, & ut grauissimè dicas, improvidos iocos? Nam in Vuestphalos ecce aliquid dixi. Hoc caput, hæc arx accusationis est. Testor fidem, Monaui, animo & mente nihil nec luisse quidem in ipsos, sed in ea, quæ ad ipsos. Vbi virtuti eorum aut robori aliquid à me detractum? De cultu dixi, & genere vitæ externo: quod valde elegans apud ipsos esse, nec ipsi quidem dicant. Atqui nefas illa tangere. Quid Erasmo igitur fiet, qui tam vbertim & liberè illudit in hospitia omnia Germania? Quid Clenardo, qui in Hispaniâ? Nec tamen usque adhuc vidimus, qui dicam iis scripsit. Ferri solent & possunt hæc talia, amœnitates, aut si vis, lasciuiæ ingeniorum: nec oderunt hos sales, qui salem ipsi habent. Ij sciunt, dicta à maledictis, & hæc à ma-

à maleficiis differre. At iste capitis etiam me anquirat, & (verba eius sunt) *crucem mereri hæc ait, crucem*. Credo sanè, sed eam, in quâ Cupido apud Poëtam adfixus, ioculari. Sed extra iocum, si quid in Epistolis illis nimium aut asperum est, quæso, è nostrâ mente molliatur: quam palàm testor nunquam fuisse ad lædendum. Verba quædam si ire videntur longius, reuocanda sunt, nec id me facere pudebit publicè, & vt sic dicam, in ipsis Rostris. Vtinam pectus hoc videant! niueum est, & fuit. Humida sunt illa & laplantia quædam verba, & nata non nisi in summo ore. Quid, quod in morbo nata? ille excuset. Querulum hoc genus, & præsertim nos, quos atra hæc bilis vexat: quæ cum exarsit, * *Εὐκαρέως κεν ἀπὸ αὐτῆς καὶ λυγρὸν ἀΐσται*, vt ait Poëta. Atqui Germanos etiam vniuersos læsimus, quibus *passim* (ita inquit) *tam stultè, quàm ferociter insulto*. Quæ frons tam infrunita hoc dicit? Ego Germanos? parentes illos maioresque nostros? Nam ita scio & sentio, nos Belgas plerosque origine illinc esse: & quanquam positu locisque Galli sumus, tamen stirpe & sanguine Saxones, & læti libentesque audimus INFERIORES GERMANI. Vbi igitur, aut cur læsi? Dicta & scripta mea excutiantur, latebra nusquam in quâ hæc calumnia delirescat. Quin contrà, diserta & exserta verba in laudem & elogia gentis, aliis inuidenda. Scripsi & edidi in commentario ad Germaniam Taciti: CANDIDAM GENTEM: & CASTVM ORBEM: & MAGNAM MEAM PATRIAM: & fastigium, si examinas, omnis laudis, PACE ET BELLO OPTIMAM GENTEM. Quæ vis magis honora, magis viuæ & spirantia verba? Tamen cumulaui, & ecce iterum ad Annalem Taciti decimumtertium, PUGNACISSIMA ET FIDELISSIMA GENS. Et in Epistolis: HOMINES ETIAM ILLA TELLVS (Germania) ALIT, INGENIO DOCTRINAQUE PARES NOBIS, FIDE ET VIRTUTE MELIORES. Ades liuor. Quis germanissimus Germanus potuit de matre suâ benignius? Nec vsquam læsa à me hæc pietas (ita loquor, & sentio:) nisi si quid ioculo in bibones quoddam, & vt hoc quoque ioco, * *κυλίκων ἐπέτας*. Sed ille non contentus hoc marè in me commouisse, Imperatorem ipsum con- citat, & postulat me Maiestatis. Ius, inquit, eius minuisti, in

* ab eâ facile vel lychnium accendere possis. Theocrit.

* Calicem remiges sine trabones. Apud Athen.

laureâ Poëtarum. O homo, nec per somnium in illo Somnio feci. Sed tu colligis, vt video, omnium sermonum aurulas, & iis vela tua ad calumniandum imples. Fuit res in inuidiâ aliquâ, fateor, recenti illo scripto: tracti in causam per eos qui iure læsi, etiam qui non læsi. Sed seorsum postquàm Epistolâ excusauì & aperui (exstat in Saturnalium nostrorum fronte:) omnis ista bilis soluta est in risum. Quid enim aliud schemate illo (non fanè scominate) volui, quàm quod verbum vetus: *Multos Thyrsiferos esse, paucos Bacchos?* Et hoc sciunt, & dolent illi ipsi, quos merito suo cinxit Phœbæa illa laurus. Ad Imperatorem quidem quid istud pertinet, si sint qui imponant & obrepant? Ego tantum abssum, vt lædere aut illudere voluerim Principum illum principem, sacrum caput Christiani orbis: vt contrà ab adolescentiâ cultum omnem venerationemque detulerim ipsi, & eius genti. TACITVS meus cum præfatione ad MAXIMILIANVM iuit Imperatoris huius Patrem: ELECTA ad Archiducem MATTHIAM eius fratrem: POLITICA nostra, ad HUNC IPSVM & Christianos reges. Cur non facerem? deberi mihi hæc & alia meliorum ingeniorum libamenta visa, domui ad summum fastigium genita, arcu & propugnaculo vnico in æternum illum hostem. Hæc sunt in vniuerso illo scripto, quæ digna reiectione aliquâ censui. nam reliqua sunt conuicia aut scommata insulsa, illepida, nata inter haras. Peponem habet loco cordis, quem ea delectent. Atque ego, quid me opponam? Spreta illa exolescent: & vt in omni alio certamine, qui vincit, coronatur; ita contrà hîc est, & accipit herbam, qui eam dedit. Nos scimus arbores quæ iuxta vias sunt, saxis & fustibus peti sæpius: & homines linguarum his telis, qui in limite melioris famæ. Non tamen ea nocent: imò iuuant. & vt frumentum triturâ folliculos exuit ac deponit: sic nos concussiunculis illis paleas, si fortè, vanitatum. quas nimis sæpe animis adhærescere è tractatione istâ litterarum non est negandum. Oraculum est, *Nimiâ gloriâ luxuriare, & evanescere viuida sæpe ingenia*. Interueniant igitur vtiliter hæc conuicia: & quod amicorum lenis spongia non cluit, deterat & defricet scaber hic lapis castigationum. Hæc nostra mens est, nec nunc solum, *cùm folia in me cadunt*, sed etiam *cùm arbores* (fiet, vt hoc æuam

Liu. III.

æuum est:) nec aliud , quàm Palladium illud scutum pecto-
ri appresserim , NON MOVERI. Miseri quid ad hoc scam-
ma producimur? quid luctatiunculis istis nobis volumus? Ecce
mors supra caput, & superum istud tribunal; vbi non scripta no-
stra examinanda sunt, sed facta. Sapiamus. Mihi quidem de-
inceps certum, Deum per maiorum vestigia constanter cole-
re, studia & ex iis famam non negligere, quatenus tamen ea vsui
Reip. esse possint, aut iuuentuti. Quòd si interea homines me
contemnant, aut incurrant, contemno: & cum Achille clamo,

Πρόναι δὲ τετιμῆσθαι Διὸς Δίον.

Ecce habes, mi Monau, longam, & pænè præter leges epi-
stolæ, epistolam: sed prouexit me res ipsa, & filium istud re-
sponsionum: tum etiam hæc causâ, quòd tibi homini Germa-
no, & inter eos claro, probare nostram causam voluerim: ma-
ximè duplicem, quæ ad gentem, & quæ ad Cæsarem: aman-
dam à me semper illam, & hunc colendum. Vtrumque factu-
rus sum Monau & tibi. Vale. Leodici, Nonis Ianuariis,

∞. IO. XCII.

EPIST. XCIX.

ABRAHAMO ORTELIO S. D.

EN mi Ortel, illam ad Monauium, quam legere te adeò
non veto, imò volo. Scripta per hanc occasionem est, &
quia quærebat ecquid in illum vellem? Scripta inquam, de ipsâ
re, & breuiter sed fortiter satis ad me purgandum. Reliqua no-
lui tangere, quæ in me ferè dirigit, & nihil ad ARAS FOCO S-
QVE PATRIOS: & ea ipsa cum glacie fragiliora sint, quid
insistam? Caue autem tu aut alius aliò me traxeris: longius non
ibo, *Si stimulos pugnis cedis, manibus plus dolet*, ait noster. Non alius
hîc fructus. In Busbequij morte, & tali morte, in animo meo
dolui. Seruatum hunc virum per tot discrimina, apud exteros,
apud barbaros, vt in limine ferè patriæ latronum manibus (ita
audimus) periret? Sed cum recogito, quacunque viâ illa venerit,
mors est: & paucis viris magnis contigit illa, quam Augustus op-
tabat & habuit, *εὐθυνασία*. Sed loco eius *εὐφροσύνη* contigit, & suauem
famam reliquit doctrinæ suæ, prudentiæ, probitatis. Nos quan-

c. 4.

do ad

Spero me
honoratum
fate Iouis
esse.
Homer.

do ad hunc portum? Magis appetimus, cum publica & priuata hæc naufragia videmus amicorum. Sed fiat quod Deo, & cum Deo, visum: cui parere, & velle quod ipse vult, summa non sapientia solum est, sed tranquillitas & quies. Vale mi Orteli. III. Idus Ianuar. ∞. IO. XCII.

EPIST. C.

ABRAHAMO ORTELIO S. D.

VIDI epistolam meam diuulgatam, & dolui, quocumque casu aut culpâ id factum. Serio loquor. Hôcne oportuit me inconsulto? & an sic oportuit solam? imò & corruptam? Nam immutata in eâ quædam aut omissa, quæ vel optimè à nobis dicta. Ego Monauio non quidem irascor (quî possum tam amico?) sed tamen subirascor, quòd passus sit exscribi ab hominibus, ut res docet, parum fidis. Atqui beniuoli illi mihi. Credo, sed an quisquam supra me? Vulnus ego meum optimè intelligo & sentio, atque vnâ medendi tempus. Sed enim edi merebatur. Quis præsumit sibi hoc iudicium? mihi debebatur: nec feram in parente, si viuat, ut hac in re non dicam plus me, sed aliquid sine me possit. Tamen factum est: quid ergo faciam? nisi illud

*Perpetiar,
tolerantem
animum
esto in pe-
ctore gestas.
Homer.*

Τλίσσομαι ἐν στήθεσσι ἔχων ὁλασπένθεα θυμὸν.

Vndique mihi materies ad Patientiam, & latus campus in quo exerceam hanc virtutem. Sed iterum dico, Monauio non irascor: quem PECCASSE pronunciare non possum, sed PARVM CAVISSE. Ego in posterum: etsi quî possum, nisi ut planè stilum coërceam & hanc manum? Vnum est quod me lenit aliquid & mitigat, quòd epistolæ eius me non pudet, & recitetur vel in theatro Europæ. Tamen exempli improbi res est, nec probus aliquis neget. Vale mi Orteli. Leodici, v. i. Kalend. Iul. ∞. IO. XCII.

F I N I S.

L. AP-

L. APPVLEIVS

I. *Floridorum.*

Hoc quoque genus inuenitur, qui meliores obtreſtare malint quàm imitari, & quorum ſimilitudinem desperent, eorundem adfectent ſimultatem: Scilicet vt qui ſuo nomine obſcuri ſunt, aliorum innotescant.

APPROBATIO.

Nihil continent hæ epistola fidei Catholica aduerſum, aut quod quemquam meritò offendant. Actum Bruxella, 4. Auguſti, 1592.

Cornelius Worzel. S. Th. Licentiatuſ,
D. Gud. Plebanuſ.

ANTVERPIÆ,
EX OFFICINA PLANTINIANA,
APVD IOANNEM MORETVM.

M. DCI.



